

## ପ୍ରେରିତ ଶିକ୍ଷ୍ୟମାନଙ୍କ କାର୍ଯ୍ୟର ବିବରଣୀ ପ୍ରେରିତ ସିସୁରି ପାଣିଦି ଇସାବ୍ ପ୍ରେରିତ ବଇ ବିସୟତାନ୍ ଏସ ମାଟା

ପ୍ରେରିତ ବଇ ଆଜିନାତ୍ ମଣ୍ଡଳିଦି ଆରାମ୍ ମାରି ଏଣ୍ଡେସ୍ ଇକା ଜିରୁସାଲୀମ୍‌ତାନ୍ ଜିହୁଦା, ସୋମରିୟା, ମାରି ଇତିରାଜିଦୁ ଝେଙ୍ଗ୍‌ତାତ୍, ଇକା ଜିସୁ ମୁସ୍କୁପୁରତୁ ସନି ଆଗ୍ତି ଝାନି ସିସୁରିଙ୍ଗ୍ ଇରଥା ମାର୍ହାନ୍ ୧:୮ । ଇକା ଲୁକଦି ମାଣାନ୍ ରାସାତାମାନାତ୍ ଏନ୍ କି ସୁସମାଚାର ଲୁକ ବା ରାସାତାମାର୍ହାନ୍, ଝାନ୍ ଅରେନ୍ ତାଲ୍ଲର୍ ମାରି ଏନ୍ କି ନେଗେନ୍‌ତାନ୍ ରାସାତା ଇର୍ତ୍ତା ମାର୍ହାନ୍ । ଝାନ୍ ଝାନି ସୁସମାଚାର ନି ପ୍ରେରିତ ବଇଦୁ ତିୟପିଲ, ଏନ୍ କି ଗ୍ରିକ୍ ଲୋକ୍ ମାର୍ହାନ୍, ଝାନି ବିସୟତାନ୍ ଝେର୍‌ସିନାନ୍ । ମାତର୍ ବଇଙ୍ଗ୍‌ବା ଆନାତ୍‌ସୁଗି କ୍ରିସ୍ଟାନ୍ ଲୋକାଙ୍ଗ୍ ମିସାକିଜି ଗ୍ରିକ୍ ଲୋକାଙ୍ଗ୍ ମାରି ଜିହୁଦି ଲୋକାଙ୍ଗ୍ ମାର୍ହାତ୍ ୧:୧ ।

ପ୍ରେରିତ ବଇ ୬୦-୬୪ ବାର୍ଷେକ୍ ଲୋଇ ଆନାତ୍‌ସୁଗି ରାସାତାମାନାତ୍ ଜିସୁ କ୍ରିସ୍ଟଦି ଜନମ୍ ଝେନ୍‌କା ଇରିଙ୍ଗ୍ ବଇ ପାଉଲତି ଜଇଲ୍‌ତାନ୍ ମୁକୁଡାନି ଆଗ୍ତି ବଇ ରାସାତିକା ଝିଜ୍‌ଜିନାତ୍ । ଲୁକ ବା ପାଉଲତି ଝାଲେ ସର୍‌ଆନ୍ ମାରି ଇୟା ବଇ ଆନାତ୍‌ସୁଗି ଆଣ୍ଟିୟକ୍ ଗାଡ୍‌ତୁ ରାସାତାମାନାତ୍ । ପ୍ରେରିତ ବଇ ଲୁକ ବଇ ରାସାତି ଝେନ୍‌କା ଝେନ୍‌କା ରାସାତାମାନାତ୍ ମାରି ଇକା ଜିସୁ କ୍ରିସ୍ଟଦି ମୁସ୍କୁପୁରତୁ ସନି ଝାଲେ ଆରାମ୍ ଆତାମାନାତ୍ । ଲୁକ ରାସ୍‌ନି ଉଦେସ୍ ଆଜିନାତ୍ ଏଣ୍ଡେସ୍ ସୁସମାଚାର ରାସ୍‌ତା ମାର୍ହାନ୍ ଆୟାଝାଜା ଇବେବା ରାସ୍‌ତାମାନାନ୍ । ଝାନ୍ ତିୟପିଲଙ୍ଗ୍ ବଦା କିତାନ୍ ଆୟା ଦାପେ ଦାପେ ପିରଜିମାନି କ୍ରିସ୍ଟାନ୍ ଲୋକୁ ଏଣ୍ଡେସ୍ କିଜି ଅଜାଦେଙ୍ଗ୍ ଆଟ୍‌ନାର୍ ମାରି ଝାନ୍ ଜିସୁ କ୍ରିସ୍ଟଦି ଜିବନ୍‌ତି ଟିକ୍ ଦାଡି ମାରି କ୍ରିସ୍ଟାନ୍ ପିରିନି ବିସୟତାନ୍ ରାସ୍‌ତାମାନାନ୍ ।

ପ୍ରେରିତ ବଇ ମାଙ୍ଗ୍ ପାର୍‌ତୁମ୍ ମଣ୍ଡଳିଦି ନେଗି ବିସୟ୍ ତରନାତ୍

ମାରି ଜିସୁ କ୍ରିସ୍ତଦିମାନୁ ବିସ୍ବାସତାନ୍ ଜିନିମାଡ଼ିନି ଉଣ୍ଡିଙ୍ଗ୍ ତରନାତ୍ ।  
ପ୍ରେରିତ ସିସୁର୍ ମାଙ୍ଗ୍ ନେଗି ସାରି ତରନାର୍ ଏଣ୍ଡେସ୍ କିଜି ପବିତ୍ର  
ଆମ୍ବାଦି ସାକ୍ତିଦାନ୍ ଆସା ଇଡ଼ଜି ଆଇ ଝାରିମାନୁ ସୁସମାଚାର ପ୍ରଚାର  
କିନିକା ।

### ଇୟା ବଇଦି ଏସ ମୁକିୟ ବିସୟ

୧. ସିସୁରି ମୁସକୁ ପବିତ୍ର ଆମ୍ବାଦି ରେତାନିକା ମାରି ମଣ୍ଡଲିଦି  
ପିରିନିକା । ୧:୧-୮:୧
୨. ମଣ୍ଡଲିଦି କାସ୍ତୁ ମାରି ଜିରୁସାଲାମ୍ ସାନ୍ଧି ସୁସମାଚାର  
ଝେଙ୍ଗ୍ ତାତ୍ । ୮:୨-୧୨:୨୩
୩. ପାଉଲତି ପାର୍ତୁମ୍ ସେବାକିନି ପାଣି । ୧୨:୨୪-୧୪:୨୮
୪. ପୁନି ବିସ୍ବାସସିରି ଉଣ୍ଡିଙ୍ଗ୍ ଇନିକା ଦରକାର ଜିରୁସାଲାମ୍ତି  
ମିଟିଙ୍ଗ୍ତୁ ନିଷ୍ପତି । ୧୫:୧-୩୫
୫. ପାଉଲତି ମାରିଉନ୍ତ୍ରଦେବା ସେବାକିନି ପାଣି । ୧୫:୩୬-  
୧୮:୨୨
୬. ପାଉଲତି ମୁନ୍ତ୍ରଦେବେଙ୍ଗ୍ ସେବାକିନି ପାଣି । ୧୮:୨୩-୨୦:୩୮
୭. ପାଉଲ ଜିରୁସାଲାମ୍ତୁ ତରତାର୍ । ୨୧-୨୭
୮. ପାଉଲତିଙ୍ଗ୍ ରୋମ୍ତୁ ପୋକ୍ତାର୍ । ୨୭-୨୮

### ପବିତ୍ର ଆମ୍ବାଦି ପାରାମାଣ୍

୧ ☆ ଏ ଲାଡ଼ତି ତିୟପିଲ,

ନା ପାର୍ତୁମ୍ ବଇଦୁ ଜିସୁ ଝାନି ପାଣି ଆରାମ୍ କିନି ଦିନ୍ତାନ୍  
ଆମାଞ୍ଜିଦୁ ପାଣି କିତାମାର୍ହାନ୍ ମାରି ସିକିୟା ସିତାମାର୍ହାନ୍, ଆୟାଞ୍ଜିଦୁ  
ବିସୟତାନ୍ ରାସ୍ତାମାର୍ହାନ୍ ।

୨ ମୁସକୁପୁର୍ ସନି ଆଗ୍ଡିନେ ଆମାଞ୍ଜାରିଙ୍ଗ୍ ଝାନ୍ ନିଜେଦି ସିସୁ  
ଝାଜା ଆସକିତା ମାର୍ହାନ୍, ଝାରିଙ୍ଗ୍ ଝାନ୍ ପବିତ୍ରାଆମ୍ବାଦି ସାକ୍ତିଦାନ୍  
ସିକିୟା ସିତାମାର୍ହାନ୍

୩ ନାସ୍ତିଝାଲେ ଝାନ୍ ଜିବନ୍ ମାର୍ହାନ୍, ଇକା ପାରାମାଣ୍ କିନି ଉଣ୍ଡିଙ୍ଗ୍  
ମାରି ସିସୁର୍ ନାମ୍‌ଇକା ଆକ କିନି ଉଣ୍ଡିଙ୍ଗ୍ ଝାନ୍ ଝାରି ସାତି ଝେନ୍‌କା  
ସାଲିସ୍ ଦିନ୍ ସାନ୍ଧି ଗାଦି ଦେବେଙ୍ଗ୍ ଝାରିଙ୍ଗ୍ ତରାୟା ଆତାମାର୍ହାନ୍

☆ ୧:୧ ଲୁକ ୧:୧-୪.

। ଝାର ଜିସୁଙ୍କୁ ସୁତୁଆମାର୍ହାର ମାରି ଜିସୁ ଝାରିଙ୍ଗ ମାପୁରୁଦି ରାଜି ବିସୟତାନ ଇର୍ହାନ ।

୪ ☆ ଝାର ଉନ୍ତେମାନୁ ମାନିଝାଲେ ଉଣିତିନିମାନୁ ଜିସୁ ଝାରିଙ୍ଗ ଇୟା ମାଟା ସିତାନ ଜିରୁସାଲାନ ଡିସସୋ ସଲ୍‌ମାଟ୍ । ମୁସକୁପୁରତି ବୁବା ମିଙ୍ଗ ଆମାକା ସିନାନ ଇଜି ପାର୍‌ମାଣ୍ କିତାମାନାନ ମାରି ଆମା ଦାନ ବିସୟତାନ ନାନ ମିଙ୍ଗ ଝେର୍‌ତାମାର୍‌ଆ, ଆକା ପଇନି ସାନ୍ଦି କାପକିଦୁ ।

୫ ☆ ଜୋହନ ଏରତୁ ତୁବନ୍ ସିତାନ, ମାତର୍ ଏସ ଉଣା ଦିନ୍ ଝେନ୍‌କା ମିର୍ ପବିତ୍ର ଆମାଦୁ ତୁବନ୍ ଆନିଦେର୍ ।

### ଜିସୁଦି ମୁସକୁପୁରସନିକା

୬ ଅର୍‌ଲେନ୍ ପ୍ରେରିତ ସିସୁର୍ ଉନ୍ତେମାନୁ ମାନିଝାଲେ ଜିସୁଙ୍କୁ ଝେନ୍‌ବାତାର୍, “ପ୍ରବୁ, ନିନ୍ ଇନିକା ଇଲେଇ ଇସ୍ରାଏଲରିଙ୍ଗ ଝାରି ରାଜି ଡେସି ସିନି ?”

୭ ଜିସୁ ଝାରିଙ୍ଗ ଇର୍ହାନ, “ଝେଡା ନି ଇଲେଇତିଙ୍ଗ ନା ବୁବା ଝାନି ଆଡଗି କିଜି ଇଟାମାନାନ । ଇୟାଞ୍ଜି ଏସକାଙ୍ଗ ଗଟାମାଟ୍, ମିର୍ ନେସ୍‌ଡେଙ୍ଗ ଦରକାର୍ ସିଲେ ।

୮ ☆ ମାତର୍ ମି ମୁସକୁ ପବିତ୍ରଆମା ରେତାତିଙ୍ଗ, ମିର୍ ସାକ୍ତିଦାନ ପୁରା ଆନିଦେର୍ ମାରି ଜିରୁସାଲାନ, ସାରାଞ୍ଜି ଜିହୁଦା ମାରି ସମିରୋଣ ମାରି ଦୁନିଆଦି ସାରାସାରିଇତି ସାନ୍ଦି ନା ଉଣ୍ଡିଙ୍ଗ ମିର୍ ସାକି ଆନିଦେର୍ ।”

୯ ☆ ଇକା ଝେର୍‌ତି ଝେନ୍‌କା ଜିସୁଙ୍କୁ ମୁସକୁପୁରତୁ ସନିକା ଝାର ସୁତୁଆର୍ ମାରି କାଣ୍ଡେକ୍ ବାଦ୍‌ଡତାନ ଝାନ ଝାରି କାଣାଗ୍‌ଦି ଆଗଡିରାନ ସାୟାମାୟା ଆତାନ ।

୧୦ ଝାନ ମୁସକୁ ସୋରି ଝେନ୍‌କା ବା ଝାର ତିର୍‌ତାନ ସୁତୁଡି ବାଦ୍‌ଡତିଙ୍ଗ ବେସସି ତେବାତାମାର୍ହାର । ଅଡିନିଆଙ୍ଗ ଆରାତିକାର୍ ରିଏର୍ ଲୋକୁ ଆୟାଦାପ୍ରେନେ ଝାରି ଲାକ୍‌ତୁ ଝାଜି,

☆ ୧:୪ ଲୁକ ୨୪:୪୯. ☆ ୧:୫ ମାତିଉ ୩:୧୧; ମାର୍କ ୧:୮; ଲୁକ ୩:୧୭; ଜୋହନ ୧:୩୩.

☆ ୧:୮ ମାତିଉ ୨୮:୧୯; ମାର୍କ ୧୭:୧୫; ଲୁକ ୨୪:୪୭, ୪୮. ☆ ୧:୯ ମାର୍କ ୧୭:୧୯; ଲୁକ ୨୪:୫୦, ୫୧.

୧୧ ନିର୍ହା ଇର୍ହାନ୍, “ଏ ଗାଲିଲିଦି ଲୋକୁ, ଏନ୍ଦା ଇବେନ୍ନୁ ନିର୍ଦେବ୍‌ନୋ ବାଦ୍‌ଡ଼ତିଙ୍ଗ୍ ବେସ୍‌ସିନିଦେବ୍ ? ଏ ଜିସୁ ମି ଲାକ୍‌ତୁରାନ୍ ସୋଲ୍‌ସି ମୁସ୍‌କୁପୁର୍‌ତୁ ଅତାର୍ । ମାତର୍ ଖାନ୍ ଆମା ଖାଜା ମୁସ୍‌ପୁର୍‌ତୁ ସନିକା ମିର୍ ସୁଡ଼ୁଦେବ୍, ଟିକ୍ ଆୟାଖାଜା ଖାନ୍ ମାରିଡେସି ଖାନାନ୍ ।”

### ଜିହୁଦାଦି ବାତି ପୁରା ଆନାଡ୍

୧୨ ତାନେଖେନ୍‌କା ପ୍ରେରିତ ସିସୁର୍ ଜିତ ଗରନ୍‌ତାନ୍ ଜିରୁସାଲମ୍‌ତୁ ଡେସି ସୋର୍ହାର୍ । ଜିତ ଗରନ୍ ଗାଡ଼୍‌ତାନ୍ ଉନ୍‌ଡେ କିଲମିଟର୍ ଆକ ମାର୍ହାଡ୍ ।

୧୩ ☆ଗାଡ଼ୁତୁ ସୋଲ୍‌ସି ଖାର୍ ତେବାଜିମାର୍‌ଇ ମୁସ୍‌କୁରି ବାକ୍‌ରାତୁ ଡଗ୍‌ଗିତାର୍ । ଆୟା ପ୍ରେରିତ ସିସୁର୍ ଆଜିନାର୍ ପିତର, ଜୋହନ, ଜାକୁବ, ଆନ୍ଦ୍ରିୟ, ପିଲିପ୍, ଥୋମା, ବାର୍ତ୍ତଲମି, ମାତିଉ, ଆଲପିଦି ମାରିନ୍ ଜାକୁବ, ଦେସ୍‌ଡିଙ୍ଗ୍‌ଜିବନ୍‌ନୋନି ସିମୋନ ମାରି ଜାକୁବଦି ମାରିନ୍ ଜିହୁଦା ।

୧୪ ଖାର୍ ବେଡାବେଡାତୁ ଉନ୍‌ଡେ ଦଲ୍ ଖାଜା ପାର୍‌ତାନା କିଦେଙ୍ଗ୍ ଉନ୍‌ଡେମାନୁ ଆଜିମାର୍‌ହାର୍ ମାରି ଖାରି ଖାଲେ ଜିସୁଦି ଆଇସି ମରିୟମ୍ ମାରି ଆଇ ଆଇମେକ୍ ମାରି ଜିସୁଦି ତଡାନ୍‌କୁ ବା ଉଣ୍ଡାଜି ମାର୍ହାର୍ ।

୧୫ ଏସ ଦିନ୍ ଖେନ୍‌କା ସଏକଡେ ଲୋକୁ ବିସ୍‌ବାସ୍‌ତି ତଡାନ୍‌କା ଉନ୍‌ଡି ପେରି ମିଟିଙ୍ଗ୍‌ତୁ ପିତର ନିଲ୍‌ତାନ୍‌ନୋ ଇର୍ହାନ୍

୧୬ “ତଡାନ୍‌କୁ ନି ତାଙ୍ଗ୍‌କି, ଆମା ଜିହୁଦା ଜିସୁଙ୍ଗ୍ ଆସ୍‌ତେଙ୍ଗ୍ ଇଜି ସାତୁରିଙ୍ଗ୍ ସାରି ତର୍‌ସି ଅତାମାର୍‌ହାନ୍, ଆୟା ବିସ୍‌ୟତାନ୍ ଦାଉଦ ପବିତ୍ରଆମ୍‌ଦି ମାଣାନ୍ ସାଲାଜି ବବିସ୍ୟତ ମାଟା ଖେରତା ମାର୍ହାନ୍ । ଦାର୍‌ମୁସାସ୍ତୁ ରାସ୍‌ତି ଆୟା ମାଟା ପୁରା ଆଦେଙ୍ଗ୍ ସଡ୍ ମାର୍ହାଡ୍ ।

୧୭ ମାରିବା ଜିହୁଦା ମା ଦଲ୍‌ତୁ ମାର୍‌ହାନ୍ ମାରି ମା ଅରେନ୍ ଅର୍‌ସେ ସେବା ପାଣି କିନି ଉଣ୍ଡିଙ୍ଗ୍ ଆସ୍‌କିଆତା ମାର୍‌ହାନ୍ ।”

୧୮ ☆ଖାନି ତାଗ୍‌ଇ ପାଣି ଉଣ୍ଡିଙ୍ଗ୍ ଜିହୁଦା ପୟ୍‌ତିମାନି ତାବୁଣାଙ୍ଗ୍ ଉନ୍‌ଡି ବୁମି କଡାୟା ଆତାମାର୍‌ହାଡ୍ ମାରି ଆୟା ବୁମିତୁ

ମେଡ଼େତାନ୍‌ନୋ ଖାନ୍ ସାତାନ୍ । ଖାନି ପଟା ପାତିଜି ସୋଲ୍‌ସି  
ଝାସ୍‌କିଙ୍ଗ୍ ସତେ ସର୍ଏ ।

୧୯ ଜିରୁସାଲାମତି ଗାଡ଼ତୁ ମାନି ଝିଜୁ ଲୋକୁ ଇୟାଝିଜୁ ନେସ୍‌ଡେଙ୍ଗ୍  
ଆର୍‌ସି ଖାରି ବାସାଦାନ୍ ଆୟା ବୁମିଦି ଦରୁ “ଆକେଲ ଦାମା” ଅର୍ତ୍ତାତ୍  
“ନେଡେର୍ ତି କିଡ଼ିଙ୍ଗ୍” ଇଜି ଇର୍‌ତାମାନାର୍ ।

୨୦ ଇୟା ବିସୟତାନ୍ ଗିତସଂହିତା ବଇଦୁ ରାସାତାମାନାଡ଼  
“ଖାନି ଇଲୁ ସିମା ଆପିଡ଼,  
ଆବେନ୍‌ ଏନ୍‌ ଡେବାମାକିର୍,  
ମାରି ବା ରାସାତାମାନାଡ଼;  
ଆଇକାନ୍‌ ଅରେନ୍‌ ଖାନି ପାଣିଦୁ ରାପିନ୍ ।”

୨୧ ☆ “ମାରି ପ୍ରବୁ ଜିସୁଦି ଡେସିନିଙ୍ଗ୍ ନି ବିସୟତାନ୍ ସାକି ଆଦେଙ୍ଗ୍  
ଇଜି ମାରି ଅରେନ୍‌ ମା ଖାଲେ ମିସାନିକା ଦରକାର୍ ।

୨୨ ଜିସୁ ଜୋହନତି ମାଣାନ୍ ତୁବନ୍‌ ଅତି ସମୟତାନ୍ ମୁସକୁ ସନି  
ସାନ୍‌ ଝିଜୁ ଖାଲେ ପ୍ରବୁ ଜିସୁ ମା ଖାଲେ ବୁଲାସାଲା କିନିଝାଲେ, ଏମେ  
ଲୋକୁ ମା, ଦଲ୍‌ତୁ ମାର୍‌ହାର୍‌ ଅରେନ୍‌ ଖାନିଙ୍ଗ୍ ଆସ୍‌କିଦେଙ୍ଗ୍ ଆନାଡ଼  
ଏମେ ଲୋକୁ ମା ଦଲ୍‌ତୁ ମାର୍‌ହାର୍‌, ଖାରି ଲୋଇରାନ୍‌ ଅରେନ୍‌ ଖାନିଙ୍ଗ୍  
ମାରିଡେସି ଇୟାଉଣ୍ଡିଙ୍ଗ୍ ଆସ୍‌କିଦେଙ୍ଗ୍ ଆନାଡ଼ ।”

୨୩ ଖାର୍‌ ରିଏରି ଦରୁ ଝେର୍‌ଡାର୍‌ ଜୋସେପ୍ ଏନ୍‌ ବର୍‌ସବା ମାରି  
ଜୁସ୍‌ସ୍‌ ଇଜି ବା ଇନାର୍‌ ମାରି ମତିୟ ।

୨୪ ମାରି ପାର୍‌ତନା କିଡାର୍‌, “ପ୍ରବୁ, ନିନ୍‌ ଝିଜୁ ସିନ୍ତା ନେସ୍‌ନି । ଇୟା  
ରିଏରି ଲୋଇ ଏଙ୍ଗ୍ ବାସେକିତିମାନି,

୨୫ ଇୟା ବେକ୍ତି ଜିହୁଦା ନିଜେଦିବାଡ଼ିଦୁ ସନି ଉଣ୍ଡିଙ୍ଗ୍ ଇୟା ଏମେ  
ସେବା ମାରି ପେରିତ ସିସୁ ପାଣି କିନାନ୍ ।”

୨୬ ତାନିଝେନ୍‌କା ରିଏରି ଲୋଇ ଅରେନ୍‌ ଖାନିଙ୍ଗ୍ ବାସ୍‌କିଦେଙ୍ଗ୍  
କୁଡ଼କୁଡ଼ି ପକ୍‌ଡାର୍‌ । ମାରି ମତିୟଦି ଦର୍‌ତାନ୍‌ କୁଡ଼କୁଡ଼ି ସତାଡ଼;  
ଆବେର୍‌ ଖାନ୍‌ ଏଗାର୍‌ ଲୋକୁ ସିସୁରି ଖାଲେ ମିସାତାନ୍ ।

☆ ୧:୨୧ ମାତିଉ ୩:୧୭; ମାର୍କ ୧:୯; ଲୁକ ୩:୨୧; ମାର୍କ ୧୭:୧୯; ଲୁକ ୨୪:୫୧.

## ୨

## ପବିତ୍ର ଆତ୍ମାଦି ଖାନିକା

<sup>୧</sup> ପେଣ୍ଟିକସ୍ ପଣ୍ଡି ନାଣ୍ଡିଙ୍କ କ୍ରିଷ୍ଣନ୍ ଲୋକୁ ଝିଜେରେ ଉଣ୍ଡେ\_  
ବାଡିଦୁ ଉଣ୍ଡାତା ମାର୍ହାର ।

<sup>୨</sup> ଆୟାଦାପ୍ରେନେ ନାଣ୍ଡି ଗାଲି ଖାନି ଆଉଲି ଖାଜା ବାଦଡ଼ତାନ୍  
ଉଣ୍ଡି\_ ବାଦଡ଼ତାନ୍ ଆଉଲି ଆତାଡ଼ ମାରି ଏମେ ଇଲ୍ଡୁ ଖାର  
ବାସ୍ତାମାର୍ହାର, ଆକା ଆୟା ଆଉଲିଦାନ୍ ପୁରା ଆତାଡ଼ ।

<sup>୩</sup> ତାନିଝେନ୍‌କା ଖାର ସୁଡ଼ତୁର, ଏସୋ ସିସୁ ଝେତଲ୍ ସାର୍ଜି ଆବେ  
ମାହ୍ ଝିଜେରିଙ୍କ ମୁଟ୍‌ତାଡ଼ ।

<sup>୪</sup> ଖାର ଝିଜେରେ ପବିତ୍ର ଆତ୍ମାଦୁ ପୁରା ଆତାର ମାରି ଆତ୍ମାଦାନ୍  
ସାଲାଜି ଆଇ ଆଇ ବାସାଦାନ୍ ମାଟା ଇଣ୍ଡେ\_ଙ୍କ ଆସ୍ତାର ।

<sup>୫</sup> ଦୁନିଆଦି ଝିଜୁ ଦେସ୍‌ତାନ୍ ଖାତିମାନି ଜିହୁଦି ଦାମ୍ ଲୋକୁ  
ଝିଜେରେ ଜିରୁସାଲାମ୍‌ତୁ ଉଣ୍ଡାତା ମାର୍ହାର ।

<sup>୬</sup> କୁରୁମ୍‌ତୁ ଆଜିମାନି ଆଉଲି ଝେନ୍‌ଜି, ନାଣ୍ଡି ଲୋକ୍ ଆବେ  
ଉଣ୍ଡାତାର । କ୍ରିସ୍ ବିସ୍‌ବାସ୍‌ସିର ଆବେ ଉଣ୍ଡାତିମାନି ଝିଜେରି  
ବାସାଦାନ୍ ମାଟା ଇଜିମାନିକା ଝେନ୍‌ଜି ଖାରି ମନ୍‌ତୁ କାବାନିକା  
ଖାତାଡ଼ ।

<sup>୭</sup> ମାରି, ଖାର କାବାଆଜି ମାରି ବେମ୍‌ରିଆଜି ଇନ୍‌ଡେଙ୍କ ଆସ୍ତାର,  
“ଇୟାଖାଜା ଖାରଗିଜିମାନି ଇୟା ଲୋକୁ ଇନିକା ଗାଲିଲିୟତିକାର  
ଆଏର୍ ?

<sup>୮</sup> ଆରିଙ୍କ ମାଡ଼ ଝିଜୁ ଏଣ୍ଡେସ୍ ଖାରିଙ୍କ ମା ନିଜେଦି ଜନମ୍‌ତି  
ବାସାଦାନ୍ ଖାରଗିଜିମାନିକା ଝେନ୍‌ଜିନାୟ ?

<sup>୯</sup> ମାଡ଼ ପାତ୍‌ୟ, ମାଦିୟ ମାରି ଏଲାମିୟ, ମାରି ମେସପଟାମିଆ,  
ଜିହୁଦା ଦେସ୍ ମାରି କାପ୍‌ପାଦକିଆ, ପନ୍ତ ମାରି ଆସିଆ,

<sup>୧୦</sup> ପୁଗିଆ ମାରି ପାମ୍‌ଲିଆ, ମିସର୍ ମାରି କୁରିଣି ଲାକ୍‌ତୁରି ଲିବିୟା  
ରାଜିପୁମାନିକାର । ମାବାଣ୍ଡକୁ ଏସୋ ଲୋକୁ ରୋମ୍‌ତାନ୍ ଖାତିମାନି  
ଜିହୁଦିର

<sup>୧୧</sup> ମାରି ଜିହୁଦି ଦାମ୍ ଆତିମାରଇ ଲୋକୁ; ମାରି ଏସୋ କ୍ରିତି ନି  
ଆରବିୟ ଦେସ୍‌ତି ଲୋକୁ । ମାରିବା ମାପୁରୁ ଏମେ କାବାଆନି ବିସୟ

ଓଁ କିତାମାନାନ୍, ଆୟା ବିସୟତାନ୍ ମାପ୍ ଓଁଜେରେ ଖାରିମାଣକୁ ମା  
ନିଜେ ନିଜେଦି ବାସାଦାନ୍ ଖେନ୍ଦେଞ୍ ଆର୍ସିନାପ୍ ।”

୧୭ କାବାନି ବେମ୍ରିଆଜି ଖାର ନିଜେ ନିଜେଦିମାନୁ ଖେନ୍ଦବାଦେଞ୍  
ଆସ୍ତାର୍, “ତେନି ଅର୍ତ୍ତ ଇନିକା ?”

୧୮ ମାତର୍ ଆଇକାର୍ ବିସ୍ବାସିରିଙ୍ ଖେକ୍ରିସ୍ କିଜି ଇର୍ହାର୍,  
“ଇୟା ଲୋକୁ ଅଙ୍ଗୁରରସ୍ ଉଣୁଜି ସସ୍ତା ମାନାର୍ ।”

### ପିତରତି ପ୍ରଚାର

୧୯ ତାନିଖେନକା ଆଇ ଏଗାର୍ ଲୋକୁ ପ୍ରେରିତ ସିସୁରି ଖାଲେ  
ପିତର୍ ନିଜ୍ଜି ନାଣ୍ ଆଉଲି ଆଜି ଇର୍ହାନ୍, ଏ ଜିହୁଦି ତଡାନ୍କୁ  
ତାଙ୍ଗ୍ ମାରି ଜିରୁସାଲମ୍ତୁ ବାସାତିମାନି ମଣ୍ଡଲି, ନା ମାଟା  
ନେଗେନ୍ତାନ୍ ଖେନ୍ଦୁ, ନାନ୍ ଇୟା ବିସୟତାନ୍ ବୁଜାକିଜି ଇନା ।

୨୦ ମିର୍ ଅଡ୍ବିଜିନିଦେର୍, ଇୟାକାର୍ ସହସ୍ତିକାର୍ । ସିଲେ,  
ଇୟାକାର୍ ସହସ୍ତିକାର୍ ଆଏର୍ । ଇରିଙ୍ ଇଲେଇ ଖେଡା ସାଲ୍ଦି  
ନୋ ଗଣ୍ଡା ।

୨୧ ମାତର୍ ବାବବାଦି ଜୟେଲ୍ ଏମେ ଗଟାନା ବିସୟତାନ୍  
ବବିସଡବାଣି ଇର୍ହାମାହାନ୍, ଆକା ଆୟାଖାଜା ଉନ୍ତ୍ର ଗଟନା;

୨୨ ମାପୁରୁ ଇନାନ୍; ଓଁଜିନି ଦିନକାଙ୍ ଇକା ଓଁଜୁ ଗଟନାଡ୍,  
ନାନ୍ ଓଁଜେରି ମୁସକୁ ନା ଆମ୍ବା ଖାକ୍ନା ସିନା ।

ମି କଡର୍ ନି ଆଇଲିକ୍ ବାବବାଦି କିନାର୍ ।

ମି ମୁରୁଲିର୍ ଦର୍ସନ ସୁଣାର୍,

ମାରି ନେଡାର୍ ଲବେର୍ ସୁଣାର୍ ।

୨୩ ହୁଁ ନା ଦାସକୁ ଅର୍ସେ ମେମାରି ନି ଆଇମେକା ମୁସକୁ,

ଆୟା ଦିନ୍ତୁ ନା ଆମ୍ବା ଖାକ୍ନା ସିନା,

ମାରି ଖାର ନା ବାକ୍ୟ ଖେର୍ନାର୍ ।

୨୪ ନାନ୍ ବାଦଡ୍ ମୁସକୁ କାବାଆନି ପାଣି

ମାରି ଆଡ୍ଗିରି ଦୁନିଆଦୁ କାବାଆନି ପାଣିତରନା ।

ନେତେର୍, ସିସୁ ମାରି ନାଣ୍ ଗଇଦାନ୍ ଦୁନିଆ ବର୍ତ୍ତ ଆନାଡ୍;

୨୫ ପ୍ରବୁଦି ପେରି ଗୌରବ୍ ଦିନ୍ତି ଖାନି ଆଗ୍ଡି

ଖେଡା ସିକାଟି ଆନାଡ୍

ମାରି ଲେଖୁ ନେତେର ଖାଜା ଆନାତ୍ ।

୨୧ ନାସ୍ତିଖାଲେ ଏନ୍ ପ୍ରବୁଦି ଦରତାନ୍ ପାରତନା କିନାନ୍, ଖାନ୍ ରକିୟା ପୟନାନ୍ ।

୨୨ ଏ ଇସ୍ରାଏଲ୍‌ତି ଲୋକୁ, ଇୟାଞ୍ଜିକୁ ମାଟା ଖେନ୍‌ତୁ ! ନାଶ୍ତି ସାକ୍ତିଦି ପାଣି ମାରି କାବାନି ସିନା ଦାନ୍ ନାଜରିୟତିୟ ଜିସୁଜେ ମାପୁରୁ ପକ୍ତିକାନ୍ ଇଜି ପାର୍‌ମାଣ୍ କିଆୟ ଆତାମାନାନ୍ ମାରି ମାପୁରୁ ସାକ୍ତି ପୁରାକିତିକାନ୍, ଇକା ମି ଲାକ୍‌ତୁ ସତ୍ ଆତାମାନାତ୍ । ମି ଲୋଇ ଇୟା ଇୟାଞ୍ଜିକୁ ଗଟନା ଗଟାତାତ୍, ଆଦେଙ୍ଗ୍ ଇୟା ବିସୟତାନ୍ ମିର୍ ନେଗେନ୍‌କିଜି ନେସ୍‌ତିମାନିଦେର୍ ।

୨୩ ☆ମାପୁରୁ ଖାନି ଉପାୟ ଇସାବ୍‌ତାନ୍ ଜିସୁଙ୍ଗ୍ ମି କିୟୁଦୁ ସର୍ପେ କିଦେଙ୍ଗ୍ ତିର୍ କିତାମାର୍‌ହାନ୍ । ମାରି ମିର୍ ଖାନିଙ୍ଗ୍ ପାପିଲୋକା ମାଣାନ୍ କୁସଦୁ ଏକିସ୍‌କିଜି ଡାକ୍ତି ମାର୍‌ଇଦେର୍ ।

୨୪ ☆ମାତର ମାପୁରୁ ଖାନିଙ୍ଗ୍ ସାନି ମାଣକୁ ଡିସିସକିଜି ମାରିତେସି ନିକ୍‌ତାନ୍, ଇରିଙ୍ଗ୍ ଖାନ୍ ସାତି ମାନ୍ ତରାୟାଜି ତେବାନିକା ଅସମ୍‌ବ ।

୨୫ ଦାଉଦ ଖାନି ବିସୟତାନ୍ ଇନାନ୍,  
“ଞ୍ଜିକୁ ସମୟତୁ ନାନ୍ ପ୍ରବୁଙ୍ଗ୍ ନା ଆଗ୍ତି ସୁଡ଼ୁଆନା,  
ଖାନ୍ ନା ତରିନ୍ ତେବାତାମାନାନ୍ । ଏନ୍ ନାଙ୍ଗ୍ ତିଲିସ୍  
କିଦେଙ୍ଗ୍ ଆର୍‌ଏନ୍ ।”

୨୬ ଆଦେଙ୍ଗ୍ ନା ଜିବନ୍ ଖେଡ଼ିକାଦୁ ପୁରାଆତାମାନା,  
ନା ଖେତଲ ଖେଡ଼ିକାଆଜି ନିଙ୍ଗ୍ ଜିନାତ୍ ।

ମାରିବା ନାନ୍ ସାନିକିୟା,  
ନା ପୁରା ମେନ୍‌ଲ୍ ଆସାଦୁ ତିର୍‌ତେବାନା,

୨୭ ଇରିଙ୍ଗ୍ ନିନ୍ ନାଙ୍ଗ୍ ସାନି ଦୁନିଆଦୁ ଡିସ୍‌ଇ;  
ନିନ୍ ନି ବିସ୍‌ବାସ୍‌ତି ଦାସ୍‌ତିଙ୍ଗ୍ ଦୁକିଗୁଟା ଲୋଇ ସାବ୍‌ଦେଙ୍ଗ୍  
ଇଜି ଡିସ୍‌ସୋ ସିଇ ।

୨୮ ନିନ୍ ନାଙ୍ଗ୍ ଜିବନ୍‌ତି ସାରି ତରତିମାନି  
ମାରି ନି ଲାକ୍‌ତୁତେବାନିକା ନାଙ୍ଗ୍ ଖେଡ଼ିକାଦୁ ପୁରାକିନାତ୍ ।

☆ ୨:୨୩ ମାତିଉ ୨୭:୩୫; ମାର୍କ ୧୫:୨୪; ଲୁକ ୨୩:୩୩; ଜୋହନ ୧୯:୧୮. ☆ ୨:୨୪  
ମାତିଉ ୨୮:୫,୬; ମାର୍କ ୧୬:୭; ଲୁକ ୨୪:୫.

୨୯ ଏ ନା ଇସ୍ରାଏଲିତ ଡଢ଼ାନ୍‌କୁ ନି ତାଙ୍ଗୁଁକ, ବୁଜାନିଝାଜା ନାନ୍ ମିଙ୍ଗୁଁ ମା ଡକ୍ରାଦାଦା ରାଜା ଦାଉଦତି ବିସୟତାନ୍ ଏସ ଇନ୍‌ଡ୍ରେଙ୍ଗ ଦରକାର୍ ମାନାଡ଼ ଇଜି ଅଡ଼ବିଜିନା । ଝାନ୍ ସିତିଙ୍ଗ ମୁସ୍‌ତାର୍, ମାରି ଝାନି ଦୁକିଗୁଟା ନେର୍ ସାନ୍ ଇବେ ମା ଲୋଇ ମାନାଡ଼ ।

୩୦ ଝାନ୍ ଅରେନ୍ ବାବବାଦି ମାର୍ହାନ୍, ଆଦେଙ୍ଗ ଝାନି ଉଣ୍ଡିଙ୍ଗ ମାପୁରୁଦି ଜିଦ୍ ମାଟା ନେସ୍‌ତାମାର୍ହାନ୍ । ଦାଉଦତି କୁଟୁମତି ଲୋଇ ଅରେନ୍ ଝାନିଙ୍ଗ ରାଜା କିନାନ୍ ଇଜି ମାପୁରୁ ପାର୍‌ମାଣ୍ କିତାମାର୍ହାନ୍ ।

୩୧ ମାପୁରୁ ଝାନିଦିନ୍‌ତୁ ଇନିକା କିଦେଙ୍ଗ ସଲ୍‌ସିନାନ୍, ଦାଉଦ ଆକା ନେସ୍‌ସି, କ୍ରସ୍ତ ଅର୍ତ୍ତାଡ଼ ମସିହଦି ମାରିଡ଼େସି ନିଙ୍ଗୁଁନି ବିସୟତାନ୍ ଇର୍ହାମାନାନ୍;

ଝାନ୍ ସାନି ଦୁନିଆଦୁ ଡିସାୟ ଆସତାନ୍ ।

ଝାନି ମେନ୍‌ଲୁ ଦୁକିଗୁଟା ଲୋଇ ସାବ୍‌ସତାଡ଼ ।

୩୨ ମାପୁରୁ ଇୟା ଜିସୁଙ୍ଗୁଁ ସାତିମାଣାନ୍ ମାରିଡ଼େସି ନିକ୍‌ତାମାନାନ୍ । ମାପୁ ଝିଜେରେ ତେନି ସାକି ।

୩୩ ଜିସୁ ଝାନି ବୁବା ମାପୁରୁଦି ଉଣେରି ତରିନ୍ ପେରାୟ ଆତାମାନାନ୍ ମାରି ବୁବାଦି ଜିଦ୍ ଇସାବ୍‌ତାନ୍ ଝାନିମାଣ୍‌କୁ ପବିତ୍ର ଆମ୍ବା ପୟତାମାନାନ୍ । ଇଲେଇ ମିର୍ ଆମାକା ସୁଡ଼ୁଜିନିଦେର୍ ମାରି ଝେନ୍‌ଜିନିଦେର୍, ଆକା ଝାନି ଦାନ୍ । ଆକା ଝାନ୍ ମା ମୁସ୍‌କୁ ଝାକ୍‌ତା ସିତାମାନାନ୍ ।

୩୪ ଦାଉଦ ନିଜେ ମୁସ୍‌କୁପୁରୁତୁ ସଲ୍‌ଏନ୍ ମାର୍ହାନ୍, ମାତର୍ ଝାନ୍ ଇର୍ହାନ୍,

ପ୍ରବୁ ନା ପ୍ରବୁଙ୍ଗୁଁ ଇର୍ହାନ୍,

୩୫ ନାନ୍ ନି ସାତୁରିଙ୍ଗ ନି ପାଦାମ୍ ଆଡ଼ଗି କିଇ ସାନ୍ତି ।

ନା ଉଣେରି ତରିନ୍ ବାସ୍‌ସ ମାନ୍‌ଆ ।

୩୬ “ମାରି ଇସ୍ରାଏଲିତ ଲୋକୁ ଝିଜେରେ ସଡ଼ତାନ୍ ନେସିର୍ ଜେ, ଇୟା ଏମେ ଜିସୁଙ୍ଗୁଁ ମିର୍ କ୍ରସ୍ତ ଏକିସ୍ କିତିଦେର୍, ମାପୁରୁ ଝାନିଙ୍ଗ ନେ ପ୍ରବୁ ନି କ୍ରସ୍ତ ଅର୍ତ୍ତାଡ଼ ମସିହ କିତାମାନାନ୍ ।”

୩୭ ଇୟାଞ୍ଜିଲ୍ ମାଟା ଝେନଜି ଖାରି ଜିବନ୍ ନାଣ୍ଡ କିଲିବିଲି ଆତାଡ଼ ମାରି ପିତର୍ ନି ଆଇ ପ୍ରେରିତ ସିସୁରିଙ୍ଗ୍ ଝେନବାତାର୍, “ତଡ଼ାନକୁ ମାପ୍ ଇନିକା କିନାପ୍ ?”

୩୮ ପିତର ଖାରିଙ୍ଗ୍ ଇର୍ହାନ୍, “ମିର୍ ଝିଜେରେ ପାପତାନ୍ ଡେସିଞ୍ଜାଜି ମି ପାପ୍ କେମା ଆନି ଉଣ୍ଡିଙ୍ଗ୍ ଜିସୁ କ୍ରିସ୍ତଦି ଦରତାନ୍ ହୁବନ୍ ଅଡୁ; ଆରଡିଙ୍ଗ୍ ମିର୍ ମାପୁରୁଦି ଦାନ୍ ପବିତ୍ର ଆମ୍ବା ପୟନିଦେର୍ ।

୩୯ ଇରିଙ୍ଗ୍ ମାପୁରୁଦି ପାରମାଣ୍ ମି ଉଣ୍ଡିଙ୍ଗ୍, ମି କଡ଼ରି ଉଣ୍ଡିଙ୍ଗ୍ ମାରି ପ୍ରବୁ, ମାପୁରୁଦି ମାଣାନ୍ କୁକାୟଆତି ଆକ ତେବାଜିମାନି ଝିଜେରି ଉଣ୍ଡିଙ୍ଗ୍ ଟିକ୍ ।”

୪୦ ପିତର ଖାରିଙ୍ଗ୍ ମାଡ଼ିସ୍କିଜି ମାରି ନାଣ୍ଡ ମାଟେଣାନ୍ ଖାରିଙ୍ଗ୍ ସାକି ସିଜି ଇର୍ହାନ୍, “ଇୟା ତାଗ୍ ଲୋକା ମୁସ୍କୁ ଖାନି ସାସ୍ତିଦାନ୍ ନିଜେ ନିଜେଦିଙ୍ଗ୍ ରକିୟା କିଦୁ ।”

୪୧ ଖାରି ଲୋଇ ନାଣ୍ଡ ଲୋକୁ ଖାନି ମାଟାଦୁ ବିସ୍ବାସ୍ କିଜି ହୁବନ୍ ଅତାର୍ । ଆୟା ନାଣ୍ଡିଙ୍ଗ୍ ତିନି ହାଜାର ଲୋକୁ ଦଲ୍ ହୁ ମିସାତାର୍ ।

୪୨ ଆୟାନାଣ୍ଡିରାନ୍ ସିସୁର୍ ଖାରିଙ୍ଗ୍ ସିକିୟା ସିତାର୍ । ମାରି ଖାର୍ ମିସାବିଡ୍ ଆତାର୍, ରୁଟି ରୁକ୍ତେଙ୍ଗ୍ ମାରି ପାର୍ତନା କିଦେଙ୍ଗ୍ ମୋନ୍ସିଜି ତେବାତାର୍ ।

### ବିସ୍ବାସି ଲୋକା ଲୋଇ ଜିନିକା

୪୩ ପ୍ରେରିତ ସିସୁର୍ ନାଣ୍ଡ କାବାଆନି ସିନେଙ୍ଗ୍ ମାରି କାବାଆନି ବିସୟ୍ କିତାନ୍ । ମାରି ଝିଜେରେ ଆବେନ୍ନୁ ତିଲାତା ସର୍ହାର୍ ।

୪୪ ✠ବିସ୍ବାସ୍ସିର୍ ଆପ୍ଣା ଆପ୍ଣାଦି ଖାଲେ ଉନ୍ତେମାନ୍ନୁ ମିସାତାର୍ ମାରି ମିସାଜି ଖାରି ଝିଜୁ ଦନ୍ ସିଜିସାଜି ଆତାର୍ ।

୪୫ ଖାର୍ ଆପ୍ଣା ଆପ୍ଣାଦି ମାନି ଦନ୍ତିଙ୍ଗ୍ ପର୍ଜି, ଡାରୁଙ୍ଗ୍ ଝିଜେରି ଦର୍କାର୍ ଇସାବତାନ୍ ନିଜେନିଜେ ଲୋଇ ବାଟା କିତାର୍ ।

୪୬ ଖାର୍ ଝିଜୁଦିନ୍ ପାର୍ତନାକିନି ମନ୍ଦିର୍ତୁ ଉନ୍ତେ ଦଲ୍ ଖାଜା ଉଣ୍ଡାଜି ମାହାର୍ ମାରି ଇଲ୍ଲକାଙ୍ଗ୍ ଇଲ୍ଲକାଙ୍ଗ୍ ରୁଟି ରୁକ୍ସି ଝେଡ଼ିକା ମନ୍ତାନ୍ ମାରି ନେଗି ଜିବନ୍ତାନ୍ ଉଣ୍ଡିଜିନିକା କିଜି,

୪୭ ମାପୁରୁଦି ଦନ୍ୟବାଦ୍ କିଜି ଝିଜେରେ ଲୋକା ଖାଲେ ନେଗି  
 ଝେଡ଼ିକା କିତାର । ମାରି ପ୍ରବୁ ରକିୟା ପୟନି ଲୋକାଙ୍ଗ୍ ଝିଜୁଦିନ୍  
 ଖାରି ଦଲ୍ଲତୁ ମିସା କିଦେଙ୍ଗ୍ ଆସ୍ତାନ ।

## ୩

### ଅରେନ୍ ସଟା ବିକାରି ନେଗେନ୍‌ଆତାନ

୧ ଅରେଲେନ୍ ପିତର ନି ଜୋହନ ପାର୍ତାନା ସମୟ ଝେଡ଼ାରେନି  
 ତିନଟାବୁ ମନ୍ଦିରତୁ ସଲ୍‌ସିମାହାନ ।

୨ ଆବେନ୍ “ସୁନ୍ଦର” ଦର୍ତ୍ତି ଦୁଆର ଲାକ୍‌ତୁ ଅରେନ୍ ଲୋକୁ  
 ମାହାନ । ଖାନ୍ ଜନମତାନ ସଟା । ମନ୍ଦିରତୁ ସଲ୍‌ସିମାନି  
 ଲୋକାମାଣ୍‌କୁ ଭିକିୟା ଲସ୍‌ତେଙ୍ଗ୍ ଇଜି ସବୁଦିନ୍ ଖାନ୍ ଦୁଆର  
 ଲାକ୍‌ତୁ ପିଣ୍ଡାୟାଜି ସଲ୍‌ସିମାହାନ ।

୩ ପିତର ନି ଜୋହନତିଙ୍ଗ୍ ମନ୍ଦିର ଲୋଇ ସନିକା ସୁଡ଼ୁଜି ଖାନ୍  
 ଖାରିଙ୍ଗ୍ ଭିକିୟା ଲସ୍‌ତାନ ।

୪ ପିତର ନି ଜୋହନ ଖାନିଙ୍ଗ୍ ସିଦା ବେସ୍‌ତାର ମାରି ପିତର ଇହାନ,  
 “ମା ତରିନ୍ ସୁଡ଼ୁଆ !”

୫ ଆବେଟ୍ ଖାନ୍ ଖାରିମାଣ୍‌କୁ ଏସ ପୟନି ଆସାଦାନ୍ ଖାରି ତରିନ୍  
 ବେସ୍‌ତାନ ।

୬ ମାତର ପିତର ଖାନିଙ୍ଗ୍ ଇହାନ, “ନା ଲାକ୍‌ତୁ ବାଙ୍ଗାଁରାମ୍ ମାରି  
 ଝେଣ୍ଡି ସିଲେଡ୍, ମାତର ଆମାକା ମାନାଡ୍, ନାନ୍ ନିଙ୍ଗ୍ ସିଜିନା :  
 ନାଜରିୟତିୟ ଜିସୁ କ୍ରିସ୍‌ତି ଦର୍ତ୍ତାନ ନାନ୍ ଆଦେସ୍ ସିଜିନା, ନିଙ୍ଗ୍‌ଜ  
 ବୁଲାଆ ।”

୭ ଇକା ଇଜି ଖାନ୍ ଖାନି ଉଶେରି କିୟୁ ଆସସି ନିକ୍‌ତାନ ।  
 ଆୟାଦାପ୍ରେ ଲୋକ୍‌ତି ପାଦାମ୍ ନି ସିରାଗାଟିଙ୍ଗ୍ ଝିଜୁ ବପୁ ଆଡେ ।

୮ ଖାନ୍ ତୁଲ୍‌ଜି ନିଙ୍ଗ୍‌ଜି ନିରୁଆନ୍ ମାରି ବୁଲାଦେଙ୍ଗ୍ ଆସ୍ତାନ ।  
 ତାନିଝେନକା ଖାନ୍ ବୁଲାବୁ ବୁଲାବୁ, ତୁଲ୍‌ବୁ ତୁଲ୍‌ବୁ ମାରି ମାପୁରୁଦି  
 ଦନ୍ୟବାଦ୍ କିବୁ କିବୁ ଖାରି ଖାଲେ ମନ୍ଦିରତୁ ସହାନ ।

୯ ଆବେଣି ଲୋକୁ ଖାନିଙ୍ଗ୍ ବୁଲାନିକା ନି ମାପୁରୁଦି ପ୍ରସଂସା କିନିକା  
 ସୁଡ଼ୁଡ଼ାର,

୧୦ ଖ୍ରୀଷ୍ଟ ମନ୍ଦିର ଦୁଆର ଲାକଡ଼ୁ ବାସ୍ତିମାରର ଭିକାରି ଇତି ସିନିସକିତାର ମାରି ଖ୍ରୀଷ୍ଟ ଉଣ୍ଡିଙ୍ଗ ଇନିକା ଗଟାତାମାହାଡ଼, ଖିଜୁ ନେସସି ଖାର କାବାନି ବେମ୍ବରି ଆତାର ।

### ପାରତନା ମନ୍ଦିରରୁ ପିତରୁତି ପ୍ରଚାର

୧୧ ଆୟାକାନ ପିତରୁ ନି ଜୋହନତି ଖାଲେ ସଲମନ୍ତି ଗୁଡ଼ିକାଲୁ ମାନିକା ସୁଡ଼ଜି ଲୋକୁ କାବାଆଜି ଲାକଡ଼ୁ ଉରୁକ୍ତାର ।

୧୨ ପିତରୁ ଖାରିଙ୍ଗ ସୁଡ଼ଜି ଇହାନ୍, ଏ ଇସ୍ରାଏଲ୍‌ତି ଲୋକୁ, ମିର୍ ଏନ୍ଦା ଇବେନ୍ କାବାଆଜି ମା ତରିନ୍ ଇୟାଖାଜା ବେସସି ମାନିଦେର୍ ? ମିର୍ ଇନିକା ଅଡ଼ବିଜିନିଦେର୍ ଜେ ମା ନିଜେ ସାକ୍ତିଦାନ୍ ନି ମା ଦାମ୍ବୁ ଉଣ୍ଡିଙ୍ଗ ମାପ୍ ଇୟା ଲୋକତି ବୁଲାନି ସାକ୍ତି ସିତାମାନାପ୍ ?

୧୩ ଅବ୍ରାହାମ, ଇସହାକ୍ ମାରି ଜାକୁବଦି ମାପୁରୁ, ମା ତକ୍ରାଦାଦାରି ମାପୁରୁ, ଖ୍ରୀଷ୍ଟ ଦାସ୍ ଜିସୁଙ୍ଗୁ ମାପୁରୁଦି ଦନ୍ୟବାଦ୍ ସିତାମାନାନ୍ । ମାତରୁ ମିର୍ ଖ୍ରୀଷ୍ଟ ଅଦିକାରିରି କିୟୁଦୁ ସର୍ପେ କିତିଦେର୍ । ଇୟାଖାଜାକି ପିଲାଡ଼ ରାଜା ଖ୍ରୀଷ୍ଟ ଡିସିସ୍ କିଦେଙ୍ଗ ତିର୍ କିତିମାରିଙ୍ଗ ବା, ଖ୍ରୀଷ୍ଟ ପିଲାଡ଼ ରାଜା ଆଗଡ଼ି ଅମାନ୍ୟ କିତିଦେର୍ ।

୧୪ ☆ଖ୍ରୀଷ୍ଟ ଅରେନ୍ ପବିତ୍ର ମାରି ଦାମ୍ବୁ ଲୋକୁ, ମାତରୁ ମିର୍ ଖ୍ରୀଷ୍ଟ ଅମାନ୍ୟ କିତିଦେର୍ ମାରି ଖ୍ରୀଷ୍ଟ ବାଦ୍‌ଲୁ ମିଙ୍ଗୁ ଦୟା ତରସି ଅରେନ୍ ନରକାଡ଼ିନିଖ୍ରୀଷ୍ଟ ଡିସିସ୍ କିଦେଙ୍ଗ ଇତି ପିଲାଡ଼ ରାଜେଙ୍ଗ ଇରୁଇଦେର୍ ।

୧୫ ଏନ୍ ଜିବନ୍ତି ସାରି ତରନିକାନ୍, ମିର୍ ଖ୍ରୀଷ୍ଟ ତାକ୍ତିଦେର୍; ମାତରୁ ମାପୁରୁ ଖ୍ରୀଷ୍ଟ ସାତିମାଣାନ୍ ମାରିଡେସି ନିକ୍ତାନ୍ । ମାପ୍ ତାନି ସାକ୍ତି ।

୧୬ ଖ୍ରୀଷ୍ଟ ଦରୁତି ସାକ୍ତି ନେ ଇୟା ସଟେଙ୍ଗ ନେଗେନ୍ କିତାମାନାଡ଼ । ଏମେ ଗଟନା ଇଲେଇ ମିର୍ ନିଜେ ସୁଡ଼ଜି ସଡ଼ ଇତି ନେସ୍ତିମାନିଦେର୍, ଆକା କେବଲ୍ ଖ୍ରୀଷ୍ଟ ଦରୁତାନ୍ ବିସ୍ବାସ୍ କିନି ଉଣ୍ଡିଙ୍ଗ ଆତାମାନାଡ଼ । ଜିସୁମାନୁ ବିସ୍ବାସ୍ କିନି ଉଣ୍ଡିଙ୍ଗ ଖ୍ରୀଷ୍ଟ ଜେ ନେଗେନ୍ ଆତାମାନାନ୍, ଇକା ମିର୍ ସୁଡ଼ଜିମାନିଦେର୍ ।

☆ ୩:୧୪ ମାତିଉ ୨୭:୧୫-୨୩; ମାର୍କ ୧୫:୬-୧୪; ଲୁକ ୨୩:୧୩-୨୩; ଜୋହନ ୧୯:୧୨-୧୫.

୧୭ “ମାରି ଇଲେଇ, ଏ ଇସ୍ରାଏଲ୍‌ତି ତତ୍ତାନ୍‌କୁ ନି ତାଙ୍ଗୁଁକ୍, ମିର୍ ମାରି ମି ନେତାର୍ ଜିସୁଦି ଉଣ୍ଡିଙ୍ ଆମାକା କିତିଦେର୍, ଆକା ନେସ୍‌ଏଣ୍ଡା କିତିମାନିଦେର୍, ଇକା ନାନ୍ ନେସନା ।

୧୮ ନାଣ୍ଡ ବାସେକ୍ ଆଗ୍ତି ଝିଜେରେ ବାବବାଦି ଝେୟୁଦୁ ମାପୁରୁ ଝେରତା ମାର୍ହାନ୍ ଜେ, କ୍ରିସ୍ତଙ୍ ଦୁକ୍‌ବଗାଦେଙ୍ ଆନାଡ୍ । ଇୟାଞ୍ଜା ଇଲେଇ ଆକା ସଡ୍ ଆତାମାନାଡ୍ ।

୧୯ ମାରି ଅନୁତାପ୍ କିଜି ମାପୁରୁ ତରିନ୍ ଡେସି ରାଦୁ । ଆରିଙ୍ ଝାନ୍ ମି ପାପ୍ କେମା କିନାନ୍ ।

୨୦ ମାରି ପ୍ରବୁଦି ମାଣାନ୍ ମିର୍ ଆମ୍ବିକ ସାକ୍ତି ପୟନିଦେର୍ । ମାପୁରୁ ମି ଉଣ୍ଡିଙ୍ ଆଗ୍ତିରାନ୍ ବାସେଆତିମାନି ମସିହ ଜିସୁଙ୍ ପକ୍‌ନାନ୍ ।

୨୧ ପୁର୍ବେକାଡାଦି ପବିତ୍ର ବାବବାଦି ମାଣ୍‌କୁ ମାପୁରୁ ଝେରତି ଇସାବତାନ୍ ଝିଜୁ ବିସୟତି ପୁନିକା ଆନି ସାନ୍ ଝାନ୍ ମୁସ୍‌କୁପୁରୁତୁ ତେବାନାନ୍ ।

୨୨ ଇୟା ବିସୟତାନ୍ ମୋସା ଇର୍ହାମାର୍ହାନ୍, ମି ପ୍ରବୁ ମାପୁରୁ ମି ତତ୍ତାନ୍‌କା ମାଣ୍‌କୁ ମି ଲାକ୍‌ତୁ ନା ନାନି ଅରେନ୍ ବାବବାଦିଙ୍ ପକ୍‌ନାନ୍ । ଝାନ୍ ମି ନିଜେ ଲୋକା ଲୋଇରାନ୍ ଅରେନ୍ ଆନାନ୍ । ଝାନ୍ ମିଙ୍ ଆମାକା ଇନାନ୍, ଆୟାଞ୍ଜି ବିସୟ ମିର୍ ମାନାନିକା ମାନାଡ୍ ।

୨୩ ଏନ୍ ଆୟା ବାବବାଦିଦି ବାକ୍ୟ ମାନାଏନ୍, ଝାନିଙ୍ ମାପୁରୁଦି ଲୋକାମାଣ୍‌କୁ ଝେରଏ କିଜି ନାସ୍ କିଆୟୁଆନାନ୍ ।

୨୪ ଇଲେଇ ଆମାକା ଗଟାଜିନାଡ୍, ଆୟା ବିସୟତାନ୍ ସାମୁଏଲ୍‌ତି ଝାଲେ ଝିଜେରେ ବାବବାଦିର୍ ମାଟା ପ୍ରଚାର୍ କିଜି ଇର୍ହାମାର୍ହାନ୍ ମାରି ଝାରି ଝେନ୍‌କାରି ବାବବାଦିର୍ ବା ଇୟା ବିସୟତାନ୍ ଝେରତା ମାର୍ହାନ୍ ।

୨୫ ବାବବାଦିରି ଝେୟୁଦୁ ମାପୁରୁ ଏମେ ଝିଜୁ ପ୍ରତିଜ୍ଞା କିତାମାନାନ୍, ଆକା ମି ଉଣ୍ଡିଙ୍ ଟିକ୍, ମାରି ମାପୁରୁ ମି ପୁର୍ବେଦିତକ୍‌ରାଦାଦାରି ଝାଲେ ଏମେ ନିୟମ୍ କିତାମାନାନ୍, ମିର୍ ଆବେଣି ବାଗ୍ତିକାର୍ । ମାପୁରୁ ଅବ୍ରାହାମ୍‌ତିଙ୍ ଇର୍ହାମାର୍ହାନ୍, ମି କୁରୁମ୍‌ତି ମାଣାନ୍ ନାନ୍ ଦୁନିଆଦି ଝିଜୁ ବାସାଦି ଲୋକାଙ୍ ଆସିର୍ବାଦ୍ କିନାପ୍ ।

୨୬ ଆଦେଙ୍ ମାପୁରୁ ଝାନି ଦାସ୍‌ତିଙ୍ ବାସେକିତାନ୍ ମାରି ମି ଝିଜେରିଙ୍ ତାଗ୍‌ଇ ସାରିଦାନ୍ ଡେସିଞ୍ଜାନି ଆସିର୍ବାଦ୍ ସିଦେଙ୍ ଇଜି

ଆଗୁଡ଼ି ଖାନିଙ୍ଗ ମି ଲାକ୍ତୁ ପକ୍ତାନ ।”

## ୪

ଜିହ୍ୱଦିର୍ ପେରି ମିଟିଙ୍ଗୁ ପିତର ନି ଜୋହନ

୧ ପିତର ନି ଜୋହନ ଲୋକାଙ୍ଗ ଇୟାଞ୍ଜା ସିକିୟା ସିଜିମାନି  
ଝାଲେ ମନ୍ଦିରତି ଏସ ଜାଜକର, ମନ୍ଦିରତି କାପକିନିଝାରି ପେରିକାନ  
ମାରି ଏସ ସାଦୁକିର ଝାଜି ଇତାର ।

୨ ଝାର ରିସା ଆତାମାର୍ହାର, ଇରିଙ୍ଗ ଜିସୁ ସାତିମାଣାନ ମାରିଡେସି  
ନିଙ୍ଗୁ ନି ଇଜି ରିଏର୍ ପ୍ରେରିତର ଲୋକାଙ୍ଗ ସିକିୟା ସିଜି, ଇବେଣାନ  
ସାତିକାର ମାରିଡେସି ନିଙ୍ଗୁନାର ଇଜି ପାରମାଣ କିଜିମାର୍ହାର ।

୩ ମାରି ଝାର ଝାରିଙ୍ଗ ତରତାର ମାରି ଆୟାନାଣ୍ଡିଙ୍ଗ ନାଣ୍ଡି ଝେଡ଼ା  
ଆତାମାର୍ହାଡ଼ଆକା ମାରିନାଣ୍ଡିଙ୍ଗ ସାନ୍ଦି ଝାରିଙ୍ଗ ଜଇଲ୍ତୁ ଇଟତାର ।

୪ ମାତର ଝାରି ସିକିୟା ଝେରଇମାହୁ ନାଣ୍ଡି ଲୋକୁ ଆବେନ୍ନୁ  
ବିସ୍ୱାସ କିତାର ମାରି ଝାରି ସଂଖ୍ୟା ପିରଜି ପାସ୍ ହାଜାର ଆତାଡ଼ ।

୫ ମାର୍ନାଣ୍ଡିଙ୍ଗ ଜିହ୍ୱଦି ନେତାର, ମନ୍ଦିରତି ଆଇନେତାର ମାରି  
ଦାର୍ମଗୁରୁର ଜିରୁସାଲାମତୁ ଉଣ୍ଡେ ମାନୁ ଉଣ୍ଡାତାର ।

୬ ଆବେନ୍ନୁ ଝିଜେରିଙ୍ଗ ପେରି ଜାଜକ ହାନାନା, କୟାପା, ଜୋହନ,  
ଆଲେକ୍ଜାଣ୍ଡର ମାରି ଝିଜେରିଙ୍ଗପେରି ଜାଜକରି ଇଲ୍ତି ଆଇ  
ଲୋକାଙ୍ଗ ମିସାତାର ।

୭ ସିସୁରିଙ୍ଗ ଝାରି ଆଗୁଡ଼ି ତାପିସ୍ କିଜି ଝେନ୍ବାତାର, “ମିର୍  
ଇୟାଞ୍ଜୁ ଏଣ୍ଡେସ୍ କିଜିନିଦେର ? ଏ ସାକ୍ତିଦାନ ବା ଏ ଦରତାନ ଇକା  
କିଜିନିଦେର ?”

୮ ଆବେଟ୍ ପିତର ପବିତ୍ର ଆମାନ୍ତୁ ପୁରା ଆଜି ଝାରିଙ୍ଗ ଇର୍ହାନ, “ଏ  
ଲୋକା ନେତାର ମାରି ପେରିକାର :

୯ ଜଦି ନେର ମାଙ୍ଗୁ ଇୟା ସଟା ଉଣ୍ଡିଙ୍ଗ କିତିମାନି ନେଗି ପାଣି  
ବିସ୍ମୟତାନ ମିର୍ ଝେନ୍ବାଜିନିଦେର ମାରି ଝାନ୍ ଏଣ୍ଡେସ୍ ନେଗେନ୍  
ଆତାନ ଇଜି ନେସ୍ତେଙ୍ଗ ବଦାକିଜିନିଦେର ।

୧୦ ଆବେଟ୍ ମିର୍ ମାରି ଇସ୍ରାଏଲ୍ତି ଝିଜେରେ ନେସ୍ନିକା ମାନାଡ଼  
ଜେ, ମି ଆଗୁଡ଼ି ନିରଇ ମାନି ଇୟା ଲୋକୁ କେବଲ୍ ନାଜରିୟତିୟ  
ଜିସୁ କ୍ରିସ୍ତଦି ଦରତି ସାକ୍ତିଦାନ ପୁରା ନେଗେନ୍ ଆତାମାନାନ । ଆୟା

ଜିସୁଙ୍କୁ ମିର କୁସଦୁ ଏକିସକିତି ମାରିଇଦେବ । ମାତର୍ ମାପୁରୁ  
ଝାନିଙ୍ଗ ସାତିମାଣାନ୍ ମାରିଡେସି ନିକ୍ତାନ୍ ।

୧୧ ଜିସୁଦି ବିସୟତାନ୍ ନେ ଦାମ୍ବୁସାସ୍ତ୍ରୁ ରାସାତାମାନାଡ୍,

“ଏମେ କାଲୁଦିଙ୍ଗ ଇଲୁ ତିଆର୍ କିନିକାର୍ ତିସ୍ତାର୍,

ମାତର୍ ଆୟା କାଲୁ ନେ କନାଦି ମୁଲ୍ କାଲୁ ଆତାଡ୍ ।

୧୨ କେବଲ୍ ଝାନି ମାଣାନ୍ ରକିୟା ପୟନିକା ଆନାଡ୍ । ସାରା ଦୁନିଆଦୁ  
ମାନି ଆଇ ଇନି ଦର୍ ମାଣାନ୍ ଲୋକୁ ରକିୟା ପୟଦେଙ୍ଗ୍ ଆବ୍‌ଏନ୍ ।”

୧୩ ପିତର ନି ଜୋହନ ପଡ଼ାଇକାର ମାରି ସାମାନତି ଲୋକୁ ଇଜି  
ପେରି ମିଟିଙ୍ଗ୍ ଜିସୁଦି ନେତାର ନେସ୍ତାମାହାର୍ । ଆଦେଙ୍ଗ୍ ଝାରି  
ସାସ୍ ସୁଡ଼ୁଜି ଝାର୍ କାବାଆତାର୍ । ମାରି ଝାର୍ ନେସ୍ତାମାହାର୍, ଆୟା  
ରିଏର୍ ଜିସୁଦି ଝାଲେ ମାହାର୍ ।

୧୪ ମାତର୍ ଝାର୍ ବିରୁଦ୍ କିଜି ଇନିକା ଇନ୍‌ଡ୍ରେଙ୍ଗ୍ ଆବ୍‌ଏତାର୍;  
ଇରିଙ୍ଗ୍ ଝାର୍ ନେଗେନ୍ ଆତିମାର୍‌ଇ ଲୋକ୍‌ତିଙ୍ଗ୍ ପିତର ନି ଜୋହନତି  
ଝାଲେ ନିରଇ ମାରିଇକା ସୁଡ଼ୁଡ଼ାର୍ ।

୧୫ ଆବେଟ୍ ଝାର୍ ସିସୁରିଙ୍ଗ୍ ମିଟିଙ୍ଗ୍ ଇଲ୍‌ତାନ୍ ସପ୍‌ସି ସିଜି ଝାରି  
ବିସୟତାନ୍ ନିଜେ ନିଜେମାନୁ ଝାର୍‌ଗିଦେଙ୍ଗ୍ ଆସତାର୍ ।

୧୬ ଝାର୍ ଇହାର୍, “ମାଡ୍ ଝେରି ଉଣ୍ଡିଙ୍ଗ୍ ଇନିକା କିନାଟ୍ ?” ଇକାର୍  
କିତିମାନି ଇୟା କାବାଆନି ପାଣି ବିସୟତାନ୍ ଜିରୁସାଲାମ୍‌ତି ଝିଜେରେ  
ନେସ୍ତା ମାନାର୍ । ତେନି ସଡ୍ ମାଡ୍ ମାରି ସିଲେ ଇନ୍‌ଡ୍ରେଙ୍ଗ୍  
ଆବ୍‌ଇକା ।

୧୭ ମାତର୍ ଇୟା ମାଟା ଏଣ୍ଡେସ୍ ଲୋକା ଲୋଇ ନାଣ୍ଡୁ ଝେଙ୍ଗ୍ ୱିଡ୍,  
ଜିସୁଦି ଦର୍ତ୍ତାନ୍ ମାରି ଏସାଙ୍ଗ୍ ଆମାଝାରି ଆଗ୍‌ଡି ଇନିକା ଇନ୍‌ଇ  
ଉଣ୍ଡିଙ୍ଗ୍ ଇୟାଝାରିଙ୍ଗ୍ ମାପ୍ ଜାଗାର୍‌ତା କିନା ସିନାଟ୍ ।

୧୮ ଆବେଟ୍ ଝାର୍ ପିତର ନି ଜୋହନତିଙ୍ଗ୍ ମାରିଡେସି ଲୋଇ  
କୁକିସ୍ କିତାର୍ ମାରି ଏସାଙ୍ଗ୍ ବା ଜିସୁଦି ଦର୍ତ୍ତାନ୍ ଇନି ମାଟା ଇନ୍‌ଇ  
ଉଣ୍ଡିଙ୍ଗ୍ ମାରି ସିକିୟା ସିଇ ଉଣ୍ଡିଙ୍ଗ୍ ଜାଗାର୍‌ତା କିତା ସିତାର୍ ।

୧୯ ମାତର୍ ପିତର ନି ଜୋହନ ଇହାର୍, “ମିଙ୍ଗ୍ ମାନାନିକା, ଅବା  
ମାପୁରୁଦିଙ୍ଗ୍ ମାନାନିକା ଏମେ ବିସୟ ମାପୁରୁଦି ଆଗ୍‌ଡି ଟିକ୍, ଆକା  
ମିର୍ ବିସାର୍ କିଦୁ ।

୨୦ ଇରିଙ୍ଗ ମାପ ଆମାକା ସୁଡ଼ତୁମାନାପ, ମାରି ଝେରଆମାନାପ, ଆୟା ବିସୟ ଇନ୍‌ଏଣ୍ଡା ତେବାଦେଙ୍ଗ ଆଟ୍‌ଏପ୍ ।”

୨୧ ମାତର୍ ଜିହ୍ୱଦିର୍ ପେରି ମିଟିଙ୍ଗ୍‌ତୁ ଲୋକୁ ଖାରିଙ୍ଗ୍ ମାରି ତାଟ୍‌ତାନ୍ ଆଦ୍‌ରିସ୍‌କିଜି ଡିସ୍‌ତା ସିତାର୍ । ଖାରିଙ୍ଗ୍ ଦଣ୍ଡ ସିନିକା ଆଏଡ୍ ଇଜି ଖାର୍ ନେସ୍‌ତେଙ୍ଗ୍ ଆଟ୍‌ତାର୍, ଇରିଙ୍ଗ୍ ଆୟାଗଟନା ଉଣ୍ଡିଙ୍ଗ୍ ଲୋକୁ ଝିଜେରେ ମାପୁରୁଦି ଦନ୍‌ସବାଦ୍ କିଜିମାର୍ହାର୍ ।

୨୨ ଏମେ ଲୋକୁ କାବା ଇସାବ୍‌ତାନ୍ ନେଗେନ୍ ଆତାମାର୍ହାନ୍, ଖାନି ବୟସ୍ ସାଲିସ୍ ବାର୍ସେକ୍‌ତାନ୍ ନାଣ୍ଡ ମାର୍ହାଡ୍ ।

### ବିସ୍‌ବାସିର୍ ସାହାସ୍ ପୟନି ଉଣ୍ଡିଙ୍ଗ୍ ପାର୍‌ତନା କିତାର୍

୨୩ ପିତର ନି ଜୋହନ ମୁକ୍‌ଡାତି ଦାପେ ଦାପେ ଖାରି ଦଲ୍‌ତୁ ଡେସି ସର୍ହାର୍ ମାରି ପେରି ଜାଜକର୍ ମାରି ନେତାର୍ ଆମାକା ଇର୍ହାମାର୍ହାର୍, ଆକା ଖାରିଙ୍ଗ୍ ଝେରତାନ୍ ।

୨୪ ବିସ୍‌ବାସିର୍ ଝିଜୁ ମାଟା ଝେରଇ ଝେନକା ଝିଜେରେ ଉଣ୍ଡାଜି ମାପୁରୁଦି ଲାକ୍‌ତୁ ଇୟା ପାର୍‌ତନା କିତାର୍, “ଏ ପ୍ରବୁ ! ମୁସ୍‌କୁପୁର, ଦୁନିଆଦୁ, ସାମ୍‌ଦୁର୍ ମାରି ଆବେମାନି ଝିଜୁ ବିସୟତି ତିଆରକିତିକନ୍ଦା !

୨୫ ପବିତ୍ର ଆମ୍‌ଦି ମାଣାନ୍ ନିନ୍ ମା ଡକ୍ରାଦାଦା ମାରି ନି ଦାସ୍ ଦାଉଦତି ଝେୟୁଦାନ୍ ଇୟା ମାଟା ଝେରତିମାହ୍,

“ଅଣଜିହ୍ୱଦିର୍ ଏନ୍ଦା ରିସା ଆତାର୍;

ଲୋକୁ ଏନ୍ଦା ଆର୍‌ତିତାନିଙ୍ଗ୍ ଉପାୟକିତାର୍ ?

୨୬ ପ୍ରବୁଦି ବିରଦ୍‌ତାନ୍ ମାରି ଖାନି କ୍ରିସ୍ତ ଅର୍ତ୍ତାଡ୍ ମସିହଦି ବିରଦ୍‌ତାନ୍ ଦୁନିଆଦି ରାଜାର୍ ନିଜେଦିଙ୍ଗ୍ ତିଆର କିତାର୍

ମାରି ସାସନ୍ କିନି ନେତାର୍ ଉଣ୍ଡାତାର୍,

୨୭ ☆ସଡ୍‌ତାନ୍ ଇୟା ଗାଡ୍‌ତୁ ହେରୋଦ ନି ପନ୍ତିୟ ପିଲାଡ୍ ରାଜା ଅଣଜିହ୍ୱଦି ମାରି ଇସ୍ରାଏଲ୍‌ତି ଲୋକା ଖାଲେ ମିସାଜି ମି ମାଣାନ୍ ବାସେଆତି କ୍ରିସ୍ତ ଅର୍ତ୍ତାଡ୍ ମସିହ, ମି ପବିତ୍ର ଦାସ୍ ଜିୟୁଙ୍ଗ୍ ବିରଦ୍ କିତାର୍ ।

☆ ୪:୨୭ ଲୁକ ୨୩:୭-୧୧; ମାତିଉ ୨୭:୧,୨; ମାର୍କ ୧୫:୧; ଲୁକ ୨୩:୧; ଜୋହନ ୧୮:୨୮,୨୯.

୨୮ ମି ସାକ୍ତି ମାରି ବଦା ଇସାବତାନ ଆମାକା ଓଡୁ ଗଟେଆନି ଉଣ୍ଡିଙ୍ଗ ମିର ଆସା କିତିମାରଇଦେର୍, ଝାର ଉଣ୍ଡାଜି ଆୟାଓଡୁ କିନି ଉଣ୍ଡିଙ୍ଗ ଲାଗେ ପଡେଆତାର ।

୨୯ ପ୍ରବୁ, ଇଲେଇ ଝାର ମାଙ୍ଗ ଏମେ ଆଦରିସ୍ କିତାମାନାର, ନିନ୍ ଆୟା ବିସୟତାନ ମନ୍ ସିଆ ମାରି ସାହାସତାନ ନି ବାକ୍ୟ ପ୍ରଚାର କିଦେଙ୍ଗ ଇଜି, ନି ଇୟା ଦାସ୍ରିଙ୍ଗ ସାକ୍ତି କିଆ ।

୩୦ ମାରି ନେଗେନ୍ କିଦେଙ୍ଗ ଇଜି ନି କିୟୁ ପେର୍ଆ ମାରି ନି ପବିତ୍ର ଦାସ୍ ଜିସୁଦି ଦର୍ତ୍ତାନ କାବାଆନିକା ମାରି କାବାଆନି ପାଣି କିଦେଙ୍ଗ ମାଙ୍ଗ ସାକ୍ତି ସିଦା ।”

୩୧ ଝାର ପାର୍ତନା ଓସ୍ତି ଝେନ୍କା ଏମେ ବାଡିବୁ ଉଣ୍ଡାତା ମାର୍ହାର, ଆକା ଦୁଙ୍ଗ ତା ସର୍ହାଡ । ଝାର ଓଜେରେ ପବିତ୍ରଆମାଦୁ ପୁରା ଆତାର ମାରି ସାହାସତାନ ମାପୁରୁଦି ବାକ୍ୟ ପ୍ରଚାର କିଦେଙ୍ଗ ଆସତାର ।

### ବିସ୍ବାସିର ନିଜେନିଜେଦି ଦନ୍ତୁ ମିସାତାର

୩୨ ☆ବିସ୍ବାସସି ଦଲ୍ ଉନ୍ତୁ ଜିବନ୍ ମାରି ଉନ୍ତୁ ମନ୍ ଆତାର । ଏନ୍ ନିଜେଦି ଦନ୍ତିଙ୍ଗ ନିଜେଦିକା ଇଜି ଦାବି କିଏଜିମାର୍ହାର, ମାତର୍ ଓଜେରି ଦନ୍ତିଙ୍ଗ ଝାର ସାମାନତାନ ବାଟାକିଜି ସିଜିସାତାର ।

୩୩ ନାଣ୍ଟ ସାକ୍ତିଦାନ ପ୍ରେରିତର ସିସୁର୍ ପ୍ରବୁ ଜିସୁଦି ମାରିଡେସି ନିଙ୍ଗ ନି ବିସୟତାନ ସାକ୍ତିୟ ସିତାର ମାରି ମାପୁରୁ ଝାରି ମୁସ୍କୁ ନାଣ୍ଟ ଆସିର୍ବାଦ୍ ସିତାନ ।

୩୪ ଝାରି ଦଲ୍ତୁ ଆମା ଲୋକୁ କାକୁତ ସିଲେତାନ । ଏମେଝାରି ବୁମି ମାରି ଇଲୁ ମାର୍ହାଡ, ଝାର ଆକା ପରସି ପରତି ଦନ୍ତି ତାବୁଙ୍ଗୁ ତାସି,

୩୫ ଝାର ସିସୁରି ପାଦାମ୍ ଆଡ୍ରି ଇଡ୍ଜିମାର୍ହାର । ମାରି ଆୟା ତାବୁଙ୍ଗୁ ଝାରି ଲୋଇ ଲୋକା ଦରକାର ଇସାବତାନ ବାଟା କିଜିମାର୍ହାର ।

୩୭ ସାଇପ୍ରସ୍ ଦରତି ବାଡ଼ିବୁ ଜନମ୍ ଆତିମାରଇ ଲେବି କରୁମତି ଜସେପ୍, ଆମାଞ୍ଜାନିଙ୍ଗ୍ ପ୍ରେରିତ ସିସୁର ବର୍ଣ୍ଣବା ଇଜି ଦର ଇଚ୍ଚାମାର୍ହାର, ବର୍ଣ୍ଣବାଦି ଅର୍ତ୍ତ “ଦୁଃକ୍ତୁ ଖେଡ଼ିକାସିନି ମାରିନ୍”

୩୮ ଖାନି ବୁମି ପରସି ଆବେଣି ତାବୁଙ୍ଗ୍ ତାସି ପ୍ରେରିତ ସିସୁରିଙ୍ଗ୍ ସିତାନ୍ ।

## ୫

### ହନନିୟ ନି ସପିରା

୧ ହନନିୟ ଦରତି ଅରେନ୍ ଲୋକୁ ମାରି ଖାନି ଆଡ଼ସି ସପିରା ତାମେ ଏସ ବୁମି ପରତାର ।

୨ ମାତର୍ ଆଡ଼ସି ମାଟା ଆସ୍‌ସି ହନନିୟ ପରତି ତାବୁଙ୍ଗ୍ ଏସ ନିଜେଦି ଉଣ୍ଡିଙ୍ଗ୍ ଇଡ଼ଜି, ଏଜିତିକା ପ୍ରେରିତ ସିସୁରିଙ୍ଗ୍ ସିତାର ।

୩ ପିତର୍ ଖାନିଙ୍ଗ୍ ଇର୍ହାନ୍, “ହନନିୟ, ନି ଜିବନ୍ ଡିଜୁ ଏନ୍ଦା ସୟତାନତି ଆଡ଼ଗି ଆଜି ବୁମି ପରଜି ପୟତିମାନି ତାବୁଙ୍ଗ୍ ଏସ ନିଜେଦି ଉଣ୍ଡିଙ୍ଗ୍ ଇଡ଼ଜି ପବିତ୍ର ଆମ୍ବାଦିଙ୍ଗ୍ ମିସ୍ ଇହ ?

୪ ଦନ୍ ପରନି ଆଗଡ଼ି ଆକା ନି ଅଦିକାର ମାର୍ହାଡ଼, ପରନି ଖେନ୍‌କା ବା ତାବୁଙ୍ଗ୍ ନିଦି ମାର୍ହାଡ଼, ଆରତିଙ୍ଗ୍ ନିନ୍ ଏନ୍ଦା ଇୟାଞ୍ଜା ପାଣି କିଦେଙ୍ଗ୍ ମୋନ୍ କିତି ? ନିନ୍ ଲୋକାଙ୍ଗ୍ ମିସ୍ ଖେରଇତି, ମାତର୍ ମାପୁରୁଙ୍ଗ୍ ମିସ୍ ଖେରତି ।”

୫ ହନନିୟ ଇୟା ମାଟା ଖେନି ଦାପ୍ରେ ଆଡ଼ଗି ଆରଜି ସାତାନ୍; ମାରି ଏମେକାର ଇୟା ମାଟା ଖେରଆର୍, ଖାର ଖିଜେରେ ନାଣ୍ଡ ତିଲାତାର ।

୬ ମାରି, ମୁରୁଲିର୍ ହନନିୟଦି ସାତି ମାଡ଼ାଦିଙ୍ଗ୍ ଖାଡ଼ିବୁ ତେରେପ୍‌ସି ଆଡ଼ରେ ଅତାର ମାରି ମୁସ୍‌ତାର ।

୭ ମାରି ମୁନ୍‌ଡ଼ି ଗନ୍‌ଟା ଖେନ୍‌କା ହନନିୟଦି ଆଡ଼ସି ଖାଜି ଇତାଡ଼ । ଖାଦ୍ ଇୟା ଗଟ୍‌ନା ବିସୟ ନେସ୍‌ଏଡ଼ ମାର୍ହାଡ଼ ।

୮ ପିତର ତାନିଙ୍ଗ୍ ଖେନ୍‌ବାତାନ୍, “ନାଙ୍ଗ୍ ଇନ୍‌ଆଁ, ନିନ୍ ମାରି ନି କନ୍‌ଲି ଆମା ବୁମି ପରତିଦେର୍, ଇକା ଇନିକା ତାନି ପୁରା ତାବୁଙ୍ଗ୍ ?”

ଖାଦ୍ ଇର୍ହାଡ଼, “ହୁଁ ।”

୯ ପିତର ତାନିଙ୍ଗ ଇର୍ହାନ, “ପ୍ରବୁଦି ଆମ୍ବଦିଙ୍ଗ ପରିକା କିଦେଙ୍ଗ ଇଜି ନିନ୍ ମାରି କନ୍ଲି ଏନ୍ଦା ବାସେ କିତିଦେର୍ ? ଏମେକାର୍ ନି କନ୍ଲିଙ୍ଗ ମୁସ୍ତାର୍, ଖାର୍ ଇଲେଇ ସେର୍ଲ୍ଲା ଲାକ୍ତୁ, ଖାର୍ ନିଙ୍ଗ୍ ବା ପିଣ୍ଡୁନା ଅନାର୍ ।”

୧୦ ଖେନି ଆୟାଦାପ୍ରେ ଖାଦ୍ ପିତରତି କାଲ୍‌କା ଲାକ୍ତୁ ଆର୍ଜି ସାତାଡ୍ । ମୁରୁଲିର୍ ଲୋଇ ଖାଜି ତାନି ସାତି ମାନିକା ସୁଡ୍‌ଜି ତାନିଙ୍ଗ୍ ପିଣ୍ଡୁଜି ଅତାର୍ ମାରି ତାନି କନ୍ଲିସିଦି ଗୁଟା ଲାକ୍ତୁ ତାନିଙ୍ଗ୍ ମୁସ୍ତାର୍ ।

୧୧ ମଣ୍ଡୁଲିଦି ପେରିକାର୍ ମାରି ଏମେକାର୍ ଇୟା ମାଟା ଖେର୍ଆର୍, ଝିଜେରେ ନାଣ୍ଡୁ ତିଲାତାର୍ ।

### କାବାଆନି ସିନା ମାରି କାବାଆନି ପାଣି

୧୨ ପ୍ରେରିତ ସିସୁରି ମାଣାନ୍ ଲୋକା ଲୋଇ ନାଣ୍ଡୁ କାବାଆନି ପାଣି ଆଜିମାର୍ହାର୍, ଝିଜେରେ ବିସ୍‌ବାସିର୍ ସଲମନ୍ତି ଗୁଡିକାଲ୍‌ତୁ ଉଣ୍ଡାଜି ମାର୍ହାର୍ ।

୧୩ ଖାରି ବିସ୍‌ୟତାନ୍ ଲୋକୁ ନେଗି ମାଟା ଇଜିମାର୍ହାର୍, ମାତର୍ ଦଲ୍ ଆଡ୍‌ରେ ମାନି ଲୋକୁ ଏନ୍ ଖାରି ଖାଲେ ମିସାଦେଙ୍ଗ୍ ସାସ୍ କିଏଜିମାର୍ହାର୍ ।

୧୪ ମାତର୍ ପ୍ରବୁମାନ୍ ବିସ୍‌ବାସ୍ କିଜିମାନି ନାଣ୍ଡୁ ଆଇମେକ୍ ନି ମେମାରିର୍ ଦଲ୍‌ତୁ ଡଗ୍ରିତାର୍ ମାରି ଆୟା ବିସ୍‌ବାସି ଦଲ୍ ଦିନ୍‌ଡିଙ୍ଗ୍ ଦିନ୍ ପିର୍‌ଦେଙ୍ଗ୍ ଆସ୍ତାର୍ ।

୧୫ ପ୍ରେରିତ ସିସୁରି ପାଣି ନାଣ୍ଡୁ ନେଗେନ୍ ଆତାଡ୍, ଇୟାଞ୍ଜାକି ପିତର୍ ବୁଲ୍‌ଜି ସନିଞ୍ଜାଲେ ଖାନି ନିଡ୍‌ଗା ଆର୍‌ଦେଙ୍ଗ୍ ଇଜି ଲୋକୁ ରୋଗିଲୋକାଙ୍ଗ୍ ପିଣ୍ଡୁଜିତାସି ସାର୍‌ଦୁ କାଟେଲ୍ ନି ଟାଟିଦୁ ତେର୍‌ପ୍‌ସି ମାର୍ହାର୍ ।

୧୬ ଜିରୁସାଲାମ୍‌ତି ଲାକ୍ତୁରି ଗାଡାକାଣ୍‌କୁ ଉନ୍‌ଡ୍ରି ପେରି ଲୋକୁ ମାନ୍ଦା ରଗ୍ ନି ଦୁବା ଆସ୍ତି ଲୋକାଙ୍ଗ୍ ତାସି ସିସୁରି ଲାକ୍ତୁ ତାସିମାର୍ହାର୍ ମାରି ଖାର୍ ଝିଜେରେ ନେଗେନ୍ ଆଜିମାର୍ହାର୍ ।

### ପ୍ରେରିତ ସିସୁର୍ କାସୁ ପୟ୍‌ନିକା

୧୭ ତାନିଞ୍ଜେନ୍‌କା ଝିଜେରିଙ୍ଗ୍ ପେରି ଜାଜକ ମାରି ଖାନି ପାଣିକିନିକାର୍ ନି ଲାକ୍ତୁରି ସାଦୁକି ଦଲ୍‌ତୀ ଲୋକୁ ପ୍ରେରିତ ସିସୁରି

ମୁସକୁ ନାଶ୍ରି ରିସା ଆଜି ଖାରି ବିରୁଦ୍ଧତାନ୍ ପାଣି କିଦେଙ୍ଗ ବାସେ କିତାର ।

୧୮ ଖାର ପ୍ରେରିତ ସିସୁରିଙ୍ଗ ତରସି ଇସି ଜଇଲ୍‌ତୁ ଇଟ୍‌ତାର ।

୧୯ ମାତର୍ ଆୟା ନାଡ଼ା ପ୍ରବୁଦି ଅରେନ୍ ଦୁଡ଼ ଜଇଲ୍‌ତି ସେର୍ଲା ରେତା ସିତାନ୍ ମାରି ପ୍ରେରିତ ସିସୁରିଙ୍ଗ ଡିସିସ୍‌କିଜି ଖାରିଙ୍ଗ ଇର୍ହାନ୍,

୨୦ “ସାନ୍‌ଡୁ, ମନ୍ଦିର୍‌ତୁ ନିଲ୍‌ସି ଲୋକାଙ୍ଗ ଇୟା ପୁନି ଜିବନ୍ ବିସୟତାନ୍ ଓଜୁ ମାଟା ଖେରୁଡୁ ।”

୨୧ ପ୍ରେରିତ ସିସୁର୍ ଖାନି ମାଟା ମାନାଜି ସାଲ୍‌ଦି ମନ୍ଦିର୍‌ତୁ ଡୁଗୁଜି ସିକିୟା ସିଦେଙ୍ଗ ଆସ୍‌ତାର ।

ଓଜେରିଙ୍ଗପେରି ଜାଜକ ନି ଖାନି ଖାନି ପାଣିକିନିକାର ପେରିମିଟିଙ୍ଗତି ଇନ୍‌ଡୁ ପୁରା ବାସିନି ଉଣ୍ଡିଙ୍ଗ ଇସ୍‌ଏଲ୍‌ତି ଓଜେରେ ଲୋକୁ ଜିହୁଦି ନେତାରିଙ୍ଗ କୁକିସ୍ କିଜି ତାତାର ମାରି ତାନିଝେନ୍‌କା ପ୍ରେରିତ ସିସୁରିଙ୍ଗ ଆୟା ମିଟିଙ୍ଗତୁ ତାତେଙ୍ଗ ଇଜି ପାଣିକିନିଖାରିଙ୍ଗ ଜଇଲ୍‌ତୁ ପୋକ୍‌ତାର ।

୨୨ ମାତର୍ ପାଣିକିନିକାର ଜଇଲ୍‌ତୁ ପ୍ରେରିତ ସିସୁରିଙ୍ଗ ପୟ୍‌ଏତାରୋ ଡେସି ଖାଜି ପେରି ମିଟିଙ୍ଗତୁ ଖେରୁଡାର,

୨୩ “ମାପ୍ ଜଇଲ୍‌ତୁ ଇତା ସୁଡ଼ତୁପ୍, ଜଇଲି ଆର୍‌ଝାଦାନ୍ କେରପାତା ମାନାଡ଼ ମାରି କାପ୍‌କିନିକାର ସେର୍ଲା ଆଗ୍‌ଡି କାପ୍‌କିଜିନାର, ମାତର୍ ସେର୍ଲା ରେତି ଝେନ୍‌କା ଲୋଇ ମାପ୍ ଏଙ୍ଗ ପୟ୍‌ଏତାପ୍ ।”

୨୪ ଇୟା ମାଟା ଝେନ୍‌ଜି ପେରି ଜାଜକ ନି ମନ୍ଦିର୍ କାପ୍‌କିନିଖାରି ଦାୟିତ୍‌ତୁ ମାନି ପାଣିକିନିକାନ୍ କାବାଆତାନ୍ । ପ୍ରେରିତ ସିସୁରିଙ୍ଗ ଉଣ୍ଡିଙ୍ଗ ଇନିକା ଗଟାତାମାନାଡ଼ ।

୨୫ ନାସ୍ତିଝାଲେ ଅରେନ୍ ଲୋକୁ ଖାଜି ଇର୍ହାନ୍, “ଝେନ୍‌ଶ୍ଟୁ...! ଏମେ ଲୋକାଙ୍ଗ ମିର୍ ଜଇଲ୍‌ତୁ ଇଟ୍‌ତିମାହ୍ ଦେର୍, ଖାର ମନ୍ଦିର୍‌ତୁ ଲୋକାଙ୍ଗ ସିକିୟା ସିଜିନାର ।”

୨୬ ମନ୍ଦିର୍‌ତି ପାଣିକିନିକାର କାପ୍‌କିନିଖାରି ଝାଲେ ସଲ୍‌ସି ପ୍ରେରିତ ସିସୁରିଙ୍ଗ ମାରିଡେସି ତାସି ଖାତାର । ଖାର ଏଣ୍ଡେସ୍ କିଜିବା ବପୁ ତିଗ୍‌ଏତାର, ଇରିଙ୍ଗ ଖାରି ତିଏଲ୍ ମାହାଡ଼ ଜେ ଲୋକୁ ଖାରି ମୁସକୁ କାଲ୍‌କୁ ତାକିନାର ।

୨୭ ୱାର ପ୍ରେରିତ ସିସୁରିଙ୍ଗ ଲୋଇ ଅସି ପେରିମିଟିଙ୍ଗ ଆଗଡ଼ି ନିଲ୍‌ପଡାର ମାରି ଝିଜେରିଙ୍ଗପେରି ଜାଜକ ୱାରିଙ୍ଗ ମାଟା ୱେନ୍‌ବାତାନ,

୨୮ ☆“ଇୟା ଲୋକ୍‌ତି ଦର୍‌ତାନ ଜନି ସିକିୟା ସିଇ ଉଣ୍ଡିଙ୍ଗ ମାପ୍ ତାଟ୍ ଆଦେସ୍ ସିତାମାର୍‌ହାପ୍, ମାତର୍ ସୁଡ଼ୁ, ମିର୍ ଜନିକା କିତିମାନିଦେର୍ ! ଜିରୁସାଲାମ୍‌ତି ଝିଜୁତରିନ୍ ମିର୍ ଇୟା ସିକିୟା ପ୍ରଚାର କିତିମାନିଦେର୍ ମାରି ୱାନି ନେତେର୍ ଉଣ୍ଡିଙ୍ଗ ମିର୍ ମାଙ୍ଗ୍ ଦସ୍ କିଦେଙ୍ଗ୍ ସେସ୍ଟା କିଜିନିଦେର୍ !”

୨୯ ପିତର୍ ନି ଆଇ ସିସୁର୍ ଇର୍‌ହାର୍, “ମାପ୍ ମାପୁରୁଙ୍ଗ୍ ମାନାନିକା ନେଗେଡ଼, ଲୋକାଙ୍ଗ୍ ସିଲେ ।

୩୦ ମିର୍ ଜିସୁଙ୍ଗ୍ କୁସଦୁ କୁଟିଙ୍ଗ୍ ତାକ୍‌ସିସାପିସ୍‌ତି ୱେନ୍‌କା, ମା ତକ୍ରାଦାଦାରି ମାପୁରୁ, ଜିସୁଙ୍ଗ୍ ସାତିମାଣାନ୍ ମାରିଡେସି ନିକ୍‌ତାମାନାନ୍ ।

୩୧ ଇସ୍ରାଏଲ୍‌ତି ଲୋକାଙ୍ଗ୍ ଏଡ଼କିଜି ମନ୍‌ତିଙ୍ଗ୍ ଡେପିସ୍ ପାପ୍ କେମା ପୟ୍‌ନି ସୁଜୋଗ ସିନି ଉଣ୍ଡିଙ୍ଗ୍ ମାପୁରୁ ୱାନିଙ୍ଗ୍ ନେତା ନି ରକିୟାକର୍ତ୍ତା ୱାଜା ନିକ୍‌ତାମାନାନ୍ ମାରି ୱାନି ଉଣ୍ଡେରି ତରିନ୍ ଇର୍‌ତାମାନାନ୍ ।

୩୨ ମାପ୍ ଇୟାଝିଜୁ ବିସୟ୍‌ତି ସାକି । ମାରି ଏମେ ପବିତ୍ର ଆମ୍ବାଦିଙ୍ଗ୍ ମାପୁରୁ ୱାନି ମାନାନିଝାରିଙ୍ଗ୍ ଦାନ୍ ସିତାମାନାନ୍, ୱାନ୍ ବା ତେନିସାକି ।”

୩୩ ପେରିମିଟିଙ୍ଗ୍‌ତି ଲୋକୁ ଇୟା ମାଟା ୱେନ୍‌ଜି ନିସା ରିସା ଆତାର୍ ଜେ, ୱାର ସିସୁରିଙ୍ଗ୍ ତାକ୍‌ତେଙ୍ଗ୍ ୱିଦା କିତାର୍ ।

୩୪ ମାତର୍ ୱାରି ଲୋଇ ଗମଲିଏଲ ଦର୍‌ତି ଅରେନ୍ ପେରି ପାରୁସି ଦାର୍‌ମୁଗୁରୁ ପେରିମିଟିଙ୍ଗ୍‌ତୁ ନିଲ୍‌ସି ପ୍ରେରିତ ସିସୁରିଙ୍ଗ୍ ଆଡ଼ରେ ଅତେଙ୍ଗ୍ ଇଜି ଆଦେସ୍ ସିତାନ୍,

୩୫ ପେରିମିଟିଙ୍ଗ୍‌ତି ଲୋକାଙ୍ଗ୍ ଇର୍‌ହାନ୍, “ଇସ୍ରାଏଲ୍‌ତି ଲୋକୁ, ଇୟା ଲୋକାଙ୍ଗ୍ ଉଣ୍ଡିଙ୍ଗ୍ ଆମାକା କିଦେଙ୍ଗ୍ ସଲ୍‌ସିନିଦେର୍, ଅଡ଼ପ୍ ଜାଗାର୍‌ତାଦାନ୍ କିନିଦେର୍ ।

୩୬ ମି ମନ୍‌ତୁ ତେବାତାଡ଼, ଏସ୍ ସମୟ୍ ଆଗଡ଼ି ତିହୁଦା ନିଜେଦିଙ୍ଗ୍ ଅରେନ୍ ପେରିଲୋକ୍ ଇଜି ଇର୍‌ହାନ୍, ମାରି ପାକାପାକି ଚାରିସ ଲୋକୁ

ଝାନି ଝାଲେ ମିସାତାମାର୍ହାର; ମାତର୍ ଝାନ୍ ସାତାନ୍, ଝାନି ଝାଲେ ବୁଲାନିକାର୍ ଜନିଙ୍ଗା ଆନିଙ୍ଗା ଆତାର୍ ମାରି ଝାନି ଦଲ୍ ମାର୍ଗିତା ସର୍ହାଡ଼ ।

୩୭ ତାନିଝେନ୍‌କା ଲୋକୁ ଲେକିସ୍‌ନି ଝେଡ଼ାଦୁ ଗାଲିଲିଦୁ ଜିହୁଦା ଦରତି ମାରି ଅରେନ୍ ଝାତାନ୍, ଝାନ୍ ବା ନାଣ୍ତ ଲୋକାଙ୍ଗ୍ ଝାନି ଦଲ୍‌ତୁ ମିସାକିତାନ୍ । ମାତର୍ ଝାନ୍ ବା ସାତାନ୍ ମାରି ଝାନି ଝାଲେ ବୁଲାନିକାର୍ ଜନିଙ୍ଗା ଆନିଙ୍ଗା ଆତାର୍ ।

୩୮ ଆବେଟ୍ ଇୟା ବିସୟତାନ୍ ଇୟା ଲୋକା ବିରଦ୍‌ତାନ୍ ଜନି ପାଣି କିଇ ଉଣ୍ଡିଙ୍ଗ୍ ନାନ୍ ମାଟା ସିଜିନା । ଝାରି ବିସୟତାନ୍ ମନ୍ ସିମାଟ୍ । ଝାରି ଉପାୟ ନି ପାଣିଦି ସନିକା ଜଦି ଲୋକା ମାଣ୍‌କୁ ଆନାମାନାଡ଼, ଆରିଙ୍ଗ୍ ତାନି ବିସୟ ମାର୍ଗନାଡ଼ ।

୩୯ ମାତର୍ ଜଦି ଆକା ମାପୁରୁ ମାଣ୍‌କୁ ଆନାମାନାଡ଼, ଆରିଙ୍ଗ୍ ଝାରିଙ୍ଗ୍ ଆରାକିନିକା ମି ଉସାସ୍ ସିଲେ । ଆନାଡ଼ ତରାନାଡ଼ ଜେ ମିର୍ ମାପୁରୁ ବିରଦ୍‌ତାନ୍ ଜୁଦ୍ କିତିମାନିଦେର୍ ।”

ପେରିମିଟିଙ୍ଗ୍ ଲୋକୁ ଗମଲିଏଲ୍‌ତି ମାଟା ମାନାତାର୍ ।

୪୦ ଝାର୍ ପ୍ରେରିତ ସିସୁରିଙ୍ଗ୍ ଲୋଇ କୁକ୍‌ସି, ଝାରିଙ୍ଗ୍ କର୍ତ୍ତା ତାକିସ୍‌କିତାର୍ ମାରି ଜିସୁଦି ଦରତାନ୍ ଜନି ମାଟା ଜନିଇ ଉଣ୍ଡିଙ୍ଗ୍ ଆଦେସ୍ ସିଜି ଡିସତା ସିତାର୍ ।

୪୧ ପ୍ରେରିତ ସିସୁର୍ ଝେଡ଼ିକାଦାନ୍ ପେରିମିଟିଙ୍ଗ୍‌ତାନ୍ ସତାସର୍‌ହାର୍, ଇରିଙ୍ଗ୍ ମାପୁରୁଦି ଆଗ୍‌ଡି ଝାର୍ ଜିସୁ ଉଣ୍ଡିଙ୍ଗ୍ ଅପମାନ୍ ପୟ୍‌ଦେଙ୍ଗ୍ ଇଜି ଜଗ୍ ଅଡ଼ବିତା ମାର୍ହାର୍ ।

୪୨ ମାରି ଝାର୍ ଦିନାମି ମନ୍‌ରିତୁ ମାରି ଲୋକା ଇଲ୍‌କାଙ୍ଗ୍ ା ମସିହ ଜିସୁଦି ବିସୟତାନ୍ ନେଗିକାରୁର୍ ପ୍ରଚାର୍ କିତାର୍ ମାରି ସିକିୟା ସିଦେଙ୍ଗ୍ ଆସତାର୍ ।



### ସାଡ଼ ଲୋକୁ ସେବାକିନିକାର୍

୧ ଏସ୍ ସମୟ ଝେନ୍‌କା ସିସୁରି ଦଲ୍ ପିର୍‌ନି ଦାପେ ଦାପେ ଏବ୍ରି ବାସାଦି ଜିହୁଦିର୍ ମାରି ଆବେ ମାନି ଜିହୁଦି ଲୋକା ଲୋଇ ଜାଟିଙ୍ଗ୍ ା ଆତାର୍ । ଦିନାମିଦି କାଦି କି ତାରୁଙ୍ଗ୍ ବାଟାକିନିଝାଲେ

ଝାରି ରାଣ୍ଡିଆଇମେକାଙ୍ଗ୍ ଓଁ ନେଗେନ୍ ସୁଡ଼ୁଜିନାର୍ ଇଜି ଗ୍ରିକ୍‌ବାସା  
ଝାରିଗିନି ଜିହୁଦିର୍ ଦାବି କିତାର୍ ।

<sup>୨</sup> ଆବେଟ୍ ବାର୍ ଲୋକୁ ପ୍ରେରିତ ସିସୁର୍ ଝିଜୁ ବିସ୍‌ବାସି ଦଲ୍‌ଡିଙ୍ଗ୍  
ଉଣ୍ଡା କିଜି ଇର୍ହାନ, “ତାବୁଙ୍ଗ୍ ସାଲାକିନି ଉଣ୍ଡିଙ୍ଗ୍ ମାପୁରୁଦି ବାକ୍ୟ  
ପ୍ରଚାର୍ କିଦେଙ୍ଗ୍ ଗାଡ଼ୟା ଆନିକା ମା ଉଣ୍ଡିଙ୍ଗ୍ ଟିକ୍ ସିଲେ ।

<sup>୩</sup> ଆଦେଙ୍ଗ୍ ଏ ତଡ଼ାନକୁ ନି ତାଙ୍ଗ୍ କି ମି ମାଣ୍‌କୁ ପବିତ୍ର ଆମ୍ବା ନି  
ବୁଦିଦୁ ପୁରା ଆତିମାନି ସାଡ଼ ଲୋକାଙ୍ଗ୍ ଆସକିଦୁ । ମାଡ଼ ଝାରିଙ୍ଗ୍  
ଇୟା ବିସ୍‌ୟତୁ ଦାୟିତ୍‌ ସିନାର୍ ।

<sup>୪</sup> ଆର୍‌ଡିଙ୍ଗ୍ ଓଁ ପାର୍‌ତନା ନି ପ୍ରଚାର୍ ସେବା ପାଣିଦୁ ମାଡ଼ ପୁରା  
ସମୟ ସିଦେଙ୍ଗ୍ ଆବ୍‌ନିକା ।”

<sup>୫</sup> ଦଲ୍‌ଡି ଝିଜେରେ ପ୍ରେରିତ ସିସୁରି ଇୟା ମାଟାଦୁ ଝେଡ଼ିକା  
ଆତାର୍ ମାରି ଇୟା ପାଣି ଉଣ୍ଡିଙ୍ଗ୍ ବିସ୍‌ବାସ୍ ନି ପବିତ୍ର ଆମ୍ବାଦୁ ପୁରା  
ଆତିମାନି ସ୍ତ୍ରୀପାନ୍ ଦର୍‌ଡି ଅରେନ୍ ଲୋକଡିଙ୍ଗ୍, ମାରି ପିଲିପପ,  
ପ୍ରକର, ନିକାନୋର, ତିମୋନ, ପାର୍‌ମନା ମାରି ଆର୍‌ଡି ଜିହୁଦି ଦର୍‌ମ୍‌ଦୁ  
ବାଦଲେ ଆତିମାର୍‌ଇ ଆଣ୍ଡିୟୋକତି ଅଣଜିହୁଦି ନିକୋଲାୟଡିଙ୍ଗ୍  
ଆସକିତାର୍ ।

<sup>୬</sup> ପ୍ରେରିତ ସିସୁର୍ ଇୟା ସାଡ଼ ଲୋକା ଉଣ୍ଡିଙ୍ଗ୍ ପାର୍‌ତନା କିଜି ଝାରି  
ମୁସକୁ କିକୁ ଇଟ୍‌ତାର୍ ।

<sup>୭</sup> ଇୟାଝାଜା ମାପୁରୁଦି ବାକ୍ୟ ପ୍ରଚାର୍ କିତାର୍ । ଜିରୁସାଲାମ୍‌ତୁ  
ସିସୁରି ଦଲ୍ ନାଣ୍‌ଦାନ ନାଣ୍ ପିର୍‌ଦେଙ୍ଗ୍ ଆସ୍‌ତାର୍; ନାଣ୍ ଜାଜକର୍  
ବା କ୍ରିସ୍‌ ବିସ୍‌ବାସ୍‌ସିର୍ ଆତାର୍ ।

### ସ୍ତ୍ରୀପାନ୍‌ଡିଙ୍ଗ୍ ତର୍‌ତାର୍

<sup>୮</sup> ମାପୁରୁମାଣାନ୍ ନାଣ୍‌ବାବେ ଆସିର୍‌ବାଦ୍ ପୟଜି ମାରି ସାକ୍ତିଦୁ ପୁରା  
ଆତିମାନି ସ୍ତ୍ରୀପାନ୍, ଲୋକା ଲୋଇ ନାଣ୍ ସିନା ନି କାବାଆନି ପାଣି  
କିତାନ୍ ।

<sup>୯</sup> ମାତର୍ କୁରିଣି ମାରି ଆଲେକ୍‌ଜାଣ୍ଡିଆ ତ୍ରୁଆଦି ଦାସ୍‌ପାଣିଦାନ୍  
ମୁକ୍‌ଡାତି ମାର୍‌ଇ ଜିହୁଦିରିଙ୍ଗ୍ ଓଁ ଅସି ତିଆର୍‌ଆତି ପାର୍‌ତନା ଇଲ୍‌ଦୁ  
ମାନି ଏସଲୋକ୍ ସ୍ତ୍ରୀପାନ୍‌ଡି ବିରୁଦ୍‌କିତାର୍ । ଝାର୍ ମାରି କିଲିକିୟା  
ନି ଆସିଆ ଦେସ୍‌ତି ଆଇ ଜିହୁଦିର୍ ସ୍ତ୍ରୀପାନ୍‌ଡି ଝାଲେ ଜାଟି କିଦେଙ୍ଗ୍  
ଆସ୍‌ତାର୍ ।

୧୦ ମାତର ପବିତ୍ର ଆତ୍ମା ସ୍ଥିପାନତିଙ୍କ ଇୟାଞ୍ଜାଲ ବୁଦି ସିତାତ୍ ଜେ, ଏନ୍ ଖାନି ବିରୁଦ୍ଧତାନ୍ ଖେରତେଙ୍କ ଆର୍ଏତାନ୍ ।

୧୧ ଆରତିଙ୍କୁ “ଖାନ୍ ମୋସାଦି ବିରୁଦ୍ଧତାନ୍ ମାରି ମାପୁରୁଦି ବିରୁଦ୍ଧତାନ୍ ମାଟା ଇଜିମାନିକା ମାପ୍ ଖେରଆପ୍,” ଇୟା ମିସ୍ ସାକି ସିନି ଉଣ୍ଡିଙ୍କୁ ଖାର ଏସ ଲୋକାଙ୍କୁ ଲାଟ୍ ସିଜି ପୁସେରେକିତାର୍ ।

୧୨ ଇୟାଞ୍ଜାଲ ଖାର ଲୋକାଙ୍କୁ, ଦାମ୍ ନେତାର୍ ମାରି ଗୁରୁରିଙ୍କୁ ଉଡ୍ଡତାର୍ ମାରି ସ୍ଥିପାନତିଙ୍କୁ ଆସ୍ସି ପେରିମିଟିଙ୍କୁ ଅତାର୍ ।

୧୩ ତାନିଝେନ୍‌କା ଖାର ଖାନି ବିରୁଦ୍ଧତାନ୍ ମିସ୍ ସାକି ସିଦେଙ୍କୁ ଇଜି ଏସ ଲୋକାଙ୍କୁ ଲୋଇ ତାତାର୍ । ଖାର ଇର୍ହାର୍, “ଇୟା ଲୋକୁ ଖିଜୁଦିନ୍ ମା ପବିତ୍ର ମନ୍ଦିର ନି ମୋସାଦି ନିୟମ୍ ବିରୁଦ୍ଧତାନ୍ ଖେରସିନାନ୍ ।

୧୪ ନାଜରିୟତିୟ ଜିସୁ ମନ୍ଦିରତିଙ୍କୁ ରୁକ୍ନା ପକ୍ନାନ୍ ମାରି ମୋସାଦି ମାଣାନ୍ ମାପ୍ ପୟତିମାନି ଖିଜୁ ରିତିନିତି ବାଦ୍‌ଲେ କିନା ଇଜି ଇୟା ଲୋକୁ ଇଜିମାନିକା ମାପ୍ ଖେରଆମାନାପ୍ !”

୧୫ ନାସ୍ତିଞ୍ଜାଲେ ଆବେନ୍ ବାସ୍ତିମାରଇ ଖିଜେରେ ଅରସେ ସ୍ଥିପାନତି ତରିନ୍ ସୁଡ୍‌ତୁର୍ ଜେ ଖାନି ମକମ୍ ମୁସ୍‌କୁପୁରତି ଦୁଡ୍‌ତି ମକମ୍‌ତି ଖାଜା ତରଜିମାର୍ହାପ୍ ।



### ସ୍ଥିପାନତି ପ୍ରଚାର୍

୧ ଖିଜେରିଙ୍କୁ ପେରି ଜାଜକ ସ୍ଥିପାନତିଙ୍କୁ ଖେନ୍‌ବାତାନ୍, “ଇକା ଇନିକା ସଡ୍ ?”

୨ ସ୍ଥିପାନ ଇର୍ହାନ୍, ଏ ନା ତଡ୍‌ତାନ୍‌କୁ ନି ବୁବାର୍, ଖେନ୍‌ଡୁ ! ମା ତକ୍ରାଦାଦା ଅବ୍ରାହାମ ହାରୋଣ୍‌ଦୁ ବାସାଦେଙ୍କୁ ସନି ଆଗ୍ତି ଗୌରବ୍‌ତି ମାପୁରୁ ମେସପଟାମିଆଦୁ ତରାୟାଜି,

୩ ମି ଇଲୁତିଲୋକୁ ମାରି ଦେସ୍ ଡିସ୍‌ସି ନାନ୍ ଏମେ ଦେସ୍ ତରନା, ଆବେ ସାଙ୍ଗ୍‌ଆ ।

୪ ଆବେଟ୍ ଖାନ୍ ଖାନି କଲଦୀୟ ଦେସ୍ ଡିସ୍‌ସି ହାରୋଣ୍‌ଦୁ ବାସାଦେଙ୍କୁ ସର୍ହାନ୍ । ଅବ୍ରାହାମତି ବୁବାସି ସାତି ଖେନ୍‌କା ମିର୍

ଇଲେଇ ଆମା ଦେସତୁ ବାସାଜିନିଦେର, ମାପୁରୁ ଖାନିଙ୍ଗ ଆୟା ଦେସତୁ ତାତାନ ।

<sup>୫</sup> ମାପୁରୁ ନାସ୍ତିଖାଲେ ଅବ୍ରାହାମତି ଇୟା ଦେସତୁ ଜନି ଦନ୍, ଇୟାଖାଜା ଜେ କାଣ୍ଡେକ୍ ମୁରା ବୁମି ବା ସିଏନ୍ ମାର୍ହାନ୍ । ମାତର୍ ମାପୁରୁ ପାରମାଣ୍ କିତାମାର୍ହାନ୍, ଅବ୍ରାହାମତିଙ୍ଗ ଇୟା ଦେସ୍ ସିନାନ୍ ମାରି ଇକା ଖାନି ନି ଖାନି କୁଟୁମ୍ବତି ନିଜେତିକା ଆଜି ତେବାନାଡ୍ । ମାପୁରୁ ଆୟା ପାରମାଣ୍ କିନିଖାଲେ ଅବ୍ରାହାମତିଙ୍ଗ କଡକକରା ଆଏନ୍ ମାର୍ହାନ୍ ।

<sup>୬</sup> ନାସ୍ତିଖାଲେ ମାପୁରୁ ଖାନିଙ୍ଗ ଇୟା ମାଟା ଇର୍ହାନ୍ ! ମି କୁଟୁମ୍ବତିକାର ଦାସ୍ତି ଖାଜା ଆଇ ଦେସତୁ ବାସାନାର୍ ମାରି ସାରିସ ବାସେକ୍ ସାନ୍ଦି କାଷ୍ଟୁ ପୁୟନାର୍ ।

<sup>୭</sup> ମାତର୍ ମାପୁରୁ ଇର୍ହାନ୍, ଖାର୍ ଏମେଖାରି ସେବା କିନାର୍, ନାନ୍ ଆୟା ଲୋକା ବିସାର୍ କିନାପ୍, ଝେନ୍କା ମି କୁଟୁମ୍ବତିକାର ଆୟା ଦେସ୍ତାନ ସନା ଖାନାର୍ ମାରି ଇୟା ବାଡିଦୁ ନା ପାର୍ତନା କିନାର୍ ।

<sup>୮</sup> ଝେନ୍କା ମାପୁରୁ ଅବ୍ରାହାମତି ଖାଲେ ପାରମାଣ୍ ସିନା ଖାଜା ସୁନ୍ନତ୍ ନିୟମ୍ ତିଆର୍ କିତାନ୍ । ଆବେର୍ ଖାନି ମାରିସି ଇସହାକ୍ତି ଜନମତି ଉଣ୍ଡି ସାତା ଝେନ୍କା ଅବ୍ରାହାମ ଖାନି ସୁନ୍ନତ୍ କିତାନ୍; ଇସହାକ୍ ଖାନି ମାରିସି ଜାକୁବଙ୍ଗ୍ ମାରି ଜାକୁବ୍ ଖାନି ବାର ମାରିସିରିଙ୍ଗ୍ ଅର୍ତାଡ୍ ମା ଜାତିଦି ଝେଙ୍ଗ୍ତି ଡକ୍ରାଦାଦାରିଙ୍ଗ୍ ସୁନ୍ନତ୍ କିତାନ୍ ।

<sup>୯</sup> ଜାକୁବଦି ମାରିସିର୍ ଖାରି ତଡାନ୍ ଜୋସେପ୍ ଉଣ୍ଡିଙ୍ଗ୍ ରିସାଆଜି ଖାନିଙ୍ଗ୍ ମିସର୍ ଦେସତୁ କଟିସାକର୍ ଖାଜା ପର୍ତାର୍ । ମାତର୍ ମାପୁରୁ ଜସେପ୍ତି ଖାଲେ ମାର୍ହାନ୍ ।

<sup>୧୦</sup> ମାରି ଝିଜୁ ଦୁକୁ କାସୁଦି ଖାଲେ ଖାନିଙ୍ଗ୍ ସାଲା କିତାନ୍ । ଏସ୍ତିଖାଲେ ଜସେପ୍ ମିସର୍ତି ରାଜା ଫାରୋଦି ଆଗ୍ତି ଖାତାନ୍, ମାପୁରୁ ଖାନିଙ୍ଗ୍ ଦୟା ନି ବୁଦି ସିତାନ୍ ମାରି ରାଜା ଜସେପ୍ତିଙ୍ଗ୍ ଦେସ୍ତି ସାସନ୍କିନିକାନ୍ ନି ରାଜା ମେଡ୍ତି ପେରିକାନ୍ ଖାଜା ଆସକିତାନ୍ ।

<sup>୧୧</sup> ତାନିଝେନ୍କା ଝିଜୁ ମିସର୍ ମାରି କିଣାନ୍ତୁ ଉଣିକା

ପୁରୁଷତାତ୍‌ଆକା ଲୋକୁ ନାଶ୍ଟ କାସ୍ତୁ ପୟତାର । ମା ତକ୍ରାଦାଦାରି  
କାଦିଦି ଉଣା ଆତାତ୍ ।

୧୨ ମିସର୍ ଦେସ୍ତୁ କାଦି ମାନାତ୍ ଇଜି ଝେନ୍‌ଜି ଜାକୁବ୍ ଝାନି  
ମାରିସିରିଙ୍ଗ୍ ଅର୍ତ୍ତାତ୍ ମା ତକ୍ରାଦାଦାରିଙ୍ଗ୍ ଆବେ ପକ୍‌ତାନ୍ ।

୧୩ ଆବେ ଝାର୍ ରିଜା ସନି ଝାଲେ ଜୋସେପ୍ ଝାନି ତଡ଼ାନକୁ ମାନୁ  
ନିଜେଦି ପରିଚୟ ଝେରତାନ୍ ମାରି ଫାରୋ ରାଜା ଜସେପ୍‌ତି ଇଲୁ  
ବିସୟତାନ୍ ନେସ୍‌ତାନ୍ ।

୧୪ ତାନି ଝେନ୍‌କା ଜୋସେପ୍ ଝାନି ବୁବାସି ଜାକୁବ୍ ନି ଝାନି ଇଲୁଦି  
ଝିଜେରେ ସତୁରି ପାସ୍ ଲୋକାଙ୍ଗ୍ ମିସର୍ ଦେସ୍ତୁ ଝାଦେଙ୍ଗ୍ ଇଜି  
କୁକ୍‌ତାନ୍ ।

୧୫ ଜାକୁବ୍ ମିସର୍ ଦେସ୍ତୁ ସର୍ହାନ୍, ଆବେ ଝାନ୍ ମାରି ଝାନି  
ମାରିସିରି ସାତାର୍ ।

୧୬ ଝାରି ସାତି ମାଡ଼ା ସିକିମ୍‌ତୁ ଅତାର୍ ମାରି ଅବ୍ରାହାମ ହାମୋର  
ଲୋକା ମାଣ୍‌କୁ କଟିମାହ୍ ବୁଦିଦୁ ଝାରିଙ୍ଗ୍ ଅତାର୍ ମୁସ୍‌ତାର୍ ।

୧୭ “ମାପୁରୁ ଅବ୍ରାହାମ୍‌ତିଙ୍ଗ୍ ଏମେ ପାର୍‌ମାଣ୍ କିତାମାହାନ୍, ଆକା  
ସତ୍ ଆଜି ମିସର୍ ଦେସ୍ତୁ ମା ଲୋକୁ ସଂକିୟା ନାଶ୍ଟ ଆତାର୍ ।

୧୮ ଝେନ୍‌କା ଜୋସେପ୍‌ତି ବିସୟତାନ୍ ନେସେଇ ମାହ୍ ଅରେନ୍  
ରାଜା ମିସର୍ ଦେସ୍ତୁ ସାସନ୍ କିତାନ୍ ।

୧୯ ଝାନ୍ ମା ତକ୍ରାଦାଦାରିଙ୍ଗ୍ ନାଶ୍ଟ କାସ୍ତୁ ସିତାନ୍, ଝାରି ଜନମ୍‌ଆତି  
ଇସ୍ତି କଡ଼ରିଙ୍ଗ୍ କାଡ଼ତେଙ୍ଗ୍ ଇଜି ଝାରିଙ୍ଗ୍ ଆଡ଼ରେ ପକ୍‌ତେଙ୍ଗ୍ ଇଜି  
ଆଦେସ୍ କିତାନ୍ ।

୨୦ ଇୟା ସମୟତୁ ମୋସା ଜନମ୍ ଆତାନ୍ । ଝାନ୍ ମାପୁରୁ ଆର୍ତ୍ତି  
ମାହାନ୍ ଅରେନ୍ ନେଗ୍ରି କଡ଼ ପିଲା । ଇନ୍‌ଡ୍ର ମୁଣ୍ଡି ଲେଜ୍‌କୁ ସାଧି ଝାନ୍  
ଜାତୁନ୍ ଅଆୟ୍ ଆତାନ୍,

୨୧ ମାରି ଏସ୍ତିଝାଲେ ଝାନିଙ୍ଗ୍ ଆଡ଼ରେ ପୋକ୍‌ତାର୍, ଫାରୋ ରାଜାଦି  
ଗାଡ଼ସି ଝାନିଙ୍ଗ୍ ପୟଜି ନିଜେଦି କଡ଼ ଝାଜା ପସା କିତାତ୍ ।

୨୨ ମୋସା ମିସର୍ ଦେସ୍‌ତି ଝିଜୁ ବୁଦିଦୁ ସିକିୟା ପୟତାନ୍, ଝାନି  
ମାଟା ମାରି ପାଣିଦୁ ଅରେନ୍ ପେରି ଲୋକୁ ଝାଜା ଝେଙ୍ଗ୍ ତାନ୍ ।”

୨୩ “ମସାଦି ବାସ୍ ଏସ୍ତିଝାଲେ ସାଲିସ୍ ବାସ୍‌ବେକ୍ ଆତାତ୍, ଝାନ୍ ଝାନି  
ଇସ୍ରାଏଲ୍‌ତି ତଡ଼ାନକୁ ଉଣ୍ଡିଙ୍ଗ୍ ଏଣ୍ଡେସ୍ ବ୍ୟବହାର୍ କିଆୟ୍‌ଆଜିନାତ୍,

ଆକା ନେସ୍‌ତେଙ୍ଗ୍ ବଦା କିତାନ୍ ।

୨୪ ୱାରି ଲୋଇ ଅରେନ୍ ୱାନିଙ୍ଗ୍, ଅରେନ୍ ମିସର୍ ଦେସ୍‌ତିକାନ୍ ଜାଟିକିନିକା ସୁଡ଼ଜି, ମସା ୱାନିଙ୍ଗ୍ ରକିୟା କିଦେଙ୍ଗ୍ ଇଜି ମିସର୍‌ତି ୱାନିଙ୍ଗ୍ ବାଦ୍‌ଲୁ ଅସି ତାକ୍‌ସି ସାପିସ୍‌କିତାନ୍ ।

୨୫ ୱାନ୍ ଅଡ଼ବିତା ମାର୍ହାନ୍, ୱାନି ନିଜେ ଲୋକୁ ନେସ୍‌ନାର୍ ଜେ, ତଡ଼ାନ୍‌କାଙ୍ଗ୍ ମୁକ୍‌ଡ଼ା କିଦେଙ୍ଗ୍ ଇଜି ମାପୁରୁ ୱାନିଙ୍ଗ୍ ବ୍ୟବହାର କିଜିନାନ୍; ମାତର୍ ୱାର୍ ଆକା ବୁଜାଏତାର୍ ।

୨୬ ମାର୍‌ନାଶ୍ଟିଙ୍ଗ୍ ରିଏର୍ ଇସ୍ରାଏଲ୍ ଦେସ୍‌ତିକାର୍ ଜାଟିକିନିକା ସୁଡ଼ତୁନ୍ ମାରି ୱାରି ଲୋଇ ସାନ୍ତି କିଦେଙ୍ଗ୍ ସେସ୍ଟୁ କିତାନ୍ । ୱାନ୍ ଇର୍ହାନ୍, ୱେନ୍‌ଶ୍ଟୁମିର୍ ରିଇଦେର୍ ତୋ ଇସ୍ରାଏଲ୍ ଦେସ୍‌ତି ତଡ଼ାନ୍‌କୁ । ଏଦା ଇୟାଞ୍ଜା ଜାଟି କିଜିନିଦେର୍ ?

୨୭ ମାତର୍ ଏମେକାନ୍ ଆଇଞ୍ଜାନିଙ୍ଗ୍ ଜାଟି କିଜି ମାର୍ହାନ୍, ୱାନ୍ ମସେଙ୍ଗ୍ ପେଲେ କିଜି ୱେନ୍‌ବାତାନ୍, ମା ନେତାର୍‌ରି ମୁସ୍‌କୁ ନିଙ୍ଗ୍ ଏନ୍ ସାସନ୍‌କିନିକାନ୍ ନି ବିସାର୍ କିନିକାନ୍ କିତାମାନାନ୍ ?

୨୮ ଇଏନ୍ ଏଣ୍ଟେସ୍ ମିସର୍ ଦେସ୍‌ତି ଲୋକ୍‌ତିଙ୍ଗ୍ ସାୟାମାର୍‌ଗାତାକ୍‌ତି, ନାଙ୍ଗ୍ ଇନିକା ଆୟାଞ୍ଜା ତାକ୍‌ତେଙ୍ଗ୍ ବଦା କିନି ?

୨୯ ମୋସା ଇକା ୱେନ୍‌ଜି ମିସର୍ ଦେସ୍‌ତାନ୍ ଉରକ୍‌ତାନ୍ ମାରି ମିଦିୟୋନଦୁ ବାସା କିତାନ୍ । ଆବେନ୍ ୱାନି ରିଏର୍ କଡ଼ର୍ ମାର୍ହାର୍ ।”

୩୦ “ସାଲିସ୍ ବାର୍ସେକ୍ ସର୍‌ଇ ୱେନ୍‌କା ସିନୟ୍ ଗରନ୍ ଲାକ୍‌ତୁ ଉଣ୍ଡି କାସ୍‌ସିମାନି ଦୁପା ସିସୁ ଲୋଇ ମାପୁରୁଦି ଉନ୍‌ଡ଼ି ଦୁଡ଼ ମସେଙ୍ଗ୍ ତରାଈଆତାଡ଼ ।

୩୧ ମୋସା ଇକା ସୁଡ଼ଜି ନାଶ୍ଟି କାବା ଆତାନ୍, ମାରି ଅଡ଼ପ୍ ନେଗେନକିଜି ସୁଡ଼ଦେଙ୍ଗ୍ ଇଜି ଦୁପାଦି ଲାକ୍‌ତୁ ସର୍ହାନ୍ । ମାତର୍ ୱାନ୍ ପ୍ରବୁଦି ବଲ୍ ୱେର୍‌ଆନ୍,

୩୨ ନାନ୍ ମି ତକ୍ରାଦାଦା ଅବ୍ରାହାମ, ଇସ୍ରାଏଲ୍ ମାରି ଜାକୁବଦି ମାପୁରୁ । ମୋସା ତିଲାଜି ତିରଗ୍‌ଜି ବେସ୍‌ତେଙ୍ଗ୍ ସାସ୍ କିଏତାନ୍ ।

୩୩ ପ୍ରବୁ ୱାନିଙ୍ଗ୍ ଇର୍ହାନ୍, ନି ଜୁତା କୁଡ଼ିଆ, ଇରିଙ୍ଗ୍ ନିନ୍ ଏମେମାନୁ ନିହ୍‌ମାନି, ଆକା ପବିତ୍ର ବୁମି ।”

୩୪ ମିସର ଦେସରୁ ନାନ୍ ନା ଲୋକାଙ୍ଗ ନାଶ୍ଟ ଦୁକୁକାସ୍ତୁ ସୁତୁତୁମାନା । ନାନ୍ ଖାରି ଆଡ଼୍‌ବାନିକା ଖେରୁଆମାନା ମାରି ଖାରିଙ୍ଗ ଦାସପାଣିଦାନ୍ ରକିୟା କିଦେଙ୍ଗ ରେତା ଖାତାମାନା । ଇଲେଇ ରାଦୁ, ନାନ୍ ମିଙ୍ଗ ମିସର ଦେସରୁ ପକ୍‌ନା ।

୩୫ “ମୋସା ଇସ୍ରାଏଲ୍ ଲୋକା ମାଣାନ୍ ତିସାୟୁଆତା ମାର୍ହାନ୍ । ପେରି ନେତାର ଖେନବାତାର, ମା ମୁସକୁ ନିଙ୍ଗ ଏନ୍ ସାସନ୍‌କିନିକାନ୍ ନି ବିସାରକିନିକାନ୍ କିତାନ୍ ? ମାତର୍ ମାପୁରୁ ଆୟା ମୋସେଙ୍ଗ କାସନ୍ ଦୁପା ଲାକ୍‌ତୁ ତରାୟୁଆତି ମାହ୍ ଦୁତତି ସାକାଦାନ୍ ଲୋକା ମୁସକୁ ସାସନ୍ କିଦେଙ୍ଗ ମାରି ଖାରିଙ୍ଗ ମୁକୁଡ଼ା କିଦେଙ୍ଗ ଇଜି ପକ୍‌ତାନ୍ ।

୩୬ ଖାନ୍ ମିସର ଦେସରୁ ମାରି ନେତରେ ସାମ୍‌ଦୁରୁତୁ ନାଶ୍ଟ କାବାଆନି ପାଣି କିଜି ଲୋକାଙ୍ଗ ମିସର ଦେସତାନ୍ ସପ୍‌ସି ତାତାନ୍, ସାଲିସ୍ ବାର୍‌ସେକ୍ ସାନ୍‌ସି ବାଲି ବୁମିଦୁ ଖାରିଙ୍ଗ ସାରି ତରସି ଅତାନ୍ ।

୩୭ ମୋସା ନିଜେ ଇସ୍ରାଏଲ୍ ଦେସତି ଲୋକାଙ୍ଗ ଇର୍ହାମାର୍ହାନ୍, ମାପୁରୁ ନାଙ୍ଗ ଏଣ୍‌ସେ ପକ୍‌ତାମାର୍ହାନ୍, ଆୟାଞ୍ଜା ମି ଲାକ୍‌ତୁ ଅରେନ୍ ବାବବାଦିଙ୍ଗ ପକ୍‌ନାନ୍ ଖାନ୍ ମି ନିଜେ ତଡ଼ାନ୍‌କା ଲୋଇରାନ୍ ଅରେନ୍ ଆନାନ୍ ।

୩୮ ଆୟା ମୋସା ବାଲି ବୁମିଦୁ ଉଣ୍ଡାତିମାହ୍ ଇସ୍ରାଏଲ୍‌ତି ଲୋକାଞ୍ଜାଲେ ଅରସେ ମାର୍ହାନ୍ । ଖାନ୍ ସିନୟ ଗରନ୍‌ତୁ ମା ତକ୍ରାଦାଦାରି ଖାଲେ ମାରି ଖାରି ଖାଲେ ମାଟା ଇହ୍ ମାନି ମୁସକୁପୁରତି ଦୁତତି ଖାଲେ ମାର୍ହାନ୍ ମାରି ମା ଲାକ୍‌ତୁ ଇନ୍‌ଶ୍ଟେଙ୍ଗ ଇଜି ଖାନ୍ ମାପୁରୁଦି ମାଣ୍‌କୁ ଜିବନ୍‌ତି ବାକ୍ୟ ଆସ୍‌ତାନ୍ ।”

୩୯ ମାତର୍ ମା ତକ୍ରାଦାଦାର ଖାନିଙ୍ଗ ମାନାଏତାର୍; ଖାର୍ ଖାନିଙ୍ଗ ପେଲେକିଜି ମିସର ଦେସରୁ ଡେସି ସନ୍‌ଡ୍ରେଙ୍ଗ ମନ୍‌ବଦାକିତାର୍ ।

୪୦ ଆୟାଉଣ୍ଡିଙ୍ଗ ଖାର୍ ହାରୋଣ୍‌ତିଙ୍ଗ ଇର୍ହାର୍, ଇଲେଇ ମାଙ୍ଗ ସାରି ତରସି ଅଡେଙ୍ଗ ଇଜି ଏସ ଦିୟାମ୍‌କୁ ତିଆର୍ କିଜ ସିଦା । ମାଙ୍ଗ ମିସର ଦେସତାନ୍ ସପ୍‌ତି ତାତିମାନି ଆୟା ମୋସା ଜେ ଏମେ ସର୍ହାନ୍, ଆକା ମାପ୍ ନେସ୍‌ଏପ୍ ।

୪୧ ଆୟା ସମୟରୁ ଆବେ ଖାର୍ ଉଣ୍ଡି ଗାଡ଼ାଲ୍‌ତି ବମା ତିଆର୍

କିତାର ମାରି ତାନି ଉଦେସ୍ତାନ ପୁଜା କିଜି ବଲି ସିତାର । ମାରି ନିଜେ  
ତିଆର କିତିମାନି ଆୟା ମୁତ ଦିଙ୍କ ମାନାଦେଙ୍କ ଇଜି ଉଣ୍ଡି ବଜି  
ତିଆର କିତାର ।

୪୭ ଆବେଟ୍ ମାପୁରୁ ଖାରିମାଣାନ୍ ଏରିତାନ୍ ମାରି ଖାରିଙ୍କ ବାଦଡ଼ତି  
ସୁକେଙ୍ଗାଙ୍କ ସେବା କିଦେଙ୍କ ଇଜି ଡିସ୍ତାସିତାନ୍ । ଇୟା ବିସୟତାନ୍  
ବାବବାଦିରି ବଇଦୁ ରାସାତାମାନାଡ଼ :

“ଏ ଇସ୍ରାଏଲ କୁରୁମ୍ !

ବାଲିବୁମିଦୁ ସାଲିସ୍ ବାର୍ସେକ୍ ସାନ୍ଦି

ମିର୍ ନା ଉଣ୍ଡିଙ୍କ ଜାତୁ ପୁଜା ସିଇତି ମାହ ଦେରନୋ ।

୪୮ ମାତର ମିର୍ ପାର୍ତନା କିଦେଙ୍କ ଇଜି ଏମେ ବମା ଝିଜୁ ତିଆର  
କିତିମାହ ଦେର,

ଆୟା ମାଲେକ୍ତି ଗୁଡ଼ା ମାରି ସୁକା ଦିୟାମ୍ ରମ୍ପାତି ବମାଦିଙ୍କ  
ପଣ୍ଡିତିଦେର ।

ଆୟାଉଣ୍ଡିଙ୍କ ନାନ୍ ମିଙ୍ଗ ବାବିଲନ୍ତି ଆୟାପାଡ଼ି ପକ୍ନାପ୍ ।”

୪୯ ବାଲିବୁମିଦୁ ମା ତକ୍ରାଦାଦାରି ଖାଲେ ମାପୁରୁଦି ତେବାନିକା ଗୁଡ଼ା  
ମାହାଡ଼ । ମାପୁରୁ ମୋସେଙ୍କ ଏଣ୍ଡେସ୍ ତିଆର କିଦେଙ୍କ ଇହାମାହାନ୍  
ମାରି ମୋସାଦିଙ୍କ ଏମେ ସାରି ତରତାମାହାନ୍, ଇକା ଆୟାଖାଜା  
ତିଆର ଆତାମାହାଡ଼ ।

୫୦ ଝେନ୍କା ମା ତକ୍ରାଦାଦାରି ଲୋକା ବୁବାସିରି ମାଣ୍ଡକୁ  
ପୟତିମାହ ଆୟା ଗୁଡ଼ାଦିଙ୍କ ଜିହୋସିୟଦି ଖାଲେ ପିଣ୍ଡୁଜି ଅସି  
ସହାର ମାରି ମାପୁରୁଦି ମାଣାନ୍ ପେରାୟ ଆତିମାରୁଇ ଆଇ ଦେସ୍  
ଅଦିକାର କିତାର । ଦାଉଦ ରାଜାଦି ସମୟ ସାନ୍ଦି ଆବେ ତେବାତାଡ଼  
।

୫୧ ଖାନ୍ ମାପୁରୁଦିମାଣାନ୍ ଦୟା ପୟଜି ଜାକୁବଦି ମାପୁରୁଦି  
ଉଣ୍ଡିଙ୍କ ଉଣ୍ଡି ତେବାନି ମନ୍ଦିର୍ ତିଆର କିଦେଙ୍କ ଖାନି ସାରି  
ବଦାକିତାମାହାନ୍ ।

୫୨ ମାତର ଝେନ୍କା ଆୟା ତେବାନି ଇଲୁ ତିଆର କିତାନ୍ ସଲମନ୍  
।

୫୩ ମାତର ଝିଜେରିଙ୍କ ପେରି ମାପୁରୁ ଲୋକାମାଣାନ୍ ତିଆର ଆତି  
ଇଲ୍ଲକାଙ୍କ ବାସାଏନ୍ । ଇୟା ବିସୟତାନ୍ ବାବବାଦି ରାସ୍ତାମାନାନ୍;

୪୯ “ପ୍ରଭୁ ଇନାନ୍, ମୁସକୁପୁର ନା ବାସନି ଗାଦି  
ମାରି ଦୁନିଆ ନା ପାଦାମ୍ ଇଡ଼ନି ବାଡ଼ି ମିର୍  
ନା ଉଣ୍ଡିଙ୍ଗ୍ ଏଣ୍ଡେସ୍ ନାନି ଇଲୁ ତିଆର୍ କିନିଦେର୍ ?  
ନା ରମ୍ନି ଉଣ୍ଡିଙ୍ଗ୍ ବାଡ଼ି ଏମେ ?

୫୦ ଇୟାଞ୍ଜିଲୁ ବିସୟ ଇନିକା ନାନ୍ ନିଜେ ତିଆର୍ କିଏ ନୋ ?”

୫୧ ସ୍ତ୍ରୀପାନ୍ ମାରି ଇର୍ହାନ୍, “ମିର୍ ଏସା ମାନାଈକାର । ମି ଜିବନ୍ ଏସା  
ତାଗ୍‌ଇକା । ମାପୁରୁଦି ବାକ୍ୟ ଉଣ୍ଡିଙ୍ଗ୍ ମିର୍ ଏସା ବଇରା ! ମିର୍ ଟିକ୍  
ମି ପୁର୍ବେଦିତକ୍ତାରି ଖାଜା : ମିର୍ ଖିଜୁଖାଲେ ପବିତ୍ର ଆମ୍‌ଦି ବିରୁଦ୍  
କିଜିନିଦେର୍ !

୫୨ ମି ପୁର୍ବେଦିତକ୍ତାଦାଦାରି ମାଣାନ୍ ପେରାୟ୍ ଆଇ ମାନି ଏମେ  
ବାବବାଦି ମାନାନ୍ ନୋ ? ମାପୁରୁଦି ଏମେ କାବୁର୍‌ସିନିକାର୍ ବେସି  
ଆଗତି ଖାରି ଦାମ୍‌ଦି ଦାସତି ଖାନି ବିସୟତାନ୍ ଇର୍ହାମାର୍ହାନ୍, ମି  
ତକ୍ତାଦାଦାର୍ ଖାରିଙ୍ଗ୍ ତାକ୍‌ତାର୍ ।

୫୩ ଇଲେଇ ମିର୍ ଖାନି ଉଣ୍ଡିଙ୍ଗ୍ ବିସ୍‌ବାସ୍‌ତୁ ଆରାକିଜି ଖାନିଙ୍ଗ୍  
ତାକ୍‌ତିମାନିଦେର୍ । ମିର୍ ମୁସକୁପୁରତି ଦୁଡ଼କା ମାଣାନ୍ ସିତିମାନି  
ମାପୁରୁଦି ନିୟମ୍ ଖିଜୁ ପୟତିମାନିଦେର୍ ମାତର୍ ଆକା ମାନାଈଦେର୍  
।”

### ସ୍ତ୍ରୀପାନ୍ତି ସାନିକା

୫୪ ପେରିମିଟିଙ୍ଗ୍‌ତି ନେତାର୍ ସ୍ତ୍ରୀପାନ୍ତି ମାଟା ଖେନ୍‌ଜି ନାଣ୍ଡ ରିସା  
ଆତାର୍, ଖାନି ଉଣ୍ଡିଙ୍ଗ୍ ରିସାଦାନ୍ ପାଲ୍‌କୁ କାତ୍ରେ କିତାର୍ ।

୫୫ ମାତର୍ ସ୍ତ୍ରୀପାନ୍ ପବିତ୍ର ଆମ୍‌ଦୁ ପୁରାଆଜି ମୁସକୁପୁର ତରିନ୍  
ସୁଡ଼ତ୍ତାନ୍ ମାରି ମାପୁରୁଦି ଗୌରବ୍ ନି ଜିସୁଙ୍ଗ୍ ମାପୁରୁଦି ଉଣ୍ଡେରି  
ତରିନ୍ ନିନି ମାନିକା ସୁଡ଼ତ୍ତାନ୍ ।

୫୬ ଖାନ୍ ଇର୍ହାନ୍, “ସୁଡ଼ତ୍ତୁ, ନାନ୍ ମୁସକୁପୁର ରେଆତିକା ମାରି  
ମନ୍‌ସ୍ୟପୁତ୍ରଙ୍ଗ୍ ମାପୁରୁଦି ଉଣ୍ଡେରି ତରିନ୍ ନିନି ମାନିକା ସୁଡ଼ତ୍ତୁନା !”

୫୭ ଆଉଲି ଆଜି ପେରିମିଟିଙ୍ଗ୍‌ତି ନେତାର୍ ଇୟା ମାଟା ଖେନ୍‌ଜି  
ଉଣ୍ଡିଙ୍ଗ୍ ଗିତଣିଦୁ କିକୁ କେରପ୍‌ତାର୍ । ଖେନ୍‌କା ଖାର୍ ଏକ୍‌ଜୁର୍ ଆଜି  
ଖାନି ତରିନ୍ ମାଟ୍‌ସି ଖାତାର୍ ।

୫୮ ଗାଡ଼ ଆଡ଼ରେ ଖାନିଙ୍ଗ ରେଲ୍‌ଜି ଅସି, ଖାନି ମୁସକୁ କାଲକୁ ପକସି ତାକତାର । ମିସ୍ ସାକିସିନିକାର ସାଉଲ ଦର୍ତ୍ତି ଅରେନ୍ ମୁରୁଲିଦି ଲାକତୁ ଖାରି ଆଙ୍ଗ ପାସିୟା ଝିକୁ ଡିସତା ସର୍ହାମାର୍ହାର ।

୫୯ ଖାର ସ୍ତ୍ରୀପାନତି ମୁସକୁ କାଲକୁ ତାକନି ସମୟତୁ ଖାନ ପ୍ରବୁଙ୍ଗ ପାରତନା କିଜି ଇର୍ହାନ, “ପ୍ରବୁ ଜିସୁ ନା ଆମ୍ବଦିଙ୍ଗ ମାନାଆ !”

୬୦ ଖାନ ମେଣ୍ଟେଙ୍ଗ ଗଟକିଜି ନାଣ୍ଡ ଆଉଲିଦାନ ଇର୍ହାନ, “ପ୍ରବୁ ! ଇୟାଖାରି ବିରଦତାନ ଇୟା ପାପ ଏଡ଼ କିମା ।” ଇକା ଇଜି ଖାନ ପୁଣ୍ଡା ଡିସସି ସାତାନ ।

## ୮

### ସାଉଲ ମଣ୍ଡଲିଦିଙ୍ଗ କାସୁ ସିତାନ

୧ ସ୍ତ୍ରୀପାନତି ସାନିଦଣ୍ଡିଙ୍ଗ ସାଉଲ ଉନ୍‌ଡ୍ରେମୋନ୍ ଆତାନ ।

ଆୟାନାଣ୍ଡିରାନ୍ ଜିରୁସାଲାମ୍‌ତି ମଣ୍ଡଲି ଉଣ୍ଡିଙ୍ଗ ନାଣ୍ଡ କାସୁଦି ତାଡନା ଆରାମ୍ ଆତାଡ । ସିସୁରିଙ୍ଗ ଡିସସି ଆଇ ଝିଜେରେ ବିସ୍‌ବାସିର୍ ଜିହୁଦା ନି ସମିରୋଣ ରାଜିଦି ଇନିଙ୍ଗ ଆନିଙ୍ଗ ଆତାସର୍ହାର ।

୨ ଏସ ମାପୁରୁଦି ଦାମ୍‌ ଲୋକୁ ନାଣ୍ଡ ଆଉଲି ଆଜି ଆଡ଼ବାଜି ସ୍ତ୍ରୀପାନତି ସାତି ମାଡାଦିଙ୍ଗ ମୁସତାର ।

୩ ଖାତର୍ ସାଉଲ ମଣ୍ଡଲିଦିଙ୍ଗ ଦଂସ କିଦେଙ୍ଗ ସେସୁ କିତାନ, ଇଲୁ ଇଲୁଦୁ ସଲ୍‌ସି କ୍ରିସ୍ତ ବିସ୍‌ବାସି ମେମାରି, ଆଇମା ଝିଜେରିଙ୍ଗ ରେଲ୍‌ଜି ତାସି ଜଇଲ୍‌ତୁ ଇର୍ତାନ ।

### ସମିରୋଣଦୁ ସୁସମାତାର ପ୍ରଚାର

୪ ଇନିଙ୍ଗ ଆନିଙ୍ଗ ଝିଦିତି ମାର୍‌ଇ ବିସ୍‌ବାସିର୍ ଝିକୁ ତରିନ୍ ସଲ୍‌ସି ସୁସମାତାର ପ୍ରଚାର କିତାର ।

୫ ସମିରୋଣଦି ପେରି ଗାଡ଼କାଙ୍ଗ ସଲ୍‌ସି ପିଲିପ୍‌ପ, ଆବେଣି ଲୋକାମାନୁ କ୍ରିସ୍ତ ନି ମାପୁରୁଦି ସୁସମାତାର ପ୍ରଚାର କିତାନ ।

୬ ପିଲିପ୍‌ପଦି ମାଟା ଝେନ୍‌ଜି ମାରି ଖାନି କାବାଆନି ପାଣି ଝିକୁ ସୁଡ଼ଜି ଲୋକୁ ଖାନି ତରିନ୍ ନାଣ୍ଡ ନେଗେନ୍ ବେସତାର ।

୭ ନାଣ୍ଡ ଲୋକା ମାଣାନ୍ ତାଗ୍‌ଇ ଆଡ଼ମେଙ୍ଗ୍ ଆଉଲି ଆଜି ସତେ ସହେ, ନାଣ୍ଡ କୁସ୍‌ ରୋଗି ମାରି ସଟାର୍‌ ନେଗେନ୍‌ ଆତାର୍‌ ।

୮ ଇୟାଉଣ୍ଡିଙ୍ଗ୍‌ ଆୟା ଗାଡ଼ତୁ ଉନ୍‌ଣ୍ଡି ଖେଡ଼ିକା ଆଉଲି ଖେଙ୍ଗ୍‌ ତା ସହାଡ଼ ।

୯ ସିମୋନ୍‌ ଦରତି ଅରେନ୍‌ ଲୋକୁ ଖାନି ଗୁଣିଆ ବିଦ୍ୟା ଦାନ୍‌ ଆୟା ସମିରୋଣ୍‌ ରାଜିଦି ଲୋକାଙ୍ଗ୍‌ କାବା କିଜି ଇଟ୍‌ତାମାହାନ୍‌ ।

୧୦ ଖାନ୍‌ ନିଜେଦିଙ୍ଗ୍‌ ଅରେନ୍‌ ପେରିଲୋକ୍‌ ଇଜି ସମାଜତି ଝିକୁଜାତିଦି ଲୋକା ଲୋଇ ପେରିପଦ୍‌ ପୟତାମାହାନ୍‌ । ଖାର୍‌ ଇଜିମାହାନ୍‌, “ଖାନ୍‌ ପେରିସାକ୍ତି ଦରତାନ୍‌ ଖେଙ୍ଗ୍‌ ତି ମାପୁରୁଦି ଉନ୍‌ଣ୍ଡି ସାକ୍ତି ।”

୧୧ ଖାନ୍‌ ଗୁଣିଆ ବିଦ୍ୟାଦାନ୍‌ ନାଣ୍ଡ ଦିନ୍‌ ଆସ୍‌ସି ଖାନ୍‌ ସମିରୋଣ୍‌ ଲୋକାଙ୍ଗ୍‌ ଖାନି ଖାଲେ ବୁଲାଦେଙ୍ଗ୍‌ ଇଜି ଇଟ୍‌ତାମାହାନ୍‌ ।

୧୨ ମାତର୍‌ ପିଲିପ୍‌ପତି ମାଣ୍‌କୁ ମାପୁରୁଦି ରାଜି ମାରି ଜିସୁ କ୍ରିସ୍‌ତି ବିସୟତାନ୍‌ ସୁସମାଚାର୍‌ ଖେନ୍‌ଜି, ଆୟାବାନ୍‌ ଲୋକା ବିସ୍‌ବାସ୍‌ ଆତାଡ଼ ମାରି ଆୟା ରାଜିଦି ଆଇମା ମେମାରି ଝିଜେରେ ହୁବନ୍‌ ଅତାର୍‌ ।

୧୩ ନିଜେ ସିମୋନ୍‌ ଆୟା ସୁସମାଚାର୍‌ତୁ ବିସ୍‌ବାସ୍‌ କିତାନ୍‌ । ପିଲିପ୍‌ପତି ମାଣ୍‌କୁ ଆତିମାର୍‌ଇ କାବାଆନି ପାଣି ନି ନେଗେନ୍‌ କିନି ପାଣି ଝିକୁ ସୁଡ଼ଜି ଖାନ୍‌ ହୁବନ୍‌ ଅସି ପିଲିପ୍‌ପତି ଖାଲେ ତେବାତାନ୍‌ ।

୧୪ ସମିରୋଣ୍‌ଦି ଲୋକୁ ମାପୁରୁଦି ବାକ୍ୟ ଆସ୍‌ତାମାନାର୍‌ ଇଜି ଜିରୁସାଲାମତୁ ମାନି ପ୍ରେରିତ ସିସୁର୍‌ ଖେନ୍‌ଜି, ପିତର ମାରି ଜୋହନତିଙ୍ଗ୍‌ ଖାରି ଲାକ୍‌ତୁ ପକ୍‌ତାନ୍‌ ।

୧୫ ଖାର୍‌ ଆବେ ଇତି ଖେନ୍‌କା ସମିରୋଣ୍‌ଦି ବସ୍‌ବାସିର୍‌ ଏଣ୍ଡେସ୍‌ ପବିତ୍ର ଆମ୍‌ ପୟନାର୍‌, ଆୟାଉଣ୍ଡିଙ୍ଗ୍‌ ପାର୍‌ତନା କିତାର୍‌ ।

୧୬ ଇରିଙ୍ଗ୍‌ ଆୟା ସାନ୍‌ ଖାରି ଲୋଇ ଏମେଖାରି ମୁସ୍‌କୁ ପବିତ୍ର ଆମ୍‌ ରେତାଏଡ଼ ମାହାଡ଼ । ଖାର୍‌ କେବଲ୍‌ ପ୍ରବୁ ଜିସୁକ୍ରିସ୍‌ତି ଦରତାନ୍‌ ହୁବନ୍‌ ଅତାମାହାନ୍‌ ।

୧୭ ପିତର ନି ଜୋହନ ଖାରି ମୁସ୍‌କୁ କିୟୁ ଇଟ୍‌ତି ଦାପ୍ରେ ଖାର୍‌ ପବିତ୍ର ଆମ୍‌ ପୟତାର୍‌ ।

୧୮ ସିମୋନ୍ ସୁତଦ୍ୱାନ୍ ଜେ, ପ୍ରେରିତ ସିସୁର ବିସବାସିରି ମୁସକୁ କିୟୁ  
ଇଟ୍‌ତାର୍‌ଆକା ଖାର ପବିତ୍ର ଆମ୍ବା ପୟତାର୍ । ଆବେଟ୍ ଖାନ୍ ପିତର୍  
ନି ଜୋହନତିଙ୍ଗ୍ ତାବୁଙ୍ଗ୍ ଜାସେ କିଜି ଇର୍ହାନ୍,

୧୯ “ନାନ୍ ଆଇଝାରି ମୁସକୁ କିୟୁ ଇଟ୍‌ତିଙ୍ଗ୍, ଖାର ଏଣ୍ଡେସ୍ ପବିତ୍ର  
ଆମ୍ବା ପୟଦେଙ୍ଗ୍ ଆଟ୍‌ନାର୍, ଇୟାଉଣ୍ଡିଙ୍ଗ୍ ନାଙ୍ଗ୍ ଇୟା ସାକ୍ତି ନି  
ଅଦିକାର୍ ସିଦା ।”

୨୦ ମାତର୍ ପିତର୍ ଖାନିଙ୍ଗ୍ ଇର୍ହାନ୍, “ନି ଖାଲେ ନି ତାବୁଙ୍ଗ୍  
ଦ୍ୱଂସ ଆପିତ୍, ଇରିଙ୍ଗ୍ ତାବୁଦାନ୍ ନିନ୍ ମାପୁରୁଦି ଦାନ୍ କଣ୍ଡେଙ୍ଗ୍  
ଅଡ୍‌ବିତିମାନି !

୨୧ ମା ପାଣିଦୁ ନି ଇନି ବାଗ୍ ସିଲେଡ୍ । ଇରିଙ୍ଗ୍ ମାପୁରୁଦି ଆଗଡ୍  
ନି ଜିବନ୍ ନେଗିକା ସିଲେଡ୍ ।

୨୨ ଆଦେଙ୍ଗ୍ ନି ଇୟା ତାଗ୍‌ଇ ମାଟା ଉଣ୍ଡିଙ୍ଗ୍ ମନ୍ ଡେପ୍‌ଆ,  
ଇୟାଝାଜା ବିସୟ ସିନ୍ତା କିତିମାନିଙ୍ଗ୍ ପ୍ରବୁ ଏଣ୍ଡେସ୍ କେମା କିନାନ୍,  
ଆୟାଉଣ୍ଡିଙ୍ଗ୍ ପ୍ରବୁଙ୍ଗ୍ ପାର୍‌ତନା କିଆ ।

୨୩ ଇରିଙ୍ଗ୍ ନାନ୍ ସୁଡ୍‌ଜିନା ଜେ ନି ଜିବନ୍ ରିସାଦୁ ପୁରା  
ଆତାମାନାଡ୍, ନିନ୍ ପାପ୍ ଗାଟିଦୁ ତରାତିମାନି ।”

୨୪ ସିମୋନ୍ ଜୋହନ ନି ପିତର୍‌ତିଙ୍ଗ୍ ଇର୍ହାନ୍, “ମିର୍ ଆମା ଖିଜୁ  
ଇରୁଇଦେର୍, ଆକା ଏଣ୍ଡେସ୍ ନା ଉଣ୍ଡିଙ୍ଗ୍ ଗଟାଏଡ୍, ଇୟାଉଣ୍ଡିଙ୍ଗ୍  
ଦୟାକିଜି ପ୍ରବୁଦି ଆଗଡ୍ ପାର୍‌ତନା କିଦୁ ।”

୨୫ ସାକି ନି ପ୍ରବୁଦି ବାକ୍ୟ ଝେର୍‌ତି ଝେନ୍‌କା ପିତର୍ ନି ଜୋହନ  
ଜିରୁସାଲାମ୍‌ତୁ ଡେସିସର୍ହାର୍ । ଡେସି ସନି ସାରିଦୁ ଖାର ସମିରୋଣଦି  
ଏସ ନାରକାଙ୍ଗ୍ ସୁସମାଚାର୍ ପ୍ରଚାର୍ କିତାର୍ ।

### ପିଲିପ ନି ଇତିଓପିଆଦି ପାଣିକିନିକାନ୍

୨୬ ପ୍ରବୁଦି ଅରେନ୍ ଦୁଡ୍ ପିଲିପତିଙ୍ଗ୍ ଇର୍ହାନ୍, “ତିଆର୍ ଆଆ,  
ଉଣ୍ଡେରି ତରିନ୍ ଜିରୁସାଲାମ୍‌ତାନ୍ ଗାଜା ତରିନ୍ ମାନି ପେରିଜାରିଦୁ  
ସାଙ୍ଗ୍‌ଆ ।” ଆଜିକାଲି ମାରି ଆୟା ରାସ୍ତା ବ୍ୟବହାର୍ ଆଏଜିନାଡ୍

୨୭ ଆବେଟ୍ ପିଲିପ ନିଙ୍ଗ୍‌ତା ସର୍ହାନ୍ । ମାରି ସୁଡ୍‌ଦୁ, ଇତିଓପିଆ  
ଦେସ୍‌ତି କାଣ୍ଡାକି ଦରଡି ରାଣିଦି ମାନୁ ପେରିପାଣିକିନି ପଦ୍ ପୟତି  
ଇତିଓପିଆଦି ପାଣିକିନିକାନ୍, ଏନ୍ ତାନି ଖିଜୁ ଦନ୍‌ସମ୍‌ତିଦି ସୁଣିକାନ୍

ମାର୍ହାନ୍, ଖାନ୍ ମାପୁରୁକୁ ପାର୍ତନା କିଦେଙ୍ଗ ଇଜି ଜିରୁସାଲାମତୁ  
 ଖାତାମାର୍ହାନ୍;

୨୮ ଖାନ୍ ଖାନି ରତଦୁ ବାସସି ଇନ୍ତୁ ଡେସିସଲ୍‌ସିମାର୍ହାନ୍ । ଖାନ୍  
 ରତଦୁ ଡେସିସିନି ସମୟତୁ ଜିସାୟ ବାବବାଦିଦି ପୁସ୍ତକ ନାଶ୍ ଆଉଲି  
 ଆଜି ପଡ଼ାଜି ମାର୍ହାନ୍ ।

୨୯ ପବିତ୍ର ଆମ୍ବା ପିଲିପତିଙ୍ଗ ଇର୍ହାଡ଼, “ଆୟା ରତ ଲାକ୍‌ତୁ ସାଙ୍ଗ୍‌ଆ  
 ମାରି ଖାନି ଲାକ୍‌ତୁ ତେବାଆ ।”

୩୦ ଆବେଟ୍ ପିଲିପ୍ପ ଉର୍ସି ସଲ୍‌ସି ଖାନ୍ ଜିସାୟ ବାବବାଦିଦି ବଇ  
 ପଡ଼ାନିକା ଝେରୁଆନ୍ । ଖାନ୍ ଖାନିଙ୍ଗ୍ ଝେନ୍‌ବାତାନ୍, “ନିନ୍ ଆମାକା  
 ପଡ଼ାଜିନି, ଆକା ବୁଜାଦେଙ୍ଗ୍ ଆଟ୍‌ସିନିନୋ ?”

୩୧ ପାଣିକିନିକାନ୍ ଇର୍ହାନ୍, “ଅରେନ୍ ଏନ୍ ନାଙ୍ଗ୍ ଇକା ବୁଜା କିଜ  
 ସିଏତିଙ୍ଗ୍, ନାନ୍ ଏଣ୍ଡେସ୍ ବୁଜାଦେଙ୍ଗ୍ ଆଟ୍‌ନା ?” ଖାନି ଖାଲେ ରତଦୁ  
 ବାସ୍‌ତେଙ୍ଗ୍ ଇଜି ଖାନ୍ ପିଲିପତିଙ୍ଗ୍ କୁକ୍‌ତାନ୍ ।

୩୨ ଖାନ୍ ଦାମ୍‌ସାସ୍ତ୍ରଦି ଇୟା ବାଗ୍ ପଡ଼ାଜି ମାର୍ହାନ୍ :

“କାଡ଼ତେଙ୍ଗ୍ ଇଜି ଅଆୟାଆଜିମାନି ମେଣ୍ଡା ଖାଜା,  
 ବୁରୁବୁସେଙ୍ଗ୍ କୟ୍‌ନିଖାଲେ ଆଲେନିମାନି ମେଣ୍ଡା ଖାଜା  
 ଖାନ୍ ପଦ୍ ବା ମାଟା ଇନ୍‌ଏତାନ୍ ।

୩୩ ଖାନ୍ ଅପ୍‌ମାନ୍ ଆତାନ୍ ମାରି ନ୍ୟାୟତାନ୍ ଜିଣାଏତାନ୍ ।  
 ଖାନି କୁଟୁମ୍‌ତି ବିସୟତାନ୍ ଏନ୍ ଇନିକା ଇନ୍‌ଡ୍ରେଙ୍ଗ୍ ଆଟ୍‌ଏର୍,  
 ଇରିଙ୍ଗ୍ ଦୁନିଆଦୁ ଖାନି ଜିବନ୍‌ତି ଝିଜ୍‌ନିକା ଗଟାତାମାନାଡ଼ ।”

୩୪ ପାଣିକିନିକାନ୍ ପିଲିପତିଙ୍ଗ୍ ଝେନ୍‌ବାତାନ୍, “ବାବବାଦି ଏ  
 ବିସୟତାନ୍ ଝେରୁସିନାନ୍, ନାଙ୍ଗ୍ ଇନ୍‌ଆଁ । ଖାନି ନିଜେଦି  
 ବିସୟତାନ୍ ନୋ ଆଇ ଏ ବିସୟତାନ୍ ?”

୩୫ ପିଲିପ୍ପ ଦାମ୍‌ସାସ୍ତ୍ରଦି ଇୟା ବାଗ୍‌ତାନ୍ ଆରାମ୍ କିଜି ଜିସୁଦି  
 ବିସୟତାନ୍ ରାସାତି ଝିଜ୍ ନେଗିକାବୁର ଖାନିଙ୍ଗ୍ ଝେରୁତାନ୍ ।

୩୬ ଖାନ୍ ପେରିଜାରିଦୁ ସଲ୍‌ପୁ ସଲ୍‌ପୁ ଉନ୍‌ଶ୍ଟି ଏରୁ ମାନି ଲାକ୍‌ତୁ  
 ଇତାର । ପାଣିକିନିକାନ୍ ଇର୍ହାନ୍, “ଇବେ ତୋ ଏରୁ ମାନେ, ନା ତୁବନ୍  
 ଅତେଙ୍ଗ୍ ଇଜି ଇନିକା ବାଦା ମାନାଡ଼ ନୋ ?”

୩୭ ପିଲିପ ଇର୍ହାନ୍, ନିନ୍ଦୁ ଓଡୁ ମନ୍ତିଓଲେ ଜଦି ବିସ୍ବାସ କିନି, ଆତିଙ୍ଗ୍ ଆନାଡ଼, ଆବେଟ୍ ଖାନ୍ ଇର୍ହାନ୍, ଜିସୁ କ୍ରିସ୍ତ ଜେ ମାପୁରୁଦି ମାରିନ୍, ଇକା ନାନ୍ଦୁ ବିସ୍ବାସ କିଜିନା । \*

୩୮ ମାରି ଖାନ୍ ରତଦିଙ୍ଗ୍ ନିଲପ୍ତେଙ୍ଗ୍ ଆଦେସ୍ ସିତାନ୍, ମାରି ପିଲିପ ନି ପାଣିକିନିକାନ୍ ରିଏର୍ ଏରୁ ଲୋଇ ସର୍ହାର୍, ମାରି ପିଲିପ ଖାନିଙ୍ଗ୍ ହୁବନ୍ ସିତାନ୍ ।

୩୯ ଖାର୍ ଏରୁତାନ୍ ନିଙ୍ଗ୍ ଜାତି ଖେନକା, ପ୍ରବୁଦି ପବିତ୍ର ଆମ୍ବା ପିଲିପତିଙ୍ଗ୍ ଅତାଡ଼ । ପାଣିକିନିକାନ୍ ମାରି ଖାନିଙ୍ଗ୍ ସୁଡ଼ୁଦେଙ୍ଗ୍ ଆର୍ଏତାନ୍, ମାତର୍ ଖେଡ଼ିକାଦାନ୍ ପୁରା ଆଜି ଖାନି ସାରିଦୁ ସର୍ହାନ୍ ।

୪୦ ଏସ୍ ସମୟ ଖେନକା ପିଲିପ ସୁଡ଼ୁତାନ୍ ଜେ ଖାନ୍ ଅସଦୋଦ୍ ହୁ ଇତାନ୍ । ଆବେଟ୍ କୁ ଖାନ୍ କାଇସରିୟାଦୁ ସର୍ହାନ୍ ମାରି ସାରିଦୁ ମାନି ଗାଡ଼କାଙ୍ଗ୍ ସୁସମାଚାର୍ ପ୍ରଚାର୍ କିତାନ୍ ।



ସାଉଲ ମନ୍ ଡେପ୍ନିକା

(ପ୍ରେରିତ ୨୨:୬-୧୬; ୨୬:୧୨-୧୮)

୧ ଇୟା ସମୟତୁ ସାଉଲ ପ୍ରବୁଦି ସିସୁରିଙ୍ଗ୍ କାଡ଼ତେଙ୍ଗ୍ ଇଜି ଆଦ୍ରିସ୍ କିଜି ପେରି ଜାଜକଦି ଲାକ୍ତୁ ସର୍ହାନ୍ ।

୨ ମାରି ଦାମାସ୍କସ୍ତି ପାର୍ତନାକିନି ଇଲ୍ଲକାଙ୍ଗ୍ ପ୍ରବୁଦି ଖାଲେ ବୁଲାନିଖାରିଙ୍ଗ୍ ପୟତିଙ୍ଗ୍ ତର୍ସି ଜିରୁସାଲମ୍ତୁ ଆସ୍ସି ତାତେଙ୍ଗ୍ ଇଜି ପେରି ଜାଜକରି ମାଣାନ୍ ସାରି ସିନି ଆକୁ ଲୋସ୍ତାନ୍ ।

୩ ସାଉଲ ଦାମାସ୍କସ୍ ଗାଡ଼ ଲାକ୍ତୁ ଇଗା ସନି ସମୟତୁ ଦାପ୍ରେ ବାଦଡ଼ତାନ୍ ଉନ୍ଶ୍ଟି ଜାୟ୍ ଖାନି ସାରିବେଡ଼ତି କାସ୍ସି ନିଙ୍ଗ୍ ତାଡ଼ ।

୪ ଖାନ୍ ବୁମିଦୁ ଆର୍ତାନ୍ ମାରି ଉନ୍ଶ୍ଟି ବଲ୍ ଖେର୍ଆନ୍, “ସାଉଲ ! ସାଉଲ ! ନିନ୍ ଏୟା ନାଙ୍ଗ୍ ତାଡ଼ନା କିଜିନି ?”

\* ୮:୩୭ ପିଲିପ ଇର୍ହାନ୍, “ନିନ୍ ପୁରା ଜିବନ୍ତାନ୍ ଜଦି ବିସ୍ବାସ କିନି, ଆତିଙ୍ଗ୍ ଇକା ଆଦେଙ୍ଗ୍ ଆନାଡ଼ । ଆବେଟ୍ ଖାନ୍ ଇର୍ହାନ୍, ଜିସୁ କ୍ରିସ୍ତ ଜେ ମାପୁରୁଦି ମାରିସି, ଇକା ନାନ୍ଦୁ ବିସ୍ବାସ କିଜିନା ।”

୫ ଖାନ ଇର୍ହାନ, “ପ୍ରବୁ, ନିନ୍ ଏନ୍ ?” ମାରିଡେସି ଆୟା ବଲ୍ ଖାତାଡ଼, “ନିନ୍ ଏଙ୍ଗ୍ କାସ୍ କିଜିନି, ନାନ୍ ଆୟା ଜିସୁ ।

୬ ନିଙ୍ଗ୍ଆ, ଗାଡ଼ତୁ ସାଙ୍ଗ୍ଆ, ଇନିକା କିଦେଙ୍ଗ୍ ଆନାଡ଼, ଆବେ ନିଙ୍ଗ୍ ଖେରନା ସିନା ।”

୭ ସାଉଲତି ଖାଲେ ଅରସେ ସନିକାର କାବାଆଜି ତେବାତା ସର୍ହାର; ଖାର ଆୟା ବଲ୍ ଖେରଆର, ମାତର ଏଙ୍ଗ୍ ସୁଡ଼ୁଦେଙ୍ଗ୍ ଆବ୍‌ଏତାର ।

୮ ସାଉଲ ବୁମିଦାନ୍ ନିଙ୍ଗ୍ଜି କାଣ୍ଟୁ ରେତାନ୍, ମାତର ଖାନିଙ୍ଗ୍ ଇନିକା ତରଏତାଡ଼ । ଆବେଟ୍ ଖାର ଖାନି କିୟୁ ଆସସି ଦାମାସକସ୍ ସାନ୍ଦି ସାରି ତରସି ଅତାର ।

୯ ମୁନେନ୍ ସାନ୍ଦି ଖାନ ସୁଡ଼ୁଦେଙ୍ଗ୍ ଆବ୍‌ଏତାନ୍ ମାରି ଆୟା ସମୟତୁ ଉଣ୍ଟୁତାନ୍ ।

୧୦ ଦାମାସକସ୍ତୁ ହନନିୟ ଦରତି ଅରେନ୍ ସିସୁ ମାର୍ହାନ୍ । ଖାନ ଉନ୍‌ଶ୍ଟି ଦର୍ସନ୍ ପୟତାନ୍, ପ୍ରବୁ ଖାନିଙ୍ଗ୍ ଇର୍ହାନ, “ହନନିୟ !”

ଖାନ ଇର୍ହାନ, “ଏ ପ୍ରବୁ ଇନ୍‌ଆଁ ।”

୧୧ ପ୍ରବୁ ଇର୍ହାନ, “ତିଆର୍ ଆଆ । ସିଦା ଦରତି ପେରିଜାରି ଆସସି ଜିହୁଦାଦି ଇଲୁବୁ ସାଙ୍ଗ୍ଆ । ଆବେ ତାର୍‌ସତାନ୍ ଖାତିମାନି ସାଉଲ ଦରତି ଅରେନ୍ ଲୋକତିଙ୍ଗ୍ ପୟଆ । ଖାନ ପାର୍‌ତନା କିଜିନାନ୍ ।

୧୨ ହନନିୟ ଦରତି ଅରେନ୍ ଲୋକୁ ଖାଜି ଖାନି ମୁସକୁ କିୟୁ ଇଟ୍‌ତିଙ୍ଗ୍, ଖାନ କାଣ୍ଟୁ ସୁଣାନ୍ ଇଜି ଦର୍ସନ୍ ପୟତାମାନାନ୍ ।”

୧୩ ହନନିୟ ଇର୍ହାନ, “ପ୍ରବୁ, ଇୟା ଲୋକୁ ଜିରୁସାଲାମତୁ ନି ବିସ୍‌ବାସି ଲୋକା ଉଣ୍ଟିଙ୍ଗ୍ ଏମେ କାସ୍‌ଦି ପାଣି ଝିଜୁ କିତାମାନାନ୍, ଆୟା ବିସୟତାନ୍ ନାଣ୍ଟ ଲୋକୁ ନାଙ୍ଗ୍ ଖେରତାମାନାର ।

୧୪ ମାରି ଖାନ ପେରି ଜାଜକରି ମାଣ୍ଟୁ ଅଦିକାର୍ ଆକୁ ତାସି, ଦାମାସକସ୍ତୁ ନି ପାର୍‌ତନା କିନିଝାରିଙ୍ଗ୍ ଆସସି ଅତେଙ୍ଗ୍ ଇଜି ଖାତାମାନାନ୍ ।”

୧୫ ପ୍ରବୁ ଖାନିଙ୍ଗ୍ ଇର୍ହାନ, “ସାଙ୍ଗ୍ଆ, ଅଣଜିହୁଦି ମାରି ରାଜା ମାରି ଇସ୍ରାଏଲ୍‌ତି ଲୋକା ଆଗ୍‌ଡ଼ି, ନା ଦର ଖେରତେଙ୍ଗ୍ ଇଜି ମାରି ନା ସେବା କିଦେଙ୍ଗ୍ ନାନ୍ ଖାନିଙ୍ଗ୍ ଆସକିତାମାନା ।

୧୬ ନା ଉଣ୍ଟିଙ୍ଗ୍ ଖାନ ଏମେ ଦୁକ୍ ପୟନାନ୍, ନାନ୍ ନିଜେ ଖାନିଙ୍ଗ୍ ଖେରନା ।”

୧୭ ହନନିୟ ସର୍ହାନ, ସାଉଲ ମାନି ଇଲୁଦୁ ଡଗ୍ଗୁଜି ଖାନି ମୁସକୁ କିୟୁ ଇଟତାନ । ଖାନ ଇର୍ହାନ, “ଡଡାନକୁ ସାଉଲ, ଇବେ ଖାନି ସାରିଦୁ ଏମେ ପ୍ରବୁ ଜିସୁ ନିଙ୍ଗୁ ଦର୍ସନ୍ ସିତାନ, ଖାନ ନାଙ୍ଗୁ ପକ୍ତାମାନାନ, ଏଣ୍ଡେସମାରି ଡେସି ନିନ୍ କାଣୁକୁ ସୁଡ଼ଦେଙ୍ଗୁ ଆଟ୍ଟନି ମାରି ପବିତ୍ର ଆମାଦୁ ପୁରା ଆନି ।”

୧୮ ଆୟାଦାପ୍ରେ ସାଉଲତି କାଣ୍ଟକାଣ୍ଟକୁ ମିନିଦି ସପା ଖାଜା ଏସ ଆର୍ତେ ମାରି ଖାନ ମାରିଅରସୁ ସୁଡ଼ଦେଙ୍ଗୁ ଆଟ୍ଟତାନ । ଖାନ ନିଙ୍ଗୁଜି ତୁବନ୍ ଅତାନ ।

୧୯ ମାରି ଉଣ୍ଡୁଜି ସାକ୍ତି ପୟତାନ । ସାଉଲ ସିସୁରି ଖାଲେ ଦାମାସକସ୍ତୁ ଏସ ଦିନ୍ ତେବାତାନ ।

### ଦାମାସକସ୍ତୁ ସାଉଲ ପ୍ରଚାର କିତାନ

୨୦ ଖାନ ସିଦା ପାର୍ତନାକିନି ଇଲ୍‌କାଙ୍ଗୁ ସଲ୍‌ସି, ଜିସୁ ଜେ ମାପୁରୁଦି ମାରିସି, ଇୟା ମାଟା ପ୍ରଚାର କିଦେଙ୍ଗୁ ଆସ୍ତାନ ।

୨୧ ଏମେକାର୍ ଖାନି ମାଟା ଝେର୍‌ଆର୍, ଖାର୍ କାବାଆଜି ଝେନ୍‌ବାତାର୍, “ଜିରୁସାଲାମ୍‌ତୁ ଜିସୁ ଦର୍ତ୍ତି ଲୋକ୍ତି ପାର୍ତନା କିନିଝାରିଙ୍ଗୁ ଏମେ ଲୋକୁ କାଡ଼ସି ମାର୍ହାନ, ଇକାନ ଇନିକା ଆକାନ ଆଏନ୍ ନୋ ? ଝାରିଙ୍ଗୁ ପେରି ଜାଜକରି ଲାକ୍ତୁ ଆସ୍‌ସି ଅନି ଉଦେସ୍‌ତାନ ଖାନ ଇନିକା ଇବେ ରେଏନ୍ ମାର୍ହାନ ନୋ ?”

୨୨ ମାତର୍ ସାଉଲ ପ୍ରଚାର ନାଣ୍ଡ ସାକ୍ତି ମାର୍ହାଡ଼, ଜିସୁ ଜେ ମସିହ, ଇୟା ବିସୟତାନ ଖାନି ପାର୍‌ମାଣ୍ ନିସା ଜିଦ୍ ମାର୍ହାଡ଼ ଜେ ଦାମାସକସ୍ତୁ ବାସାଜି ମାନି ଜିହୁଦିର୍ ଖାନି ଇନି ମାଟାଦି ଉତର ସିଦେଙ୍ଗୁ ଆଟ୍‌ଏର୍ ମାର୍ହାର୍ ।

୨୩ ☆ନାଣ୍ଡ ଦିନ୍ ଆତି ଝେନ୍‌କା ଜିହୁଦିର୍ ଉଣ୍ଡାଜି ସାଉଲତିଙ୍ଗୁ ଡାକ୍‌ତେଙ୍ଗୁ ଇଜି ଉପାୟା କିତାର୍,

୨୪ ମାତର୍ ସାଉଲ ଝାରି ଉପାୟ ନେସ୍‌ତେଙ୍ଗୁ ଆଟ୍‌ତାନ । ଖାନିଙ୍ଗୁ କାଡ଼‌ତେଙ୍ଗୁ ଇଜି ଝେଡେ ନାଡ଼ା ଖାର୍ ଗାଡ଼ତି ଦୁଆର୍ ଝିଜୁ କାପ୍‌କିଜି ତେବାତାର୍ ।

୨୫ ମାତର ଅରଲେନ୍ ନାଡ଼ା ସାଉଲତି ସିସୁର ଖାନିଙ୍ଗ ଉନ୍‌ଶ୍ଟି, ଦାଉଣିକାଦୁ ଇଡ଼ଜି ଗଡାଦି ଉନ୍‌ଶ୍ଟି, ରେଆତି ସାରି ସିଜି ଆଡ଼ଗି ରେପ୍‌ଡା ସିଡାର ।

### ଜିରୁସାଲାମ୍‌ତୁ ସାଉଲ

୨୬ ସାଉଲ ଜିରୁସାଲାମ୍‌ତୁ ସଲ୍‌ସି ସିସୁରି ଖାଲେ ମିସାଦେଙ୍ଗ ସେସ୍‌ କିତାନ୍ । ମାତର ଖାନ୍ ସିସୁ ଇଜି ଖାର ମୁଟେ ବିସ୍‌ବାସ୍ କିଏଡାର । ଝିଜେରେ ଖାନିଙ୍ଗ ଡିଲାଜି ମାର୍‌ହାନ୍ ।

୨୭ ମାତର ବର୍ଣ୍ଣବା ଖାନିଙ୍ଗ ପ୍ରେରିତ ସିସୁରି ଲାକ୍‌ତୁ ଅସି ଦାମାସ୍କସ୍ ସାରିଦୁ ସାଉଲ ଏଣ୍ଡେସ୍ ପ୍ରବୁଦି ଦର୍ସନ୍ ପୟ୍‌ଡାମାର୍‌ହାନ୍ ମାରି ପ୍ରବୁ ଏଣ୍ଡେସ୍ ଖାନିଙ୍ଗ ମାଟା ଇର୍‌ହାମାର୍‌ହାନ୍, ଇୟାଞ୍ଜିକୁ ବିସୟ୍ ଖାରିଙ୍ଗ ବୁଜାକିଜି ଇର୍‌ହାନ୍ । ଦାମାସ୍କସ୍‌ତୁ ଜିସୁଦି ଦର୍‌ଡାନ୍ ସାଉଲ ଏଣ୍ଡେସ୍ ଡିଲାଏଣ୍ଡା ପ୍ରଚାର କିତାମାର୍‌ହାନ୍, ଖାରିଙ୍ଗ ନେଗେନ୍ କିଜି ବୁଜାକିଜି ଇର୍‌ହାନ୍ ।

୨୮ ଇୟା ଝେନ୍‌କା ସାଉଲ ପ୍ରେରିତ ସିସୁରି ଖାଲେ ତେବାଡାନ୍ ମାରି ଜିରୁସାଲାମ୍‌ତି ସାରିବେଡ଼ତି ସଲ୍‌ସି ସାହାସ୍‌ଡାନ୍ ପ୍ରବୁଦି ଦର୍‌ଡାନ୍ ପ୍ରଚାର କିତାନ୍ ।

୨୯ ଇୟାଞ୍ଜିକୁ ବିସୟ୍‌ଡାନ୍ ଖାନ୍ ଗ୍ରିକ୍ ବାସାଦି ଜିହୁଦିର୍ ଖାଲେ ବା ଆସ୍‌ସିସାଡାର, ମାତର ଖାର ଖାନିଙ୍ଗ ଡାକ୍‌ଡେଙ୍ଗ୍ ସେସ୍‌ କିଡାର ।

୩୦ ବିସ୍‌ବାସି ତଡାନ୍‌କୁ ଇୟା ମାଟା ନେସ୍‌ସି; ସାଉଲତିଙ୍ଗ କାଈସରିଆଦୁ ଅଡାର ମାରି ଆବେଶାନ୍ ଖାନିଙ୍ଗ ତାର୍‌ସ୍‌ତୁ ପକ୍‌ଡାର ।

୩୧ ଜିହୁଦା, ଗାଲିଲି ମାରି ସମିରୋଶାଦୁ ମାନି କ୍ରିଷ୍ଟିୟାନ୍ ମଣ୍ଡଲିଙ୍ଗ ଉଣ୍ଡିଙ୍ଗ ଆୟା ସମୟତି ଦିନ୍ ସାନ୍ତି ମାର୍‌ହାଡ଼, ମାରି ପବିତ୍ର ଆମ୍‌ଦି ସାନ୍ତିଦାନ୍ ଖାରି ଲୋକୁ ନାଣ୍ଡ ଆଡାର ମାରି ଖାର ତାଡ଼ ଆଡାର । ବିସ୍‌ବାସିର୍ ପ୍ରବୁଦି ଉଣ୍ଡିଙ୍ଗ ମାନାଜି ଜିବନ୍ କାଟେ କିଡାର ।

### ପିତର ଲୁଦା ନି ଜପା ଗାଡ଼ତୁ

୩୨ ପିତର ନାଣ୍ଡ ଜାଗେଆଙ୍ଗ୍ ଟୁଲାଜି ବୁଲାଜି ଅରଲେନ୍ ଲୁଦାଦୁ ବାସାଜିମାନି ବିସ୍‌ବାସିରି ଲୋକାଙ୍ଗ ମିସାଦେଙ୍ଗ ଖାଡାନ୍ ।

୩୩ ଆବେନ୍ନ ଏନିୟ ଦରତି ଅରେନ୍ ଲୋକତିଙ୍ଗ ବେଟ୍‌ବୁଡ଼ାତାନ୍ । ଖାନ୍ କୁସ୍ ରୋଗତୁ ଆସାଇ ଆଜି ଆଟ୍‌ଗୋଟା ବାସେକ୍ ଆସ୍‌ସି କାଟେଲ୍‌ତାନ୍ ନିଙ୍ଗ୍ ଡେଙ୍ଗ୍ ଆଟ୍‌ଏଜି ମାର୍ହାନ୍ ।

୩୪ ପିତର ଖାନିଙ୍ଗ୍ ଇର୍ହାନ୍, “ଏନିୟ, ଜିସୁ କ୍ରିସ୍ଟ ନିଙ୍ଗ୍ ନେଗେନ୍ କିତାମାନାନ୍ । ନିଙ୍ଗ୍ ଥା, ନି ଟାଟି ରସ୍‌ଆ ।” ଆୟାଦାପ୍ରେ ଏନିୟ ନିଙ୍ଗ୍ ତାନ୍ ।

୩୫ ଇକା ସୁଡ଼ଜି ଲୁଦା ନି ସାରୋଣାଦୁ ବାସାକିଜିମାନି ଲୋକୁ ଝିଜେରେ ପ୍ରବୁଦି ଲାକ୍‌ତୁ ଡେସି ଖାତାର ।

୩୬ ଜପାଦୁ ଟବିତା ଦରତି ଅରେଡ୍ ବିସ୍‌ବାସିନି ଆଇମା ବାସାଜି ମାର୍ହାଡ୍ । ତାନି ଗ୍ରିକ୍ ଦର୍ ଦର୍କାସ୍ ଅର୍ଡାଡ୍ “ବନ୍ ଗରିଆ” ମାର୍ହାଡ୍ । ଖାଦ୍ ତାନି ଝିଜୁ ସମୟ ନେଗି ପାଣିଦୁ ମାରି କାକୁଟ୍ ଲୋକାଙ୍ଗ୍ ସେବା କିନିମାନି ସମୟ ସିଜି ମାର୍ହାଡ୍ ।

୩୭ ଆୟା ସମୟତୁ ନବ୍ ଆଜି ଖାଦ୍ ସାତା ସର୍ହାଡ୍ । ତତ୍‌କୁ ତାନି ମେନ୍‌ଲତିଙ୍ଗ୍ ଇବିସ୍ କିଜି ମୁସ୍‌କୁରି ମହଲ୍‌ାଦୁ ତେରେପ୍‌ତେ ।

୩୮ ଜପା ଲୁଦାଦାନ୍ ଆକ ସିଲେତାଡ୍ । ପିତର ଲୁଦାଦୁ ମାନାନ୍ ଇଜି ଝେନ୍‌ଜି, ଜପାଦୁ ମାନି ବିସ୍‌ବାସିର ରିଏର୍ ଲୋକାଙ୍ଗ୍ ଖାନି ଲାକ୍‌ତୁ ଇନ୍‌ଞ୍ଜି ପୋକ୍‌ତାର୍, “ଦୟା କିଜି ବେଗି ମା ଲାକ୍‌ତୁ ରାଆ ।”

୩୯ ପିତର ତିଆର୍ ଆଜି ଖାରି ଖାଲେ ସର୍ହାନ୍ । ଆବେ ଇତି ଦାପ୍ରେ ଲୋକୁ ଖାନିଙ୍ଗ୍ ମୁସ୍‌କୁରି ମହଲ୍‌ାଦୁ ଅତାର୍ । ଆବେ ରାଣ୍ଡିଆଇମେକ୍ ତାନିଙ୍ଗ୍ କେର୍‌ବିତେନ୍ ଆଡ୍‌ବାଜି ଆଡ୍‌ବାଜି ଦର୍କାସ୍ ଜିଜିମାନି ଖାଲେ ଗୁଡ୍‌ତି ମାର୍‌ଇ ଆଙ୍ଗ୍ ମାରି ଖାତିଙ୍ଗ୍‌ଝିଜୁ ଖାନିଙ୍ଗ୍ ତରତେ ।

୪୦ ପିତର ଝିଜେରିଙ୍ଗ୍ ବାକ୍‌ରାଦାନ୍ ଆଡ୍‌ରେ ସପ୍‌ତାନ୍ ମାରି ମେଣ୍ଡେଙ୍ଗ୍ ଗଟ୍‌କିଜି ପାର୍‌ତନା କିତାନ୍ । ତାନିଝେନ୍‌କା ଖାନ୍ ଦାର୍‌କାସ୍‌ତି ସାତି ମେନ୍‌ଲ୍‌ ତରିନ୍ ସୁଡ଼ଜି ଇର୍ହାନ୍, “ଟବିତା, ନିଙ୍ଗ୍ ଥା !” ଦର୍କାସ୍ କାଣୁକୁ ରେତାଡ୍ ମାରି ପିତରତିଙ୍ଗ୍ ସୁଡ଼ଜି ନିଙ୍ଗ୍‌ଜି ବାସ୍‌ତାଡ୍ ।

୪୧ ପିତର କିୟୁ ପେର୍‌ଜି ତାନିଙ୍ଗ୍ ଜିବନ୍ କିଜି ନିକ୍‌ତାନ୍ । ଝେନ୍‌କା ଡଣ୍ଡାତି ମାର୍‌ଇ ଝିଜୁ ବିସ୍‌ବାସି ନି ରାଣ୍ଡିଆଙ୍ଗ୍ କୁକ୍‌ସି ଦର୍କାସ୍‌ତିଙ୍ଗ୍ ଖାରି କିୟୁଦୁ ସପେ କିତାନ୍ ।

୪୭ ଇୟା କାବୁର୍ ଜପାଦି ଝିନ୍ନୁ ତରିନ୍ ଝେଙ୍ଗିତାତ୍ ମାରି ନାଣ୍ଡ  
ଲୋକୁ ପ୍ରବୁଙ୍ଗି ବିସ୍‌ବାସ୍ କିତାର୍ ।

୪୮ ପିତର ନାଣ୍ଡ ଦିନ୍ ସାନ୍ତି ଜପାଦୁ ସିମୋନ ଦର୍ତ୍ତି ଅରେନ୍  
ତଲ୍‌କୁପାଣିକିନି ଇଲ୍‌ତୁ ତେବାତାନ୍ ।

## ୧୦

### ପିତର ନି କଣ୍ଟିଲିୟ

୧ କାଇସରିଆଦୁ ବାସାନି କଣ୍ଟିଲିୟ “ଇଟାଲିଦି ବାହିନି” ଦର୍ତ୍ତି  
ରମିୟ ସୈନ୍‌ୟରି ସେନାପତି ମାର୍ହାନ୍ ।

୨ ୱାନ୍ ଅରେନ୍ ଦାମ୍‌ଲୁ ଲୋକୁ ମାର୍ହାନ୍ । ୱାନ୍ ମାରି ୱାନି ଇଲ୍‌ଦି  
ଝିଜେରେ ମାପୁରୁଙ୍ଗି ପାର୍ତନା କିଜିମାର୍ହାନ୍ । ୱାନ୍ କାକୁତ୍ ଜିହୁଦି  
ଲୋକାଦି ନେଗି ଉଣ୍ଡିଙ୍ ନାଣ୍ଡ ପାଣି କିଜି ମାର୍ହାନ୍ ମାରି ଦିନାମି  
ମାପୁରୁମାନ୍ ପାର୍ତନା କିଜିମାର୍ହାନ୍ ।

୩ ଅର୍ଲେନ୍ ଝେଡାରେନି ତିନ୍ ଗଣ୍ଡା ସମୟତୁ ୱାନ୍ ଉନ୍‌ଶ୍ଟି  
ଦର୍ସନତୁ ନେଗେନ୍ ସୁଡୁତାନ୍ ଜେ ମାପୁରୁଦି ଦୁଡ୍ ୱାଜି ୱାନିଙ୍  
କୁକ୍‌ସିନାନ୍, “କଣ୍ଟିଲିୟ ।”

୪ ୱାନ୍ ତିଲାଜି ଦୁଡ୍‌ତି ତରିନ୍ ସୁଡୁଜି ଇର୍ହାନ୍, “ଏ ପ୍ରବୁ ଇନିକା ?”

ଦୁଡ୍ ଇର୍ହାନ୍, “ମାପୁରୁ ନି ପାର୍ତନା ନି ଦାନସିନିମାନ୍ ଝେଡିକା  
ଆତାମାନାନ୍ ମାରି ତେନି ବାଦ୍‌ଲୁ ସିଦେଙ୍ଗ୍ ଇଜି ତିଆର୍ ମାନାନ୍ ।

୫ ଇଲେଇ ସିମୋନ ପିତର ଦର୍ତ୍ତି ଅରେନ୍ ଲୋକ୍‌ତିଙ୍ କୁକ୍‌ସ  
ତାତେଙ୍ଗ୍ ଇଜି ଜପାଦୁ ଲୋକାଙ୍ ପକ୍‌ଆ ।

୬ ୱାନ୍ ସାମ୍‌ଦୁର୍ ପାଡି ବାସାଜିମାନି ସିମୋନ ଦର୍ତ୍ତି  
ତଲ୍‌ପାଣିକିନି ୱାନି ଇଲ୍‌ଦୁ ମାନାନ୍ ।”

୭ ଇକା ଇଜି ଦୁଡ୍ ସର୍ହାନ୍ । କଣ୍ଟିଲିୟ ୱାନି ଇଲ୍‌ତି ରିଏର୍ ସାକର୍  
ନି ସନ୍‌ୟ ପାଣିକିନି ୱାରି ଲୋଇ ଅରେନ୍ ଦାମ୍‌ଲୁ ଲୋକାଙ୍ କୁକ୍‌ସ୍‌ତାନ୍  
।

୮ ୱାନ୍ ୱାରିଙ୍ ଝିନ୍ନୁ ଗଟଣା ଝେର୍‌ସି ଜପାଦୁ ପକ୍‌ତାନ୍ ।

୯ ମାରିନାଶିଙ୍ଗ ମାଦଲ୍ଲାମ୍ ଝେଡ଼ାଦୁ ଝାର ଜପାଦି ଲାକ୍ତୁ ଆନିଝାଲେ, ପିତର ପାର୍ତନା କିଦେଙ୍ଗ ଇଜି ସାଡ଼ ମୁସକୁ ସର୍ହାମାର୍ହାନ ।

୧୦ ଝାନ ବାଙ୍ଗା ସାଜି ଉଣ୍ଡେଙ୍ଗ ବଦା କିତାନ୍ ମାରି କାଦି ଆନି ସମୟତୁ ଝାନ ଉଣ୍ଡି ଦର୍ସନ୍ ପୟତାନ୍ ।

୧୧ ଝାନ ସୁଡ଼ତୁନ୍, ବାଦଡ଼ ରେଆତାମାନାଡ଼ ମାରି ଉଣ୍ଡି ପେରି ସାଦର ନାଲ୍ଗି କନାଦାନ୍ ଡ଼ଆଇ ଆଜି ଦୁନିଆଦି ମୁସକୁ ଆରଜି ଝାଜିନାଡ଼ ।

୧୨ ଆବେନ୍ ଦୁନିଆଦି ବେସି ରକମ୍ତି ଜାଡ଼ୁ, ଉଜ୍ଜନିକେଙ୍ଗ ମାରି ବାଦଡ଼ତି ପଟିଙ୍ଗ୍ ମାନେ ।

୧୩ ମାରି ଝାନ ଉଣ୍ଡି ବଲ୍ ଝେରୁଆନ୍, “ପିତର ! ନିଙ୍ଗ୍ ଥାଁ, ଡାକସ ତିନିଆ !”

୧୪ ମାତର ପିତର ଇର୍ହାନ୍, “ସିଲେ ପ୍ରବୁ, ନାନ୍ ଆର୍ଏ ! ନାନ୍ ଏସାଙ୍ଗ୍ ଇନି ତାର୍‌ଇକା ନି ଅପବିତ୍ର ଜିନିଷ୍ ତିନ୍ଏ ।”

୧୫ ମାରି ଉଣ୍ଡି ଦେବା ଝାନ ଝେରୁଆନ୍; “ମାପୁରୁ ଆମାକା ପବିତ୍ର କିତାମାନାନ୍, ନିନ୍ ତାନିଙ୍ଗ୍ ଅପବିତ୍ର ଅଡ଼ବିମା ।”

୧୬ ମୁଜା ଇୟାଝାଜା ଆନି ଝେନ୍‌କା, ସାଦରତିଙ୍ଗ୍ ମୁସକୁପୁରୁତୁ ପେରଜି ଅଥାୟ ଆତାଡ଼ ।

୧୭ ପିତର ଝାନି ଦର୍ସନ୍ତି ଅର୍ତ୍ତ ମାଟା ଅଡ଼ବିଜି କାବା ଆତାନ୍ । ଇୟା ଝେଡ଼ାଦୁ, କଣ୍ଟିଲିୟ ଏମେଝାରିଙ୍ଗ୍ ପକ୍ତାମାର୍ହାନ୍, ଝାର ସିମୋନତି ଇଲୁଦିଙ୍ଗ୍ ପୟଜି ଗେଟ୍ ଲାକ୍ତୁ ନିର୍ହା ମାର୍ହାର ।

୧୮ ଝାର ଝେନ୍‌ବାତାର, “ସିମୋନ ପିତର ଦର୍ତ୍ତିକାନ୍ ଇବେ ଅରେନ୍ କୁଡ଼ାଏନ୍ ମାନାନ୍ ନୋ ?”

୧୯ ପିତର ଆୟା ସାନ୍ ଦର୍ସନ୍ତି ଅର୍ତ୍ତ ବୁଜାଦେଙ୍ଗ୍ ଇଜି ସେଷ୍ଟା କିଜିମାର୍ହାନ୍, ଆୟା ସମୟତୁ ଆମ୍ ଇର୍ହାଡ଼, “ସୁଡ଼ଆ, ଇବେ ମୁଏର୍ ଲୋକୁ ନିଙ୍ଗ୍ ପୟଜିନାଡ଼ ।

୨୦ ତିଆର୍ ଆଜି ଆଡ଼ଗି ସାଙ୍ଗଆ ମାରି ଝାରିଝାଲେ ସନ୍ତେଙ୍ଗ୍ ଇଜି ଅଡ଼ବିଏଣ୍ଟା, ଇରିଙ୍ଗ୍ ନାନ୍ ଝାରିଙ୍ଗ୍ ପକ୍ତାମାନା ।”

୧୧ ପିତର ଆଡ଼ଗି ସଲ୍‌ସି ଆୟା ଲୋକାଙ୍ଗ ଇର୍ହାନ, “ମିର୍ ଏମେଞ୍ଜାନିଙ୍ଗ ପୟ୍‌ଜିନିଦେର୍, ନାନ୍ ଆକାନ୍ । ମିର୍ ଏୟା ଖାତିମାନିଦେର୍?”

୨୨ ଖାର ଇର୍ହାର, “ସେନାପତି କଣ୍ଟିଲିୟା ମାଙ୍ଗ ପକ୍ତାମାନାନ୍ । ଖାନ୍ ଅରେନ୍ ଦାମ୍‌ଦି ଲୋକୁ । ଖାନ୍ ମାପୁରୁଙ୍ଗ ଆରାଦନା କିନାନ୍ ମାରି ଜିହୁଦିର୍ ଖିଜେରେ ଖାନିଙ୍ଗ ମାନାନାର୍ । ନିଙ୍ଗ ଖାନି ଇନ୍‌ତୁ କୁକ୍‌ସି ଅସିନି ସିକିୟା ଖେନ୍‌ଡେଙ୍ଗ ଇଜି ମାପୁରୁଦି ଅରେନ୍ ପବିତ୍ର ଦୁଡ଼ ଖାନିଙ୍ଗ ଆଦେସ୍ ସିତାମାନାନ୍ ।”

୨୩ ପିତର ଖାରିଙ୍ଗ ଲୋଇ କୁକ୍‌ସି ଅସି ଆୟା ନାଡ଼ା ଆବେ ଡେବାଦେଙ୍ଗ ଇଜି ବାତିଙ୍ଗ ମାଲିତାର୍ ।

ମାରିନାଣ୍ଡିଙ୍ଗ ଖାନ୍ ତିଆର୍ ଆଜି ଖାରିଖାଲେ ସର୍ହାନ୍ । ଜପାଦୁ ଏସ ବିସ୍‌ବାସି ତଡ଼ାନ୍‌କୁ ବା ଖାନିଖାଲେ ଅର୍‌ସେ ସର୍ହାର୍ ।

୨୪ ମାରିନାଣ୍ଡିଙ୍ଗ ଖାର ସିସେରିଆଦୁ ଇତାର୍ । ଆବେ କଣ୍ଟିଲିୟା ଖାନି ପାଡ଼କାଦି ସଙ୍ଗ ନି ନିଜେଦି ଲୋକାଖାଲେ ପିତରତିଙ୍ଗ କାପ୍‌କିଜି ମାର୍ହାର୍ ।

୨୫ ପିତର ଲୋଇ ସନିଖାଲେ କଣ୍ଟିଲିୟା ଖାନିଙ୍ଗ ତରାଜି ଖାନି ପାଦାମ୍ ଆଡ଼ଗି ଆର୍‌ଜି ମାଡ଼ିସ୍ କିତାନ୍ ।

୨୬ ମାତର୍ ପିତର ଖାନିଙ୍ଗ ନିକ୍‌ସି ଇର୍ହାନ୍, “ନିଙ୍ଗ ଆଁ, ନାନ୍ ନିଜେ ଅରେନ୍ ଲୋକୁ ।”

୨୭ ପିତର କଣ୍ଟିଲିୟା ଖାଲେ ଖାରଗିବୁ ଖାରଗିବୁ ଇଲୁ ଲୋଇ ଡ଼ରୁତାର୍ ମାରି ଆବେ ନାଣ୍ଡ ଲୋକାଙ୍ଗ ଉଣ୍ଡାନି ମାନିକା ସୁଡ଼ୁତାନ୍ ।

୨୮ ଖାନ୍ ଖାରିଙ୍ଗ ଇର୍ହାନ୍, “ମିର୍ ନେଗେନ୍ କିଜି ନେସ୍‌ନିଦେର୍, ଅରେନ୍ ଜିହୁଦି ଖାନି ଦାମ୍‌ ବିସ୍‌ବାସ୍ ଇସାବ୍‌ତାନ୍ ଅଣଜିହୁଦି ଲୋକା ଖାଲେ ମିସାବିଡ଼ା କିଦେଙ୍ଗ ଆଟ୍‌ଏନ୍ । ମାତର୍ ମାପୁରୁ ନାଙ୍ଗ ଖେର୍‌ତାମାନାନ୍, ଏଙ୍ଗ ଡ଼ାଗ୍‌ଇକା ନି ଅପବିତ୍ର ଅଡ଼ବିନିକା ନେଗେଡ଼ ସିଲେ ।

୨୯ ଆଦେଙ୍ଗ ମିର୍ ଏସ୍‌ିଖାଲେ ନାଙ୍ଗ କୁକ୍‌ସିକିତି, ନାନ୍ ଇନିକା ଅଡ଼ବିଏଣ୍ଡା ଖାତା । ନାନ୍ ନେସ୍‌ଡେଙ୍ଗ ବଦା କିନା, ନିନ୍ ଏୟା ନାଙ୍ଗ କୁକ୍‌ସିକିତି?”

୩୦ କଣ୍ଠ ଲିୟ ଇର୍ହାନ, “ମୁନ୍ତ୍ରଦିନ୍ ଆଗ୍ତି ପୁରା ଇୟା ବେଡାଦୁ  
 ଝେଡାରେନି ମୁନ୍ତ୍ର ଗଣ୍ଡା ସମୟତୁ ନାନ୍ ନା ଇଲୁଦୁ ପାରତନା  
 କିଜିମାର୍ହା । ଆୟାଦାପ୍ରେ ଅଡିନିଆଙ୍ ଆରାତି ଅରେନ୍ ଲୋକୁ ନା  
 ଆଗ୍ତି ନିଲ୍ସି ଇର୍ହାନ;

୩୧ କଣ୍ଠ ଲିୟ ! ମାପୁରୁ ନି ପାରତନା ଝେର୍ହାମାନାନ୍ ମାରି ନିନ୍  
 କାକୁର୍ ଲୋକାଙ୍ ସେବା କିନିକା ସୁଡ଼ୁ ମାନାନ୍ ।

୩୨ ସିମୋନ ପିତର ଦର୍ତ୍ତି ଅରେନ୍ ଲୋକ୍ତିଙ୍ ତାତେଙ୍ ଇଜି  
 ଜପାଦୁ ଲୋକାଙ୍ ପକଆ । ଖାନ୍ ସାମ୍ବୁର ପାଡି ତେବାତିମାନି  
 ତଲ୍ପାଣି କିନି ସିମୋନ ଇଲୁଦୁ କୁଡାଏନ୍ ଆତାମାନାନ୍ ।

୩୩ ଆଦେଙ୍ ବେଗି ବେଗି ନାନ୍ ନିଙ୍ କୁକିସକିତା ମାରି ନିନ୍  
 ଦୟାକିଜି ଖାତିମାନି । ପ୍ରବୁ ନିଙ୍ ଆମାକା କିଦେଙ୍ ଇଜି ସିକିୟା  
 ସିତାମାନାନ୍, ଆକା ଝେନ୍ତେଙ୍ ମାପ୍ ଝିଜେରେ ଇଲେଇ ମାପୁରୁଦି  
 ଆଗ୍ତି ଉଣ୍ଡାତାମାନାପ୍ ।”

### ପିତରତି ସିକିୟା

୩୪ ପିତର ସିକିୟା ସିଦେଙ୍ ଆରାମ୍ କିଜି ଇର୍ହାନ, “ଇଲେଇ ନାନ୍  
 ବୁଜାଜିନା ଜେ ସଡ଼ ତାନ୍ ମାପୁରୁ ଝିଜେରିଙ୍ ସାମାନତାନ୍ ସୁଣାନ୍ ।

୩୫ ଆମା ଇନି ଜାତିଦି ଆମା ଏମେ ଲୋକୁ ପ୍ରବୁଦି ପାରତନା  
 କିତିଙ୍ ମାରି ଖାନି ଆଗ୍ତି ସଡ଼ପାଣି କିତିଙ୍, ପ୍ରବୁ ଖାନିଙ୍  
 ଆସ୍ନାନ୍ ।

୩୬ ମିର୍ ନେସ୍ତିମାନିଦେର୍ ଜେ ମାପୁରୁ ଇସ୍ରାଏଲ୍ ଲୋକା  
 ମାନ୍ ଏମେ ବାକ୍ୟ ପକ୍ତାମାର୍ହାନ, ଆକାନେ ଜିସୁଦି ମାଣାନ୍  
 ଝେରାୟାଆତିମାନି ସାନ୍ତିଦି ବାକ୍ୟ, ଇୟା ଜିସୁ କ୍ରିସ୍ ଝିଜେରି ପ୍ରବୁ ।

୩୭ ଜୋହନ ମନ୍ ଡେପ୍ନି ମାରି ଭୁବନ୍ ସିନି କାରୁର୍ ଝେରୁତି  
 ଝେନ୍କା, ଗାଲିଲିଦାନ୍ ଆରାମ୍ କିଜି ଝିଜୁ ଇସ୍ରାଏଲ୍ ଦେସ୍ତୁ ଆମା  
 ଝିଜୁ ଗଟନେଙ୍ ଗଟାତାସର୍ହାଡ଼, ଆକା ମିର୍ ନେସ୍ତିମାନିଦେର୍ ।

୩୮ ମିର୍ ନାଜରିତଦି ଜିସୁଦି ବିସୟତାନ୍ ମାରି ମାପୁରୁ ଏଣ୍ଡେସ୍  
 ଖାନି ମୁସକୁ ପବିତ୍ର ଆମା ନି ସାକ୍ତି ସିତାମାର୍ହାନ, ଆକା ନେସ୍ତିମାନିଦେର୍  
 । ଖାନ୍ ଝିଜୁ ତରିନ୍ ସଲ୍ସି କାବାଆନି ପାଣି କିତାନ୍ । ସୟତାନ୍ତି

ଅଦିକାରତାନ୍ ମାନି ଲୋକାଙ୍ଗୁଳ ନେଗେନ୍ କିତାନ୍, ଇରିଙ୍ଗ ମାପୁରୁ  
 ଖାନି ଖାଲେ ମାର୍ହାନ୍ ।

୩୯ ଜିହୁଦିରି ଦେସତୁ ମାରି ଜିରୁସାଲମତୁ ଖାନ୍ ଏମେ ଖିଜୁ ପାଣି  
 କିତାନ୍, ମାପ୍ ଆୟାଖିଜୁଦି ସାକି । ତାନେଖେନ୍‌କା ଖାନିଙ୍ଗ୍ ଖାର୍  
 କୁସଦୁ ଏକିସକିଜି ଡାକ୍‌ତାର୍ ।

୪୦ ମାତର୍ ମାପୁରୁ ମୁନେନ୍ ଲୋଇ ଖାନିଙ୍ଗ୍ ସାତିମାଣାନ୍  
 ପୁନିଜିବନ୍ ସିଜି ନିକ୍‌ତାନ୍ ।

୪୧ ଖାନ୍ ଖିଜେରି ଲାକ୍‌ତୁ ସିଲେ, ମାତର୍ ମାପୁରୁଦି ବାସେଆତିମାନି  
 ସାକି, ଅର୍ତ୍ତାତ୍ ମା ଲାକ୍‌ତୁ ତରାୟ୍‌ଆତାନ୍ । ମାପୁରୁ ଖାନିଙ୍ଗ୍ ସାତି  
 ମାଣାନ୍ ନିକ୍ତି ଖେନ୍‌କା ମାପ୍ ଖାନି ଖାଲେ ଉଟାପ୍ ତିର୍‌ଆପ୍ ।

୪୨ ଲୋକାମାନୁ ନେଗି କାବୁର୍ ପ୍ରଚାର୍ କିଦେଙ୍ଗ୍ ଇଜି ନି  
 ମାପୁରୁ ଜେ ଖାନିଙ୍ଗ୍ ଜିନିମାନି ନି ସାତିଖାରି ବିଚାର୍‌କିନି ଖାଜା  
 ନିଲ୍‌ପତାମାନାନ୍, ଇୟା ମାଟାଦି ସାକି ସିଦେଙ୍ଗ୍ ଇଜି ଖାନ୍ ମାଙ୍ଗ୍  
 ଆଦେସ୍ ସିତାମାନାନ୍ ।

୪୩ ଖିଜେରେ ବାବବାଦିର୍ ଖାନି ବିସୟ୍‌ତାନ୍ ଇୟା ସାକି  
 ଇର୍ହାମାର୍ହାର୍, ଏନ୍ ଖାନିମାନୁ ବିସ୍‌ବାସ୍ କିନାନ୍, ଖାନି ଦର୍ତ୍ତି ସାକ୍ତିଦୁ  
 ଖାନି ପାପ୍ କେମା ଆନାତ୍ ।”

### ଅଣଜିହୁଦିର୍ ପବିତ୍ର ଆତ୍ମା ପୟନିକା

୪୪ ପିତର ସିକିୟା ସିନିଖାଲେ ଏମେକାର୍ ଖାନି ସିକିୟା ଖେନ୍‌ଜି  
 ମାର୍ହାର୍, ଆୟା ଖିଜେରି ମୁସକୁ ପବିତ୍ର ଆତ୍ମା ରେଡାତାତ୍ ।

୪୫ ଅଣଜିହୁଦିରି ମୁସକୁ ବା ମାପୁରୁ ଖାନି ପବିତ୍ର ଆତ୍ମାଦାନ୍  
 ସିନିମାନିକା ସୁତ୍‌ଜି ପିତରତି ଖାଲେ ଖାତିମାର୍‌ଇ ଜପାଦି ଜିହୁଦି  
 ବିସ୍‌ବାସ୍‌ସିର କାବାଆତାର୍ ।

୪୬ ଇରିଙ୍ଗ୍ ଜିହୁଦି ବିସ୍‌ବାସିର୍ ଖାରିଙ୍ଗ୍ ମାପୁରୁଦି ଦନ୍‌ସ୍‌ବାଦ୍  
 କିଜିମାନିକା ନି ଆଇ ବାସାଦାନ୍ ଖାର୍‌ଗିଜିମାନିକା ଖେର୍‌ଆର୍ । ପିତର  
 ଇର୍ହାନ୍,

୪୭ “ମା ଖାଜା ଇୟା ଲୋକୁ ବା ପବିତ୍ର ଆତ୍ମା ପୟନାମାନାର୍ ।  
 ତୁବନ୍ ଅଡେଙ୍ଗ୍ ଇଜି ଏନ୍ ଇନିକା ଖାରିଙ୍ଗ୍ ବାଦା ସିଦେଙ୍ଗ୍ ଆର୍‌ନାନ୍  
 ?”

୪୮ ଆଦେଙ୍ଗ୍ ଖାନ୍ ଖାରିଙ୍ଗ୍ ଜିସୁ କ୍ରିସ୍ତ ଦରତାନ୍ ତୁବନ୍ ଅଡେଙ୍ଗ୍  
ଇଜି ଆଦେସ୍ ସିତାନ୍ । ତାନିଝେନ୍‌କା ଖାର୍ ଖାନିଙ୍ଗ୍ ମାରି ଏସ ଦିନ୍  
ଖାରି ଖାଲେ ତେବାଦେଙ୍ଗ୍ ବାତିଙ୍ଗ୍ ମାଲିତାର୍ ।

## ୧୧

ଜିରୁସାଲମ୍ ମଣ୍ଡଲିତୁ ପିତରଦି ଝେର୍‌ନିକା

୧ ଅଣଜିହୁଦିର୍ ବା ମାପୁରୁଦି ବାକ୍ୟ ଝେର୍‌ଆମାନାର୍ ଇଜି ପ୍ରେରିତ  
ସିସୁର୍ ମାରି ଜିହୁଦା ରାଜିଦି ଆଇ ବିସ୍‌ବାସି ତତାନ୍‌କୁ ଝେର୍‌ଆର୍ ।

୨ ପିତର ଏସିଝାଲେ ଜିରୁସାଲମ୍‌ତୁ ସର୍ହାନ୍, ଅଣଜିହୁଦିରିଙ୍ଗ୍ ସୁନ୍ନତ  
କିନି ତରିନ୍ ମାନି ଲୋକୁ ଖାନି ବିରୁଦ୍‌ତାନ୍ ଇର୍ହାର୍,

୩ “ନିନ୍ ଅସୁନ୍ନତ ଅଣଜିହୁଦିରି ଇଲ୍‌କାଙ୍ଗ୍ କୁଡାଏନ୍ ଆତିଙ୍ଗ୍,  
ଇୟାଝାଜାକି ଖାରିଝାଲେ ଉଟି ।”

୪ ମାତର୍ ଆର୍ଡିରାନ୍ ଆମାକା ଆମାକା ଗଟାତାମାହାଡ୍, ପିତର  
ଝାରିଙ୍ଗ୍ ଖାନି ପୁରା ମାଟା ସିଦେଙ୍ଗ୍ ସଲ୍‌ସି ଇର୍ହାନ୍ :

୫ “ନାନ୍ ଜପା ଗାଡୁତୁ ପାର୍‌ତନା କିଜିମାନିଝାଲେ ଉଣ୍ଡି ଦର୍ସନ୍  
ପୟ୍‌ତା । ଉଣ୍ଡି ପେରି ସାଦର୍‌ତି ନାଲ୍‌ଗି କନାଦାନ୍ ଦୁଙ୍ଗ୍‌ଜି  
ବାଦଡ୍‌ତାନ୍ ଆଡ୍‌ଗି ଆର୍‌ଜିମାନିକା ନାନ୍ ସୁଡୁତୁ, ଆକା ନା ଲାକ୍‌ତୁ  
ତେବାତାସର୍ହାଡ୍ ।

୬ ନାନ୍ ନେଗେନ୍‌କିଜି ଲୋଇ ସୁଡ୍‌ଜି ଆୟା ଲୋଇ ଇଲ୍‌ତୁ  
ପସାକିନି ଜାତୁଙ୍ଗ୍, ଦୁନିଆଦି ବନ୍ ଜାତୁଙ୍ଗ୍, ଉଜ୍‌ନିକେଙ୍ଗ୍\* ମାରି  
ବାଦଡ୍‌ତି ବନ୍ ପଟିଙ୍ଗ୍ ସୁଡୁତୁ ।

୭ ତାନିଝେନ୍‌କା ନାନ୍ ଇୟା ବଲ୍ ଝେର୍‌ଆ, ପିତର ! ନିଙ୍ଗ୍‌ଆଁ,  
କୟ୍‌ଜି ତିନ୍‌ଆ ।

୮ ମାତର୍ ନାନ୍ ଇର୍‌ଆ, ସିଲେ, ପ୍ରବୁ ! ନାନ୍ ଆର୍‌ଏ । ଇୟାସାଦି  
ଇଜି ଅପବିତ୍ର କାଦି ନା ଝେୟ୍‌ବୁ ଅଏ ।

୯ ମୁସ୍‌କୁପୁରତାନ୍ ମାରିଡେସି ଇୟା ବଲ୍ ଖାତାଡ୍, ମାପୁରୁ ଆମାକା  
ପବିତ୍ର କିତାମାନାନ୍, ନିନ୍ ତାନିଙ୍ଗ୍ ଅପବିତ୍ର ଅଡ୍‌ବିମା ।”

\* ୧୧:୬ ଉଜ୍‌ନିକେଙ୍ଗ୍ ଆଜିନାଡ୍ ତାନି ଅର୍ଥ ଆମା ଖିଜୁ ବୁମିବୁ ଉଜ୍‌ନି ଖାନିକାଙ୍ଗ୍  
ବୁଜାଜିନାଡ୍ । ସାରାସ୍, ପିଡ଼କୁ, ସିଝାତି, କାପୋକି, ତକି ଇନିକା ଇନିକା ଖିଜୁଦିଙ୍ଗ୍ ବୁଜାନାଡ୍  
।

୧୦ ମୁଜା ଇୟାଞ୍ଜା ଆତାଡ଼, ସାରାସାରି ଆୟାଞ୍ଜିନ୍ ମୁସକୁପୁରତୁ ପେରଜି ଅଆୟାଆତେ ।

୧୧ ଟିକ୍ ଆୟା ସମୟତୁ, ସିସେରିଆଦାନ୍ ନା ଲାକ୍ତୁ ପକାୟାଆତିମାର୍‌ରି ମୁଏର୍ ଲୋକୁ ନାନ୍ ଏମେ ଇଲୁଦୁ ତେବାଜିମାର୍‌ହା, ଆବେ ଇଗାଞ୍ଜାତାର ।

୧୨ ଖେନ୍‌କା ଅଡ଼ବିଏଶ୍‌ଗା ଖାରି ଖାଲେ ସନ୍‌ଶ୍ରେଙ୍ଗ୍ ଇଜି ପବିତ୍ର ଆମ୍ବା ନାଙ୍ଗ୍ ଆଦେସ୍ ସିତାଡ଼ । ଜପାଦି ଇୟା ସଅ ଲୋକୁ ବିସ୍‌ବାସି ତଡ଼ାନକୁ ନା ଖାଲେ ସିସେରିଆଦୁ ସର୍‌ହାର୍ ମାରି ମାପ୍ ଖିଜେରେ କଣ୍‌ଲିୟଦି ଇଲୁଦୁ ଇତାପ୍ ।

୧୩ ଖାନି ଇଲୁଦୁ ଖାନ୍ ଏଶ୍ରେସ୍ ମୁସକୁପୁରତି ଦୁଡ଼ତି ଦର୍‌ସନ୍ ପୟତାମାର୍‌ହାନ୍, ଆୟା ବିସୟତାନ୍ ମାଙ୍ଗ୍ ଖେରତାନ୍ । ମୁସକୁପୁରତି ଦୁଡ଼ ଖାନିଙ୍ଗ୍ ଇର୍‌ହାମାର୍‌ହାଡ଼, “ଜପାଦୁ ମାନି ସିମୋନ ପିତର ଦରତି ଅରେନ୍ ଲୋକ୍‌ତିଙ୍ଗ୍ ତାତେଙ୍ଗ୍ ଇଜି ଲୋକାଙ୍ଗ୍ ପକ୍‌ତୁ ।

୧୪ ଖାନ୍ ଖାଜି ମିଙ୍ଗ୍ ସିକିୟା ସିନାନ୍ ମାରି ଆବେଶକୁ ନିନ୍ ମାରି ନି ଇଲୁତି ଖିଜେରେ ରକିୟା ପୟନାର ।

୧୫ ମାରି ନାନ୍ ଏସ୍ତିଖାଲେ ସିକିୟା ସିଦେଙ୍ଗ୍ ଆରାମ୍ କିତା, ଆଗ୍‌ଡ଼ି ପବିତ୍ର ଆମ୍ବା ଏଶ୍ରେସ୍ ମା ମୁସକୁ ରେତାତା ମାର୍‌ହାଡ଼, ଆୟାଞ୍ଜା ଖାରି ମୁସକୁ ରେତାତାଡ଼ ।

୧୬ ☆ତାନିଖେନ୍‌କା ନାନ୍ ପ୍ରବୁଦି ଇୟା ବାକ୍ୟ ଏଡ଼ କିତା : ଜୋହନ ଏରୁତୁ ତୁବନ୍ ସିତାନ୍, ମାତର୍ ମିର୍ ପବିତ୍ର ଆମ୍ବାଦାନ୍ ତୁବନ୍ ଆନିଦେର୍ ।

୧୭ ଇକା ପୁରାସଡ଼ ଜେ ମାପ୍ ପ୍ରବୁ ଜିସୁ କ୍ରିସ୍ତିମାନୁ ବିସ୍‌ବାସ୍ କିତି ଡ଼ଣ୍‌ଙ୍ଗ୍ ମାପୁରୁ ମାଙ୍ଗ୍ ଏମେ ଦାନ୍ ସିତା ମାର୍‌ହାନ୍, ଅଶଜିହୁଦିରିଙ୍ଗ୍ ବା ଆୟା ଦାନ୍ ସିତାମାନାନ୍; ନାନ୍ ଏନ୍ ଜେ ମାପୁରୁଦି ଇୟା ପାଣିଦିଙ୍ଗ୍ ବିରୁଦ୍ କିନା !”

୧୮ ଖାର ଇକା ଖେରଇ ଖେନ୍‌କା ମାରି ଜାଟି କିଏନ୍‌ଶ୍ଟା ମାପୁରୁଦି ଦନ୍‌ୟବାଦ୍ କିଜି ଇର୍‌ହାର୍, “ଆରିଙ୍ଗ୍ ମାପୁରୁ ଅଶଜିହୁଦିରିଙ୍ଗ୍ ବା ଏଡ଼କିଦେଙ୍ଗ୍ ମାରି ଜିଦେଙ୍ଗ୍ ସୁଜୋଗ ସିତାମାନାନ୍ ।”

### ଆଣ୍ଟିକିୟାଦି ମଣ୍ଡଳି

୧୯ ✠ ସ୍ତ୍ରୀପାନ୍ତି ସାତି ଖେନକା ବିସ୍‌ବାସିର ତାଡ଼ନା ପୟଜି ଇନିଙ୍ଗି ଆନିଙ୍ଗି ଆନିଝାଲେ ଖାରି ଲୋଇ ଏସଲୋକ୍ କେବଲ୍ ଜିହୁଦିର ଲାକ୍‌ତୁ ବାକ୍ୟ ପ୍ରଚାର କିଜି, ପିନିସିଆ, ସାଇପ୍ରସ୍ ମାରି ଆଣ୍ଟିୟକ୍ ସାନ୍ତି ସର୍ହାର ।

୨୦ ମାତର ସାଇପ୍ରସ୍ ମାରି କୁରିଣିଦି ଆଇ ଏସ ବିସ୍‌ବାସିର ଆଣ୍ଟିୟକ୍‌କୁ ସଲ୍‌ସି ଅଣଜିହୁଦିରି ଲାକ୍‌ତୁ ପ୍ରବୁ ଜିସୁଦି ନେଗି କାରୁର ପ୍ରଚାର କିତାର ।

୨୧ ମାପୁରୁଦି ସାଲ୍ଲି ଖାରି ଖାଲେ ମାର୍ହାତ୍ ମାରି ନାଣ୍ଟ ଲୋକୁ ବିସ୍‌ବାସ୍ କିଜି ପ୍ରବୁଦି ତରିନ୍ ମନ୍ ଡେପ୍‌ତାର ।

୨୨ ଏସ୍ତ୍ରାଲେ ଇୟା କାରୁର ଜିରୁସାଲାମ୍‌ତି ମଣ୍ଡଳିକୁ ଇତାଡ଼, ଖାର ବର୍ଣ୍ଣବାସ୍‌ତିଙ୍ଗ୍ ଆଣ୍ଟିୟକ୍‌କୁ ପକ୍‌ତାର ।

୨୩ ଖାନ୍ ଆବେ ଇଜି ମାପୁରୁ ଆୟା ଲୋକାଙ୍ଗ୍ ଏଣ୍ଡେସ୍ ଆସିର୍ବାଦ୍ କିତାମାନାନ୍, ଆକା ସୁଡ଼ଜି ଖେଡ଼ିକା ଆତାନ୍ ମାରି ଜିବନ୍‌ତୁ ପ୍ରବୁଦି ଉଣ୍ଡିଙ୍ଗ୍ ବିସ୍‌ବାସ୍ ଡେବାଜି ନେଗେନ୍ ଜିଦେଙ୍ଗ୍ ଖାରିଙ୍ଗ୍ ଖେରତାନ୍ ।

୨୪ ବର୍ଣ୍ଣବାସ୍ ପବିତ୍ର ଆମ୍ ନି ବିସ୍‌ବାସ୍‌ତୁ ପୁରାଆତି ଅରେନ୍ ନେଗି ଲୋକୁ ମାର୍ହାନ୍ । ଖାନି ପ୍ରଚାରତାନ୍ ନାଣ୍ଟ ଲୋକୁ ପ୍ରବୁଦି ଲାକ୍‌ତୁ ଖାତାର ।

୨୫ ତାନିଖେନକା ବର୍ଣ୍ଣବାସ୍ ସାଉଲତିଙ୍ଗ୍ ପୟ୍‌ଦେଙ୍ଗ୍ ଇଜି ତାର୍‌ସ୍‌ତୁ ସର୍ହାନ୍ ।

୨୬ ଆବେ ଖାନିଙ୍ଗ୍ ପୟ୍‌ଜି ଆଣ୍ଟିୟକ୍‌କୁ ତାତାନ୍ । ମାରି ପୁରା ଉନ୍‌ଶ୍ଟି ବାର୍‌ସେକ୍ ସାନ୍ତି ଇୟା ରିଏର୍ ଆୟାବାଣି ମଣ୍ଡଳିଦି ବିସ୍‌ବାସିରି ଖାଲେ ମିସାଜି ନାଣ୍ଟ ଲୋକାଙ୍ଗ୍ ସିକିୟା ସିତାର । ଇୟା ଆଣ୍ଟିୟକ୍‌ଦି ବିସ୍‌ବାସିରିଙ୍ଗ୍ ଲୋକୁ ଆଗ୍‌ତି କ୍ରିଷ୍ଟିୟାନ୍ ଇଜି ଇର୍ହାମାର୍ହାର ।

୨୭ ଆୟା ବେଡାଦୁ ଜିରୁସାଲାମ୍‌ତାନ୍ ଏସ ବାବବାଦିର ଆଣ୍ଟିୟକ୍‌କୁ ଖାତାର ।

୨୮ ☆ ଖାରି ଲୋଇ ଆଗାବ ଦରତି ଅରେନ୍ ଲୋକୁ ଆମ୍ଭାଦି ସାକ୍ତିଦାନ ପୁରାଆଜି ଖିନ୍ନ ଦୁନିଆକୁ ଉନ୍ନିଷ୍ଟ ପେରି କାକୁଡ଼ ଆନାଡ଼ ଇଜି ବବିସଡ଼ ମାଟା ଖେରତାନ । ସମ୍ରାଟ କ୍ଳାତିୟସ୍ତି ସମୟତୁ ଇକା ଗଟାତାମାର୍ହାତ ।

୨୯ ସିସୁର ଜିହ୍ୱାଦାଦୁ ବାସାଜିମାନି ବିସ୍ବାସି ତଡ଼ାନକା ଲାକ୍ତୁ ଖାରି ସିଦେଙ୍ଗ ଆର୍ବନି ସାନ୍ଦି ସାହାଜ୍ୟ ପକ୍ନାର ଇଜି ତିର କିତାର ।

୩୦ ଖାର ତାବୁଙ୍ଗୁ ଉଣ୍ଡା କିଜି ବର୍ଣ୍ଣବାସ ନି ସାଉଲତି କିଦୁ ମଣ୍ଡଲିଦି ପେରି ନେତାରରି ଲାକ୍ତୁ ଆକା ପୋକ୍ତାର ।

## ୧୨

### ନାଣୁ କାସୁ ପୟନିକା

୧ ଇୟା ସମୟତୁ ରାଜା ହେରୋଦ ମଣ୍ଡଲିଦି ଏସ ଲୋକାଙ୍ଗ କାସୁୟନିକା ଆରାମ୍ କିତାନ ।

୨ ଖାନ ଜୋହନତି ତଡ଼ାନ ଜାକୁବଙ୍ଗ କାଣ୍ଡାଦାନ କାତିସ୍ତାନ ।

୩ ଜିହ୍ୱାଦିର ଇବେ ଖେଡ଼ିକା ସୁଡ଼ଜି ଖାନ ପିତରତିଙ୍ଗ ବା ତର୍ସିସ୍ କିତାନ । ଇୟା ଗଟନା କମିରିମିସାକିଏନ୍‌ଶ୍ଟା ରୁଟି ପଣ୍ଡୟତି ସମୟତୁ ଗଟାତାମାର୍ହାତ ।

୪ ପିତର ତରାୟାଜି ଜଇଲ୍‌ତୁ ଇଡାୟ ଆତାନ ମାରି ନାଲ୍‌ଏର୍ ନାଲ୍‌ଏର୍ ଲୋକୁ ସନ୍ୟରିଙ୍ଗ ଅସି କିଆୟାଆତି ନାଲ୍‌ଗି ଦଲ୍ ସନ୍ୟର୍ ଖାନିଙ୍ଗ କାପ୍‌କିଜି ତେବାତାର । ନିସ୍ତାର ପଣ୍ଡୟ ଖେନ୍‌କା ଖିଜେରେ ଲୋଇ ଖାନି ବିସାର କିନିକା ହେରୋଦ୍‌ତି ବଦା ମାର୍ହାତ ।

୫ ପିତର ଜଇଲ୍‌ତୁ ମାନିଖାଲେ ମଣ୍ଡଲିଦି ଲୋକୁ ଉଣ୍ଡି ମନ୍‌ତାନ ଖାନ ଉଣ୍ଡିଙ୍ଗ ମାପୁରୁଦି ଲାକ୍ତୁ ପାର୍ତାନା କିଜିମାର୍ହାର ।

### ଜଇଲ୍‌ତାନ ପିତରତି ମୁକୁଡ଼ାନିକା

୬ ଆମା ନାଣ୍ଡିଙ୍ଗ ହେରୋଦ ପିତରତିଙ୍ଗ ଲୋକା ଆଗ୍ତି ତାନି ଉଣ୍ଡିଙ୍ଗ ଅଡ଼ବିତା ମାର୍ହାନ, ତାନି ଆଗ୍ତିରି ନାଡ଼ା ପିତର ରିଏର୍ କାପ୍‌କିନିଖାରି ନାଡ଼ି ତରିତାମାର୍ହାନ । ରୁଣ୍ଡି ସିକ୍‌ଶି ଦାନ ଖାନିଙ୍ଗ

ତରତାମାର୍ହାର ମାରି ଜଇଲ୍‌ତି ସେରଲା ଲାକ୍‌ତୁ କାପ୍‌ନିକାର କାପ୍‌କିତା ମାର୍ହାର ।

୭ ଆୟାଦାପ୍ରେନେ ପ୍ରବୁଦି ଅରେନ୍ ଦୁଡ଼ ଖାଜି ନିର୍‌ଆଡ଼ ମାରି ବାକରା ଜାୟ ଆତାସର୍‌ହାଡ଼ । ଦୁଡ଼ ପିତରତି ଗୁଜାମ୍‌ତିଙ୍ଗ୍ ଦୁକ୍‌ଜି ଖାନିଙ୍ଗ୍ ସୁସ୍‌କାଶ୍‌କାଶ୍‌କୁ ନିକ୍‌ସି ଇର୍‌ହାଡ଼, “ବେଗି ନିଙ୍ଗ୍ ଆ !” ବେଗି ବେଗି ପିତରତି କିୟୁଦୁ ତର‌ଆତିମାହ୍ ସିକ୍‌ଶିଙ୍ଗ୍ ଆର୍‌ତେ ସର୍‌ଏ ।

୮ ତାନିଝେନ୍‌କା ଦୁଡ଼ ଇର୍‌ହାଡ଼, “ଜୁକିଦି ଗାଟି ତର‌ଆ, ଜୁଡେଙ୍ଗ୍ ଆର‌ଆ ।” ପିତର ଆକା କିତିଝେନ୍‌କା ଦୁଡ଼ ଇର୍‌ହାଡ଼, “ମେନ୍‌ଲ୍‌ତୁ ସାଦର୍‌ ପକ୍‌ସି ନା ଝେନ୍‌କା ର‌ଆ ।”

୯ ଦୁଡ଼ ଆମାକା କିଜିମାର୍‌ହାଡ଼, ଆକା ଉଣ୍ଡି ସଡ଼ ଗଟନା ନୋ ସିଲେ, ପିତର ନେସ୍‌ଡେଙ୍ଗ୍ ଆର୍‌ଏତାନ୍ । ଖାନ୍ ଲବ୍ ସୁଡ଼ଜିନାନ୍ ଇଜି ଅଡ଼ବିତାନ୍ । ଆରିଙ୍ଗ୍‌ବା ପିତର ଜଇଲ୍‌ତାନ୍ ସହସି ଦୁଡ଼ତି ଖାଲେ ସର୍‌ହାନ୍ ।

୧୦ ଖାର କାପ୍‌କିନିଝାରି ପାର୍‌ତୁମ୍ ନି ମାରି ଉନ୍‌ଣ୍ଡି ବାତି ଜିଶାଜି ସାରାସାରି ଗାଡ଼ତୁ ଡ଼ଗୁନି ସାରିଦୁ ମାନି ଲୁଝା ସେରଲା ଲାକ୍‌ତୁ ଖାତାର । ଖାରି ଉଣ୍ଡିଙ୍ଗ୍ ସେରଲା ତାନି ମନ୍‌ତିଙ୍ଗ୍ ରେଏତାଡ଼ ମାରି ଖାର ସହସି ବୁଲାଜି ଖାତାର । ଖାର ପେରିଜାରିଦୁ ସଲ୍‌ପୁ ସଲ୍‌ପୁ ଆୟାଦାପ୍ରେନେ ମୁସ୍‌କୁପୁରତି ଦୁଡ଼ ପିତରତିଙ୍ଗ୍ ଡ଼ିସ୍‌ସି ସର୍‌ହାଡ଼ ।

୧୧ ତାନିଝେନ୍‌କା, ଆମାକା ଗଟାତାମାର୍‌ହାଡ଼, ପିତର ଆକା ନେସ୍‌ଡେଙ୍ଗ୍ ଆର୍‌ସି ଇର୍‌ହାନ୍, “ଇକା ସଡେନେ ସଡ଼ ଇଜି ନାନ୍ ନେସ୍‌ଡେଙ୍ଗ୍ ଆର୍‌ସିନା । ହେରୋଦତି ସାକ୍ତିଦାନ୍ ମାରି ଜିହୁଦି ଲୋକୁ ଆମାକା ଗଟାନାଡ଼ ଇଜି ଆସା କିତାମାର୍‌ହାଡ଼, ଆବେଟ୍‌କୁ ନାଙ୍ଗ୍ ରକିୟା କିଦେଙ୍ଗ୍ ଇଜି ପ୍ରବୁ ମୁସ୍‌କୁପୁରତି ଦୁଡ଼ତିଙ୍ଗ୍ ପକ୍‌ତାମାର୍‌ହାନ୍ ।”

୧୨ ନିଜେଦି ଅବସ୍ଥାଦି ବିସୟତାନ୍ ଜାଗାର୍‌ତା ଆଜି ଖାନ୍ ଜୋହନତି ନି ମାର୍‌କିରି ଆଇସି ମରିୟମତି ଇଲୁଦୁ ସର୍‌ହାନ୍ । ଆବେ ନାଣ୍ଡ ଲୋକୁ ଉଣ୍ଡାଜି ପାର୍‌ତନା କିଜିମାର୍‌ହାଡ଼ ।

୧୩ ପିତର ଆତ୍ମରେ ସେରଲ୍ଲାଦୁ କଡ଼ତାନ, ରୋଦା ଦର୍ତ୍ତି ଅରେଡ଼ ଦାସି ସେରଲ୍ଲା ରେଡେଙ୍ଗ୍ ଝାଡ଼ାଡ଼ ।

୧୪ ପିତରତି ବଲ୍ ନେସଡେଙ୍ଗ୍ ଝାଡ଼ାସି ଝାଡ଼ ନିସା ଝେଡ଼ିକା ଆତାଡ଼ଜେ ସେରଲ୍ଲା ରେସନ୍‌ଶ୍ଟା ପିତର ଆତ୍ମରେ ନିର୍ଆ ମାନାନ୍ ଇଜି ଝେରଡ଼ାଡ଼ ।

୧୫ ଝାର ତାନିଙ୍ଗ୍ ଇର୍ହାର, “ନିନ୍ ବାୟା ଆତିମାନି ।” ମାତର୍ “ଇକା ସଡ଼” ଇଜି ଝାଡ଼ ଆଡ଼ଝାଦାନ୍ ଇର୍ହାଡ଼ଆକା, ଝାର ଅଡ଼ବିତାର, “ଆରିଙ୍ଗ୍ ଆନାମାନାଡ଼, ଇକା ଝାନି ଦୁଡ଼ ।”

୧୬ ପିତର ଜାରିଦିଙ୍ଗ୍ ଜାରି ସେରଲ୍ଲାଦୁ କଡ଼ସି ମାର୍ହାନ୍ । ସାରାସାରି ଝାର ସେରଲ୍ଲା ରେସି ଝାନିଙ୍ଗ୍ ସୁଡ଼ଜି କାବାତାର ।

୧୭ ଝାନ୍ କିୟୁଦାନ୍ ଜୁର୍ସି ଆଲ୍‌ଜ ମାନ୍‌ଡେଙ୍ଗ୍ ଇର୍ହାନ୍, ମାରି ପ୍ରବୁ ଝାନିଙ୍ଗ୍ ଏଣ୍ଡେସ୍ ଜଇଲ୍‌ତାନ୍ ସପ୍‌ସି ତାତାନ୍, ଆୟା ବିସୟ ଝାରି ଆରଡ଼ି ଝେରଡ଼ାନ୍ । ତାନିଝେନ୍‌କା ଇୟାଝିଜୁ ମାଟା ଜାକୁବ ନି ଆଇ ଝିଜେରେ ବିସ୍‌ବାସିରି ତଡ଼ାନ୍‌କାଙ୍ଗ୍ ଝେରଡେଙ୍ଗ୍ ଇଜି ଆଦେସ୍ ସିଜି ଝାନ୍ ଆବେବୁକୁ ଆଇତରିନ୍ ସର୍ହାନ୍ ।

୧୮ ସାଲ୍‌ଦି ଆତି ଝେନ୍‌କା ପିତର ଏମେ ସର୍ହାନ୍ ଇଜି କାପ୍‌କିନିଝାରି ଲୋଇ ଗାବ୍‌ରା ଆତାସର୍ହାର ।

୧୯ ହେରୋଦ ଝାନିଙ୍ଗ୍ ପୟ୍‌ଦେଙ୍ଗ୍ ଆଦେସ୍ ସିତାନ୍, ମାତର୍ ଝାର ଝାନିଙ୍ଗ୍ ପୟ୍‌ଏତାର । ସାରାସାରି କାପ୍‌କିନିଝାରିଙ୍ଗ୍ ଝେନ୍‌ବାଜି ଝାରିଙ୍ଗ୍ ସାନିଦଣ୍ଡ ସିନି ଉଣ୍ଡିଙ୍ଗ୍ ଆଦେସ୍ ସିତାନ୍ ।

ତାନିଝେନ୍‌କା ହେରୋଦ ଜିହୁଦା ଦେସ୍‌ତାନ୍ ସଲ୍‌ସି କାଇସରିଆଦୁ ତେବାତାନ୍ ।

### ହେରୋଦତି ସାନିକା

୨୦ ଆୟା ସମୟତୁ ହେରୋଦ ସୋର ନି ସିଦୋନତି ଲୋକା ମୁସକୁ ନାଣ୍ଡ ରିସା ଆତାମାର୍ହାନ୍ । ଆଦେଙ୍ଗ୍ ଝାରି ଲୋଇ ଉଣ୍ଡି ଦଲ୍ ଝାନିଙ୍ଗ୍ ତରଆୟ୍ ଆଦେଙ୍ଗ୍ ଇଜି ସର୍ହାର । ପାର୍‌ଡୁମ୍ ଝାର ରାଜା ମେଡ଼ତି ଦାୟିତୁ ମାନି ଲ୍ଲାସ୍‌ଜି ବୁଜାକିଜି ଝାନି ସାହାଜ୍ୟ ପୟ୍‌ତାର । ତାନିଝେନ୍‌କା ଝାର ହେରୋଦତି ଲାକ୍‌ତୁ ସଲ୍‌ସି ସାନ୍ତି ଲସ୍‌ତାର,

ଇରିଙ୍ଗ ହେରୋଦତି ଦେସ୍‌ଦାନ ଖାରି ଦେସ୍‌ତୁ କାଦି ଓଁଜୁ ପକ୍ସି ମାର୍ହାର ।

୨୧ ବାସେ ଆତି ଦିନ୍‌ତୁ ହେରୋଦ ଖାନି ରାଜାଦି ଆଙ୍ଗ ଆରାତାନ ମାରି ବିଚାର କିନି ରାଜାଗାଦିଦୁ ବାସ୍‌ସି ଲୋକାଙ୍ଗ ଉନ୍‌ଶି ମାଟା ଖେରତାନ ।

୨୨ ଖାର ଆଉଲି ଆତାର, “ଇକା ଇନି ଲୋକାଦି ଆଏଡ୍, ମାତର୍ ଅରେନ୍ ମାପୁରୁଦି ବଲ୍ !”

୨୩ ଆୟାଦାପ୍ରେ ପ୍ରବୁଦି ଦୁଡ୍ ହେରୋଦତିଙ୍ଗ ତାକ୍‌ତାନ, ଇରିଙ୍ଗ ମାପୁରୁଙ୍ଗ ଏମେ ଗୌରବ୍ ସିନି ମାଟା, ଖାନ୍ ଆକା ଖାନିଙ୍ଗ ସିଏନ୍ ମାର୍ହାନ । ପିଡ୍‌କୁ ଆଜି ଖାନ୍ ସାତାନ ।

୨୪ ଇୟା ସମୟ ଲୋଇ ମାପୁରୁଦି ବାକ୍ୟ ପିରଜି ଖେଙ୍ଗ ଦେଙ୍ଗ ଆସ୍‌ତାଡ୍ ।

୨୫ ବର୍ଣ୍ଣବା ମାରି ସାଉଲ ଜିରୁସାଲାମ୍‌ତୁ ସେବା ପାଣି ଓଁସ୍‌ସି ଜୋହନ ମାର୍କଙ୍ଗ ଅର୍‌ସେ ଅସି ଜିରୁସାଲାମ୍‌ତାନ ଡେସିସ୍‌ହାର ।

## ୧୩

ବର୍ଣ୍ଣବା ନି ସାଉଲ ପ୍ରେରିତ ସିସୁ ଖାଜା ବାସେ ଆତାର

୧ ଆଶ୍ଟିୟକ ମଣ୍ଡଳିଦୁ ଏସ ବାବବାଦି ନି ସିକିୟା ଗୁରୁର୍ ମାର୍ହାର । ଖାରି ଲୋଇ ମାର୍ହାନ ବର୍ଣ୍ଣବା, ସିମୋନ ଆମାକାନକି ନିଗର ଦରତାନ ଖେଙ୍ଗ ତା ମାର୍ହାନ, ଲୁସିଅସ୍ କୁରିଣିଦୁ ବାସାନିକାନ, ମହନେମ ଖାନ୍ ରାଜିୟ ପାଲ ହେରୋଦତି ଇଲ୍‌ତୁ ପିରିତାମାର୍ହାନ ମାରି ସାଉଲ ।

୨ ଖାର ପ୍ରବୁଦି ସେବା ନି ଉପାସ୍ କିନିଖାଲେ, ପବିତ୍ରଆମ୍ ଖାରିଙ୍ଗ ଇର୍ହାନ, “ନାନ୍ ଏମେ ପାଣି ଉଣ୍ଡିଙ୍ଗ ବର୍ଣ୍ଣବା ନି ସାଉଲତିଙ୍ଗ କୁକ୍‌ତାମାନା, ଆୟାଉଣ୍ଡିଙ୍ଗ ଖାରିଙ୍ଗ ନା ଉଣ୍ଡିଙ୍ଗ ଖେରଏ କିଦୁ ।”

୩ ଖାର ଉପାସ୍ ନି ପାରତନା କିଜି ଆୟା ରିଏରି ମୁସ୍‌କୁ କିକୁ ଇଡ୍‌ଜି ଖାରିଙ୍ଗ ପ୍ରଚାରକିନି ପାଣିଦୁ ପୋକ୍‌ତାର ।

ସାଉପ୍ରସ୍‌ତୁ ସେବା ପାଣି

୪ ପବିତ୍ର ଆତ୍ମାଦି ମାଣନ୍ ପକାୟ ଆଜି ବର୍ଣ୍ଣବା ନି ସାଉଲ ସେଲୁକିୟାଦୁ ସର୍ହାର ମାରି ଆବେଟ୍‌କୁ ଜାହାଜ୍‌ତାନ୍ ସାଇପ୍ରସ ସାରିବେଡ୍‌ତି ସାମ୍ବୁର୍ ମାନି ନାଣ୍‌ମିରି ଇସ୍‌ବ୍ରୁମି ବାଡିଦୁ ସର୍ହାର ।

୫ ସାଲାମି ଗାଡ୍‌ତୁ ଇଜି ଜିହୁଦିର୍ ପାରତନାକିନି ଇଲ୍‌କାଙ୍ ମାପୁରୁଦି ବାକ୍ୟ ପ୍ରଚାର କିତାର । ଜୋହନ ମାର୍କ ଖାରିଖାଲେ ମାନ୍‌ଜି ସାହାଜ୍ୟ କିଜିମାର୍ହାନ୍ ।

୬ ଖାର ସାଇପ୍ରସ ଇସ୍‌ବ୍ରୁମି ବାଡି ଜିଣାଜି ପାଫ୍‌ଦୁ ସର୍ହାର । ଆବେ ଖାର ବାର-ଜିସୁ ଦରତି ଅରେନ୍ ଜିହୁଦି ଗୁଣ୍‌ଏଙ୍ ବେଟ୍‌ବୁଡାତାର । ଖାନ୍ ନିଜେଦିଙ୍ ବାବବାଦି ଇଜିମାର୍‌ଆନ୍ ।

୭ ଖାନ୍ ଆୟା ଦ୍ଵିପଦି ସାସନକିନି ସଗର୍‌ୟସ ପାଉଲ୍‌ତି ଅରେନ୍ ନେଗି ତଡ୍ ମାର୍ହାନ୍ । ସଗର୍‌ୟସ ଅରେନ୍ ବୁଦିମାନି ଲୋକୁ ମାର୍ହାନ୍ । ଖାନ୍ ମାପୁରୁଦି ବାକ୍ୟ ଖେନ୍‌ଡେଙ୍ ବଦାକିଜି ବର୍ଣ୍ଣବା ନି ସାଉଲତିଙ୍ କୁକିସ୍‌ତାନ୍ ।

୮ ମାତର୍ ଗୁଣିଆ ଏଲିମାସ ଇକା ଖାନି ଗ୍ରିକ୍ ଦରୁ ଖାରିଙ୍ ବାଦା ସିତାନ୍, ଇରିଙ୍ ଖାନ୍ ସାସନକିନି ଖାନିଙ୍ କ୍ରିସ୍‌ତି ବିସ୍‌ବାସ୍ ଉଣ୍‌ଜିଙ୍ ଝେରଏ କିଜି ଇଡ୍‌ଦେଙ୍ ବଦା କିଜିମାର୍ହାନ୍ ।

୯ ମାତର୍ ସାଉଲ ଆମାଖାନି ଆଇ ଦରୁ ପାଉଲ ପବିତ୍ର ଆତ୍ମାଦୁ ପୁରାଆଜି ଗୁଣିଆ ତରିନ୍ ସିଦା କାଣ୍‌କାଣ୍‌କୁ ସୁଡ଼ୁ ଇର୍ହାନ୍,

୧୦ “ଏ ସୟତାନତି ମାରିସି ! ନିନ୍ ଝିଜୁ ନେଗି ବିସୟତି ସାତୁ ! ନିନ୍ ଝିଜୁ ବିସୟତି ସାଲାକିଦୁ ପୁରାଆତିକିୟା ମାରି ଝିଜୁଦିନ୍ ପ୍ରବୁଦି ସଡ଼ତିଙ୍ ମିର୍ ଇଜି ଇନ୍‌ଡେଙ୍ ଇଜି ସେସ୍ଟା କିଜିନି ।

୧୧ ଇଲେଇ ନିନ୍ ପ୍ରବୁଦି କିୟୁଦୁ ଦଣ୍ ପୟନି । ନିନ୍ କାଣା ଆଜି ଏସ ସମୟ ସାନ୍ ଝେଡେରି ଜାୟ ସୁଡ଼େଙ୍ ଆଟ୍‌ଇ ।”

ଆୟାଦାପ୍ରେ ଏଲିମାସଦି କାଣ୍‌କୁ ନାଣ୍ ଦୁରିଦୁ କେରବିନି ଖାଜା ଆନିକା ଖାନ୍ ଅଡ଼ବିତାନ୍ ମାରି ଖାନି କିୟୁ ଆସସି ସାରି ତରସି ଅଡେଙ୍ ଇଜି ଅରେନ୍‌ଖାନିଙ୍ ପୟଦେଙ୍ ଆସ୍‌ତାନ୍ ।

୧୨ ଇୟା ଗଟ୍‌ନା ସୁଡ଼ି ସାସନକିନି ଖାନି ବିସ୍‌ବାସ୍ ଆତାଡ୍, ଇରିଙ୍ ଖାନ୍ ପ୍ରବୁଦି ସିକିୟା ଖେନ୍‌ଜି କାବାଆତା ମାର୍ହାନ୍ ।

### ପିସିଦିଆଦି ଆଣ୍ଟିୟକିଆଦୁ ସେବା ପାଣି

୧୩ ପାଉଲ ନି ଖାନି ସାଙ୍ଗର୍ ପାଫଦାନ ଗାତାନାସି ପାଞ୍ଜିଲିଆଦି ପର୍ଗା ଦରତି ଉନ୍‌ଣି ଗାଡ଼ୁ ଇତାର । ଜୋହନ ମାର୍କ ଖାରିଙ୍ଗ୍ ଇୟାବାନ୍ ଡିସ୍‌ସି ଜିରୁସାଲାମ୍‌ତୁ ଡେସିସର୍ହାନ୍ ।

୧୪ ଖାର ପର୍ଗାଦାନ ସଲ୍‌ସି ପିସିଦିଆଦି ଆଣ୍ଟିୟକଦୁ ଇତାର ମାରି ରମ୍‌ନିଦିନ୍ ପାରତନା ଇଲ୍‌ଦୁ ସଲ୍‌ସି ବାସ୍‌ତାର ।

୧୫ ମାରି ମସାଦି ନିୟମ୍ ମାରି ବାବବାଦିରି ମାଣାନ୍ ରାସ୍‌ତିକା ପଡାତି ଖେନ୍‌କା, ପାରତନା ଇଲ୍‌ତି ପେରିକାର୍ ଖାରି ଲାକ୍‌ତୁ ଇୟା ମାଟା ଇଜି ପକ୍‌ତାର, “ତଡାନ୍‌କୁ, ଜଦି ଲୋକାଙ୍ଗ୍ ଖେଡିକାକିନି ଖାଜା ମି ଇନି ଉପଦେସ୍ ସିନିକା ମାନାଡ଼, ଆର୍‌ତିଙ୍ଗ୍ ଇନ୍‌ତୁ ।”

୧୬ ପାଉଲ ନିଲ୍‌ଜି ଲୋକାଙ୍ଗ୍ ଆଲେଜ ମାନ୍‌ଡେଙ୍ଗ୍ ଇଜି କିୟୁ ଜୁସ୍‌ସି ଇର୍ହାନ୍ :

ଉଣ୍ଡାତିମାନି ଇସ୍ରାଏଲ୍‌ତି ତଡାନ୍‌କୁ ନି ମାପୁରୁଙ୍ଗ୍ ପାରତାନା କିଜିମାନି ଅଣଜିହୁଦିର୍, ନା ମାଟା ଖେନ୍‌ତୁ !

୧୭ ଇସ୍ରାଏଲ୍ ଲୋକା ମାପୁରୁ ମା ତକାରାଦାଦାରିଙ୍ଗ୍ ବାସେକିତାନ୍ ମାରି ମିସରୁତୁ ଖାର ଆଇ ଦେସ୍‌ତିକାର୍ ଖାଜା ବାସାଜି ମାରୁହି ସମୟତୁ ଉନ୍‌ଣି ପେରି କୁରୁମ୍‌ତୁ ମିସା କିତାର । ମାପୁରୁ ଖାନି କାବାଆନି ସାକ୍ତିଦାନ୍ ଖାରିଙ୍ଗ୍ ମିସରତାନ୍ ସପ୍‌ସି ତାତାନ୍,

୧୮ ମାରି ସାଲିସ୍ ବାରସେକ୍ ସାହି ମରୁରୁମିତୁ ଖାରି ତାଗ୍‌ଜ ତାନିଙ୍ଗ୍ ସାସ୍ କିତାନ୍ ।

୧୯ ମାରି, ଖାନ୍ କିଣାନ୍ ଦେସ୍‌ତୁ ସାତଗୋଟା କୁରୁମ୍‌ତିଙ୍ଗ୍ ଦଂସ କିଜି ବାସେକିତି ଲୋକାଙ୍ଗ୍ ଆୟା ଦେସ୍ ସିତାନ୍ ।

୨୦ ପୁରା ସାରିସ ପଟାସ୍ ବାରସେକ୍ ଲୋଇ ଇୟାଞ୍ଜିଲ୍ ଗଟନା ଗଟାତାମାର୍ହାଡ଼ ।

ଇୟା ଖେନ୍‌କା ସାମୁଏଲ୍ ବାବବାଦିଦି ସମୟ ସାହି ମାପୁରୁ ଖାରି ମୁସ୍‌କୁ ବିସାର୍ କିନିଖାରିଙ୍ଗ୍ ଆସ୍‌କିତାନ୍ ।

୨୧ ଏସିଞ୍ଜାଲେ ଖାର ଅରେନ୍ ରାଜାଦିଙ୍ଗ୍ ବଦା କିତାର, ମାପୁରୁ ଖାରି ମୁସ୍‌କୁ ସାଲିସ୍ ବାରସେକ୍ ସାହି ସାସନ୍ କିନି ଉଣ୍ଡିଙ୍ଗ୍ ବିନ୍‌ମାମିନ୍ କୁରୁମ୍‌ତି କିଗତି ମାରିସି ସାଉଲତିଙ୍ଗ୍ ଆସ୍‌କିତାନ୍ ।

୨୨ ତାନିଝେନକା ମାପୁରୁ ଖାନିଙ୍ଗ ରାଜାଗାଦିଦାନ ସପସି ଦାଉଦତିଙ୍ଗ ଖାରି ରାଜା କିତାନ । ମାପୁରୁ ଖାନି ବିସୟତାନ ସାକିୟ ଇର୍ହାମାର୍ହାନ, ନାନ ଏମେନାନି ଲୋକାଙ୍ଗ ଜିବନ୍ନନା, ଜେସିଦି ମାରିସି ଦାଉଦ ଆୟାନାନି ଅରେନ୍; ଖାନ ନା ବଦାଦାନ ଝିନ୍ତୁ ପାଣି କିନାନ ।

୨୩ ଇୟା ଦାଉଦ କୁଟୁମ୍ବତି ଜିସୁଙ୍ଗୁ ମାପୁରୁ ଖାନି ପାର୍ମାଣ ଇସାବତାନ ଇସ୍ରାଏଲ୍ ଜାତିଦି ରକିୟାକର୍ତ୍ତା କିତାମାନାନ ।

୨୪ ☆ଜିସୁ ଖାନି ପାଣି ଆରାମ୍ କିନି ଆଗଡିରାନ ଜୋହନ ଇସ୍ରାଏଲ୍‌ତି ଝିନ୍ତୁ ଲୋକା ଲାକ୍ତୁ ପ୍ରଚାର କିଜି ଇର୍ହାନ, ଖାରିଙ୍ଗ ପାପତାନ ମନ୍ ତେପସି ତୁବନ୍ ଅନିକା ମାନାଡ୍ ।

୨୫ ☆ମାରି ଜୋହନ ଖାନି ସେବା ପାଣି ସେସ୍ କିନି ଆଗଡି ଲୋକାଙ୍ଗ ଝେନ୍‌ବାତାନ, ନା ବିସୟତାନ ମି ଅଡବିନିକା ଇନିକା ? ମିର୍ ଆମାଖାନିଙ୍ଗ କାପକିଜିନିଦେର୍, ନାନ ଆକାନ ଆଏ । ମାତର ଝେନ୍‌ତୁ ! ନା ଝେନକା ଏନ୍ ଖାଜିନାନ, ନାନ ଖାନି ପାଦାମ୍ବତି ଜୁତେଙ୍ଗତି ଗାଟି କୁଡତେଙ୍ଗ ବା ନାନ ଜଗ୍ ସିଲେ ।

୨୬ “ଅବାହାମ କୁଟୁମ୍ବତି ଏ ଇସ୍ରାଏଲ୍ ତଡାନକୁ ମାରି ମାପୁରୁଙ୍ଗ ପାର୍ତାନା କିଜିମାନି ଇବେମାନି ଅଣଜିହୁଦି ଲୋକୁ, ମାଙ୍ଗ ନେ ଇୟା ପରିତ୍ରାଣଦି ମାଟା ସିଆୟ୍ ଆତାମାନାଡ୍ ।

୨୭ ମାତର ଖାନ ରକିୟାକର୍ତ୍ତା, ଜିରୁସାଲାମ୍‌ତୁ ତେବାଜି ମାନିକାର୍ ମାରି ଖାରି ନେତାର୍ ଆକା ନେସ୍‌ଏର୍ ମାର୍ହାର୍ । ଖାର ଝିନ୍ତୁ ରମ୍‌ନିଦିନ୍‌ତୁ ପଡାଜି ମାନି ବାବବାଦିରି ମାଟାଦି ଅର୍ତ ବୁଜାଏଜି ମାର୍ହାର୍ । ଆରିଙ୍ଗ ବା ଜିସୁଙ୍ଗୁ ଦୋସ୍ କିଜି ଖାର ବାବବାଦିରି ବାକ୍ୟଦିଙ୍ଗ ପୁରା କିତାର୍ ।

୨୮ ☆ସାନିଦଶ୍ବତି ଇନି ନିନ୍ଦାଦି ମାଟା ପୟ୍‌ଏନ୍‌ଶ୍ବା ବା ଖାନିଙ୍ଗ ସାନିଦଶ୍ବ ସିଦେଙ୍ଗ ଇଜି ଖାର ପିଲାଡ୍ ରାଜେଙ୍ଗ ଇର୍ହାର୍ ।

୨୯ ☆ଖାନି ବିସୟତାନ ଦାମ୍‌ସାସ୍ତ୍ରୁ ଏମେ ଝିନ୍ତୁ ବିସୟ

☆ ୧୩:୨୪ ମାର୍କ ୧:୪; ଲୁକ ୩:୩। ☆ ୧୩:୨୫ ଜୋହନ ୧:୨୦; ମାତିଉ ୩:୧୧; ମାର୍କ ୧:୭;

ଲୁକ ୩:୧୬; ଜୋହନ ୧:୨୭। ☆ ୧୩:୨୮ ମାତିଉ ୨୭:୨୨,୨୩; ମାର୍କ ୧୫:୧୩,୧୪; ଲୁକ

୨୩:୨୧-୨୩; ଜୋହନ ୧୯:୧୫। ☆ ୧୩:୨୯ ମାତିଉ ୨୭:୫୭-୬୧; ମାର୍କ ୧୫:୪୨-୪୭; ଲୁକ

୨୩:୫୦-୫୬; ଜୋହନ ୧୯:୩୮-୪୨।

ରାସାତାମାନାଡ଼, ଆୟାଈସାବତାନ ଓଜୁ ପାଣିକିତି ଖେନକା ଖାର  
 ଖାନିଙ୍ଗ କୁସଦାନ ରେପସି ତାସି ଉନ୍ତୁ ଦୁକିଗୁଟାଦୁ ଇଟତାର ।

୩୦ ମାତର ମାପୁରୁ ଖାନିଙ୍ଗ ଝାତିମାଣାନ ନିକତାନ,

୩୧ ☆ନାଣୁ ଦିନ୍ ସାଦି ଖାନି ଖାଲେ ଗାଲିଲିଦାନ ଜିରୁସାଲାମତୁ ସନି  
 ଖାନିକା ଆଜିମାନ ଲୋକାଙ୍ଗ ଖାନ ତରାୟାଆତାନ । ଇଲେଇ ଖାର  
 ଇସ୍ରାଏଲ୍ ଲୋକା ଲାକତୁ ଖାନି ସାକି ।

୩୨ ମାରି, ମାପୁରୁ ମା ତକ୍ରାଦାଦାରିମାନୁ କିତି ପାରମାଣ୍ ବିସୟତାନ  
 ମାପୁ ମିଙ୍ଗ ଇୟା ନେଗିକାବୁର ଖେରସିନାପୁ,

୩୩ ମାପୁରୁ ଜିସୁଙ୍ଗୁ ନିକସି ଖାରି ମାରିସି ଜେ ମାଡ଼, ମା  
 ଉଣ୍ଡିଙ୍ଗ ଆୟା ପାରମାଣ୍ ପୁରାକିତାମାନାନ, ଏଣ୍ଡେସ୍ ଗିତ ସଂହତାଦି  
 ମାରିଉନ୍ତୁ ପାଟାଦୁ ଇୟା ମାଟାଦିଙ୍ଗ ଖେରସି ରାସାତାମାନାଡ଼,  
 “ନିନ୍ ନା ମାରିନ୍,

ନେର ନାନ ମି ବୁବା ଆତାମାନା ।”

୩୪ ମାରି ଦୁକିଦୁ ସାବଦେଙ୍ଗ ଡିସ୍‌ଏନ୍‌ଶ୍ଟା ଖାନିଙ୍ଗ ଝାତିମାଣାନ  
 ନିକତେଙ୍ଗ ଇଜି ମାପୁରୁ ଇୟା ମାଟା ଇର୍ହାମାର୍ହାନ;  
 ଦାଉଦତିଙ୍ଗ ଝିତିମାନି ପାରମାଣ୍ ଇସାବତାନ

ନାନ ନିଙ୍ଗ ପବିତ୍ର ନି ସତତି ଆସିବାଦ୍ ଦାନ ସିନା ।

୩୫ ସାସ୍ରଦୁ ମାରି ଉଣ୍ଡି ବାତିଦୁ ରାସାତାମାନାଡ଼,  
 ନିନ୍ ନିଜେଦି ବିସବାସତାନ ସେବାକିନିଖାନିଙ୍ଗ ଦୁକିଦୁ ସାବଦେଙ୍ଗ  
 ଡିସ୍‌ସୋ ସିଇ ।

୩୬ ଦାଉଦ ଖାନି ସାସନ୍ କିନିଖାଲେ ମାପୁରୁଦି ବଦା ପୁରାକିଜି  
 ସାରାସାରି ସାତାନ ମାରି ତକ୍ରାଦାଦସିଖାଲେ ମୁସାୟାଆତାନ । ଖାନି  
 ମୋହଲ୍ ଦୁକିଦୁ ସାବିତାଡ଼ ।

୩୭ ମାତର ମାପୁରୁ ଆମାଖାନିଙ୍ଗ ଝାତିମାଣାନ ନିକତାନ, ଖାନ  
 ସାବଏନ୍ ।

୩୮ ମାରି, ଏ ତଡାନକୁ, ମିର ଇକା ନେସ୍ତୁ ଜେ, କେବଲ ମୋସାଦି  
 ମାଣାନ ମି ଲାକତୁ ପାପ୍ କେମାଦି ସୁସମାତାର ପ୍ରଚାର ଆଜିନାଡ଼,

୩୯ ମାରି, ମସାଦି ନିୟମତାନ ଏମେ ଓଜୁ ବିସୟତାନ ମିର ମୁକ୍ତାଜି  
 ଦାର୍ମ୍ ଲୋକୁ ଆଦେଙ୍ଗ ଆଟ୍‌ଇତିଦେର୍, ବିସବାସକିନି ଓଜେରେ

ଲୋକୁ ଜିହ୍ୱାଦି ମାଣାନ ଆୟାଞ୍ଜିତୁ ବିସୟତାନ ମୁକ୍ତାଜି ଦାର୍ମ୍ ଲୋକୁ  
ଆଦେଙ୍ଗ୍ ଆବନାନ ।

୪୦ ଜାଗାରତା, ବାବଦାଦିର୍ ଆମାକା ଇର୍ହାମାନାର, ଆକା ଏଣ୍ଡେସ୍ ମି  
ଉଣ୍ଡିଙ୍ଗ୍ ଗଟାଏଡ୍ ।

୪୧ ଏ ମାନାଇଲୋକ୍ ! ମିର୍ କଲବଲ୍ ଆଜି ସାଦୁ !

ଇରିଙ୍ଗ୍ ନାନ ନେର୍ ଏମେ ପାଣି କିଜିନା,  
ଏନ୍ ଆକା ବୁଜା କିଜି ସିତିଙ୍ଗ୍ ବା  
ମିର୍ ବିସ୍‌ବାସ୍ କିଇଦେର୍ ।

୪୨ ପାଉଲ ନି ବର୍ଣ୍ଣବା ପାର୍ତନା ଇଲୁ ଡିସ୍‌ସି ସନିଝାଲେ,  
ମାରିଉନ୍‌ଶ୍ଟ୍ ରମ୍‌ନିଦିନ୍ ଡେସିଝାଜି ଇୟାଞ୍ଜିତୁ ବିସୟତାନ ମାରି ନାଣ୍ଡ  
ବୁଜାକିଦେଙ୍ଗ୍ ଇଜି ଝାରିଙ୍ଗ୍ ଲୋକୁ କୁକ୍‌ତାର ।

୪୩ ଲୋକୁ ମିଟିଙ୍ଗ୍ ଡିସ୍‌ସି ସହ୍ ଝେନ୍‌କା ନାଣ୍ଡ ଜିହ୍ୱାଦି ନି  
ଜିହ୍ୱାଦି ଦର୍ମ୍‌ଦି ଲୋକୁ ଅଣଜିହ୍ୱାଦିର୍ ପାଉଲ ନି ବର୍ଣ୍ଣବାଦି ଝାଲେ  
ସର୍ହାର୍, ସିସ୍‌ର ଝାରିଝାଲେ ମିସାଜି ମାପୁରୁଦି ଦୟାଦାନ ଜିବନ୍  
କାଟେ କିଦେଙ୍ଗ୍ ଝାରିଙ୍ଗ୍ ଝେଡିକା ସିତାର୍ ।

୪୪ ଝେନ୍‌କାରି ରମ୍‌ନି ଦିନ୍‌ତୁ ଗାଡ୍‌ଡି ଓଜେରେ ପ୍ରବୁଦି ବାକ୍ୟ  
ଝେନ୍‌ଡେଙ୍ଗ୍ ଇଜି ଉଣ୍ଡାତାର୍ ।

୪୫ ଲୋକୁଗହଲି ସୁଡ୍‌ଜି ଜିହ୍ୱାଦିର୍ ରିସାଆତାର୍ ମାରି ପାଉଲତି  
ମାଟାଦୁ ଜିଦ୍ କିଜି ଝାନିଙ୍ଗ୍ ନିନ୍‌ନା କିତାର୍ ।

୪୬ ମାତର୍ ପାଉଲ ନି ବର୍ଣ୍ଣବା ମାରି ନାଣ୍ଡ ଆବ୍‌ଝାଦାନ ଇର୍ହାର୍, ମି  
ଲାକ୍‌ତୁ ପାର୍‌ତୁମ୍ ମାପୁରୁଦି ବାକ୍ୟ ପ୍ରଚାର୍ ଆନିକାମାର୍ହାଡ୍ । ମାତର୍  
ମିର୍ ଏସାଙ୍ଗ୍‌ଞ୍ଜିଇ ଜିବନ୍ ପୟ୍‌ଦେଙ୍ଗ୍ ଇଜି ନିଜେଦିଙ୍ଗ୍ ଜଗ୍  
ସିଲିକା ଅଡ୍‌ବିଜି ତେନିଙ୍ଗ୍ ବିସାର୍ କିତିମାନିଙ୍ଗ୍, ମାପ୍ ମିଙ୍ଗ୍  
ଡିସ୍‌ସି ଅଣଜିହ୍ୱାଦିରି ମାନ୍ ସନାପ୍ ।

୪୭ ଇରିଙ୍ଗ୍ ପ୍ରବୁ ମାଙ୍ଗ୍ ଇୟା ମାଟା ସିତାମାନାନ :  
ନାନ ମିଙ୍ଗ୍ ଅଣଜିହ୍ୱାଦିରି ଉଣ୍ଡିଙ୍ଗ୍ ଜାୟ୍ ଝାଜା କିତାମାନା,  
ଏଣ୍ଡେସ୍ ଓଜୁ ଦୁନିଆ ରକିୟା ପୟ୍‌ନାଡ୍ ।

୪୮ ଅଣଜିହ୍ୱାଦିର୍ ଇକା ଝେନ୍‌ଜି ଝେଡିକା ଆତାର୍ ମାରି ପ୍ରବୁଦି ମାଟା  
ଉଣ୍ଡିଙ୍ଗ୍ ଦନ୍‌ସ୍‌ବାଦ୍ ସିତାର୍ । ଏମେକାର୍ ଏସାଙ୍ଗ୍‌ଞ୍ଜିଇ ଜିବନ୍

ଉଣିଙ୍କୁ ବାସେଆତାମାର୍ହାର, ଖାର ଆୟା ମାଟାଦୁ ବିସ୍ବାସ କିତାର ।

୪୯ ଆୟା ରାଜିଦି ଝିନ୍ନୁ ବାଡ଼ିଦୁ ପ୍ରବୁଦି ବାକ୍ୟ ଖେଙ୍ଗିତାଡ଼ ।

୫୦ ମାତର ଜିହୁଦିର ଗାଡ଼ି ପେରି ଲୋକାଙ୍କୁ ଖେରିସକିଜି ପାଉଲ ନି ବର୍ଣ୍ଣବାଦି ମୁସକୁ କାସୁ ସିଦେଙ୍ଗ ଆସ୍ତାର ମାରି ଆୟା ରାଜିଦାନ ଖାରିଙ୍କୁ ସିପତା ପେରିତାର ।

୫୧ ☆ପ୍ରେରିତ ସିସୁର ଆୟା ଲୋକା ବିରଦ୍‌ତାନ ଖାରି ପାଦାମ୍ବି ଦୁଡ଼ି ସାଡ଼ସି ସିଜି ଇକନିୟାଦୁ ସର୍ହାର ।

୫୨ ଆଣ୍ଟିୟକଦି ବିସ୍ବାସିର ପବିତ୍ର ଆମ୍ବା ନି ଖେଡ଼ିକାଦୁ ପୁରା ଆତାର ।

## ୧୪

### ଇକନିୟାଦୁ ସେବା ପାଣି

୧ ଇକନିୟାଦୁ ଆୟା ଗଟନାଦି ବିସୟ ମାରିଡେସି ଆତାଡ଼ : ପାଉଲ ନି ବର୍ଣ୍ଣବା ପାର୍ତନା ଇଲୁଦୁ ସଲସି ଇୟାଖାଜା ପ୍ରଚାର କିତାନ ଜେ ନାଣ୍ଟ ଜିହୁଦି ଲୋକୁ ନି ଅଣଜିହୁଦିର କ୍ରିସ୍ତଦିମାନୁ ବିସ୍ବାସ କିତାର ।

୨ ମାତର ଅବିସ୍ବାସି ଜିହୁଦିର ଅଣଜିହୁଦିରିଙ୍କୁ ବେମ୍ବରି କିଜି ତଡ଼ାନକା ବିରଦ୍‌ତାନ ମନ୍ତିଙ୍କୁ ଏଗ୍ରିସକିତାର ।

୩ ଆତିଙ୍ଗବା ପ୍ରେରିତ ସିସୁର ପ୍ରବୁଦି ବିସୟତାନ ଆଟ୍‌ଖାଦାନ ପ୍ରଚାର କିଜି ନାଣ୍ଟ ଦିନ ଆବେ ତେବାତାର । ସାକ୍ତିଦି ପାଣି ନି କାବାଆନି ପାଣିଝିନ୍ନୁ କିନି ମାଣ୍ଟକୁ ଖାର ପାରମାଣ୍ଟ କିତାର ଜେ, ମାପୁରୁଦି ଦୟା ବିସୟତାନ ଖାରି ପ୍ରଚାର ଆତି ମାଟା ସଡ଼ତାନ ସଡ଼ ।

୪ ଗାଡ଼ି ଲୋକୁ ରୁଣ୍ଟି ଦଲ୍‌ତୁ ବାଗ୍ ଆତାର । ଖାରି ଲୋଇ ଏସ ଲୋକୁ ଜିହୁଦିରିଙ୍କୁ ନି ମାରି ଏସ ପ୍ରେରିତ ସିସୁରିଙ୍କୁ ମାନେଆତାର ।

୫ ତାନିଝେନକା ଏସ ଅଣଜିହୁଦିଲୋକ ନି ଜିହୁଦିଲୋକୁ ଖାରି ନେତାରରି ଖାଲେ ଏକ୍‌ଜୁଟ୍ ଆଜି ପ୍ରେରିତ ସିସୁରି ଉଣିଙ୍କୁ ତାରଲ

ବ୍ୟବହାର କିନ୍ତି ଉଣ୍ଡିଙ୍ଗ୍ ନିଁ ଖାରିଙ୍ଗ୍ କାଲକାଣ୍ ତାକ୍ସି ସାପିସ୍  
କିଦେଙ୍ଗ୍ ଜିଜି ଖାରିଗିସାଜି ତିର କିତାର ।

୭ ପ୍ରେରିତ ସିସୁର ଇୟା ବିସୟତାନ୍ ନେସତେଙ୍ଗ୍ ଆବ୍ସି  
ଲୁକାନିଆଦି ଲୁସ୍ତା ନି ଦବ୍ ଗାଡ଼ତୁ ମାରି ଆୟା ସାରିବେଡ଼ତି ମାନି  
ରାଜିଦୁ ଉରକ୍ତାର,

୭ ମାରି ଆବେ ନେଗିକାବୁର୍ ପ୍ରଚାର କିତାର ।

### ଲୁସ୍ତା ନି ଦବ୍ ଦୁ ସେବା ପାଣି

୮ ଲୁସ୍ତାଦୁ ଅରେନ୍ ଜନମ୍ତାନ୍ ସଗାଲୋକ୍ ମାର୍ହାନ୍ । ଖାଦ୍  
ଅଡ଼ପ୍ବା ବୁଲାଦେଙ୍ଗ୍ ଆବ୍ସଜି ମାର୍ହାନ୍ ।

୯ ଆବେ ବାସସି ଖାନ୍ ପାଉଲତି ସିକିୟା ଖେନ୍ଜି ମାର୍ହାନ୍ । ଖାନି  
ମନ୍ତୁ ବିସବାସ୍ ଆତାଡ଼ ମାରି ଖାନ୍ ନେଗେନ୍ ଆନାନ୍ ଇଜି ପାଉଲ  
ନେସତେଙ୍ଗ୍ ଆବ୍ତାନ୍ ।

୧୦ ଆଦେଙ୍ଗ୍ ଖାନି ତରିନ୍ ସିଦା ସୁଡ଼ଜି ପାଉଲ ନାଣ୍ଡ ଆଉଲିଦାନ୍  
ଇର୍ହାନ୍, “ପାଦାମ୍ତାନ୍ ସାହାସ୍ଆଜି ସିଦା ନିଲ୍ଆ !” ଆକାନ୍ ଗାଡ଼ସି  
ସାରିବେଡ଼ତି ବୁଲାଦେଙ୍ଗ୍ ଆସ୍ତାନ୍ ।

୧୧ ଉଣ୍ଡାତିମାହ୍ ଲୋକୁ ପାଉଲତି ଇୟା ପାଣି ସୁଡ଼ଜି ଖାରି  
ଲୁକାନିଆ ବାସାଦାନ୍ ଆଉଲି ଆଜି ଇନ୍ତେଙ୍ଗ୍ ଆସ୍ତାର,  
“ଦିୟାମ୍କୁ ଲୋକୁ ବେସ୍ତାନ୍ ମାବାନ୍ ଖାତାମାନାର ।”

୧୨ ଖାର ବର୍ଣ୍ଣବାଦିଙ୍ଗ୍ ଜିଅସ୍ ମାରି ପାଉଲ ପେରିକାନ୍ ମାନିଙ୍ଗ୍  
ଖାନିଙ୍ଗ୍ ହେରମିସ୍ ଇର୍ହାର ।

୧୩ ଗାଡ଼ତି ଆଡ଼ରେ ମାନି ଜିଅସ୍ ମନ୍ଦିରତି ପୁଜାରି, ସେରଲା  
ଲାକ୍ତୁ ଏସ୍ ସଣ୍ଡଙ୍ଗ୍ ନିଁ ପୁଙ୍ଗ୍ ତାତାନ୍, ଇରିଙ୍ଗ୍ ଖାନ୍ ମାରି ଆବେ  
ଉଣ୍ଡାତିମାହ୍ ଲୋକୁ ପ୍ରେରିତ ସିସୁରି ଉଦେସ୍ତାନ୍ ପୁଜା ସିଦେଙ୍ଗ୍  
ଇଜି ବଦାକିତା ମାର୍ହାର ।

୧୪ ଖାର ଏମେ ପାଣି କିଦେଙ୍ଗ୍ ସଲ୍ସିମାର୍ହାର, ସିସୁର ଅର୍ତ୍ତାଡ଼  
ବର୍ଣ୍ଣବା ନି ପାଉଲ ଆକା ଖେରଇଦାପ୍ରେ ନିଜେଦି ଆଙ୍ଗ୍ କିସ୍ତା  
ପକ୍ତାର, ଲୋକା ଲୋଇ ଉରକିସି ସଲ୍ସି ଆଉଲି ଆଜି ଇର୍ହାର,

୧୫ “ମିର ଏହା ଇକା କିଜିନିଦେର ? ମାପ୍ ମି ଖାଜା ଲୋକୁ ମାତର । ମି ଲାକ୍ତୁ ନେଗି କାରୁର ପ୍ରଚାର କିଦେଙ୍ଗ୍ ଝିଜି ମାରି ଇୟା ଅସାର ବିସୟତାନ୍ ସୁପ୍ ଆଜି, ବାଦଡ଼, ଦୁନିଆ, ସାମଦୁର ନି ଆବେମାନି ଝିଜୁ ବିସୟତି ତିଆରକିତି ଜିବନ୍ମାନି ମାପୁରୁଦି ତରିନ୍ ମିଙ୍ଗ୍ ଅତେଙ୍ଗ୍ ଝିଜି ମାପ୍ ଇବେ ଖାତାମାନାପ୍ ।

୧୬ ଆଗଡ଼ି ନିଜେଦିବଦାଦାନ୍ ନିଜେଦି ସାରିଦୁ ସନ୍ତେଙ୍ଗ୍ ଝିଜି ମାପୁରୁ ଲୋକାଙ୍ଗ୍ ଡିସତା ସିତାମାର୍ହାନ୍ ।

୧୭ ମାତର ଖାନି ଝିଜୁ ନେଗି ପାଣିଦାନ୍ ଖାନ୍ ଝିଜୁଦିନ୍ ଖାନି ଝିଜୁଦିନ୍ମାନି କାରୁର ସିତାମାନାନ୍; ଖାନ୍ ବାଦଡ଼ତାନ୍ ପିରୁରୁ ମାରି ଟିକ୍ ଖେଡ଼ାଦୁ ପାସି ସିନାନ୍, କାଦି ଜଗେକିନାନ୍ ମାରି ଖେଡ଼ିକାଦାନ୍ ମି ଜିବନ୍ ପୁରା କିନାନ୍ ।”

୧୮ ଇୟାଝିଜୁ ମାଟା ଇନ୍ଜି ପ୍ରେରିତ ସିସୁର୍ ଏଣ୍ଡେସକିଜିବା ପୁଜା ସିନିମାଣାଟ୍ ଖାରିଙ୍ଗ୍ ଟେବକିତାର୍ ।

୧୯ ପିସିଦିଆଦି ଆଣ୍ଟିୟକ ନି ଇକନିୟାଦାନ୍ ଏସ ଜିହୁଦି ଲୋକୁ ଖାତାମାର୍ହାଟ୍, ଖାର ଲୋକାଙ୍ଗ୍ ଏଗ୍ରିସକିଜି ପାଉଲତିଙ୍ଗ୍ କାଲକାଣ୍ଟୁ ତାକିତାର ମାରି ଖାନିଙ୍ଗ୍ ସାତାନ୍ ଇଜି ଅଡ଼ବିଜି ଗାଡ଼ତି ଆଡ଼ରେ ରେଲ୍ଜି ଅତାର୍ ।

୨୦ ମାତର ସିସୁର୍ ଖାଜି ଖାନି ସାରିବେଡ଼ତି ଉଣ୍ଡାଜି ନିହ୍ ଝେନ୍କା ଖାନ୍ ନିଙ୍ଗ୍ ଗାଡ଼ତୁ ଡେସିସର୍ହାନ୍ । ମାରିନାଣ୍ଡିଙ୍ଗ୍ ଖାନ୍ ନି ବର୍ଣ୍ଣବା ଦବ୍ ଦୁ ସର୍ହାଟ୍ ।

### ସିରିଆଦି ଆଣ୍ଟିୟକଦୁ ଡେସିଖାତାର୍

୨୧ ପାଉଲ ନି ବର୍ଣ୍ଣବା ଦବ୍ ଦୁ ସୁସମାଚାର ପ୍ରଚାର କିଜି ନାଣ୍ଡି ସିସୁରିଙ୍ଗ୍ ଲାବ୍ କିତାର୍ । ତାନିଝେନ୍କା ଖାର ଲୁସ୍ତା, ଇକନିୟା ନି ପିସିଦିଆଦି ଆଣ୍ଟିୟକଦୁ ଡେସିସର୍ହାଟ୍ ।

୨୨ ଖାର ବିସବାସିରିଙ୍ଗ୍ ନିଜେଦି ବିସବାସତୁ ତାଟତାନ୍ ମାନ୍ତେଙ୍ଗ୍ ଝିଜି ମନ୍ତିଙ୍ଗ୍ ଖେଡ଼ିକା କିବିସକିତାର୍ । ଖାର ସିକିୟା ସିଜି ଇର୍ହାଟ୍, “ମାପୁରୁଦି ରାଜିଦୁ ଡଗୁଦେଙ୍ଗ୍ ଝିଜି ମାଙ୍ଗ୍ ନାଣ୍ଡି କାସ୍ତୁକୁ ବା ସିଜି ସନ୍ତେଙ୍ଗ୍ ଆନାଟ୍ ।”

୨୩ ଓହ୍ଲି ମଣ୍ଡଳିକୁ ଖାର କିନ୍ତୁ ଇଡ଼ଜି ମଣ୍ଡଳିଦି ପେରି ନେତାରରିଙ୍ଗ ବାସେ କିତାର ମାରି ଏମେ ପ୍ରବୁଦିମାନୁ ଖାର ବିସବାସ କିତାମାର୍ହାର, ପାରତନା ନି ଉପବାସତି ଖାଲେ ଖାରିଙ୍ଗ୍ ଆୟା ପ୍ରବୁଦି ଲାକ୍ତୁ ସର୍ପେ କିତାର ।

୨୪ ପିସିଦିଆ ରାଜି ସିଜି ଖାର ପାମ୍ପିଲିଆଦୁ ଖାତାର ।

୨୫ ଆବେ ପର୍ଗାଦୁ ପ୍ରଚାର କିଜି ଆଭାଲିଆଦୁ ସର୍ହାର ।

୨୬ ଆବେଟକୁ ଖାର ଜାହାଜତାନ ଆଣ୍ଟିୟକଦୁ ଡେସି ଖାତାର । ଇୟା ଆଣ୍ଟିୟକଦୁ ଇଲେଇ ଆତି ମାନି ପାଣି ଉଣ୍ଟିଙ୍ଗ୍ ମାପୁରୁଦି ଦୟା ଦାନ ଖାର ସର୍ପେ ଆତାମାର୍ହାର ।

୨୭ ଖାର ଆଣ୍ଟିୟକଦୁ ଇଜି ମଣ୍ଡଳିଦି ଲୋକାଙ୍ଗ ଉଣ୍ଟାକିତାର । ମାପୁରୁ ଖାରି ଉଣ୍ଟିଙ୍ଗ୍ ଆମା ଓହ୍ଲି କିତାମାର୍ହାନ ମାରି ଅଣଜିହୁଦି ବିସବାସ ଉଣ୍ଟିଙ୍ଗ୍ ଏଣ୍ଟେସ୍ ସାରି ରେତା ସିତାମାର୍ହାନ, ଆୟାଓହ୍ଲି ଖାରିଙ୍ଗ୍ ଖେରତାର ।

୨୮ ଆବେ ବିସବାସିରି ଖାଲେ ଖାନ ନାଣ୍ଟ ଦିନ୍ ସାନ୍ତି ତେବାତାନ ।

## ୧୫

### ଜିରୁସାଲାମତୁ କ୍ରିସ୍ଟନ୍ ମିଟିଙ୍ଗ୍

୧ ଜିହୁଦାଦାନ ଏସ ଲୋକୁ ଆଣ୍ଟିୟକଦୁ ଖାଜି, ମୋସାଦି ନିୟମ ଇସାବତାନ ଖାର ସୁନ୍ନତ ଆଏତିଙ୍ଗ୍ ରିକିୟା ପୟଦେଙ୍ଗ୍ ଆବ୍‌ଏର୍ ଇଜି ବିସବାସତି ତଡାନକାଙ୍ଗ୍ ସିକିୟା ସିତାର ।

୨ ଇୟା ବିସୟତାନ ଖାରି ଖାଲେ ପାଉଲ ନି ବର୍ଣ୍ଣବା ନାଣ୍ଟ ଆସିସାତାର ଆକା, ଇକା ତିର୍ ଆତାଡ଼ଜେ, ପାଉଲ, ବର୍ଣ୍ଣବା ମାରି ଆଣ୍ଟିୟକଦି ମାରି ଏସ ଲୋକୁ ଜିରୁସାଲାମତୁ ସଲ୍‌ସି ପ୍ରେରିତ ସିସୁର୍ ନି ମଣ୍ଡଳିଦି ନେତାରରି ଖାଲେ ଇୟା ବିସୟତାନ ଖାରରିଜିସାନାର ।

୩ ମଣ୍ଡଳି ଖାରି ସନି ସୁବିଦା କିଜି ପକ୍ତାତ ମାରି ଖାର ପିନିସିଆ ନି ସମିରୋଣ ସିଜି ସନି ଖାଲେ ଅଣଜିହୁଦି ଲୋକୁ ଏଣ୍ଟେସ୍ ମନ୍ ଡେପ୍‌ସି ଦାର୍ମଲୋକୁ ଆତାମାନାର, ଆୟା ବିସୟ ଖେରତାର; ଇୟା କାବୁର୍ ଖେନ୍‌ଜି ବିସବାସତି ତଡାନକୁ ନାଣ୍ଟ ଖେଡିକା ଆତାର ।

୪ ଖାର ଜିରୁସାଲମତୁ ଇତି ଖେନକା ମଣ୍ଡଳି, ପ୍ରେରିତ ସିସୁର୍ ମାରି ମଣ୍ଡଳିଦି ନେତାରୁ ଖାରିଙ୍ଗ୍ ଝୁକ୍ତାର । ମାପୁରୁ ଖାରି ମାଣାନ୍ କିତିମାନି ପାଣି ବିସୟତାନ୍ ପାଉଲ ନି ବର୍ଣ୍ଣବା ଖାରିଙ୍ଗ୍ ଝେରତାର ।

୫ ମାତର୍ ପାରୁସିର୍ ଇସାବତାନ୍ ଜିନି ଏସ ବିସବାସିର୍ ନିଲସି ଇର୍ହାର, “ଅଣଜିହୁଦି ଲୋକୁ ସୁନ୍ନତ ଆନିକା ମାନାତ୍ ମାରି ମୋସାଦି ନିୟମ୍ ମାନାଦେଙ୍ଗ୍ ଇଜି ଖାରିଙ୍ଗ୍ ଇନିକା ନେଗେତ୍ ।”

୬ ଇୟା ବିସୟ ଖାରଗିଦେଙ୍ଗ୍ ଇଜି ପ୍ରେରିତ ସିସୁର୍ ମାରି ମଣ୍ଡଳିଦି ନେତାରୁ ଉଣ୍ଡାତାର ।

୭ ନାଣ୍ଟ ସମୟ ଖାରଗିତି ଖେନକା ପିତର ନିଲ୍ଲଜି ଇର୍ହାନ, “ତଡାନ୍କୁ ନି ତାଙ୍ଗ୍, ମିର୍ ନେସ୍ନିଦେର୍ ଜେ ନାଣ୍ଟ ଆଗ୍ଡିରାନ୍ ମାପୁରୁ ଅଣଜିହୁଦି ଲୋକୁ ଲାକ୍ତୁ ସୁସମାଚାରୁ ପ୍ରଚାର କିଜି ଆୟାଉଣ୍ଟି ଖାରି ବିସବାସ୍ କିବିସ୍ କିଦେଙ୍ଗ୍ ଇଜି ମି ମାଣ୍ଟକୁ ନାଙ୍ଗ୍ ବାସେ କିତାମାର୍ହାର ।

୮ ଖାରି ଖିଜେରି ମନ୍ତି ଚିନ୍ତା ନେସ୍ସିମାନି ମନ୍ତୁବାସାନି ମାପୁରୁ ମାଙ୍ଗ୍ ଏଣ୍ଡେସ୍ ପବିତ୍ର ଆମ୍ବା ସିତା ମାନାନ୍, ଅଣଜିହୁଦି ଲୋକାଙ୍ଗ୍ ବା ଟିକ୍ ଆୟାଞ୍ଜା ଦାନ୍ ସିଜି ଖାରିଙ୍ଗ୍ ସାକି ମାନାନ୍ ।

୯ ଖାରିଦି ନି ମା ଲୋଇ ଖାନ୍ ଇନିକା ଅଲଗା ଇଡ୍‌ଏନ୍ । ଖାରି ବିସବାସ୍ ଉଣ୍ଟିଙ୍ଗ୍ ଖାନ୍ ଖାରି ପାପ୍ କେମା କିତାମାନାନ୍ ।

୧୦ ଆରତିଙ୍ଗ୍ ଏମେ ବଜୁ ପିଣ୍ଡଦେଙ୍ଗ୍ ଇଜି ମା ଡକ୍ରାଦାଦା ନି ମାପ୍ ସାସ୍ କିଦେଙ୍ଗ୍ ଆବ୍‌ଏତାପ୍, ମିର୍ ଇଲେଇ ବିସବାସିର୍ ମେପିଦୁ ଆକା ଲାଦେ କିଜି ଏୟା ମାପୁରୁଙ୍ଗ୍ ପରିକା କିଦେଙ୍ଗ୍ ବଦାକିଜିନିଦେର୍ ?

୧୧ ସିଲେ, ଇକା ଟିକ୍ ସିଲେ । ଖାର ଏମେ ବିସବାସ୍ କିଜି ରକିୟା ପୟତାମାନାର୍, ମାପ୍ ବା ଟିକ୍ ଆୟାଞ୍ଜା ବିସବାସ୍ କିଜି ପ୍ରୁ ଜିସୁଦି ଦୟା ଦାନ୍ ପରିତ୍ରାଣ ପୟତାମାନାପ୍ ।”

୧୨ ପାଉଲ ନି ବର୍ଣ୍ଣବାଦି ମାଣାନ୍ ଅଣଜିହୁଦି ଲୋକା ଲୋଇ ମାପୁରୁ ଏମେ ଖିଜୁ ନାଣ୍ଟ କାବାଆନି ପାଣି ନି କାବାଆନି ବିସୟ

କିତାମାର୍ହାନ, ଖାରିମାଣକୁ ତାନେ ମାଟା ଖେନ୍ଦି ଦଲତି ଝିଜେରେ  
ଆଲେତା ତେବାତାର ।

୧୩ ଖାର ଇହଁ ଝିସ୍ତି ଖେନ୍ଦକା ଜାକୁବ ଇର୍ହାନ, “ଏ ତଡ଼ାନକୁ ନି  
ତାଙ୍ଗି, ନା ମାଟା ଖେନ୍ଦୁ !

୧୪ ମାପୁରୁ ଏଣେସ୍ ଦୟା କିଜି ଅଣଜିହୁଦି ଲୋକା ଲୋଇ ଏସ  
ଲୋକାଙ୍ଗ୍ ଖାରି ଉଣ୍ଡିଙ୍ଗ୍ ବାସେ କିତାମାନାନ୍, ସିମୋନ ଆୟା ମାଟା  
ବୁଜାକିଜି ଖେରତାନ୍ ।

୧୫ ବାବବାଦିରି ବାକ୍ୟ ତେନିଙ୍ଗ୍ ପୁରାଦାନ୍ ମାନାଜିନାଡ଼ । ସାସ୍ତ୍ରୁ  
ରାସାତାମାନାଡ଼;

୧୬ “ପ୍ରବୁ ଇନାନ୍, ତେନି ଖେନ୍ଦକା ନାନ୍ ଡେସି ଖାନା  
ମାରି ଦାଉଦତି ରାଜିଦି ମାରିଡେସି ରକିୟା କିନା ।  
ନାନ୍ ଖାନି ଦଂସଆତି ଗୁଡ଼ା ଝିଜୁ  
ମାରିଡେସି ତିଆର୍ କିଜି ତାନିଙ୍ଗ୍ ମାରି ଉଣ୍ଡି ଦେବା ସାକ୍ତି କିନା  
।

୧୭ ଝିଜୁ ଲୋକୁ ନା ଲାକ୍ତୁ ଖାନାର୍,  
ଏମେ ଅଣଜିହୁଦି ଲୋକାଙ୍ଗ୍ ନାନ୍ ନିଜେଦିକା କିଦେଙ୍ଗ୍  
ଇଜି କୁକ୍ତାମାନା, ଖାର ଝିଜେରେ ନାନ୍ ଇଜି ମାନାନାର୍ ।

୧୮ ପ୍ରବୁ ଇୟା ମାଟା ଇର୍ହାନାନାନ୍, ପୁର୍ବେକାଡ଼ାଦୁ ଇୟା ମାଟା ଖାନ୍  
ଖେରତା ମାର୍ହାନ ।”

୧୯ “ନା ବିଚାର୍ ଇକା,” ଜାକୁବ ମାରି ବା ଇର୍ହାନ, ଏମେ ଅଣଜିହୁଦି  
ଲୋକୁ ମାପୁରୁଦି ଲାକ୍ତୁ ଖାତାମାନାର୍, ମାଡ଼ ଖାରିଙ୍ଗ୍ ମାରି ବାଦା  
କିଏର୍ ।

୨୦ ମାତର୍ ଖାର ଏଣେସ୍ ଦିୟାମ୍‌କାଙ୍ଗ୍ ପୁଜାସିତିମାନି ଇନି  
ଅସ୍ତି କାଦି ଉଣ୍ଡିଏର୍, ଦାରିପାଣି କିନି ପାପ୍‌ତାନ୍ ତେବାନାର୍, କକ୍‌ଲା  
ସିପ୍‌ସି ଡାକ୍ତିମାନି ଜାଡୁଦି ନେତେର୍ ନି କାଣ୍ଡା ତିନ୍‌ଏର୍ ଇୟାଝିଜୁ  
ବିସ୍‌ୟତାନ୍ ସିକିୟା ସିଜି ଖାରି ଲାକ୍ତୁ ଉଣ୍ଡି ଆକୁ ରାସ୍‌ନାର୍ ।

୨୧ ଇରିଙ୍ଗ୍ ନାଣ୍ଡିନ୍ ଆସ୍‌ସି ଝିଜୁ ରମ୍‌ନିଦିନ୍‌ଡୁ ପାର୍‌ତନାକିନି  
ଇଲ୍‌କାଙ୍ଗ୍ ମୋସାଦି ନିୟମ୍ ପଡ଼ା ଆଜିନାଡ଼ ମାରି ଝିଜୁ ଗାଡ଼କାଙ୍ଗ୍  
ଖାନି ବାକ୍ୟ ପ୍ରଚାର୍ ଆଜିନାଡ଼ ।

ଅଣଜିହୁଦି ବିସ୍‌ବାସିରି ଲାକ୍ତୁ ଆକୁ

୨୨ ଖେନକା ପ୍ରେରିତ ସିସୁର ନି ମଣ୍ଡଲିଦି ନେତାର ମାରି ମଣ୍ଡଲିଦି ଝିଜେରେ, ଦଲତି ଏସ ଲୋକାଙ୍ଗ ବାସେକିଜି ପାଉଲ ନି ବର୍ଣ୍ଣବାଦି ଖାଲେ ଖାରିଙ୍ଗ୍ ଆଣ୍ଟିୟକଦୁ ପକ୍ତେଙ୍ଗ୍ ଇଜି ତିର୍ କିତାର । ବର୍ଣ୍ଣବା ଦରତି ଜିହୁଦା ନି ସିଲା ବିସ୍ବାସତି ତଡ଼ାନକା ଲୋଇ ସନ୍ମାନ ପୟତାର ।

୨୩ ବିସ୍ବାସିର୍ ରାସାତିମାନି ଆକୁଦିଙ୍ଗ୍ ଇୟା ରିଏରି କିୟୁଦୁ ପକ୍ତାର ।

“ଆଣ୍ଟିୟକ, ସିରିଆ ମାରି କିଲିକିୟାଦି ଅଣଜିହୁଦିରି ମାଣ୍ଡକୁ ଖାତିମାନି ତଡ଼ାନକୁ ପ୍ରେରିତ ସିସୁର ମାରି ମଣ୍ଡଲିଦି ନେତାର ମାଡ଼ିସ୍ କିଜିନାର ।

୨୪ ମାପ୍ ଖେନଜିନାପ୍ ଜେ, ମା ଦଲ୍ତାନ ଏସ ଲୋକୁ ମି ଲାକ୍ତୁ ସଲ୍ସି ଆମାକା ଇର୍ହାମାନାର୍, ଆବେଶ୍କୁ ଖାର୍ ମି ମନ୍ତିଙ୍ଗ୍ ଗାତ୍ରା ନି ତରବର୍ କିତାମାନାର । ମାତର୍ ଇୟା ବିସୟତାନ ମାପ୍ ଖାରିଙ୍ଗ୍ ଇଜି ସିକିୟା ସିଏପ୍ ।

୨୫ ଆଦେଙ୍ଗ୍ ମାପ୍ ଝିଜେପେ ଉନ୍ଶି ମାଟା ଆଜି ଏସ ଲୋକ କାରୁର୍ ସିନିଖାରିଙ୍ଗ୍ ବାସେ କିଜି ମି ଲାକ୍ତୁ ପକ୍ତେଙ୍ଗ୍ ଇଜି ଆସକିତାମାନାପ୍ । ଖାର୍ ମା ଲାଡ଼ତି ତଡ଼ାନ ବର୍ଣ୍ଣବା ନି ପାଉଲତି ଖାଲେ ସନାର ।

୨୬ ଇୟା ତଡ଼କୁ ପ୍ରବୁ ଜିସୁ କ୍ରିସ୍ତଦି ସେବାଦୁ ନିଜେଦି ଜିବନ୍ତିଙ୍ଗ୍ ସିତା ମାନାର ।

୨୭ ମାପ୍ ଜିହୁଦା ନି ସିଲେଙ୍ଗ୍ ମି ଲାକ୍ତୁ ପକ୍ସିନାପ୍ । ମାପ୍ ଆମାକା ରାସ୍ସିନାପ୍, ଖାର୍ ନିଜେ ଆକା ମିଙ୍ଗ୍ ଇନାର୍ ।

୨୮ ଏସ ଦରକାର୍ ମାନି ନିୟମ୍ ତ୍ରିସତିଙ୍ଗ୍ ମି ମୁସକୁ ମାରି ଇଜି ବଜୁ ତିଗ୍ ଉଣ୍ଡିଙ୍ଗ୍ ମାପ୍ ପବିତ୍ର ଆମ୍ବାଦି ମାଣାନ୍ ସିକିୟା ପୟତାମାନାପ୍ ।

୨୯ ଆୟା ଏସ ନିୟମ ଆତାଡ଼; ଦିୟାମ୍କା ଉଦେସ୍ତାନ ପୁଜାସିତିମାନି ଇଜି କାଦି ଉଣ୍ଡାମାଟ୍, ନେତେର୍ ତିନିମାଟ୍, କକ୍ଲାଦିଙ୍ଗ୍ ପିଡ଼ସି ତାକ୍ତିମାନି ଇଜି ଜାହୁଦି କାଣ୍ଡା ତିନିମାଟ୍ ମାରି ଦାରିପାଣିଦାନ୍ ବନ୍ଦ୍ ଆନାଟ୍ । ଇୟାଝିକୁ ପାଣି କିଇ ଉଣ୍ଡିଙ୍ଗ୍ ଜାଗାର୍ତା ମାରିଙ୍ଗ୍, ମି ନେରିକା ଆନାଟ୍ । ମା ମାଟା ଆସ୍ତୁ ।”

୩୦ ଆମା କାବୁର ସିନିଝାରିଙ୍ଗ୍ ପକ୍ତାମାର୍ହାର୍, ଖାର ଆଣ୍ଟିୟକଦୁ ସଲ୍ସି ବିସ୍ବାସିରି ଝିନ୍ନୁ ଦଲ୍ଲତିଙ୍ଗ୍ ଉଣ୍ଡା କିଜି ଇୟା ସିଟି ସିତାର୍ ।

୩୧ ଆବେଣି ବିସ୍ବାସିର୍ ସିଟିଦି ଝେଡିକାଦି କାବୁର ପଡାଜି ଝେଡିକାଦୁ ପୁରା ଆତାର୍ ।

୩୨ ଜିହୁଦା ନି ସିଲା ନିଜେ ବାବବାଦି ମାର୍ହାର୍ ମାରି ଖାର ଆଣ୍ଟିୟକଦି ବିସ୍ବାସିରିଙ୍ଗ୍ ନାଣ୍ଡ ବେଡା ସାନ୍ଦି ଖାରଜି ତଡାନ୍‌କାରି ବିସ୍ବାସତିଙ୍ଗ୍ ଡାର୍ କିତାର୍ ।

୩୩ ଆବେ ଏସ ଦିନ୍ ତେବାତି ଝେନ୍‌କା ଏମେକାର୍ ଝାରିଙ୍ଗ୍ ପକ୍ତାମାର୍ହାର୍, ଖାରି ଲାକ୍ତୁ ତେସିସନ୍‌ଡ୍ରେଙ୍ଗ୍ ଇଜି ବିସ୍ବାସତି ତଡାନ୍‌କୁ ଝାରିଙ୍ଗ୍ ସାନ୍ତିଦାନ୍ ପକ୍ତାର୍ ।

୩୪ ମାତର୍ ସିଲା ଆବେନ୍ନୁ ମାନିକା ନେଗେନ୍ ଇଜି ଅଡ୍‌ବିତାଡ୍ ।

୩୫ ପାଉଲ ନି ବର୍ଣ୍ଣବା ଆଣ୍ଟିୟକଦୁ ଏସ ଦିନ୍ ତେବାଜି ନାଣ୍ଡ ଲୋକା ଖାଲେ ମିସାବିଡା ଆଜି ପ୍ରବୁଦି ବାକ୍ୟ ପ୍ରଚାର୍ କିତାର୍ ମାରି ସିକିୟା ସିତାର୍ ।

### ପାଉଲ ନି ବର୍ଣ୍ଣବା ଝେରଏ ଆତାର୍

୩୬ ଏସ ଦିନ୍ ଝେନ୍‌କା ପାଉଲ ବର୍ଣ୍ଣବାଦିଙ୍ଗ୍ ଇର୍ହାନ୍, “ସନାର୍, ମାଡ୍ ତେସିସନାର୍, ଝିନ୍ନୁ ଗାଡ୍‌କାଙ୍ଗ୍ ଏମେ ତଡାନ୍‌କାଙ୍ଗ୍ ପ୍ରବୁଦି ବାକ୍ୟ ଏଣ୍ଡେସ୍ ଝେନିସ୍ କିତିମାର୍ହାକା, ତଡାନ୍‌କାଙ୍ଗ୍ ମିସାନାର୍ ମାରି ଖାର ଏଣ୍ଡେସ୍ ମାନାର୍, ବୁଜାନାର୍ ।

୩୭ ବର୍ଣ୍ଣବା ଖାରି ଖାଲେ ଜୋହନ ଦର୍ଡି ମାର୍କଙ୍ଗ୍ ଅତେଙ୍ଗ୍ ଇଜି ବଦାକିତା ମାର୍ହାନ୍,

୩୮ ମାତର୍ ପାଉଲ ଝାନିଙ୍ଗ୍ ଅତେଙ୍ଗ୍ ଟିକ୍ ଅଡ୍‌ବିଏତାନ୍; ଇରିଙ୍ଗ୍ ଝାନ୍ ଆଗ୍ଡି ପ୍ରଚାର୍ କିଦେଙ୍ଗ୍ ସନି ପାଣିଦୁ ଝିଜ୍‌ନି ସାନ୍ଦି ଖାରି ଖାଲେ ତେବାଏନ୍‌ଣ୍ଡା ଝାରିଙ୍ଗ୍ ପାମ୍‌ଲିଆଦୁ ଡିସ୍‌ସି ସର୍ହାମାର୍ହାନ୍ ।

୩୯ ଇୟା ବିସୟତାନ୍ ନାଣ୍ଡ ଆସ୍‌ସିସାତାର୍ ମାରି ଖାର ଝେରଏ ଆତାର୍ । ବର୍ଣ୍ଣବା ମାର୍କଙ୍ଗ୍ ଆସ୍‌ସି ସାଇପ୍ରସ୍‌ତୁ ଏରୁ ସାରିଦୁ ସର୍ହାନ୍ ।”

୪୦ ମାତର ପାଉଲ ସିଲେଙ୍କୁ ଆସକିତାନ ମାରି ବିସ୍ବାସତି  
ତଡ଼ାନକା ମାଣାନ ପ୍ରବୁଦି ଦୟାଦାନ ସର୍ପେ ଆଜି ସର୍ହାର ।

୪୧ ଖାନ ମଣ୍ଡଳିଆଙ୍କୁ ସାକ୍ଷିକିବିସ୍ କିଜି ସିରିଆ ନି ସିଲିସିଆ ବା  
ସିଜି ସର୍ହାର ।

## ୧୭

ପାଉଲ ନି ସିଲା ଖାଲେ ତିମତି ସର୍ହାନ

୧ ପାଉଲ ଦବି ନି ଲୁସ୍ତାଦୁ ସର୍ହାର । ଆବେ ତିମତି ଦରତି ଅରେନ୍  
କ୍ରିଷ୍ଟିୟାନ ବାସାଜି ମାହାନ । ଖାନ ଅରେନ୍ କ୍ରିସ୍ଟ ବିସ୍ବାସି ଜିହୁଦି  
ଆଇମାଦି ମାରିସି । ମାତର ଖାନି ବୁବାସି ଅରେନ୍ ଗ୍ରିକ୍ ଲୋକୁ ମାହାନ  
।

୨ ଲୁସ୍ତା ନି ଇକନିୟାଦୁ ମାନି ତଡ଼ାନକା ଲୋଇ ତିମତିଦିଙ୍କୁ ନେଗି  
ଲୋକ୍ ଇଜି ନେସତା ମାର୍ହାର ।

୩ ପାଉଲ ଖାନି ଖାଲେ ତିମତିଙ୍କୁ ଅତେଙ୍କୁ ଇଜି ବଦା  
କିତାନ, ଆଦେଙ୍କୁ ଖାନିଙ୍କୁ ସୁନ୍ନତ କିତାନ । ଇକା କିନି ମାଟା  
ଆତାଡ଼, ତିମତିଦି ବୁବାସି ଗ୍ରିକ୍ ଲୋକୁ ଇଜି ଆୟା ବାଡିଆଙ୍କୁ  
ବାସାତିମାନିକାର ଜିହୁଦି ଲୋକୁ ନେସତାମାହାର ।

୪ ନାଣ୍ଡ ଗାଡ଼କୁ ନାଡ଼ି ସିଜି ସନି ଖାଲେ ଖାର ବିସ୍ବାସିରିଙ୍କୁ  
ଜିରୁସାଲାମତି ପ୍ରେରିତ ସିସୁର୍ ନି ପେରି ନେତାର ଖାରି ମାଣାନ  
କିଆୟାଆତି ନିତି ନିୟମ ଝିଜୁ ବୁଜାକିଜି, ଆୟାଝିଜୁ ମାନାଦେଙ୍କୁ ଇଜି  
ଇଜିମାହାର ।

୫ ଆବେଟକୁ ମଣ୍ଡଳିଙ୍କୁ ଝିଜୁ ବିସ୍ବାସତୁ ମାରି ନାଣ୍ଡ ସାକ୍ଷି ଆତାଡ଼  
ମାରି ଦିନତିଙ୍କୁ ଦିନ୍ ଲୋକୁ ନାଣ୍ଡ ଆଦେଙ୍କୁ ଆସତାର ।

ମାସିଦନିଆ ସନ୍ତେଙ୍କୁ ଇଜି ତ୍ରୟାଦୁ ପାଉଲତିଙ୍କୁ କୁକ୍ନିକା

୬ ପବିତ୍ର ଆମ୍ବା ଖାରିଙ୍କୁ ଆସିଆ ଦେସତୁ ପ୍ରଚାର କିଦେଙ୍କୁ ସାରି  
ପୟସତାର ଆକା ଖାର ପୁଗିଆ ମାରି ଗାଲାତିୟ ରାଜିଦୁ ସର୍ହାର ।

୭ ମିସିଆଦି ଲାକଡ଼ ଇଜି ବିତୁନିଆ ରାଜିଦୁ ସନ୍ତେଙ୍କୁ  
ସନିଖାଲେ ଜିହୁଦି ଆମ୍ବା ଖାରିଙ୍କୁ ସାରି ସିସତାଡ଼ ।

୮ ଆଦେଙ୍ଗ୍ ଝାର ମିସିଆ ନାଡ଼ମି ସିଜି ସଲ୍‌ସି ଡ୍ରୋୟାଦୁ ସର୍ହାର ।

୯ ଆୟା ନାଡ଼ା ପାଉଲ ଉନ୍‌ଶ୍ଟି ଦର୍ସନ୍ ପୟ୍‌ତାନ୍ ଜେ, ମାସିଦୋନିଆଦି ଅରେନ୍ ଲୋକୁ ମାଡ଼ିସ୍ କିଜି ଇଜିନାନ୍, “ମାସିଦୋନିଆଦୁ ଖାଜି ମାଙ୍ଗ୍ ସାକା କିଆ !”

୧୦ ପାଉଲ ଇୟା ଦର୍ସନ୍ ପୟ୍‌ତିଦାପ୍ରେ ମାସିଦୋନିଆଦୁ ସନ୍‌ଡ୍ରେଙ୍ଗ୍ ଇଜି ମାପ୍ ତିଆର୍ ଆତାପ୍, ଇରିଙ୍ଗ୍ ମାପ୍ ସତେ ନେସ୍‌ତାପ୍, ମାପୁରୁ ଆବେଣି ଲୋକା ଲୋଇ ସୁସମାଚାର ପ୍ରଚାର କିଦେଙ୍ଗ୍ ଇଜି ମାଙ୍ଗ୍ କୁକ୍‌ତାମାନାନ୍ ।

### ପିଲିପିଦୁ ଲୁଦିଆ ମନ୍ ଡେପ୍‌ତାଡ଼

୧୧ ମାପ୍ ଜାହାଜ୍‌ତାନ୍ ଡ୍ରୋୟା ଡ଼ିସ୍‌ସି ସାମତ୍ରାଦୁ ସର୍ହାପ୍ ମାରି ମାରିନାଶ୍ଟିଙ୍ଗ୍ ନିଆପଲିଦୁ ଇତାପ୍ ।

୧୨ ଆବେଟ୍‌ଗାନ୍ ମାପ୍ ମାସିଦୋନିଆ ଜିଲାଦି ପେରି ଗାଡ଼୍ ପିଲିପିଦୁ ସର୍ହାପ୍ । ଇୟା ଗାଡ଼୍ ଉନ୍‌ଶ୍ଟି ରୋମିୟରି ବସ୍ତି ମାର୍ହାଡ଼ । ମାପ୍ ଆବେନ୍‌ ନାଶ୍ଟି ଦିନ୍ ତେବାତାପ୍ ।

୧୩ ରମ୍‌ନି ଦିନ୍ ଗାଡ଼୍ ଆଡ଼ରେ ମାନି ଗାତା ପାଡ଼ି ସର୍ହାପ୍ । ମାପ୍ ଅଡ଼ବିତାପ୍, ଆବେ ଜିହୁଦିଲୋକୁ ଉଶ୍ଟାଜି ପାର୍‌ତାନା କିଦେଙ୍ଗ୍ ଇଜି ଉନ୍‌ଶ୍ଟି ବାଡ଼ି ତେବାନାଡ଼ । ମାପ୍ ବାସ୍‌ତାପ୍ ମାରି ଆବେ ଉନ୍‌ଶ୍ଟାତି ମାହ୍ ଆଇମା ଲୋକା ଖାଲେ ଖାରଗିତାପ୍ ।

୧୪ ତାମେ ଲୋଇ ତୁୟ୍‌ତିରା ଗାଡ଼୍‌ତି ସେର୍‌ଗା ରଙ୍ଗ୍ ଖାତିଗଦା ପରଜି ମାନି ଲୁଦିଆ ଦରତି ଅରେଡ଼ ଆଇମା ମାର୍ହାଡ଼ । ଖାଦ୍ ମାପୁରୁଦି ଉପାସନା କିଜିମାର୍ହାଡ଼ ମାରି ପାଉଲ ଆମାକା ଇଜିମାର୍‌ଆନ୍, ଆକା ମନ୍ ସିଜି ଖେନ୍‌ଜି ମାନାଦେଙ୍ଗ୍ ଇଜି ପ୍ରବୁ ତାନିଙ୍ଗ୍ ସୁଜୋଗ ସିତାନ୍ ।

୧୫ ଖାଦ୍ ନି ତାନି ଇଲ୍‌ତି ଓଜେରେ ତୁବନ୍ ଅତି ଖେନ୍‌କା ମାଙ୍ଗ୍ ମାଡ଼ିସ୍ କିଜି ଇର୍ହାଡ଼, “ପ୍ରବୁମାନୁ ସଡ଼ତାନ୍ ନା ବିସ୍‌ବାସ୍ ମାନାଡ଼ ଇଜି ଜଦି ମିର୍ ଅଡ଼ବିଜିନିଦେର୍, ଆରତିଙ୍ଗ୍ ଖାଜି ନା ଇଲ୍‌ତୁ ତେବାଦୁ ।” ଖାଦ୍ ଇୟାଖାଜା ତାନି ଇଲ୍‌ତୁ ସନ୍‌ଡ୍ରେଙ୍ଗ୍ ଇଜି ମାଙ୍ଗ୍ ଖେର୍‌ତାଡ଼ ।

### ପିଲିପିଦି ଜଇଲ୍‌ତୁ ପାଉଲ ନି ସିଲା

୧୭ ଅରଲେନ୍ ମାପ୍ ପାର୍ତ୍ତନା ବାଡ଼ିଦୁ ସନିଝାଲେ ଅରେଡ଼ ଦାସି ରିପାଦିଙ୍ ଝୁଡ଼ିତାପ୍ । ତାନି ଲୋଇ ମାନି ତାଗ୍‌ଇ ଆମ୍‌ଦି ସାକ୍ତିଦାନ୍ ଝାଦ୍ ବବିସଡ଼ ମାଟା ଇନ୍‌ଡ୍ରେଙ୍ ଆର୍‌ସି ମାର୍‌ହାଡ଼ । ଝାଦ୍ ଲୋକା ବାଗ୍ୟ ଲେକିସ୍ କିଜି, ମାଲିକ୍‌କା ଉଣ୍‌ଇଙ୍ ନାଣ୍ଡ ତାବୁଙ୍ ଉଣ୍ଡା କିଜିମାର୍‌ହାଡ଼ ।

୧୮ ଝାଦ୍ ପାଉଲ ନି ମା ଝେନ୍‌କା ଝେନ୍‌କା ଝାଜି ଆଉଲି ଆଜି ଇର୍‌ହାଡ଼, “ଇୟା ଲୋକୁ ଝିଜେରିଙ୍ ପେରି ମାପୁରୁଦି ସେବାକିନିକାର୍ । ମିର୍ ଏଣ୍ଡେସ୍ ପରିତ୍ରାଣ ପୟନିଦେର୍, ଇୟା ମାଟା ଝାର୍ ଇଜିନାର୍ !”

୧୯ ରିପା ଆଇଲି ବେସି ଦିନ୍ ଆସ୍‌ସି ଇୟାଝାଜା କିତାଡ଼ । ସାରାସାରି ପାଉଲ ରିସା ଆଜି ଝେନ୍‌କା ମାର୍‌ଜି ତାଗ୍‌ଇ ଆମ୍‌ଦିଙ୍ ଆଦ୍‌ରିସି ଇର୍‌ହାନ୍, “ଜିସୁ କ୍ରିସ୍ତଦି ଦରତାନ୍ ଆଦେସ୍ ସିଜିନା, ତାନି ମାଣାନ୍ ସହସ ସାଙ୍‌ଆ !” ଆୟା ଦାପ୍ରେ ତାଗ୍‌ଇ ଆମ୍‌ ତାନି ମାଣାନ୍ ସତା ସର୍‌ହାଡ଼ ।

୨୦ ଏସିଝାଲେ ତାନି ମାଲିକ୍‌କୁ ନିଜେଦି ତାବୁଙ୍ ଉଣ୍ଡାକିନିକା ଆରାତାପ୍ ଇଜି ନେସ୍‌ସି, ପାଉଲ ନି ସିଲେଙ୍ ଆସ୍‌ସି ଗାଡ଼ୁଡ଼ି ମଜାୟ ନାଡ଼୍‌ମିବାଡ଼ିଦୁ ମାନି ରମିୟ ନେତାର୍‌ଦି ଲାକ୍‌ତୁ ରେଲ୍‌ଜି ତାତାର୍ ।

୨୧ ମାରି, ଝାର୍ ଝାରିଙ୍ ରମିୟ ସାସନ୍‌କିନିଝାରି ଲାକ୍‌ତୁ ତାସି ଇର୍‌ହାର୍, “ଇୟା ଲୋକୁ ଜିହୁଦିର୍, ଇୟାକାର୍ ମା ଗାଡ଼ୁ ଜାଟିଜଗଡ଼ା କିଜିନାର୍ ।

୨୨ ଝାର୍ ମା ନିୟମ୍ ବିରୁଦ୍ଧି ରିତିନିତି ଅଜାକିଜିନାର୍ । ମାଡ଼୍ ରମିୟ ଲୋକୁ, ଆଦେଙ୍ ଇୟାଝିଜୁ ରିତିନିତି ଆସ୍‌ତେଙ୍ ଆର୍‌ଏପ୍ ।”

୨୩ ମାଲିକ୍‌କା ମାଟାବୁ ଆସ୍‌ସି ଆବେ ମାନି ଲୋକୁ ପାଉଲ ନି ସିଲାଦି ବିରଦ୍‌ତାନ୍ ନିଙ୍ ତାର୍ ।

ପାଉଲ ନି ସିଲାଦି ଆଙ୍ କୁଡ଼ସି ଝାରିଙ୍ ବାଡ଼ିଗାଦାନ୍ ତାକ୍‌ତେଙ୍ ନେତା ଆଦେସ୍ ସିତାନ୍ ।

୨୩ ନାଣ୍ଟ ମାଡ଼ ତିରଇ ଖେନକା ଖାର ଜଇଲୁଡୁ ସର୍ହାର୍ ମାରି  
 ଖାରିଙ୍ଗ୍ କୁସିକାଣ୍ଡି ଆରପସି କାପକିଜି ଇଡ଼ଦେଙ୍ଗ୍ ଇଜି  
 କାପକିନିଖାରିଙ୍ଗ୍ ଆଦେସ ସିଆୟ ଆତାଡ଼ ।

୨୪ ଇୟା ଆଦେସ ପୟଜି କାପକିନିକାନ୍ ଖାରିଙ୍ଗ୍ ଉନ୍‌ଶ୍ଟି ଲୋଇରି  
 ବାକରାଦୁ ଇଡ଼ଜି, ବଜତି ମାରାନ୍ ଗଣ୍ଡିଦୁ ଖାରି କାଲ୍‌କାଙ୍ଗ୍ ଡିରତା  
 ଇଡ଼ତାନ୍ ।

୨୫ ମଜାୟ ନାଡ଼ା ପାଉଲ ନି ସିଲା ପାରତନା କିଜିମାର୍ହାର୍,  
 ମାପୁରୁଦି ଉଦେସତାନ୍ ପାଟା ପାରଜି ମାର୍ହାର୍ ମାରି ଜଇଲୁଡୁ ମାନି  
 ଆଇକାର ଇକା ଖେନଜି ମାର୍ହାର୍ ।

୨୬ ଆୟାଦାପ୍ରେନେ ନାଣ୍ଟ ବୁମିକମ୍ ଆତାଡ଼ ମାରି ଜଇଲୁଡି  
 ମୁଲ୍‌କାଲ୍‌ତିଙ୍ଗ୍ ଦୁକାତା ପକ୍ତାଡ଼ । ବେଗି ବେଗି ଖିଜୁ ସେରଲେଙ୍ଗ୍  
 ରେଆଡେ ସର୍ହେ ମାରି ଖିଜୁ ଜଇଲୁଡୁ ମାନିଲୋକା ସିକିଣିଙ୍ଗ୍  
 ଆରଡେ ସର୍ହେ ।

୨୭ ଜଇଲୁଡିଙ୍ଗ୍ କାପକିନିକାନ୍ ସେତାଆଜି ନିଙ୍ଗ୍‌ତାନ୍ ମାରି  
 ଜଇଲୁଡି ସେରଲେଙ୍ଗ୍ ଖିଜୁ ରେଆଡିକା ସୁଡ଼ଜି ଅଡ଼ବିତାନ୍ ଜେ  
 ଜଇଲୁଡୁମାନିକାର ଉରୁକୁତାମାନାର୍; ଆଦେଙ୍ଗ୍ ଖାନ ଖାନି କୁଡ଼ାମ୍  
 ସପସି କାତାଦେଙ୍ଗ୍ ଇଜି ବଦା କିତାନ୍ ।

୨୮ ମାଡ଼ର ପାଉଲ ନାଣ୍ଟ ଆଉଲିଦାନ୍ ଇର୍ହାନ୍, “ନିଜେଦିଙ୍ଗ୍ ଇନି  
 ନାଷ୍ଟୁ କ୍ରିମା । ମାପ୍ ଖିଜେରେ ଇବେ ମାନାପ୍ ।”

୨୯ ଜଇଲୁ କାପକିନିକାନ୍ ଦିଖା ତାପିସ୍‌କିତାନ୍ ମାରି ଲୋଇ  
 ଉରୁକ୍‌ସି ଖାଜି ତିରଗିଜି ତିରଗିଜି ପାଉଲ ନି ସିଲାଦି କାଲ୍‌କା ଆଡ଼ଗି  
 ଆଡ଼ତାନ୍ ।

୩୦ ଖେନକା ଖାରିଙ୍ଗ୍ ଆଡ଼ରେ ଅସି ଖେନବାତାନ୍, “ଆଜ୍ଞାର୍,  
 ରକିୟା ପୟଦେଙ୍ଗ୍ ଇଜି ନାଙ୍ଗ୍ ଇନିକା କିଦେଙ୍ଗ୍ ଆନାଡ଼ ?”

୩୧ ଖାର ଇର୍ହାର୍, “ପ୍ରବୁ ଜିସୁମାନୁ ବିସ୍‌ବାସ୍ କିତିଙ୍ଗ୍, ନିନ୍ ମାରି  
 ଇଲୁଦି ଖିଜୁ ଲୋକ୍‌କୁ ରକିୟା ପୟନିଦେର୍ ।”

୩୨ ଖେନକା ଖାର ଖାନିଙ୍ଗ୍ ନି ଖାନି ଇଲୁଦି ଆଇ ଖିଜେରିଙ୍ଗ୍  
 ପ୍ରବୁଦି ବାକ୍ୟ ଖେରତାର୍ ।

୩୩ ନାଡ଼ାଦି ଆୟା ସମୟୁ ଜଇଲୁଡିଙ୍ଗ୍ କାପକିନିକାନ୍  
 ଖାରିଙ୍ଗ୍ ଅସି ଖାରି ଗାଉକୁ ଖିଜୁ ନରତା ସିତାନ୍, ମାରି ଖାନ ନି

ଇଲ୍‌ଡି ଓଜେରେ ଆୟାଦାପ୍ତେ ଭୁବନ୍ ଅତାର ।

୩୪ ତାନିଞ୍ଜେନକା ଖାନ୍ ପାଉଲ ନି ସିଲେଙ୍ଗ୍ ନିଜେଦି ଇଲ୍‌ଡୁ ଅସି  
ଉଣ୍ଡେଙ୍ଗ୍ ସିତାନ୍ । ମାପୁରୁମାନୁ ବିସବାସ୍ କିତାରଆକା ଖାନ୍ ନି ଖାନି  
ଇଲ୍‌ଡି ଓଜେରି ଜିବନ୍ ଶ୍ରେଡିକାଦୁ ପୁରା ଆତାଡ୍ ।

୩୫ ମାରିନାଣ୍ଡିଙ୍ଗ୍ ସାଲ୍‌ଦି ରମିୟ ଅଦିକାରିର୍ ଜାମାନକାଙ୍ଗ୍  
ଇୟା ଆଦେସ୍ ସିଜି ପକ୍ତାନ୍, “ଆୟା ଲୋକାଙ୍ଗ୍ ଡିସ୍‌ସୋ ସିଦୁ ।”

୩୬ ଆବେଟ୍ ଜେଲ୍‌କାପ୍‌କିନିକାନ୍ ପାଉଲ୍‌ଡିଙ୍ଗ୍ ଇର୍ହାନ୍,  
“ଅଦିକାରିର୍ ନିଙ୍ଗ୍ ନି ସିଲେଙ୍ଗ୍ ମୁକୁଡ଼ା କିଦେଙ୍ଗ୍ ଇଜି  
ଆଦେସ୍ ପକ୍ତାମାନାନ୍ । ଇଲେଇ ମିର୍ ସାନ୍ତିଦାନ୍ ଇୟା ବାଡିଦାନ୍  
ସନ୍‌ଡ୍ରେଙ୍ଗ୍ ଆବ୍‌ନିଦେର୍ ।”

୩୭ ମାତର୍ ପାଉଲ ଜାମାନକାଙ୍ଗ୍ ଇର୍ହାନ୍, “ଇନି ନିନ୍ଦାଦୁ ଦସି  
ଆସଡିମାରିଙ୍ଗ୍ ବା ଖାର ଲୋକା ଆଗ୍‌ଡି ମାଙ୍ଗ୍ ତାକ୍‌ତାର । ମାପ୍  
ରମିୟ ଲୋକୁ, ମାତର୍ ଖାର ମାଙ୍ଗ୍ ଜଇଲ୍‌ଡୁ ଇଟ୍‌ତାର । ଇଲେଇ  
ଖାର ମାଙ୍ଗ୍ ନେସ୍‌ଇଖାଜା ଡିସ୍‌ସୋ ସିଦେଙ୍ଗ୍ ବଦା କିଜିନାର । ମାପ୍  
ଇକା କିଦେଙ୍ଗ୍ ସିଏପ୍ । ରମିୟ ଅଦିକାରିର୍ ନିଜେ ଇବେ ଖାଜି  
ମାଙ୍ଗ୍ ମୁକୁଡ଼ା କିପିର୍ ।”

୩୮ ଜାମାନକୁ ରମିୟ ଅଦିକାରିଙ୍ଗ୍ ଇୟା ମାଟା ଶ୍ରେଟ୍‌ତାର ।  
ପାଉଲ ନି ସିଲ୍‌ଆ ରମିୟ ଲୋକୁ ଇଜି ଶ୍ରେନ୍‌ଜି ଖାର ତିଲାତା ସର୍ହାର ।

୩୯ ଶ୍ରେନ୍‌କା ସଲ୍‌ସି ଖାରି ଲାକ୍‌ଡୁ କେମା ଲୋସ୍‌ତାର ମାରି  
ଖାରିଙ୍ଗ୍ ଜଇଲ୍‌ତାନ୍ ମୁକୁଡ଼ା କିଜି ଗାଡ୍ ଡିସ୍‌ସି ସନ୍‌ଡ୍ରେଙ୍ଗ୍ ମାଡିସ୍  
କିତାର ।

୪୦ ପାଉଲ ନି ସିଲ୍‌ଆ ଜଇଲି ଡିସ୍‌ସି ଲୁଦିଆଦି ଇଲ୍‌ଡୁ ସର୍ହାର ।  
ଆବେ ଖାର ବିସବାସ୍‌ତି ତଡାନ୍‌କାଙ୍ଗ୍ ବେଟ୍ ଆତାର ମାରି ଖାରିଙ୍ଗ୍  
ଶ୍ରେଡିକା ମାଟା କିବିସ୍ କିଜି ଆୟା ବାଡି ଡିସ୍‌ସି ସର୍ହାର ।



ତେସଲନିକାଦୁ ସେବା ପାଣି

୧ ପାଉଲ ନି ସିଲ୍ଲା ଆମ୍ଫିପଲି ମାରି ଆପଲନିଆ ଗାଡ଼ ସିଜି ସଲ୍ଲସି ତେସଲନିକିୟାଦି ଇତାର । ଆବେ ଉନ୍‌ଶ୍ଟି ଜିହୁଦିରି ପାର୍ତନା ଇଲୁ ମାର୍ହାଡ଼ ।

୨ ପାଉଲ ଖାନି ରିତି ଇସାବ୍‌ତାନ୍ ପାର୍ତନା ଇଲୁତୁ ସର୍ହାନ୍ । ଆବେ ପାକାପାକି ମୁନ୍‌ଶ୍ଟି ରମ୍‌ନି ଦିନ୍ ସାନ୍‌ସି ଦାମ୍‌ସାସ୍ତ୍ରଦି ବାକ୍ୟ ଅସି ଖାନ୍ ଲୋକାଙ୍ଗ୍ ଖେର୍‌ତାନ୍,

୩ ଦାମ୍‌ସାସ୍ତ୍ର ଖେର୍‌ସି ମାରି ବୁଜାକିଜି ସଡ଼ ତରତାନ୍ ଜେ, ମସିହଦି ଦୁକୁ ବଗାନିକା ମାରି ସାତି ମାଣାନ୍ ନିଙ୍ଗା ଦରକାର ମାର୍ହାଡ଼ । ପାଉଲ ଇର୍ହାନ୍, “ଏମେ ଜିହୁଦି ବିସୟ ନାନ୍ ଖେର୍‌ସିନା, ଖାନ୍ ଆୟା ମସିହ ।”

୪ ଖାରି ଲୋଇ ଏସ ଲୋକୁ ଇକା ବିସ୍‌ବାସ୍ କିଜି ପାଉଲ ନି ସିଲ୍ଲା ଖାଲେ ମିସାତାର୍; ଆୟାଖାଜା ନାଣ୍ଟ ପେରି ଆଇମେକ୍ ମାରି ମାପୁରୁଦି ପାର୍ତନାକିନି ଗ୍ରାକ୍ ଲୋକା ଉନ୍‌ଶ୍ଟି ପେରି ଦଲ୍ ବା ଖାରି ଖାଲେ ମିସାତାର୍ ।

୫ ମାତର୍ ଜିହୁଦି ଲୋକୁ ରିସା ଆତାର୍ ମାରି ଏସ ତାଗ୍‌ଲ ଗୁଣ୍ଡତି ଲୋକାଙ୍ଗ୍ ଉଣ୍ଟା କିଜି ଖିଜୁ ଗାଡ଼କାଙ୍ଗ୍ ମାଡ଼ଗୋଲ୍ କିବିସ୍ କିତାର୍ । ଖାର୍ ପାଉଲ ନି ସିଲେଙ୍ଗ୍ ପୟ୍‌ଜି ଲୋକା ଲାକ୍‌ତୁ ତାନି ଉଣ୍ଟିଙ୍ଗ୍ ଜେସନ୍ ଦରତି ଅରେନ୍ ଲୋକ୍‌ତି ଇଲୁଦିଙ୍ଗ୍ ଖିର୍‌ସିତାର୍ ।

୬ ମାତର୍ ଆବେ ପାଉଲ ନି ସିଲେଙ୍ଗ୍ ପୟ୍‌ଏଜି, ଖାର୍ ଜେସନ୍ ନି ଆଇ ଏସ ବିସ୍‌ବାସ୍‌ତି ତଡ଼ାନ୍‌କାଙ୍ଗ୍ ଗାଡ଼ତି ଅଦିକାରିରି ଲାକ୍‌ତୁ ରେଲ୍‌ଜି ତାସି ଆଉଲି ଆଜି ଇର୍ହାନ୍, “ଇୟା ଲୋକୁ ସାରିବେଡ଼ତି ଜାଟି ଜଗଡ଼ା କିଜିନାର୍ ! ଇଲେଇ ଖାର୍ ମା ଗାଡ଼ତୁ ଖାତାମାନାର୍

୭ ମାରି ଜେସନ୍ ଖାରିଙ୍ଗ୍ ଖାନି ଇଲୁତୁ ଇଡ଼ତାମାନାନ୍ । ଜିହୁ ଦରତି ମାରି ଅରେନ୍ ରାଜା ମାନାନ୍ ଇଜି ଖେର୍‌ସି ଖାର୍ ସମ୍ରାଟ୍‌ଦି ଖିଜୁ ନିୟମ୍ ଅମାନ୍ୟ କିଜିନାର୍ ।”

୮ ଇୟା ମାଟା ଇଜି ଖାର୍ ଲୋକାଙ୍ଗ୍ ନି ଅଦିକାରିରି ଲୋଇ ନାଣ୍ଟ ରିସା ନି ଜାଟି ଜଗଡ଼ା କିଜିନାର୍ ।

୯ ଅଦିକାରିର୍ ଜେସନ୍ ନି ବିସ୍‌ବାସିରି ମାଣାନ୍ ତାବୁଙ୍ଗ୍ ଅସି ଖାରିଙ୍ଗ୍ ମୁକୁଡ଼ା କିଜି ଡିସ୍‌ତା ସିତାର୍ ।

### ବେରିଆଦୁ ସେବା ପାଣି

୧୦ ନାଡ଼ା ଆତିକ୍ଷେନ୍‌କା ବିସ୍‌ବାସ୍‌ତି ତଡ଼ାନକୁ ପାଉଲ ନି ସିଲେଙ୍ଗ୍ ବେରିଆଦୁ ପକ୍‌ତାର । ଖାର ଆବେଟାନ ଇଜି ଜିହୁଦିରି ପାର୍‌ତନା ଇଲୁଦୁ ସର୍ହାର ।

୧୧ ତେସଲନିକିୟାଦି ଲୋକା ବାଦଲୁ ଆବେଣି ଲୋକୁ ନାଣ୍ଟ ନେସ୍‌ତେଙ୍ଗ୍ ଖେଡ଼ିକା ମାର୍ହାର । ଖାର ନାଣ୍ଟ ଖେଡ଼ିକାଦାନ ସିସୁରି ବାକ୍ୟ ଖେରୁଆର ମାରି ପାଉଲଦି ମାଟାଦି ସଡ଼ ମାଟା ନେସ୍‌ତେଙ୍ଗ୍ ଇଜି ଖିଜୁଦିନ୍ ଦାର୍‌ମୁସାସ୍ତ ପଡ଼ାଜି ଖେନ୍‌ବାଜି ମାର୍ହାର ।

୧୨ ଖାରି ଲୋଇ ନାଣ୍ଟ ଲୋକୁ ବିସ୍‌ବାସ୍ କିତାର । ନାଣ୍ଟ ସନ୍‌ମାନତି ଗ୍ରୀକ୍ ଆଇମେକ୍ ମାରି ଗ୍ରୀକ୍ ଲୋକୁ ବିସ୍‌ବାସିରି ଖାଲେ ମିସାତାର ।

୧୩ ମାତର୍ ଏସ୍ତିଖାଲେ ତେସଲନିକିୟାଦି ଜିହୁଦି ଲୋକୁ ଖେରୁଆର ଜେ ବେରିଆଦୁ ବା ପାଉଲ ମାପୁରୁଦି ବାକ୍ୟ ପ୍ରଚାର କିଜିନାନ, ଖାର ଆବେ ଖାଜି ଜାଟି ଜଗଡ଼ା କିଦେଙ୍ଗ୍ ଇଜି ଲୋକାଙ୍ଗ୍ ଏଗ୍ରିସ୍‌ତାର ।

୧୪ ବେଗି ବେଗି ବିସ୍‌ବାସ୍‌ତି ତଡ଼ାନକୁ ପାଉଲ୍‌ତିଙ୍ଗ୍ ସାମଦୁର୍ ପାଡ଼ିସିଜି ପକ୍‌ତାର; ମାତର୍ ସିଲା ନି ତିମତି ରିଏର୍ ବେରିଆଦୁ ତେବାତାର ।

୧୫ ପାଉଲ୍‌ତିଙ୍ଗ୍ ଅସି ମାହ୍ ଲୋକୁ ଖାନି ଖାଲେ ଆତେନ୍‌ସ୍ ସାଦି ସର୍ହାର । ଆବେଟ୍‌ତାନ ଖାର ବେରିଆଦାନ୍ ତେସି ଖାଜି ସିଲା ନି ତିମତିଦିଙ୍ଗ୍ ଇର୍ହାର, ଖାର ବେଗି ପାଉଲ୍‌ତି ଖାଲେ ମିସାପିର୍ ଇଜି ପାଉଲ ଆଦେସ୍ ସିତାମାନାନ ।

### ଆତେନ୍‌ସ୍‌ତୁ ପାଉଲ୍‌ତି ସେବା ପାଣି

୧୬ ଆତେନ୍‌ସ୍ ସିଲା ନି ତିମତିଙ୍ଗ୍ କାପ୍‌କିନି ସମୟତୁ ଗାଡ଼୍‌ ଦିୟାମ୍‌କାଙ୍ଗ୍ ପୁରାଆତିମାନିକା ସୁଡ଼ୁ ପାଉଲ ନାଣ୍ଟ ଦୁକ୍ ଆତାନ ।

୧୭ ଆଦେଙ୍ଗ୍ ଖାନ ପାର୍‌ତନା ଇଲୁଦୁ ଜିହୁଦି ଲୋକା ଖାଲେ ମାପୁରୁଦି ପାର୍‌ତନାକିନି ଅଣଜିହୁଦିରି ଖାଲେ ଇୟା ବିସୟ୍‌ତାନ୍ ସବୁଦିନ୍ ଖାରଗିଦେଙ୍ଗ୍ ଆସ୍‌ତାନ । ଗାଡ଼ତି ତେଣା ବାଡ଼ିଆଙ୍ଗ୍ ସନିଖାନିକା ଆଜିମାନି ଲୋକା ଖାଲେ ଆୟା ବିସୟ୍‌ତାନ ଖାରଗିତାର ।

୧୮ ଏସ “ଏପିକୁଏରିଆନ୍ ନି ସ୍ପୋଇକ୍” ସିକିୟା ଗୁରୁରି ଖାଲେ  
 ଖାନି ଆସସିସାତାର । ଖାରି ଲୋଇ ଏସଲୋକ୍ ଇହାର୍, “ଇୟା  
 ବୁଦିସିଲିକାନ୍ ଇନିକା ଇନ୍ତେଜ୍ ି ସିଲ୍ସିନାନ୍ ?”

ଆଇକାର୍ ଇହାର୍, “ଆଇଦେସ୍ତି ଦିୟାମ୍ବା ବିସୟତାନ୍ ଖାନ୍  
 ସୁସମାଚାର ପ୍ରଚାର କିନିକା ଖାଜା ଆଜିନାଡ୍ ।” ଜିସୁ ନି ଖାନି  
 ମାରିଡେସି ନିଜ୍ ନି ବିସୟତାନ୍ ପାଉଲ ପ୍ରଚାର କିନିକା ଖେନ୍ଦି  
 ଖାର ଇକା ଇହାର୍ ।

୧୯ ଆୟାଉଣ୍ଡିଜ୍ ଖାର ପାଉଲ୍ତିଜ୍ ି ଆସ୍ତା ଅତାର ମାରି ଖାନିଜ୍  
 ଏରିୟ ପାଗସ୍ ଦରତି ଗାଡ୍ ମିଟିଜ୍ ିତ୍ ତାସି ଇହାର୍, “ନିନ୍  
 ଏମେ ପୁନି ସିକିୟା ବିସୟତାନ୍ ଖେରସିନି, ଆୟା ବିସୟତାନ୍ ମାପ୍  
 ନେସ୍ତେଜ୍ ି ବଦା କିଜିନାପ୍ ।

୨୦ ନିନ୍ ଖେରସି ମାନି ଏସ ମାଟା ମାଜ୍ କାବା ଖାଜିନାଡ୍ । ମାପ୍  
 ତାନି ଅର୍ତ୍ତ ନେସ୍ତେଜ୍ ବଦାକିନାପ୍ ।”

୨୧ ଆତେନ୍ସ୍ତି ଲୋକୁ ମାରି ଆବେ ବାସାକିନି ଆଇଦେସ୍ତିକାର୍  
 ପୁନି ବିସୟ ଖେନ୍ତେଜ୍ ି ନି ଇନ୍ତେଜ୍ ି ନାଣ୍ଡ ଜିବନ୍ ନଜି ମାର୍ହାର୍  
 । ଇବେ ଖାର ନାଣ୍ଡ ସମୟ ସିଜି ମାର୍ହାର୍ ।

୨୨ ପାଉଲ୍ ଏରିୟ ପାଗସ୍ ଗାଡ୍ ମିଟିଜ୍ ି ଆଗ୍ତି ନିଲ୍ସି ଇହାନ୍,  
 “ଆତେନ୍ସ୍ତି ବାସାନିଲୋକୁ, ମିର୍ ଖିଜେରେ ଦାମ୍ ଲୋକୁ ଜଣା  
 ପଡ଼ାଜିନାଡ୍ ।”

୨୩ ନାନ୍ ମି ଗାଡ୍ ବୁଲାଜି ସୁଡ୍ତି ଖାଲେ ମି ପୁଜାକିନି ବାଡିଦୁ ସୁଡ୍ଡୁ  
 । ଉନ୍ଣ୍ ପୁଜା ସିନି ବେଦି ମୁସ୍କୁ ଉନ୍ଣ୍ ନେସେଇ ମାପୁରୁଦି  
 ଉଦେସ୍ତାନ୍, ରାସାତି ମାନିକା ବା ସୁଡ୍ଡୁ । ମିର୍ ନେସ୍ଏନ୍ଣ୍ ଆମା  
 ତାନିଜ୍ ି ପୁଜା କିଜିନିଦେର୍, ଇଲେଇ ଖାନି ମାଟା ମି ଲାକ୍ତୁ ପ୍ରଚାର୍  
 କିଦେଜ୍ ି ସିଲ୍ସିନା ।

୨୪ ☆ମାପୁରୁ ଦୁନିଆ ନି ଆବେ ମାନି ଖିଜୁ ବିସୟ ତିଆର୍ କିତାନ୍  
 । ଖାନ୍ ମୁସ୍କୁପୁରୁ ନି ଦୁନିଆଦି ପ୍ରବୁ । ଲୋକା କିକାଣ୍ ତିଆର୍ ଆତି  
 ମନ୍ଦିରକାଜ୍ ଖାନ୍ ବାସାଏନ୍ ।

୨୫ ମାତ୍ର ଖାନି ଉଣ୍ଡିଙ୍ଗ୍ ଫାଣି କିଛି ଖାନିଙ୍ଗ୍ ସିଦେଙ୍ଗ୍ ଆବ୍‌ନିନାନି  
ଇନି ବିସୟ୍ ଖାନ ବଦା କିଏନ୍; ଇରିଙ୍ଗ୍ ଖାନ ଓଜେରିଙ୍ଗ୍ ଜିବନ୍,  
ପୁନ୍‌ଶ୍ଟା ମାରି ଓଜୁ ଦରକାର ବିସୟ୍ ସିତାମାନାନ୍ ।

୨୬ ଅରେନ୍ ଲୋକ୍ତି ମାଣାନ୍ ଖାନ ଓଜୁ ଲୋକୁ ଜାତିଦିଙ୍ଗ୍  
ତିଆର୍ କିତାମାନାନ୍ ମାରି ଖାନି ଆଦେସ୍‌ତାନ୍ ଖାର ଦୁନିଆଦି ନାଣ୍ଡ  
ବାତିଆଙ୍ଗ୍ ବାସାନାର୍, ଏମେ ସମୟ୍‌ତୁ, ଏନ୍ ଏମେ ବାତିଦୁ  
ବାସାନାନ୍, ଆଗ୍‌ଡିରାନ୍ ମାପୁରୁ ଆକା ତିଆର୍ କିତାମାନାନ୍ ।

୨୭ ଖାନି ଉଦେସ୍ ମାର୍ହାଡ୍, ଓଜେରେ ଏଣ୍ଡେସ୍ ଖାନିଦି ପୟ୍‌ଜି  
ଖାନିଙ୍ଗ୍ ପୟ୍‌ନାର୍ । ମାତର୍ ସତ୍‌ତାନ୍ ମାପୁରୁ ଆମାଖାନିମାଣାନ୍  
ଆକ ସିଲେନ୍ ।

୨୮ ଇୟା ବିସୟ୍‌ତାନ୍ ଅରେନ୍ ଲୋକୁ ଇର୍ହାମାନାନ୍,  
“ଖାନିମାନୁନେ ମା ଜିବନ୍‌ତି ଜିନିକା, ବୁଲାନିକା ନି ତେବାନିକା ।”  
ମି ରାସ୍‌ନିଖାରି ଲୋଇ ଏସଲୋକ୍ ଇର୍ହାମାନାର୍,  
“ମାପ୍ ବା ଖାନି କଡର୍ ।”

୨୯ ମାପ୍ ମାପୁରୁଦି କଡର୍ ଆତିମାନିଙ୍ଗ୍ ଲୋକା ମାଣାନ୍ ତିଆର୍‌ଆତି  
ବାଙ୍ଗାଁରାମ୍, ଝେନ୍‌ଶ୍ଟି ମାରି କାଲ୍‌ତାନ୍ ତିଆର୍‌ଆତି ବମାଦି ରୁପ୍‌ତାନ୍  
ମାପୁରୁଦି ଖାଜା ଏଡକିଦେଙ୍ଗ୍ ଆର୍‌ଏର୍ ।

୩୦ ଲୋକୁ ମାପୁରୁଙ୍ଗ୍ ନେସ୍‌ଇଖାଲେ ଖାନ ଆୟା ଦସ୍ ଆସ୍‌ଏନ୍  
ମାର୍ହାନ୍, ମାତର୍ ଇଲେଇ ଆୟାଓଜୁ ଓଜେରିଙ୍ଗ୍ ଖାରି ପାପ୍  
ସାରିଦାନ୍ ଡେସିଝାଦେଙ୍ଗ୍ ଇଜି ଆଦେସ୍ ସିଜିନାନ୍ ।

୩୧ ଖାନ ଉନ୍‌ଶ୍ଟି ଦିନ୍ ତିର୍ କିତାମାନାନ୍ । ଆୟା ଦିନ୍ ଖାନ ଖାନି  
ବାସେଆତି ଲୋକ୍ତି ମାଣାନ୍ ଓଜୁ ଦୁନିଆଦି ନ୍ୟାୟ୍ ବିସାର୍ କିନାନ୍  
। ଆୟା ଲୋକ୍ତିଙ୍ଗ୍ ସାତିମାଣାନ୍ ନିକ୍ତି ମାଣାନ୍ ଖାନ ଇୟା ମାଟାଦି  
ସତ୍ ଓଜେରିଙ୍ଗ୍ ଝେର୍‌ତା ମାନାନ୍ !

୩୨ ପାଉଲ୍‌ତିମାଣାନ୍ ସାତି ମାଣାନ୍ ମାରିଡେସି ନିଙ୍ଗ୍‌ନି ବିସୟ୍  
ଝେନ୍‌ଜି ଖାରି ଲୋଇ ଏସ ଲୋକୁ ଖାନିଙ୍ଗ୍ ସେମାର୍‌କିତାର୍, ମାତର୍  
ଆଇକାର୍ ଇର୍ହାର୍, “ନିବାଣ୍‌କୁ ଇୟା ବିସୟ୍‌ତାନ୍ ମାପ୍ ମାରି ଉନ୍‌ଶ୍ଟି  
ଦେବା ଝେନ୍‌ଡେଙ୍ଗ୍ ବଦା କିଜିନାପ୍ ।”

୩୩ ଆୟା ନାଣ୍ଡିରି ମିଟିଙ୍ଗ୍ ଡିସ୍‌ସି ପାଉଲ୍ ସର୍ହାନ୍ ।

୩୪ ତାୟେନିସିଅସ୍ ଦରତି ମିଟିଙ୍ଗ୍ ି ଅରେନ୍ ଲୋକୁ, ଦାମାରି  
ଦରତି ଅରେଡ୍ ଆଇ ମାନି ମାରି ଏସ ଲୋକୁ ବିସ୍ବାସ୍ କିତେ ମାରି  
ଝାନି ଖାଲେ ମିସାତାର୍ ।

## ୧୮

କରନ୍ତି ଗାଡ଼ୁ ପାଉଲତି ସେବା ପାଣି

୧ ଇୟା ଖେନ୍କା ପାଉଲ ଆତେନ୍ସ୍ ଡିସ୍ସି କରନ୍ତିଦୁ ଖାତାନ୍ ।

୨ ମାରି ଝାନ୍ ଆକିଲା ଦରତି ଜିହୁଦି ଲୋକତିଙ୍ଗ୍ ୱେଟ୍ ଆତାନ୍,  
ପନ୍ତୁ ଝାନ୍ ଜନମ୍ ଆତାମାର୍ହାନ୍; ସମ୍ରାଟ୍ କ୍ଲାଡିୟସ୍ ଝିଜେରେ ଜିହୁଦି  
ଲୋକାଙ୍ଗ୍ ରୋମ୍ ଡିସ୍ତେଙ୍ଗ୍ ୱିଜି ଆଦେସ୍ ସିତାମାର୍ହାନ୍ଆକା,  
ଝାନ୍ ଏସ୍ ଦିନ୍ ଆଗ୍ତି ଝାନି ଆଡ଼ସି ପ୍ରିସ୍ଲିଲାଦି ଖାଲେ ଇଟାଲିଦାନ୍  
ଝାତାମାର୍ହାନ୍ ।

୩ ପାଉଲ ଖାରିଙ୍ଗ୍ ୱେଟ୍ ଆଦେଙ୍ଗ୍ ୱିସ୍ଲସି ଖାରି ଖାଲେ  
ବାସାତାନ୍, ଇରିଙ୍ଗ୍ ୱିଜି ବା ଖାରିଖାଜା ଗୁଡ଼େଏଙ୍ଗ୍ ୱିଆର୍ କିଜି  
ଜିଜି ମାର୍ହାନ୍ ।

୪ ଜିହୁଦି ନି ଗ୍ରିକ୍ ଲୋକା ମନ୍ତୁ ପ୍ରବୁଦି ଉଣ୍ଡିଙ୍ଗ୍ ୱିସ୍ବାସ୍ କିବିସ୍  
କିଦେଙ୍ଗ୍ ୱିଜି ଝିଜୁ ରମ୍ବି ଦିନ୍ତୁ ଝାନ୍ ପାର୍ତନା ଇଲୁଦୁ ଖାର୍ଗିଜି  
ମାର୍ହାନ୍ ।

୫ ସିଲା ନି ତିମତି ମାସିଦିଆଦାନ୍ ଡେସି ଝାତି ଖେନ୍କା ପାଉଲ  
ଜିହୁଦି ଲୋକା ଲାକ୍ତୁ ଜିସୁଦି ସୁସମାଚାର୍ ପ୍ରଚାର୍ କିଦେଙ୍ଗ୍ ୱିରା  
ସମୟ ସିତାନ୍ ମାରି ଜିସୁଙ୍ଗ୍ ମସିହ ଇଜି ସାକି ସିତାନ୍ ।

୬ ମାତର ଖାର୍ ଝାନି ବିରୁଦ୍ଧାନ୍ ନିୟା କିଜି ଇର୍ହାନ୍, ତାମେ ବାଦା  
ଝାଜା ଝାନ୍ ନିଜେଦି ଆଙ୍ଗ୍ ଦାନ୍ ଦୁଡି ସାଡ଼ସି ଖାରିଙ୍ଗ୍ ୱିଜି,  
“ମି ନେତେର୍ ମି ତାଲା ମୁସ୍କୁ ଝାଙ୍ଗ୍ ି, ଆରିଙ୍ଗ୍ ଆୟାଉଣ୍ଡିଙ୍ଗ୍  
ମିର୍ ନିଜେ ଦାଇ ଆନିଦେର୍ । ନାନ୍ ଇୟାଉଣ୍ଡିଙ୍ଗ୍ ୱିଜି ସିଲେ ।  
ଆରତିଙ୍ଗ୍ ୱିଜି ଅଣଜିହୁଦିରି ମାନୁ ସନା ।”

୭ ଆବେଟ୍ ଝାନ୍ ଖାରିଙ୍ଗ୍ ୱିଜି ମାପୁରୁଦି ପାର୍ତନା କିଜିମାନି  
ତିତସ୍ ଜୁସ୍ ଦରତି ଅରେନ୍ ଅଣଜିହୁଦିଦି ଇଲୁଡୁ ଡେବାଦେଙ୍ଗ୍ ୱିଜି  
ସର୍ହାନ୍ । ଜୁସ୍ଦି ଇଲୁ ଜିହୁଦି ପାର୍ତନା ଇଲୁ ଲାକ୍ତୁ ମାର୍ହାଡ଼ ।

୮ ଜିହ୍ଵାଦି ପାରତନା ଇଲ୍ଲତି ପେରିକାନ୍ କ୍ରିସ୍ପସ୍ ନି ଖାନି ଇଲ୍ଲତି  
ଝିଜେରେ ପ୍ରବୁମାନୁ ବିସ୍ବାସ୍ କିତାର୍ ମାରି କରନ୍ତିଦି ମାରି ନାଶ୍  
ଲୋକୁ ପାଉଲଦି ସିକିୟା ଝେନ୍ଜି ବିସ୍ବାସ୍ କିତାର୍ ମାରି ହୁବନ୍  
ଅତାର୍ ।

୯ ଉନ୍ଶ୍ଵି ନାଡ଼ା ପାଉଲ ଉନ୍ଶ୍ଵି ଦର୍ସନ୍ ପୟ୍ତାନ୍, ଦର୍ସନ୍ତୁ ପ୍ରବୁ  
ଖାନିଙ୍ଂ ଇର୍ହାନ୍, “ତିଲାମା, ପ୍ରଚାର୍ କିଜିମାନ୍ଆ । ଆବେଟାନ୍  
ସୁପ୍ତାପ୍ ତେବାମା,

୧୦ ଇରିଙ୍ଂ ନାନ୍ ନି ଖାଲେ ଲାକ୍ତୁ ଲାକ୍ତୁ ମାନା । ଏନ୍ ନି  
କେତି କିଦେଙ୍ଂ ଆର୍ଏନ୍, ଇରିଙ୍ଂ ଇୟା ଗାଡ଼ତୁ ନା ନାଶ୍ ଲୋକୁ  
ମାନାର୍ ।”

୧୧ ଆଦେଙ୍ଂ ପାଉଲ ଆବେ ମାପୁରୁଦି ବାକ୍ୟ ବିସ୍ତୟତାନ୍  
ସିକିୟା ସିଜି ବାର୍ସେକ୍ ଆଦା ତେବାତାନ୍ ।

୧୨ ଗାଲିୟୋ ଆକାୟା ରୋମିୟ ସାସନ୍କିନିକାନ୍ ମାନି ଝେଡ଼ାଦୁ,  
ଜିହ୍ଵାଦି ଲୋକୁ ଉଶ୍ଵାଜି ପାଉଲତିଙ୍ଂ ଆସ୍ସି ବିଚାର୍ କିନିମାନୁ  
ଅତାର୍ ।

୧୩ ଖାର୍ ଇର୍ହାନ୍, “ଇୟା ଲୋକୁ ମା ନିୟମ୍ ବିରୁଦ୍ଧତି ରିତିଦାନ୍  
ମାପୁରୁଦି ପାରତନା କିଦେଙ୍ଂ ଲୋକାଙ୍ଂ କାର୍ପସିନାନ୍ ।”

୧୪ ପାଉଲ ଇନ୍ତ୍ରେଙ୍ଂ ସନିଖାଲେ, ଗାଲିୟୋ ଜିହ୍ଵାଦିଲୋକାଙ୍ଂ  
ଇର୍ହାନ୍, “ଜଦି ଇବେ ଇନି ଦୋସ୍ବା ତାଗଇମାଟା ବିସ୍ତୟ ମାନାଡ଼,  
ଆର୍ଡିଙ୍ଂ ନି ଉଶ୍ଵିଙ୍ଂ ଡିର୍ ଆଜି ନି ମାଟା ଝେନିକା ନା ଉଶ୍ଵିଙ୍ଂ  
ଟିକ୍ମାଟା ଆନାଡ଼ ।

୧୫ ମାତର୍ ଇୟା ବାଦା ବିସ୍ତୟ କେବଲ୍ ନି ନିଜେଦି ନିତି ନିୟମ୍  
ବଲ୍ ନି ଦରୁ ଜାଟିଦି ବିସ୍ତୟ ଆତିମାନିଙ୍ଂ ନିଜେ ତେନି ବିଚାର୍ କିନିକା  
ନେଗେଡ଼ । ନାନ୍ ଇୟାନାନି ବିସ୍ତୟ, ବିସାର୍ କିଏ ।”

୧୬ ଇକା ଇଜି ଖାନ ଖାରିଙ୍ଂ ବିଚାର୍ କିନି ବାଡ଼ିଦାନ୍ ସପ୍ତାର୍ ।

୧୭ ଖାର୍ ପାରତନା ଇଲ୍ଲତି ପେରିକାନ୍ ସୋସ୍ତନାତିଙ୍ଂ ଆସ୍ସି  
ବିଚାର୍କିନି ଆଗ୍ଡି ମାଡ଼ ତାକ୍ତାର୍ । ମାତର୍ ଗାଲିୟୋ ଆୟା  
ଉଶ୍ଵିଙ୍ଂ ମନ୍ ସିଏତାନ୍ ।

ସିରିଆଦି ଆଣ୍ଟିୟୋକଦୁ ପାଉଲ ଡେସିଖାତାନ୍

୧୮ ପାଉଲ କରିନ୍ତିବୁ ବିସ୍ବାସତି ତତାନକା ଖାଲେ ନାଣ୍ତ ଦିନ୍ ତେବାତାନ୍ । ଖେନ୍ଦକା ଖାରିଙ୍ଗ୍ ଡିସ୍ବି ପ୍ରିସ୍ବିଲା ନି ଆକିଲା ଖାଲେ ସିରିଆ ତରିନ୍ ଏରୁ ନାସି ସର୍ହାନ୍ । କେଲ୍ଲେୟାଦାନ୍ ଏରୁତୁ ନାତେଙ୍ଗ୍ ଆରାମ୍ କିନି ଆଗ୍ତି ଖାନି ଉନ୍ଶ୍ଟି ନିୟମ୍ ଇସାବ୍ତାନ୍ ଖାନି ତାଲା ଟାଙ୍ଗୁରୁ ଆତାନ୍ ।

୧୯ ଖାନ୍ ଏପିସସ୍ବୁ ଇତି ଖେନ୍ଦକା ପାଉଲ ପ୍ରିସ୍ବିଲା ନି ଆକିଲେଙ୍ଗ୍ ପୋକ୍ତାନ୍ । ଖାନ୍ ଆବେ ପାର୍ତନା ଇଲୁଦୁ ସଲ୍ସି ଜିହୁଦିଲୋକା ଖାଲେ ଦାମ୍ବୁ ବିସୟତାନ୍ ଖାରିଗିତାର୍ ।

୨୦ ଲୋକ୍ ଖାନିଙ୍ଗ୍ ମାରି ବେସି ଦିନ୍ ତେବାଦେଙ୍ଗ୍ ଇର୍ହାନ୍, ମାତର୍ ଖାନ୍ ରାଜି ଆଏତାନ୍ ।

୨୧ ସନି ଖେଡାଦୁ ଖାନ୍ ଖାରିଙ୍ଗ୍ ଇର୍ହାନ୍, “ଜଦି ମାପୁରୁଦି ବଦା ତେବାନାଡ୍, ନାନ୍ ମି ଲାକ୍ତୁ ଡେସି ଖାନା ।” ଖେନ୍ଦକା ଖାନ୍ ଜାହାଜ୍ ଏକ୍ସି ଏପିସସ୍ ଡିସ୍ବି ଖାତାନ୍ ।

୨୨ ସିସେରିଆଦୁ ଇଜି ଆବେଟାନ୍ ଖାନ୍ ଜିରୁସାଲାମ୍ତୁ ସର୍ହାନ୍ ମାରି ମଣ୍ଡଲିଦିଙ୍ଗ୍ ମାଡିସ୍ କିଜି ଆବେଟାନ୍ ଆଣ୍ଟିୟକ୍ତୁ ସର୍ହାନ୍ ।

୨୩ ଆବେ ଏସ ଦିନ୍ ସାନ୍ସି ମାର୍ହ୍ ଖେନ୍ଦକା ମାରି ଖାନ୍ ସଲ୍ସି ଗାଲାତିୟ ନି ପୁରିଆ ରାଜିଦୁ ମଜାୟ୍ ସିଜି ସର୍ହାନ୍ ମାରି ସାରଦୁ ବିସ୍ବାସିରିଙ୍ଗ୍ ଖାରି ବିସ୍ବାସ୍ତୁ ତାଟ୍ ଆଦେଙ୍ଗ୍ ଇଜି ଖେଡିକା କିତାନ୍ ।

### ଏପିସସ୍ ନି କରିନ୍ତିବୁ ଆପଲୋ

୨୪ ଆୟା ସମୟତୁ ଆଲେକ୍ଜାଣ୍ଡିଆ ଆଦୁ ଜନମ୍ ଆତିମାର୍ଜ ଆପୋଲୋ ଦରତି ଅରେନ୍ ଜିହୁଦିଲୋକ୍ ଏପିସସ୍ତୁ ଖାତାନ୍ । ଖାନ୍ ଅରେନ୍ ନେଗି ପ୍ରଚାରକ ନି ଦାମ୍ବୁସାସ୍ତୁ ଖାନି ନାଣ୍ତ ବୁଦି ମାର୍ହାଡ୍ ।

୨୫ ଖାନ୍ ପ୍ରବୁଦି ସାରି ବିସୟତାନ୍ ସିକିୟା ପୟତାମାର୍ହାନ୍ ମାରି ଆମ୍ବାଦୁ ନାଣ୍ତ ଖେଡିକାଦାନ୍ ଜିସୁଦି ବିସୟତାନ୍ ସଡ୍ ସିକିୟା ସିଜି ମାର୍ହାନ୍ । ମାତର୍ ଇୟା ବିସୟତାନ୍ ଖାନ୍ କେବଲ୍ ଜୋହନତି ହୁବନ୍ ବିସୟ ନେସ୍ତାମାର୍ହାନ୍ ।

୨୭ ପାର୍ତନା ଇଲୁଦୁ ଖାନ ତିଲାଏନ୍‌ଶ୍ଟା ସିକିୟା ସିଦେଙ୍ଗ ଆସ୍‌ତାନ୍ । ଖାନି ସିକିୟା ଖେନ୍‌ଜି ପ୍ରିସ୍‌ଲି ନି ଆକିଲା ଖାନିଙ୍ଗ୍ ତାମେ ଇଲୁଦୁ କୁକ୍‌ତା ଅତାର୍ ମାରି ଆବେ ଖାନିଙ୍ଗ୍ ମାପୁରୁଦି ସାରି ବିସ୍‌ୟତାନ୍ ନେଗେନ୍ କିଜି ବୁଜାକିତାସିତାର୍ ।

୨୮ ଖେନ୍‌କା ଆପଲୋ ଆକାୟା ରାଜିଦୁ ସନ୍‌ଡେଙ୍ଗ୍ ଇଜି ବଦା କିତାନ୍‌ଆକା, ଏପିସସ୍‌ତି ବିସ୍‌ବାସ୍‌ତି ତଡାନ୍‌କୁ ଖାନିଙ୍ଗ୍ ସାହାଜ୍ୟ କିତାର୍ ମାରି ଖାନିଙ୍ଗ୍ ଖେଡ଼ିକାଦାନ୍ ଆସ୍‌ଡେଙ୍ଗ୍ ଇଜି ମାଡ଼ିସ୍ କିଜି ଆକାୟାଦି ବିସ୍‌ବାସିରିଙ୍ଗ୍ ସିଟି ରାସ୍‌ତାନ୍ । ଖାନ ଆବେ ଇଜି ମାପୁରୁଦି ଦୟାଦାନ୍ ବିସ୍‌ବାସି ଆତିମାନି ଲୋକାଙ୍ଗ୍ ନାଶ୍ଟ ସାହାଜ୍ୟ କିତାନ୍ ।

୨୮ ଜିସୁ ଜେ ମସିହ, ଖାନି ସାକ୍ରିଦି ମାଟାଦିମାଟାଦାନ୍ ଦାମ୍‌ସାସ୍‌ତାନ୍ ଇକା ସତ୍ ଇଜି ଖେର୍‌ନି‌ଖାଲେ ଖାନ ଜିହୁଦିଲୋକାଙ୍ଗ୍ ଆରାକିତାନ୍ ।

## ୧୯

### ଏପିସସ୍‌ତୁ ପାଉଲ

୧ ଆପୋଲୋ କରନ୍ତିଦୁ ମାନି‌ଖାଲେ, ପାଉଲ ଲୋଇ ତରିନ୍ ମାନି ରାଜିଙ୍ଗ୍ ବୁଲାଜି ଏପିସସ୍‌ତୁ ଇତାନ୍ । ଆବେନ୍ ଏସ୍ ସିସୁରିଙ୍ଗ୍ ପୟ୍‌ତାନ୍,

୨ ଖାନ ଖାରିଙ୍ଗ୍ ଖେନ୍‌ବାତାନ୍, “ବିସ୍‌ବାସ୍ କିନି ସମୟ୍‌ତୁ ଇନିକା ମିର୍ ପବିତ୍ର ଆମ୍ବା ପୟ୍‌ତିମାହ୍ ଦେର୍ ?” ଖାର୍ ଇର୍ହାର୍ ସିଲେ,

“ମାରି ପବିତ୍ର ଆମ୍ବା ଜେ ଏନ୍ ମାନାନ୍, ଆକାବା ମାପ୍ ଖେନ୍‌ଏପ୍ ।”

୩ ପାଉଲ ଖେନ୍‌ବାତାନ୍, ଆରତିଙ୍ଗ୍ ମିର୍ ଏମେନାନି ହୁବନ୍ ଆତିମାର୍‌ଇଦେର୍ ? ଖାର୍ ଇର୍ହାର୍,

“ଜୋହନତି ହୁବନ୍ ।”

୪ ✠ପାଉଲ ଇର୍ହାନ୍, “ଆମାକାର୍ ପାପ୍‌ତାନ୍ ମନ୍‌ଡେପ୍‌ତା ମାର୍ହାର୍, ଜୋହନତି ହୁବନ୍ ସିଜି ଖାନି ଖେନ୍‌କା ଏନ୍ ଖାନାନ୍, ଜିସୁଦିମାନ୍ ବିସ୍‌ବାସ୍ କିଦେଙ୍ଗ୍ ଆନାଡ୍ ଇଜି ଲୋକାଙ୍ଗ୍ ଇଜିମାର୍‌ଆନ୍ ।”

୫ ଖାର୍ ଇକା ଖେନ୍‌ଜି ପ୍ରବୁ ଜିସୁଦି ଦର୍‌ତାନ୍ ହୁବନ୍ ଅତାର୍ ।

✠ ୧୯:୪ ମାତିଉ ୩:୧୧; ମାର୍କ ୧:୪,୭,୮; ଲୁକ ୩:୪,୧୭; ଜୋହନ ୧:୨୭,୨୭.

୭ ମାରି ପାଉଲ ଖାରି ମୁସ୍କୁ କିୟୁ ଇର୍ତାନ, ଆବେର୍ ପବିତ୍ର ଆମ୍ବା ଖାରି ମୁସ୍କୁ ଖାତାଡ଼, ମାରି ଖାର ଆଇ ବାସାଦାନ ଖାରଗିତାର ମାରି ବାକ୍ୟ ପ୍ରଚାର କିତାର ।

୮ ଖାର ଓଜେରେ ବାର ଲୋକୁ ମେମାରିର୍ ମାର୍ହାର ।

୯ ଖେନକା ପାଉଲ ଜିହୁଦିରି ପାରତନା ଇଲୁଦୁ ଡଗ୍ଲୁଜି ମୁନଶ୍ଚି, ଲେଜକୁ ସାନ୍ଦି ସାହାସତାନ ମାପୁରୁଦି ରାଜି ବିସୟତାନ ଖେରସି ବିସବାସ କିବିସ କିଦେଙ୍ଗ୍ ସେସ୍ଟା କିଦେଙ୍ଗ୍ ଆସତାନ ।

୧୦ ମାତର୍ ଏସ୍ତିଖାଲେ ଏସ ଲୋକୁ ଆର୍ଖା ନି ବିସବାସ କିଏନ୍‌ଶ୍ଟା ଲୋକା ଆଗ୍ତି ଆୟା ସାରି ବିସୟତାନ ନିନ୍ଦା କିଦେଙ୍ଗ୍ ଆସତାର, ନାସ୍ତିଖାଲେ ଖାନ ଖାରିଙ୍ ଡିସସି ସିସୁରିଙ୍ ଖେରଏ କିତାନ, ମାରି ଦିନାମି ଟିରାନସ୍ ଇଲୁଦୁ ଖାରଗିଜିସାଦେଙ୍ଗ୍ ଆସତାନ ।

୧୧ ଇୟାଖାଜା ଦୁଇ ବାର୍ସୁ ସାନ୍ଦି ସାଲାତାଡ଼; ଆବେର୍ ଆସିଆ ବାସାତିମାନି ଜିହୁଦି ଲୋକୁ ନି ଅଣଜିହୁଦି ଲୋକୁ ଓଜେରେ ପ୍ରବୁଦି ବାକ୍ୟ ଖେର୍ହାର ।

### ସ୍ଲେବାଦି ମାରିସିର୍

୧୨ ମାପୁରୁ ପାଉଲ୍‌ଜି ମାଣାନ ସାମାନତି କାବାଆନି ପାଣି ଓଜୁ କିତାନ ।

୧୩ ଇୟାଖାଜା ଜେ ପାଉଲ ଆସସି ମାହ୍ ରୁମାଲ୍ ନି ଖାତିଗନ୍ଦା ରଗିଲୋକାଙ୍ ଲାକ୍‌ଡୁ ଅତିଙ୍ ଖାର ନେଗେନ୍ ଆଜିମାର୍ହାର ମାରି ଖାରି ମେନ୍‌ଲ୍‌ତାନ ତାଗ୍‌ଇ ଦୁବେଙ୍ ଓଜୁ ସହସି ସଲ୍‌ସିମାହେ ।

୧୪ ଏସ ବୁଲାନି ଜିହୁଦି ଦୁବେଙ୍ ପେରୁନିକାର ବା ପ୍ରବୁ ଜିସୁ ଦର୍ ଆସସି ଦୁବେଙ୍ ଡିସସି କିଦେଙ୍ ସେସ୍ଟା କିତାର । ଖାର ଦୁବେଆଙ୍ ଇଜିମାର୍ହାର, “ପାଉଲ ପ୍ରଚାର କିଜିମାନି ଜିସୁଦି ଦର୍ତାନ ନାନ ନିଙ୍ ଆଦେସ୍ ସିଜିନା ।”

୧୫ ସ୍ଲେବା ଦର୍ତି ଅରେନ୍ ଜିହୁଦି ପେରି ଜାଜକତି ସାଡ଼ଲୋକ୍ ମାରିସିର୍ ଇୟାଖାଜା କିଜିମାର୍ହାର ।

୧୬ ମାତର୍ ଦୁବା ଖାନିଙ୍ ଇର୍ହାଡ଼, “ନାନ ଜିସୁଙ୍ ନେସନା ମାରି ପାଉଲ୍‌ଜି ବିସୟତାନ ନେସନା; ମାତର୍ ମିର୍ ଓଜେରେ ଏର୍ ?”

୧୭ ଦୁବା ଆସ୍ତି ଲୋକୁ ଖାରିଙ୍ଗୁଁ ନାଶ୍ୱଦାନ ରେଲ୍ଲି  
 ଖାନିତରନ୍ ଇଟ୍ତାନ । ଖାରି ଆଙ୍ଗୁ ପାସିୟା କିସ୍ତାପକ୍ତାତ୍,  
 ଖାରି କାଣ୍ଡିଆକାବରା ଆଜି ଖାନି ଇଲ୍ଲତାନ ଉରକୁତେ ।

୧୮ ଏପିସସ୍ତୁ ବାସାନି ଜିହୁଦିଲୋକୁ ନି ଅଣଜିହୁଦିଲୋକୁ ଇୟା  
 ବିସୟତାନ ଖେନଜି ତିଲାତାର ମାରି ଆବେ ପ୍ରବୁ ଜିହୁଦି ଦର୍ ମାରି  
 ନାଶ୍ୱଦାନ ମାନାନିକା ଆତାତ୍ ।

୧୯ ବିସ୍ବାସ୍ତରି ମାଣାନ ନାଶ୍ୱ ଲୋକୁ ନିଜେଦି ଖିନ୍ନୁ ତାଗ୍ଲ ପାଣି  
 ଖିଜେରରି ଆଗ୍ତି ଖେକ୍ତାର ।

୨୦ ଗୁଣିଆ ବିଦ୍ୟା ଅଜାନି ନାଶ୍ୱ ଲୋକୁ ଖାରି ବଇଙ୍ଗୁଁ ଖିନ୍ନୁ ତାସି  
 ଲୋକା ଆଗ୍ତି ଉଣ୍ଡା କିଜି ଆଡ୍‌କ୍ତା ପକ୍ତାର । ଖାରି ଆୟା ବଇଙ୍ଗୁଁ  
 ଦାରା ମାର୍ହାତ୍ ପଚାସ୍ ହଜାର୍ ଖେତି ତାବୁଙ୍ଗୁଁ ।

୨୧ ଇୟାଖାନା ପ୍ରବୁଦି ବାକ୍ୟ ନାଶ୍ୱଦାନ ଖେଜିତାସର୍ହାତ୍ ମାରି ନାଶ୍ୱ  
 ସାକ୍ତିସାଲି ଆତାତ୍ ।

### ଏପିସସ୍ତୁ ଜାତିଜଗତା

୨୨ ଇୟାଖିନ୍ନୁ ଗଟନା ଖେନକା ପାଉଲ ମାସିଦନିଆ ନି ଆକାୟା  
 ନାମ୍‌ଡିସିଜି ଜିରୁସାଲାମ୍‌ତୁ ସନ୍‌ଡ୍ରେଙ୍ଗୁଁ ଇଙ୍ଗା କିତାନ । ଖାନ ଇର୍ହାନ,  
 “ଆବେ ସହ ଖେନକା ନାନ ଏଣ୍ଡେସ୍‌ବା ରୋମ୍‌ତୁ ବା ସନା ।”

୨୩ ଆଦେଙ୍ଗୁ ଖାନ ଖାନି ସେବାକିନି ରିଏର୍ ତଡ୍ ତିମତି ନି  
 ଏରାଷ୍ଟିଜି ମାସିଦନିଆତୁ ପକ୍ତାନ, ମାତର୍ ନିଜେ ଆସିଆ ଦେସ୍‌ତୁ  
 ମାରି ଏସ ସମୟ ତେବାତାନ ।

୨୪ ଇୟା ଲୋଇ ପ୍ରବୁ ତଡ୍‌ତିମାନି ସାରି ବିସୟତାନ ଅସି ଏପିସସ୍ତୁ  
 ନାଶ୍ୱ ଜାତିଜଗତା ଆତାତ୍ ।

୨୫ ଦିମ୍‌ଡିୟ ଦରତି ଅରେନ୍ ଖେନଶ୍ୱି ତିଆରକିନିକାନ ଆର୍ଡେମି  
 ଦିୟାମ୍ ମନ୍ଦିରତି ଖେନଶ୍ୱି ବମା ରସ୍‌ସି ମାର୍ହାନ, ଇୟା ପରନିମାଣାନ  
 ପାଣିକିନିକାର ନାଶ୍ୱ ଲାବ୍ ପୟଜିମାର୍ହାର ।

୨୬ ଆୟାଉଣ୍ଡିଙ୍ଗୁ ଖାନ ସାମାନ ବେପାରକିନିଖାରିଙ୍ଗୁଁ ଉନ୍‌ଶ୍ୱା କିଜି  
 ଇର୍ହାର, “ଆଜ୍ଞାର, ଇୟା ବେପାର ମାଙ୍ଗୁଁ ମାଜନ୍ କିତାମାନନ୍ ଇଜି  
 ଖିଜେରେ ନେସ୍‌ନିଦେର୍ ।

୨୭ ଇଲେଇ ଇୟା ପାଉଲ ଇନିକା କିନାନ୍; ଆକା ମିର୍ ନିଜେ ସୁତୁଦେଙ୍ଗ୍ ଆବ୍ସିନିଦେର୍ ମାରି ଖେନ୍ତେଙ୍ଗ୍ ଆବ୍ସିନିଦେର୍ । ଖାନ୍ ଇଜିନାନ୍, ଲୋକୁ କିୟୁଦାନ୍ ତିଆରୁଆତି ଦିୟାମ୍ବୁ ଖିଜୁ ମୁଡ଼ୁକେ ଦିୟାମ୍ବୁ ଆଉ, ମାରି ଖାନ୍ ଇବେ ଏପିସସ୍ ନି ଖିଜୁ ଆସିଆ ଦେସ୍ତୁ ନାଣ୍ଟ ଲୋକାଙ୍ଗ୍ ଇୟା ବିସୟତାନ୍ ବାମ୍ରେକିଜିନାନ୍ ।

୨୮ ଆବେଟ୍ ମା ବେପାର ନାସ୍ ଆନି ମୁସ୍କୁ ମାନାଡ଼ । କେବଲ୍ ଆକାନେ ସିଲେ, ଆମା ଦିୟାମ୍ ଆସିଆ ନି ଖିଜୁ ଦୁନିଆଦୁ ଖିଜେରି ମାଣାନ୍ ପୁଜା ପୟନାଡ଼, ଆୟା ପେରି ଆର୍ଡେମି ଦିୟାମ୍ବୁତି ମନ୍ଦିର୍ ଖେଙ୍ଗ୍ ଜି ତେବାଏଡ଼ ନି ମାରି ଆର୍ଡେମି ଦିୟାମ୍ବୁତି ଖେଙ୍ଗ୍ ନିକା ନାସ୍ ଆନାଡ଼ ।”

୨୯ ଲୋକୁ ଇୟା ମାଟା ଖେନ୍ତି ରିସା ଆତାର ମାରି ଆଉଲି ଆଜି ଇର୍ହାର୍, “ଏପିସୟଦି ଆର୍ଡେମି ପେରିଦିୟାମ୍ବୁତି ଜିଣାନିକା ଆପିଡ଼ !”

୩୦ ଇୟା ଜାଟିଜଗଡ଼ା ଖିଜୁ ଗାଡ଼ୁଡ଼ୁ ଖେଙ୍ଗ୍ ତାସର୍ହାଡ଼ । ରିସାଆତିମାହ୍ ଲୋକୁ ପାଉଲ୍ତି ଖାଲେମାହ୍ ମାସିଦୋନିଆଦି ଗାୟସ୍ ନି ଆରିସ୍ପୁର୍କସ୍ତିଙ୍ଗ୍ ଆସ୍ସି ଖାରି ଜୁଜ୍ଜିନିବାତିଦୁ ତରତା ଅତାର ।

୩୧ ପାଉଲ ନିଜେ ଲୋକା ଆଗ୍ତି ନିନ୍ତେଙ୍ଗ୍ ବଦା କିତାନ୍, ମାତର୍ ବିସ୍ବାସିର୍ ଖାନିଙ୍ଗ୍ ଇୟାକା କିଦେଙ୍ଗ୍ ସିଏତାର ।

୩୨ ଏସ ଲୋକ ଗାଡ଼ୁତି ନିଜେଦି ଅଦିକାରି ସଙ୍ଗ୍କୁ ପାଉଲ୍ତିଙ୍ଗ୍ ଜୁଜ୍ଜିନିବାତି ଲୋଇ ସଲ୍ଲ ଉଣ୍ଡିଙ୍ଗ୍ ମାଡ଼ିସ୍ କିଜି ଉନ୍ଡି ମାଟା ପକ୍ତାର ।

୩୩ ଇୟା ସମୟ ଲୋଇ ପୁରାମିଟିଙ୍ଗ୍ ମାଡ଼ଗୋଲ୍ଡୁ ପୁରା ଆତାର । ଲୋକୁ ଦଲ୍ ଦଲ୍ ଆଜି ନାଣ୍ଟ ଆଉଲି ଆଜିମାହ୍, ଇରିଙ୍ଗ୍ ଖାରି ଲୋଇ ଏସ ଲୋକୁ ଖାରି ଉଣ୍ଡାତି ମାହ୍ କା ମାଟା ବା ନେସ୍ଏର୍ ମାହ୍ ।

୩୪ ଲୋକା ଲୋଇ ଏସ ଲୋକୁ ଇର୍ହାର୍ ଜେ, ଆଲେକ୍ଜାଣ୍ଡର ଇୟାଉଣ୍ଡିଙ୍ଗ୍ ଦସ୍, ଇରିଙ୍ଗ୍ ଜିହୁଦି ଲୋକୁ ଖାନିଙ୍ଗ୍ ଆଗ୍ତି ନିଲ୍ପତା ମାହ୍ । ଆଲେକ୍ଜାଣ୍ଡର କିୟୁ ପେର୍ଜି ଲୋକାଙ୍ଗ୍ ଆଲ୍ଲ ମାନ୍ତେଙ୍ଗ୍ ଇଜି ଜୁଟାନ୍ ମାରି ବିସ୍ବାସିର୍ ତରିନ୍ ବାସଣ ସିଜି

ବୁଜାକିଦେଇଁ ସେସ୍ଥା କିତାନ୍ ।

୩୪ ମାତରୁ ଖାନ୍ ଅରେନ୍ ଜିହୁଦି, ଇକା ନେସ୍ସି ଖାରୁ ଝିଜେରେ ଅରସେ ଆଉଲି ଆତାର, “ଏପିସସ୍ତି ଆର୍ଡେମି ପେରିଦିୟାମ୍ବତି ଜୟ ଆପିତ୍ !” ବୁଇ ଗଣ୍ଟା ଆସ୍ସି ଇୟାଞ୍ଜା ଆଉଲି ଆଜିମାରୁହାତ୍ ।

୩୫ ସାରାସାରି ଗାଡୁତି ପେରିକାନ୍ ଲୋକାଙ୍ଗ୍ ଆଲେଜ ମାନ୍ତେଙ୍ଗ୍ ଇଜି ଇର୍ହାନ୍, “ଏପିସିୟୁ ବାସାନି ତଡାନ୍କୁ ଝିଜେରେ ନେସ୍ନାର ଜେ, ଏପିସସ୍ ଗାଡୁତି ପେରି ଦିୟାମ୍ ଆର୍ଡେମି ମନ୍ଦିର୍ ନି ବାଦଡ୍ତାନ୍ ଆରତି ଖାତିମାନି ପବିତ୍ର ବମାଦି ରକ୍ଷା ଆଜି ଖାଜିନାତ୍ ।

୩୬ ଇକା ଏନ୍ ସିଲେ ଇନ୍ତେଙ୍ଗ୍ ଆର୍ଏନ୍ । ଆଦେଙ୍ଗ୍ ମିର୍ ଝିଜେରେ ଆଲେଜ ମାନ୍ତୁ । ଇନି ତାଗ୍ଲ ପାଣି କିମାଟ୍ ।

୩୭ ଇୟା ଲୋକୁ ମନ୍ଦିରତାନ୍ ଇନିକା ତଙ୍ଗା କିଏର୍, ମାରି ମା ଦିୟାମ୍ବତି ବିରଦ୍ତାନ୍ ଇନି ନିୟା ମାଟା ଇନ୍ଏର୍ । ଆରିଙ୍ଗ୍ବା ମିର୍ ଝେରିଙ୍ଗ୍ ଆସ୍ସି ତାତିମାନିଦେର୍ ।

୩୮ ଦିମଡ୍ରିୟ ନି ଖାନି ପାଣିକିନିଞ୍ଜାରି ଏ ବିରଦ୍ତାନ୍ ଇନି ମାଟା ମାନାତ୍, ତାନି ବିସାର୍ କିଦେଙ୍ଗ୍ ମା ପେରିକାର୍ ମାନାର୍ ମାରି ବିସାର୍ ଇଲ୍ଲତି ଟିକ୍ ଦିନ୍ ଝିଜୁ ମାନାତ୍ । ଆବେ ଆୟା ମାଟା ଝେରଡେଙ୍ଗ୍ ଆଦେଙ୍ଗ୍ ଆର୍ନାତ୍ ।

୩୯ ଜଦି ତେନିମାଣାନ୍ ମାରି ନାଣ୍ଟ ଇନିକା ବଦା କିତିଙ୍ଗ୍, ଆରତିଙ୍ଗ୍ ଲୋକାମାଣାନ୍ ନିୟାମ୍ ଆତିମାନି ଉନ୍ଶ୍ଟି ମିଟିଙ୍ଗ୍ ତାନି ପୁରା ଅଆୟ୍ ଆଦେଙ୍ଗ୍ ଆର୍ନାତ୍ ।

୪୦ ନେର୍ ଆମାକା ଗଟାତାମାନାତ୍, ଆବେ ମା ବିରଦ୍ତାନ୍ ଜାଟିଜଗଡା ଗଟେକିନି ମାଟାଦି ଆସା ମାନାତ୍, ମାଡ୍ ଇୟାଞ୍ଜୁ ଜାଟିଦାନ୍ ଇନି ଟିକ୍ ମାଟା ଝେରଡେଙ୍ଗ୍ ଆର୍ଏନ୍ ।”

୪୧ ଇୟାଞ୍ଜୁ ମାଟା ଇଜି ଖାନ୍ ଲୋକାଙ୍ଗ୍ ସାନ୍ତି କିଜି ମିଟିଙ୍ଗ୍ ବନ୍ଦ କିତାନ୍ ।

୧ ଜାତିଜଗତା ଝିଜିତି ଝେନକା ପାଉଲ ବିସ୍ବାସିରିଙ୍ଗ୍ ଉଣ୍ଡା କିଜି ଝେଡିକାଦି ମାଟା ଝେନିସ୍ବକିତାନ୍ । ଝାରି ମାଣ୍ଡକୁ ସଲ୍ସି ଝାନ୍ ମାସିଦନିଆଦୁ ସର୍ହାନ୍ ।

୨ ଝାନ୍ ଝିଜୁ ରାଜି ସିଜି ସର୍ହାନ୍ ମାରି ନାଣ୍ଡ ନେଗିମାଟା ଝେରୁସି ଲୋକାଙ୍ଗ୍ ଝେଡିକା କିତାନ୍ । ତାନେଝେନକା ଝାନ୍ ଗ୍ରସ୍ ଦେସ୍ତୁ ଇତାନ୍ ।

୩ ଆବେ ମୁନ୍ତ୍ର ଲେଜ୍କୁ ତେବାତାନ୍ । ଝାନ୍ ସିରିଆଦୁ ସନ୍ତେଙ୍ଗ୍ ଡିଆର୍ ଆନିଝାଲେ ଜିହୁଦିଲୋକୁ ଝାନି ବିରଦ୍ତାନ୍ ଉପାୟ କିଜିନାର ଇଜି କାବୁର୍ ପୟ୍ଜି ମାସିଦନିଆ ସାରିତରିନ୍ ଡେସି ସନ୍ତେଙ୍ଗ୍ ଷ୍ଟିଡିବିତାନ୍ ।

୪ ବେରିଆଦୁ ବାସାନି ପୁରୁଦି ମାରିସି ସୋପାତ୍ର, ତେସଲନିକିଆଦି ଆରିସ୍ବର୍କ୍ସ ନି ସେକ୍ସନ୍, ଦର୍ବି ଗାୟ, ଆସିଆ ଦେସ୍ତି ତୁକିକ ନି ତ୍ରପିମ, ମାରି ତିମତି ଝାନି ଝାଲେ ସର୍ହାର୍ ।

୫ ଝାର୍ ଆଗ୍ଡିରାନ୍ ସଲ୍ସି ଡ୍ରୋୟାଦୁ ମାଙ୍ଗ୍ କାପ୍କିତା ମାର୍ହାର୍ ।

୬ କମିର୍ସିଲି ରୁଟି ପଣ୍ଡୟତି ଝେନକା ମାପ୍ ପିଲିପି ଗାଡ୍ତାନ୍ ଏରୁ ନାସି ପାସ୍ ଦିନ୍ ଝେନକା ଡ୍ରୋୟାଦୁ ଝାରି ଝାଲେ ମିସାତାପ୍ ମାରି ଆବେ ଉନ୍ଡି ଝାରା ତେବାତାପ୍ ।

### ଡ୍ରୋୟାଦୁ ପାଉଲ୍ସି ସାରାସାରି ସନିକା

୭ ଝାରାଦି ଆଗ୍ଡିରି ନାଣ୍ଡିଙ୍ଗ୍ ମାପ୍ ଅରୁସେ ଉଣି ବଜୋଦୁ ଉଣ୍ଡାତାପ୍ । ପାଉଲ ଲୋକାଙ୍ଗ୍ ମାଜ୍ରାନାଡା ସାନ୍ତି ମାଟା ଝେରୁତାନ୍, ଇରିଙ୍ଗ୍ ମାର୍ନାଣ୍ଡିଙ୍ଗ୍ ଝାନ୍ ଆୟା ବାତି ଡିସ୍ତେଙ୍ଗ୍ ସିଲ୍ସିମାର୍ହାନ୍ ।

୮ ଆମା ମୁସ୍ବୁରି ମହଲ୍ଲାଦୁ ମାପ୍ ମିଟିଙ୍ଗ୍ କିଜିମାର୍ହାପ୍, ଆବେ ନାଣ୍ଡି ଦିଝେଙ୍ଗ୍ କାସସି ମାର୍ହେ ।

୯ ଆବେ ଇଉଟିକସ୍ ଦର୍ବି ଅରେନ୍ ମୁରୁଲି ଜରକା ଲାକ୍ତୁ ବାସ୍ତାମାର୍ହାନ୍, ପାଉଲ ମାଟା ଇନି ସମୟତୁ ଝାନିଙ୍ଗ୍ ସୁସକାଣ୍ଡକୁ ଝାଦେଙ୍ଗ୍ ଆସ୍ତେ । ଝାନ୍ ନାଣ୍ଡି ସୁଜ୍ଜି ମୁନ୍ତ୍ର ମହଲ୍ଲା ମୁସ୍ବୁରାନ୍ ଆଡ୍ଗି ଆରୁତାନ୍ । ଝାର୍ ଝାନିଙ୍ଗ୍ ନିକିନିଝାଲେ ଝାନ୍ ସାତା ସର୍ହାମାର୍ହାନ୍ ।

୧୦ ମାତର ପାଉଲ ଆଡ଼ି ରେସି ଖାଜି ଖାନିଙ୍ ଫମ୍ଜି ଆସସି  
ଇର୍ହାନ, “ଦାନ୍ଦା ଆମାଟ୍ । ଖାନ ଜିତାମାନାନ୍ ।”

୧୧ ତାନିଝେନ୍‌କା ଖାନ ମୁସ୍‌କୁ ଡେସି ସଲ୍‌ସି ରୁଟି ରୁକ୍‌ସି ତିରୁଆନ୍  
ମାରି ଝେଡ଼ା ସନି ସାନ୍ତି ଖାରି ଖାଲେ ନାଣ୍ଡ ଖାରିଜି ଆବେଶାନ୍ ସର୍ହାନ୍  
।

୧୨ ଲୋକୁ ମୁରୁଲି କଡ଼ଦିଙ୍ ଜିତିମାନିକା ସୁଡ଼ଜି ଖାନି ଇଲ୍‌ତୁ  
ଅତାର ମାରି ନାଣ୍ଡ ଝେଡ଼ିକା ପୟତାର୍ !

### ତ୍ରୋୟାଦାନ୍ ମିଲିଟସ୍‌ତୁ ସନିକା

୧୩ ମାପ୍ ଆଗଡ଼ିରାନ୍ ଜାହାଜ୍‌ତୁ ଏକ୍‌ସି ଆସୋସ୍‌ତୁ ସର୍ହାପ୍  
। ଆବେଶାନ୍ ମାପ୍ ପାଉଲ୍‌ତିଙ୍ ଜାଜ୍‌ତୁ ଅଡେଙ୍ ମନ୍  
କିତାମାର୍ହାପ୍, ଇରିଙ୍ ଖାନ ସାରିବୁଲ୍‌ଜି ଆୟା ବାଡ଼ିଦୁ ଇନାନ୍ ଇଜି  
ଇର୍ହାମାର୍ହାନ୍ ।

୧୪ ଖାନ ଏସ୍ତିଝାଲେ ମାଙ୍ ଆସୋସ୍‌ତୁ ବେଟ୍‌ଆତାନ୍, ମାପ୍  
ଖାନିଙ୍ ଜାହାଜ୍‌ତୁ ଅସି ମିତିଲିନିଦୁ ସର୍ହାନ୍ ।

୧୫ ଆବେଶାନ୍ ମାରି ସଲ୍‌ସି ମାର୍‌ନାଣ୍ଡିଙ୍ କିଅସ୍ ଲାକ୍‌ତୁ ଇତାପ୍  
। ମାରି ଉଣ୍ଡି ଦିନ୍‌ତି ଝେନ୍‌କା ମାପ୍ ସାମସ୍‌ତୁ ଇତାପ୍, ମାର୍‌ନାଣ୍ଡିଙ୍  
ମିଲିଟସ୍‌ତୁ ଇତାପ୍ ।

୧୬ ଆସିଆ ରାଜିଦୁ ମାରି ନାଣ୍ଡ ସମୟ୍ ତେବାଏନ୍‌ଶ୍ଟା ଏପିସସ୍  
ପାଡ଼ି ପାଡ଼ି ଜାହାଜ୍ ସାଲ୍‌କିଦେଙ୍ ପାଉଲ ମନ୍ କିତାନ୍ । ଜଦି  
ଆଡିଙ୍, ପେଣ୍ଡିକସ୍ ନାଣ୍ଡିଙ୍ ଜିରୁସାଲ୍‌ମ୍‌ତୁ ଇଦେଙ୍ ଇଜି  
ଖାନ ଦାନ୍ଦା ଆଜିମାର୍ହାନ୍ ।

### ଏପିସିୟ ମଣ୍ଡଲିଦି ନେତାରିଙ୍ ପାଉଲ୍‌ତି ପକ୍‌ନି ମାଟା

୧୭ ମିଲିଟସ୍‌ତାନ୍ କାବୁର ପୋକ୍‌ସି ଏପିସିୟ ମଣ୍ଡଲିଦି ପେରି  
ନେତାରିଙ୍ ଖାନି ଖାଲେ ମିସାଦେଙ୍ ପାଉଲ କୁକିସ୍ କିତାନ୍ ।

୧୮ ଖାର୍ ଖାଜି ଉଣ୍ଡାତାର୍‌ଆକା ପାଉଲ ଇର୍ହାନ୍, “ଆସିଆ ରାଜିଦୁ  
ଇଜି ପାର୍‌ତୁମ୍ ଦିନ୍‌ତାନ୍ ନାନ୍ ଏଣ୍ଡେସ୍ ମି ଖାଲେ ଏସ ସମୟ୍  
ତେବାତା ମାର୍ହା, ଆକା ମିର୍ ନେସ୍‌ନିଦେର୍ ।

୧୯ ଜିହୁଦି ଲୋକା ଉପାୟତି ଉଣ୍ଡିଙ୍ଗ୍ ନାଙ୍ଗ୍ ଏମେ ଖିଜୁ ଦୁକ୍କାସୁ ବଗାଦେଙ୍ଗ୍ ପଡ଼ାତାଡ଼, ତାନି ଲୋଇ ନାନୁ ପ୍ରବୁଦି ସେବାକିନି ଖାଜା ଆଡ଼ବାଜି ସାନ୍ତିଦାନ ପାଣି କିତାମାନା ।

୨୦ ମିର୍ ନେସନିଦେର୍ ଜେ, ନାନୁ ଲୋକାମାନୁ ପ୍ରଚାର କିନିଖାଲେ ମାରି ମି ଇଲ୍ଲକାଙ୍ଗ୍ ସିକିୟା ସିନିଖାଲେ ମି ନେଗେନ୍ ଆନି ଖାଜା ଇନି ବିସୟ ଖେକ୍ତେଙ୍ଗ୍ ଖେନକା ଗୁସାଏମାର୍ହା ।

୨୧ ଜିହୁଦିଲୋକୁ ନି ଅଣଜିହୁଦି ଲୋକୁ ଖିଜେରିଙ୍ଗ୍ ନାନୁ ଆର୍ଖା ଜାଗାରତା ସାକି ସିତାମାର୍ହା ଜେ, ଖାର ପାପ୍ତାନ ଡେସି ଏଡ଼କିଜି ମାପୁରୁ ତରିନ୍ ମନ୍ ସିନାର୍ ମାରି ପ୍ରବୁ ଜିସୁଦିମାନୁ ବିସବାସ କିନାର ।

୨୨ ଇଲେଇ ପବିତ୍ର ଆମ୍ବାଦି ମାଟା ମାନାଜି ନାନୁ ଜିରୁସାଲାମ୍‌ତୁ ସଲ୍‌ସିନା, ନେସେଏ ଆବେନ୍ ନାନ୍ ଇନିକା ଆନାଡ଼ନୋ ।

୨୩ ପବିତ୍ର ଆମ୍ବା ନାଙ୍ଗ୍ ଜାଗାରତା କିତା ସିତାମାନାଡ଼ ଜେ ଖିଜୁ ଗାଡ଼କାଙ୍ଗ୍ ନାନୁ ଜଇଲ୍‌ସଲ୍‌ସି କାସୁ ପୟନା ।

୨୪ ମାତର୍ ନା ଉଣ୍ଡିଙ୍ଗ୍ ନା ନିଜେ ଜିବନ୍ତିଙ୍ଗ୍ ନାନୁ ଇସିକା ଇଜି ଅଡ଼ବିନା । ମାପୁରୁଦି ଦୟା ବିସୟତାନ୍ ପ୍ରବୁ ଜିସୁ ଏମେ ମାଟା ଖେରତେଙ୍ଗ୍ ଇଜି ନାଙ୍ଗ୍ ସେବା ଦାୟିତ ସିତାମାନାନ୍, ଆକା ପୁରା କିଦେଙ୍ଗ୍ ଇଜିନା ସୁସମାଚାର ପ୍ରଚାର ପାଣି ସାକି ପୁରା କିନା, ନିସନେ ନା ବଦା ।

୨୫ “ମାପୁରୁଦି ରାଜି ବିସୟତାନ୍ ପ୍ରଚାର କିଦେଙ୍ଗ୍ ଇଜି ନାନୁ ମି ଖିଜେରି ଲାକ୍‌ତୁ ସଲ୍‌ସିନା । ଇଲେଇ ସୁଡ଼ୁ, ନାନୁ ନେସନା ଜେ, ମି ମାଣାନ୍ ଏନ୍ ନାଙ୍ଗ୍ ମାରି ସୁଡ଼ୁନ୍ ।

୨୬ ଆଦେଙ୍ଗ୍ ନେର୍ରି ଇୟା ସୁଜଗତୁ ନାନୁ ଆର୍ଖାଦାନ ମି ଲାକ୍‌ତୁ ଖେରସିନା ଜେ, ଜଦି ମି ଲୋଇରାନ୍ ଏନ୍ ନାସୁଆନାନ୍, ଆୟାଉଣ୍ଡିଙ୍ଗ୍ ନାନୁ ଦାଇ ସିଲେ ।

୨୭ ଇରିଙ୍ଗ୍ ମାପୁରୁଦି ଖିଜୁ ଉଦେସ୍ ମି ଲାକ୍‌ତୁ ଖେରତେଙ୍ଗ୍ ନାନୁ ଖେନକା ଗୁସାଏ ।

୨୮ ମାରି ମିର୍ ନେତା ଖାଜା ନିଜେଦି ବିସୟତାନ୍ ମାରି ପବିତ୍ର ଆମ୍ବା ମି ଜାତୁନ୍ ଅଡେଙ୍ଗ୍ ଏମେ ବିସବାସି ମାନ୍ଦାଦିଙ୍ଗ୍ ଡିସ୍‌ତା ସିତାମାନାନ୍, ଆୟା ଖିଜେରି ବିସୟତାନ୍ ଜାତୁନ୍ ଆଆ । ମେଣ୍ଡା ଗାଉଡ଼ୁ ଖାଜା ମାପୁରୁଦି ମଣ୍ଡଲିଦି ଜାତୁନ୍ ଆଆ । ଆୟା ମଣ୍ଡଲିଦିଙ୍ଗ୍ ଖାନ୍ ଖାନି

ମାରିସିଦି ନେତେରତି ମାଣାନ୍ ନିଜେଦିକା କିତାମାନାନ୍ ।

୨୯ ନାନୁ ନେସନା, ନାନୁ ସରରି ଝେନ୍‌କା ମି ଲୋଇ ବୟଙ୍ଗାର୍ ବେନ୍‌ତ୍ରରକିଙ୍ ଖାନେ ମାରି ମାନ୍‌ଦିଙ୍ କାଣ୍ଡିଆକାବରା କିଏନ୍‌ଶ୍ଟା ଡିସ୍‌ଉ ।

୩୦ ସମୟ ଖାନାଡ଼, ଏସ୍ତିଝାଲେ ମି ନିଜେଦି ଦଲତୀ ଏସ ଲୋକୁ ବିସ୍‌ବାସିରିଙ୍ ମିର୍ ମାଟା ଝେରସି ତାଗ୍‌ଇ ସାରିଦୁ ଅନାର୍ ।

୩୧ ନାସ୍ତିଝାଲେ ଜାଗାରତା ମାନଡୁ, ନାନୁ ଜେ ଝେଡ଼େ ନାଡ଼ା କାଣେରୁଙ୍ ଖାକସି ମୁନ୍‌ଶ୍ଟି, ବାରସେକ୍ ସାନ୍‌ ମି ଝିଜେରିଙ୍ ସିକିୟା ସିତାମାନା, ଇୟା ମାଟା ମନ୍‌ଡୁ ଇଡ଼ୁ ।

୩୨ “ଇଲେଇ ନାନୁ ମିଙ୍ ମାପୁରୁଦି କିୟୁଦୁ ମାରି ଖାନି ଦୟାଦୁ ପୁରାତି ବାକ୍ୟଦୁ ସର୍ପେ କିଜିନା, ଆୟା ବାକ୍ୟ ମିଙ୍ ବପୁ କିଦେଙ୍ ଇଜି ମାପୁରୁଦି ଲୋକା ଉଣ୍ଡିଙ୍ ମାନି ଝିଜୁ ଆସି ବାଦ୍ ମିଙ୍ ସିଦେଙ୍ ଇଜି ଆଟ୍‌ନା ।

୩୩ ନାନୁ ଏ ଝେଣ୍ଡି, ବାଙ୍ଗିରାମ୍ ମାରି ଖାତିଗନ୍‌ ପୟ୍‌ଦେଙ୍ ଆସା ଇଡ଼ଏ ।

୩୪ ମିର୍ ନେସନିଦେର, ନାନୁ ନା ଇୟା ରୁଣ୍ଡି କିକାଣକୁ ପାଣି କିଜି ନିଜେଦି ମାରି ନା ଖାଲେ ପାଣିକିନିଝାରି ଝିଜୁ ଦରକାର୍ ପୁରା କିତାମାନା ।

୩୫ ପୟ୍‌ନି ମାଣାନ୍ ଦାନ୍ କିନିମାନୁ ନାଣ୍ଡ ଝେଡ଼ିକା ତେବାନାଡ଼, ନିଜେ ପ୍ରବୁ ଜିସୁଦି ଇୟା ବାକ୍ୟଦିଙ୍ ଏଡ଼କିଜି ଇୟାଝାଜା ନାଣ୍ଡ କାସୁଦି ପାଣିଦାନ୍ ମାପ୍ ଆଟ୍‌ଇ ଲୋକାଙ୍ ସାକା କିନି ଦରକାର୍, ଇୟା ବିସୟତାନ୍ ନାନୁ ଝିଜୁଦିନ୍ ମିଙ୍ ସାରି ତରତାମାନା ।”

୩୬ ଇୟାଝିଜୁ ମାଟା ଝେରତି ଝେନ୍‌କା ପାଉଲ ଖାରି ଖାଲେ ମେଣ୍ଡେଙ୍ ଗଟ୍‌କିଜି ପାରତନା କିତାନ୍ ।

୩୭ ଝିଜେରେ ଆଡ଼ବାଜି ଆଡ଼ବାଜି ପାଉଲତିଙ୍ ପମ୍‌ଜି ନଣ୍ଡିଜି ପୋକ୍‌ତାର୍ ।

୩୮ ଖାର ଖାନିଙ୍ ମାରି ସୁଡ଼ଦେଙ୍ ଆଟ୍‌ଏର୍ ଇଜି ଖାନ୍ ଇର୍ହାନ୍‌ଆକା ଖାର ନାଣ୍ଡ ଦୁକ୍ ଆତାମାର୍ହାର୍ । ଖାର ଖାନିଙ୍ ପୋକ୍‌ତେଙ୍ ଇଜି ଜାହାଜ୍ ଲାକ୍‌ଡୁ ସର୍ହାର୍ ।

## ୨୧

## ପାଉଲ ଜିରୁସାଲମ୍‌ତୁ ସନିକା

୧ ଖାରିଙ୍ଗ୍ ପୋକ୍ତି ଖେନ୍‌କା ମାପ୍ ଆବେଶାନ୍ ସର୍ହାପ୍ । ଏରୁସାରି ନାସି ମାପ୍ କୋସ୍ତୁ ଇତାପ୍ । ମାରିନାଣ୍ଡିଙ୍ଗ୍ ରୋତସ୍ ପାଡ଼ି ସିଜି ପାତାରାଦୁ ସର୍ହାପ୍ ।

୨ ଆବେଶାନ୍ ପିନିସିଆଦୁ ସଲ୍‌ସିମାନି ଉନ୍‌ଶ୍ଟି, ଜାହାଜ୍ ଏକ୍‌ସି ସର୍ହାପ୍ ।

୩ ତାନିଖେନ୍‌କା ସାଇପ୍ରସ୍ ତର୍ଜିମାନି ଉନ୍‌ଶ୍ଟି, ବାଡ଼ିଦୁ ଇତାପ୍ । ଆବେଶାନ୍ ତାନି ତେବିରି ତରିନ୍ ସିଜି ମାପ୍ ସିରିଆଦୁ ସର୍ହାପ୍ । ମାପ୍ ସୋର ଗାଡ଼ତୁ ଜାହାଜ୍‌ତାନ୍ ରେତାପ୍, ଇରିଙ୍ଗ୍ ଇୟା ଜାହାଜ୍‌ତାନ୍ ସାମାନପତର୍ ରେପ୍‌ନିକା ମାର୍ହାଡ଼ ।

୪ ଆବେ ମାପ୍ ଏସ ବିସ୍‌ବାସିରିଙ୍ଗ୍ ସୁଡ଼ଜି ଖାରି ଖାଲେ ଉନ୍‌ଶ୍ଟି, ସାତା ତେବାତାପ୍ । ପବିତ୍ର ଆମ୍ବାଦି ଆଦେସ୍ ପୟ୍‌ଜି ଖାର୍ ପାଉଲ୍‌ତିଙ୍ଗ୍ ଜିରୁସାଲମ୍‌ତୁ ସନ୍‌ଡ୍ରେଙ୍ଗ୍ ଡେବାକିତାର୍ ।

୫ ମାତର୍ ଖାରି ଖାଲେ ଉନ୍‌ଶ୍ଟି, ସାତା ତେବାତି ଖେନ୍‌କା ମାପ୍ ଖାରିଙ୍ଗ୍ ଡିସ୍‌ସି ନିଜେଦି ସାରିଦୁ ସର୍ହାପ୍ । ମାଙ୍ଗ୍ ଡିସ୍‌ତେଙ୍ଗ୍ ଇଜି ଖାର୍ ଖିଜେରେ ନିଜେଦି ଆଡ଼ସିକ୍ ମାରି କଡ଼ରି ଖାଲେ ଗାଡ଼, ଆଡ଼ରେ ମାନି ସାମ୍‌ଦୁର୍ ପାଡ଼ି ସାନ୍ ଖାତାର୍ । ଆବେ ମାପ୍ ଖିଜେରେ ମେଣ୍ଟେଙ୍ଗ୍ ଗଟ୍‌କିଜି ପାର୍‌ତନା କିତାପ୍ ।

୬ ତାନିଖେନ୍‌କା ମାପ୍ ଖାରିଙ୍ଗ୍ ପୋକ୍‌ସି, ଜାହାଜ୍‌ତୁ ଏକ୍‌ତାପ୍, ଖାର୍ ଇନ୍‌ଡ୍ର ଡେସି ସର୍ହାର୍ ।

୭ ମାପ୍ ସୋର ଗାଡ଼ତାନ୍ ଏରୁ ନାସି ଖିଜି ପତଲ୍‌ମାଜଦୁ ଇତାପ୍, ଆବେ ବିସ୍‌ବାସ୍‌ତି ତଡ଼ାନ୍‌କାଙ୍ଗ୍ ମାଡ଼ିସ୍‌କିଜି ଖାରିଖାଲେ ଉନ୍‌ଶ୍ଟି, ଦିନ୍ ତେବାତାପ୍ ।

୮ ☆ମାରିନାଣ୍ଡିଙ୍ଗ୍ ମାପ୍ ଆୟା ବାଡ଼ି ଡିସ୍‌ସି କାଇସରିଆଦୁ ଇତାପ୍ । ଆବେ ମାପ୍ ପ୍ରଚାରକିନି ପିଲିପିତି ଇଲ୍‌ତୁ ତେବାତାପ୍, ଜିରୁସାଲମ୍‌ତୁ ସେବକ ଖାଜା ବାସେଆତି ମାନି ସାଡ଼ ଲୋକା ଲୋଇ ଖାନ୍ ଅରେନ୍ ମାର୍ହାନ୍ ।

୯ ଖାନି ନାଲଗି ପେଡ଼ିଆଇ ଆଇଲିକ୍ ମାପୁରୁଦି ବାକ୍ୟ ଖେରସି ମାହେଁ ।

୧୦ ✧ ମାପୁ ଆବେ ନାଶ୍ତି ଦିନ୍ ତେବାତି ଖେନକା, ଜିହୁଦା ଦେସ୍ତାନ ଆଗାବ ଦର୍ଡ଼ି ଅରେନ୍ ବାବବାଦି ଆବେ ଖାତାନ ।

୧୧ ଖାନ ମା ଲାକ୍ତୁ ଖାଜି ପାଉଲ୍ତି ଜୁକିଦୁ ତରାନି ନାସ୍ତୁ ଅତାନ, ଆବେଟ୍ ଖାନ ନିଜେଦି କିୟୁ ମାରି କାଲୁ ତରସି ଇର୍ହାନ, “ପବିତ୍ର ଆମ୍ଭ ନାଙ୍ଗ୍ ଜାଣେକିଜିନାତ୍ ଜେ, ଇୟା ଜୁକି ତରାତି ଅଦିକାରିଙ୍ଗ୍ ଜିରୁସାଲାମ୍ତୁ ଜିହୁଦି ଲୋକୁ ଇୟାଖାଜା ତରସି ଖାନିଙ୍ଗ୍ ଅଣଜିହୁଦି ଲୋକା କିୟୁଦୁ ସପେଁ କିନାର୍ ।”

୧୨ ଇକା ଖେନଜି ମାପୁ ମାରି ଆୟା ବାଡ଼ିଦୁ ମାନି ଆଇକାର୍ ପାଉଲ୍ତିଙ୍ଗ୍ ଜିରୁସାଲାମ୍ତୁ ସଲ୍ଲ ଉଣ୍ଡିଙ୍ଗ୍ ବାଡ଼ିଙ୍ଗ୍ ମାଲିତାପ୍ ।

୧୩ ମାତର୍ ପାଉଲ୍ ଇର୍ହାନ, “ମିର ଇୟା ଇନିକା କିଜିନିଦେର୍, ଏୟା ଇୟାଖାଜା ଆଡ଼ବାଜି ନା ଜିବନ୍ତିଙ୍ଗ୍ ରୁକ୍ସିନିଦେର୍ ? ଜିରୁସାଲାମ୍ତୁ କେବଲ୍ ତରାୟ୍ ଆଦେଙ୍ଗ୍ ସିଲେ, ମାତର୍ ପ୍ରବୁ ଜିସୁ ଉଣ୍ଡିଙ୍ଗ୍ ସାଦେଙ୍ଗ୍ ଇଜି ବା ନାନ୍ ତିଆର୍ ମାନା ।”

୧୪ ମାପୁ ଖାନିଙ୍ଗ୍ ବୁଜା କିଦେଙ୍ଗ୍ ଆର୍ଏଜି ଆବେଟାନ ସୁପ୍ଆଜି ଇର୍ହାପ୍, “ପ୍ରବୁଦି ବଦା ପୁରା ଆପିଡ୍ ।”

୧୫ ଆବେ ଏସ ସମୟ୍ ତେବାତି ଖେନକା ମାପୁ ମା ସାମାନ ପତ୍ର ରସସି ଜିରୁସାଲାମ୍ ତରିନ୍ ସର୍ହାପ୍ ।

୧୬ କାଇସରିଆଦି ଏସ ସିସୁର୍ ନି କୁପ୍ପଦି ମନାସୋନ ଦର୍ଡ଼ି ଅରେନ୍ ବିସ୍ବାସି ବା ମା ଖାଲେ ଖାତାନ । ମନାସୋନଦି ଇଲୁଡୁ ମାପୁ ତେବାନି ବ୍ୟବସ୍ଥା ଆତାମାର୍ହାଡ୍ ।

### ଜାକୁବଦି ଖାଲେ ପାଉଲ୍ତି ବେଟ୍ଆନିକା

୧୭ ଜିରୁସାଲାମ୍ତୁ ବିସ୍ବାସ୍ତି ତଡ଼ାନକୁ ଖେଡ଼ିକାଦାନ ମାଙ୍ଗ୍ କୁକ୍ତାର୍ ।

୧୮ ମାରିନାଣ୍ଡିଙ୍ଗ୍ ପାଉଲ୍ ମା ଖାଲେ ଜାକୁବଙ୍ଗ୍ ସୁଡ଼ଦେଙ୍ଗ୍ ସର୍ହାନ; ମଣ୍ଡିଲି ଖିଜୁ ନେତାର୍ ଆବେ ଉଣ୍ଡାତା ମାର୍ହାର୍ ।

୧୯ ପାଉଲ ଖାରିଙ୍ଗ୍ ମାଡ଼ିସ୍କିଜି ଖାନି ସେବା ପାଣିଦାନ ମାପୁରୁ ଅଣଜିହୁଦି ଲୋକା ଲୋଇ ଆମାକା ଆମାକା କିତାମାର୍ହାନ; ତାନି ଉନ୍‌ଶ୍ଟି ପୁରା ମାଟା ସିତାନ ।

୨୦ ଖାନି ମାଟା ଝେରୁଇ ଝେନ୍‌କା ଖାରୁ ଓଜେରେ ମାପୁରୁଦି ଦନ୍‌ୟବାଦ୍ କିତାର । ତାନି ଝେନ୍‌କା ଖାରୁ ଇର୍ହାର, “ତଡ଼ାନ ପାଉଲ, ନିନ୍ ସୁଡ଼ଜିନି, ଏଣ୍ଡେସ୍ ଇଲେଇ ହାଜାର ହାଜାର ଜିହୁଦି ଲୋକୁ ପ୍ରବୁ ଜିସୁମାନୁ ବିସବାସ୍ କିଜିନାର ମାରି ଖାରୁ ନିୟମ୍ ଉଣ୍ଡିଙ୍ଗ୍ ବା ବିସବାସ୍‌ତାନ୍ ତେବାତାମାନାର ।

୨୧ ଖାରୁ କାବୁର୍ ପୟ୍‌ତାମାନାର ଜେ, ନିନ୍ ଅଣଜିହୁଦି ଲୋକା ଦେସ୍‌ତୁ ବାସାଜି ମାନି ଜିହୁଦି ଲୋକାଙ୍ଗ୍ ମୋସାଦି ନିୟମ୍ ଡିସ୍‌ତେଙ୍ଗ୍, ଖାରି କଡ଼ରିଙ୍ଗ୍ ସୁନ୍‌ଡ କିଇ ଉଣ୍ଡିଙ୍ଗ୍ ମାରି ଜିହୁଦି ରିତିନିତି ମାନାଇ ଉଣ୍ଡିଙ୍ଗ୍ ସିକିୟା ସିଜିନି ।

୨୨ ନିନ୍ ଇବେ ଖାତିମାନି ଇଜି ଖାରୁ ସତେନେ ଝେନାର । ଆରଡିଙ୍ଗ୍ ଇନିକା କିଦେଙ୍ଗ୍ ଆନାଡ଼ ?

୨୩ ମାପ୍ ବଦାକିଜିନାପ୍, ନିନ୍ ଉନ୍‌ଶ୍ଟି ପାଣି କିଆ । ଇବେମାନି ନାଲ୍‌ଏର୍ ଲୋକୁ ଉନ୍‌ଶ୍ଟି ଅପାତାମାନାର ।

୨୪ ଖାରି ଖାଲେ ସାଙ୍ଗ୍‌ଆ । ନେଗେନ୍‌କିନି ବିଦି ମାନାନିମାନୁ ଖାରି ଖାଲେ ମିସାଜି ଖାରି କାର୍ସୁ କିଆ । ତାନିଝେନ୍‌କା ଖାରୁ ନିଜେ ନିଜେଦି ତାଲା ଟାଙ୍ଗୁରୁ କିନାର । ଇବେଟ୍‌ତାନ ଜଣା ପଡ଼ାନାଡ଼ ଜେ, ନି ବିସୟ୍‌ତାନ ଝେଙ୍ଗ୍ ତି ମାନି ଇନି ମାଟା ସଡ଼ ସିଲେ, ମାତର୍ ନିନ୍ ମସାଦି ନିୟମ୍ ଇସାବ୍‌ତାନ ଜିଜିନି ।

୨୫ ମାତର୍ ଏମେ ଅଣଜିହୁଦି ଲୋକୁ ବିସବାସ୍ ଆତାମାନାର, ଖାରି ଲାକ୍‌ତୁ ମାପ୍ ଉନ୍‌ଶ୍ଟି ଆକୁ ରାସ୍‌ସି ସିକିୟା ସିତାମାନାପ୍ ଜେ, ମା ମାଟାଦି ଇସାବ୍‌ତାନ ଖାରୁ ଦିୟାମ୍‌କା ଲାକ୍‌ତୁ ପୁଜାସିତିମାନି କାଦି ଉଣ୍ଡୁଏର୍, ନେତେର୍ ଉଣ୍ଡୁଏର୍, କକ୍‌ଲା ପିଡ଼ିସି ସାପିସ୍କିତିମାନି ପସୁଦି କାଣ୍ଡା ଡିନ୍‌ଏର୍ ମାରି ଦାରିପାଣିଦାନ ଆକତେବାଦୁ ।”

୨୬ ମାରିନାଣ୍ଡିଙ୍ଗ୍ ପାଉଲ ଖାତିମାରୁଇ ନାଲ୍‌ଏରି ଖାଲେ ନେଗେନ୍‌କିନି ବିଦି ମାନାତାର । ଝେନ୍‌କା ଖାନ ମନ୍‌ହିର୍‌ତୁ ସଲ୍‌ସି

ନେଗେନକିନି ପାଣି ଏସାଙ୍ଗ୍ ଓଁ ଓଁଜନାତ୍ ମାରି ଆମା ଖେଡ଼ାଦୁ  
ପୁଜାସିନିକା ମାନାତ୍, ଆକା ଖେରତା ସିତାନ୍ ।

**ପାଉଲ ମନ୍ଦିର ଲୋଇ ତରାୟଆତାନ୍**

୨୭ ନେଗେନକିନି ପାଣିଦି ସାତ୍ ଦିନ୍ ଓଁଜିତି ଖେନକା ଆସିଆ  
ରାଜିଦି ଏସ ଜିହୁଦି ଲୋକୁ ମନ୍ଦିରତୁ ପାଉଲତିଙ୍ଗ୍ ସୁଡ଼ତୁର୍ ।  
ଝାର୍ ଆବେ ଉଣ୍ଡାତିମାର୍‌ଇ ଲୋକାଙ୍ଗ୍ ଏଗ୍ରିସ୍ କିଜି ପାଉଲତିଙ୍ଗ୍ ଓଁ  
ଆସିତାର୍ ।

୨୮ ଝାର୍ ଆଉଲି ଆଜି ଇର୍ହାର୍, “ଏ ଇସ୍ରାଏଲ୍‌ତି ଲୋକୁ, ମାଙ୍ଗ୍  
ସାକା କିତୁ ! ଇୟା ଲୋକୁ ସାରିବେଡ଼ତି ସଲ୍‌ସି ଇସ୍ରାଏଲ୍‌ତି ଲୋକା  
ବିରୁଦ୍‌ତାନ୍, ମସାଦି ନିୟମ୍ ନି ଇୟା ମନ୍ଦିର ବିରଦ୍‌ତାନ୍ ସିକିୟା  
ସିଜିନାନ୍ । ମାରି ଇଲେଇ ଝାନ୍ ଏସ ଅଣଜିହୁଦି ଲୋକାଙ୍ଗ୍ ମନ୍ଦିର  
ଲୋଇ ତାସି ଇୟା ପବିତ୍ର ବାତିଦିଙ୍ଗ୍ ଓଁ ତାଗ୍‌ଇକା କିଜିନାନ୍ ।”

୨୯ ✧ ଝାର୍ ଗାଡ଼ତୁ ଏପିସସ୍‌ତି ତ୍ରପିମଦିଙ୍ଗ୍ ଓଁ ପାଉଲତି ଝାଲେ  
ସୁଡ଼ତିମାରିଙ୍ଗ୍ ଓଁ ଅଡ଼ିତାର୍ ଜେ, ପାଉଲ ଝାନିଙ୍ଗ୍ ମନ୍ଦିରତୁ  
ଅତାମାନାନ୍ ।

୩୦ ଓଁଜୁ ଗାଡ଼ତୁ ଜାଟି ନିଙ୍ଗ୍ ତାଡ଼ । ଲୋକୁ ପାଉଲତିଙ୍ଗ୍ ଓଁ ମନ୍ଦିର  
ଆଡ଼ରେ ଇର୍ସି ତାତାର୍ । ମନ୍ଦିରତି ସେର୍‌ଲେଙ୍ଗ୍ ଓଁଜୁ କେର୍‌ତା  
ଡ଼ିସ୍‌ତାର୍ ।

୩୧ ରିସାଆତି ଲୋକୁ ଓଁଜେରେ ପାଉଲତିଙ୍ଗ୍ ଓଁ ତାକ୍‌ତେଙ୍ଗ୍ ଓଁ  
ଇଜି ଉପାୟ କିତାର୍, ଏସ୍ତିଝାଲେ ଓଁଜୁ ଜିରୁସାଲାମତୁ ଜାଟି ଜଗଡ଼ା  
ଆଜିନାତ୍ ଇଜି ରୋମିୟ ସନ୍‌ସରି ନେତା କାବୁର୍ ଖେରଆନ୍ ।

୩୨ ନାସ୍ତିଝାଲେ ନେତା ଏସ ସେନାପତି ନି ସନ୍‌ସରିଙ୍ଗ୍ ଓଁ ଅସି  
ଜାଟି ଜଗଡ଼ା ଆନି ବାତିଦୁ ଇତାନ୍ । ଲୋକୁ ସନ୍‌ସରି ନେତେଙ୍ଗ୍ ଓଁ  
ନି ସନ୍‌ସରିଙ୍ଗ୍ ଓଁ ସୁଡ଼ଜି ପାଉଲତିଙ୍ଗ୍ ଓଁ ମାରି ମାଡ଼ ତାକ୍‌ଏନ୍‌ଶ୍ଟା  
ଡ଼ିସ୍‌ତାସିତାର୍ ।

୩୩ ସନ୍‌ସରି ନେତା ପାଉଲତିଙ୍ଗ୍ ଓଁ ଆସ୍‌ସି ଝାନିଙ୍ଗ୍ ଓଁ ରୁଣ୍ଡି ସିକ୍‌ଶି  
ଦାନ୍ ତର୍‌ତେଙ୍ଗ୍ ଓଁ ଇଜି ଆଦେସ୍ ସିତାନ୍ । ଖେନକା ଝାନ୍  
ଖେନବାତାନ୍, “ଇୟା ଲୋକୁ ଏନ୍ ମାରି ଝାନ୍ ଇନିକା କିତାମାନାନ୍  
?”

୩୪ ଲୋକୁ ଗଲି ଲୋଇ ଏନ୍ ଏସ ରକମ୍ତି ମାଟା ଇଜି ଆଉଲି ଆତାର । ଇୟାଞ୍ଜା ଅସାନ୍ତି ଆତାଡ଼ଜେ, ସନ୍ୟରି ନେତା ସଡ଼ ମାଟା ଇନିକା, ଇନିକାବା ନେସ୍ତେଙ୍ଗ୍ ଆଟ୍‌ଏତାନ୍ । ଆବେଟ୍ ଖାନ୍ ପାଉଲତିଙ୍ଗ୍ ସନ୍ୟର୍ତେବାନି ବାତି ଲୋଇ ଅତେଙ୍ଗ୍ ଇଜି ସନ୍ୟରିଙ୍ଗ୍ ଆଦେସ୍ ସିତାନ୍ ।

୩୫ ଖାନ୍ ଖାନିଙ୍ଗ୍ ଅସି ସନ୍ୟର୍ତେବାନି ବାତିଦି ପାଉଟ୍‌କୁ ଲାକ୍‌ତୁ ଇନି ଖେଡାଦୁ ଖାନିଙ୍ଗ୍ କେର୍ବାଜି ତେବାଜିମାନି ଲୋକୁ ନିସା ରିସା ଆତାର ଜେ ସନ୍ୟର୍ ପାଉଲତିଙ୍ଗ୍ ପିଣ୍ଡୁତା ଅତାର ।

୩୬ ଲୋକୁ ଖିଜେରେ ଖାନି ଖେନ୍‌କା ଖେନ୍‌କା ଖାଜି ଆଉଲି ଆଜି ଇଜିମାର୍‌ହାର୍, “ଖାନିଙ୍ଗ୍ ଡାକ୍‌ଦୁ ।”

**ପାଉଲ ନିଜେଦି ତରିଟାନ୍ ମାଟା ଆଙ୍ଗ୍‌ତାନ୍**

୩୭ ସନ୍ୟର୍ ପାଉଲତିଙ୍ଗ୍ ସନ୍ୟର୍ ତେବାନି ବାତି ଲୋଇ ଅନି ଖାଲେ ଖାନ୍ ସନ୍ୟରି ନେତେଙ୍ଗ୍ ଇର୍ହାନ୍ : “ନାନ୍ତୁ ନିଙ୍ଗ୍ ଏସ ମାଟା ଇନ୍‌ଡ୍ରେଙ୍ଗ୍ ଆଟ୍‌ନାନ୍ ନୋ ?”

ସନ୍ୟରି ନେତା ଖେନ୍‌ବାତାନ୍, “ନିନ୍ତୁ ତୋ ଗ୍ରାନ୍ ଖାରଗିଜିନି ।

୩୮ ଆରତିଙ୍ଗ୍ ଏସ ଦିନ୍ ଆଗ୍ତି ମିସର୍ ଏମେ ଲୋକୁ ଜୁଦ୍ କିଜି ଚାରି ହାଜାର ଜୁଦ୍ ସାମାନ୍ ଆସ୍ତି କାଙ୍ଗ୍‌ରଆଙ୍ଗ୍ ଅସି ମରୁବୁମିଦୁ ଇତା ମାର୍‌ହାନ୍, ନିନ୍ତୁ ତୋ ଆୟା ଲୋକୁ ସିଲେ ?”

୩୯ ପାଉଲ ଇର୍ହାନ୍, “ସିଲିସିଆଦି ତାର୍‌ସ୍‌ବୁ ଜନମ୍ ଆତିମାନି ନାନ୍ତୁ ଅରେନ୍ ଜିହୁଦି, ଉନ୍‌ଡ୍ରି ପେରି ଗାଡ୍‌ତି ଲୋକୁ । ଇୟା ଲୋକାଙ୍ଗ୍ ବୁଜାକିଜି ଇନ୍‌ଡ୍ରେଙ୍ଗ୍ ଇଜି ଦୟା କିଜି ନାଙ୍ଗ୍ ସାରି ସିଦା ।

୪୦ “ସନ୍ୟରି ନେତା ଖାନିଙ୍ଗ୍ ସାରି ସିତାନ୍‌ଆକା ପାଉଲ ପାଉଟ୍ ମୁସ୍‌କୁ ନିଲ୍‌ସି ଲୋକାଙ୍ଗ୍ ଆଲେଜ ମାନ୍‌ଡ୍ରେଙ୍ଗ୍ ଇଜି କିୟୁ ପେର୍‌ଜି ଜୁଟ୍‌ସି ଖେର୍‌ତାନ୍ । ଖାନ୍ ଆଲେତି ଖେନ୍‌କା ପାଉଲ ଏବ୍ରି ଭାସାଦାନ୍ ଇର୍ହାନ୍ :

## ୨୨

୧ “ତଡାନ୍‌କୁ ମାରି ବୁବାର୍, ମି ଆଗ୍ତି ନିଜେ ତରିଟାନ୍ ନାନ୍ତୁ ଆମାକା ଇଜିନା, ଆକା ଖେନ୍‌ଡୁ !”

୨ ଖାରି ଖାଲେ ଖାନ୍ ଏହି ବାସାବାନ୍ ମାଟା ଖାରଗିଜିନିକା ଖେନ୍ଦି ଖାର ମାରି ଆଲେତାର ମାରି ପାଉଲ ଇନ୍ଦ୍ରେଙ୍ଗ୍ ଆସ୍ତାନ୍ :

୩ ✠ ନାନୁ ଅରେନ୍ ଜିହୁଦି, ସିଲିସିଆଦି ତାର୍ସସ୍ତୁ ନା ଜନମ୍, ମାତର୍ ନାନୁ ଜିରୁସାଲାମ୍ତୁ ପିରିତା ମାର୍ହା ମାରି ଗମଲିଏଲତି ଅରେନ୍ ସିସୁ ମାର୍ହା । ମା ତକ୍ରାଦାଦାରି ନିୟମ୍ ନାନୁ ଟିକ୍ତାନ୍ ଅଜାତା ମାର୍ହା ମାରି ମି ଖାଜା ମାପୁରୁଦି ଉଣ୍ଡିଙ୍ଗ୍ ଝେଡିକା ମାର୍ହା ।

୪ ✠ ନାନୁ ଇୟା ସାରିଦୁ ସନି ଲୋକା ମୁସ୍କୁ ଜାଟି କିଜି ଖାରିଙ୍ଗ୍ ଜିବନ୍ଦୁ ତାକ୍ସି ମାର୍ହା । ମେମାରି ନି ଆଇମା ଖିଜେରିଙ୍ଗ୍ ତରସି ଜଇଲ୍ତୁ ଅସି ମାର୍ହା ।

୫ ନା ଇୟା ମାଟା ସଡ୍ ଜେ, ପେରି ଜାଜକ ନି ପେରି ଲୋକାମିଟିଙ୍ଗ୍ତି ସବାଦି ଖିଜେରେ ତେନି ସାକି । ଇୟା ଲୋକାଙ୍ଗ୍ ତରସି ମାରି ସିକିଶିଦାନ୍ ତରସି ଦଣ୍ଡ ସିଦେଙ୍ଗ୍ ଇଜି ଜିରୁସାଲାମ୍ତୁ ତାତେଙ୍ଗ୍ ଇଜି ନାନୁ ପେରି ଜାଜକତିମାଣାନ୍ ସିଟି ଅସି ଦାମାସ୍କସ୍ତୁ ମାନି ଜିହୁଦି ତଡାନ୍କା ଲାକ୍ତୁ ସର୍ଥା ।

### ପାଉଲ ଖାନି ମନ୍ ଡେପ୍ତି ବିସୟତାନ୍ ଖେରତାନ୍ (ପ୍ରେରିତ ୯:୧-୧୯; ୨୭:୧୨-୧୮)

୬ “ନାନୁ ସଲ୍ସି ଏସ୍ତିଖାଲେ ଦାମାସ୍କସ୍ତି ଲାକ୍ତୁ ଆଜିମାର୍ହା, ମାଦ୍ଲାମ୍ ବେଡାଦୁ ବାଦଡ୍ତାନ୍ ଉନ୍ତ୍ର କାସନି ଜାୟ ଆୟାଦାପ୍ରେନେ ନା ସାରିବେଡ୍ତି ତରାୟ ଆତାଡ୍ ।

୭ ନାନୁ ବୁମିଦୁ ମକମ୍ ପାଡ୍କ୍ସି ଆର୍ତା ମାରି ନା ଉଣ୍ଡିଙ୍ଗ୍ ମାଟା ଖେରଥା, ‘ସାଉଲ, ସାଉଲ’ ନିନ୍ଦୁ ଏନ୍ଦା ନାଙ୍ଗ୍ କାସୁ ସିଜିନି ?

୮ ନାନୁ ଖେନ୍ଦବାତା, ପ୍ରୁ, ନିନ୍ଦୁ ଏନ୍ ? ଖାନ୍ ନାଙ୍ଗ୍ ଇର୍ହାନ୍, ନିନ୍ଦୁ ଆମାଖିନିଙ୍ଗ୍ କାସୁ ସିଜିନି, ନାନୁ ଆୟା ନାଜରିୟତିୟଦି ଜିସୁ ।

୯ ନା ଖାଲେ ମାର୍ତ୍ତ ଲୋକ୍ ଆୟା ଜାୟ ସୁଡ୍ଡୁର, ମାତର୍ ନା ଖାଲେ ଖାରଗିଜି ମାନି ଲୋକ୍ତି ବଲ୍ ଖେନ୍ଦ୍ରେଙ୍ଗ୍ ଆସ୍ତାନ୍ ।

୧୦ ନାନୁ ଖେନ୍ଦବାତା, ପ୍ରବୁ, ନାନୁ ଇନିକା କିନା ? ପ୍ରବୁ ନାଙ୍ଗ୍ ଇର୍ହାନ୍, ନିଙ୍ଗ୍ଆ, ଦାମାସକସ୍ତୁ ସାଙ୍ଗ୍ଆ, ମାପୁରୁ ନି ଉଣ୍ଡିଙ୍ଗ୍ ୱାମେ ପାଣି ଇର୍ତାମାନାନ୍, ଆବେନ୍ନୁ ନିଙ୍ଗ୍ ଆକା ଜାଣେ କିନାନ୍ ।

୧୧ ଜାୟତି ନାଣ୍ଡ କାସ୍ନି ମାଣାନ୍ ନାନୁ କାଣା ଆତା ସର୍ଆ । ଆୟାଉଣ୍ଡିଙ୍ଗ୍ ନା ଖାଲେ ଅର୍ସେ ସନିକାର୍ ନା କିୟୁ ଆସ୍ସି ନାଙ୍ଗ୍ ଦାମାସକସ୍ତୁ ଅତାର୍ ।”

୧୨ “ଆୟା ଗାଡ଼ତୁ ହନନିୟ ଦର୍ଡି ଅରେନ୍ ଦାମ୍ବୁଦି ଲୋକୁ ମାର୍ହାନ୍ । ଖାନ୍ ମା ନିୟମ୍ ମାନାଜି ମାର୍ହାନ୍ ମାରି ଆବେ ବାସା କିଜିମାନି ଜିହୁଦି ଲୋକୁ ଓଜେରେ ଖାନିଙ୍ଗ୍ ନାଣ୍ଡ ମାନାଜି ମାର୍ହାନ୍ ।

୧୩ ଖାନ୍ ନା ଲାକ୍ତୁ ଖାଜି ନା ଲାକ୍ତୁ ନିଲ୍ସି ଇର୍ହାନ୍, ତଡ଼ାନ୍ ସାଉଲ ନି ସୁଣି ସାକ୍ତି ପୟଆ । ଟିକ୍ ଆୟା ଖେଡ଼ାଦୁ ନାନୁ ମାରିଡେସି ସୁଣିସାକ୍ତି ପୟଜି ଖାନିଙ୍ଗ୍ ସୁଡ଼ୁଦେଙ୍ଗ୍ ଆର୍ତା ।

୧୪ ଖାନ୍ ଇର୍ହାନ୍, ମା ତକ୍ରାଦାଦାରି ମାପୁରୁ ନିଙ୍ଗ୍ ଖାନି ମାଟା ନେସ୍ତେଙ୍ଗ୍ ଇଜି, ଖାନି ଦାମ୍ବୁ ସେବକତିଙ୍ଗ୍ ସୁଡ଼ୁଦେଙ୍ଗ୍ ଇଜି ମାରି ଖାନି ମାଟା ଖେନ୍ଦ୍ରେଙ୍ଗ୍ ଇଜି ବାସେ କିତାମାନାନ୍ ।

୧୫ ଇରିଙ୍ଗ୍ ନିନ୍ନୁ ଆମାକା ସୁଡ଼ୁଦିମାନି ମାରି ଖେର୍ଇମାନି, ଆକା ଓଜେରରି ଲୋକା ଲାକ୍ତୁ ଖେର୍ତେଙ୍ଗ୍ ଇଜି ନିନ୍ନୁ ଖାନି ସାକି ଆନି ।

୧୬ ମାରି ଏଦା ଖେଡ଼ା କିଜିନି ? ନିଙ୍ଗ୍ଆ, ତୁବନ୍ ଅଆ ମାରି ଖାନିମାନୁ ପାର୍ତନା କିନି ମାଣାନ୍ ନି ପାପ୍ ଓଜୁ ନରାୟ ଆପିଡ଼ ।”

ଅଣଜିହୁଦି ଲୋକା ଲାକ୍ତୁ ପ୍ରଚାର୍ କିଦେଙ୍ଗ୍ ପାଉଲ୍ଡିଙ୍ଗ୍ କୁକ୍ତାନ୍

୧୭ “ନାନୁ ଜିରୁସାଲାମ୍ତାନ୍ ଡେସି ସଲ୍ସି ଆବେ ମନ୍ଦିରତୁ ପାର୍ତନା କିଜିମାନିଖାଲେ, ପ୍ରବୁଦି ଦର୍ସନ୍ ପୟତା ।

୧୮ ଆମାମାନୁ ନାନ୍ ପ୍ରବୁଙ୍ଗ୍ ସୁଡ଼ୁଡ଼ା, ଖାନ୍ ନାଙ୍ଗ୍ ଇର୍ହାନ୍, ବେଗି ଜିରୁସାଲାମ୍ ଡିସ୍ଆ, ଇରିଙ୍ଗ୍ ଇବେଣି ଲୋକୁ ନା ବିସୟତାନ୍ ନି ସାକି ମାନାଏର୍ ।

୧୯ ନାନ୍ତୁ ଇରଥା, ପ୍ରବୁ, ନାନ୍ତୁ ପାରତନାକିନି ଇଲକାଙ୍ଗ ସଲ୍‌ସି ନିବାନ୍ତୁ ବିସ୍‌ବାସ୍ କିଜିମାନି ଲୋକାଙ୍ଗ ଏଣ୍ଡେସ୍ ତରତାମାର୍‌ହା ମାରି ତାକ୍‌ତା ମାର୍‌ହା, ଇକା ଖାର ନେଗେନ୍ କିଜି ନେସ୍‌ନାର୍ ।

୨୦ ଶ୍ଵାମାରି ଏସ୍ତ୍ରାଘାଲେ ନି ସାକି ସ୍ତ୍ରାପାନ୍‌ତିଙ୍ଗ୍ ନେତେର୍ ସାୟାମାର୍‌ଗା ତାକ୍‌ତାର୍, ନାନ୍ତୁ ନିଜେ ଆବେ ମାର୍‌ହା; ଖାନିଙ୍ଗ୍ ଜିବନ୍‌ତୁ ତାକ୍‌ତେଙ୍ଗ୍ ଇଜିନା ରାଜିଆନିକା ଖେର୍‌ତା ମାର୍‌ହା ମାରି ଖାନିଙ୍ଗ୍ ତାକ୍‌ନିଘାରି ଆଙ୍ଗ୍ ଖିଜୁ କାପ୍‌କିତା ମାର୍‌ହା ।

୨୧ ପ୍ରବୁ ନାଙ୍ଗ୍ ଇର୍‌ହାନ୍, ସାଙ୍ଗ୍‌ଆ, ନାନ୍ତୁ ନିଙ୍ଗ୍ ନାଣ୍ଡ ଆକ ଅଣଜିହୁଦି ଲୋକା ଲାକ୍‌ତୁ ପକ୍‌ନା ।”

୨୨ ପାଉଲ ଇୟା ମାଟା ଇନି ସାନ୍ଦି ଲୋକୁ ମନ୍ ସିଜି ଝେନ୍‌ଜିମାର୍‌ହାର୍, ମାତର୍ ତାନିଝେନ୍‌କା ଖାର ନାଣ୍ଡ ଆଉଲି ଆଜି ଇର୍‌ହାର୍, “ଖାନିଙ୍ଗ୍ ଦୁନିଆଦାନ୍ ସପ୍‌ତୁ ! ଖାନିଙ୍ଗ୍ ସାୟାମାର୍‌ଗା ତାକ୍‌ତୁ ! ଖାନ୍ ଜିନିକା ଜଗ୍ ସିଲେ !”

୨୩ ଖାର ଆଉଲି ଆଜିମାର୍‌ହାର୍, ଖାତିଙ୍ଗ୍ ଇପ୍‌ସିମାର୍‌ହାର୍ ମାରି ମୁସ୍‌କୁ ଦୁଡି ପୋକ୍‌ସିମାର୍‌ହାର୍ ।

୨୪ ପାଉଲ୍‌ତିଙ୍ଗ୍ ଦୁର୍ଗ ଲୋଇ ଅନି ଉଣ୍ଡିଙ୍ଗ୍ ରୋମିୟ ସନ୍‌ସରି ନେତା ସନ୍‌ସରିଙ୍ଗ୍ ଆଦେସ୍ ସିତାନ୍ ମାରି ଜିହୁଦି ଲୋକୁ ଏନ୍ଦା ଖାନି ବିରଦ୍‌ତାନ୍ ଇୟାଘାଜା ଆଉଲି ଆଜିନାର୍, ଆକା ନେସ୍‌ତେଙ୍ଗ୍ ଇଜି ଖାନିଙ୍ଗ୍ କିରତା ତାକ୍‌ସ୍‌ତେଙ୍ଗ୍ ଆଦେସ୍ ସିତାନ୍ ।

୨୫ ମାତର୍ ଖାର ଖାନିଙ୍ଗ୍ ତରନି ଖାଲେ ପାଉଲ ଆବେ ମାନି ପାଣିକିନିକାନ୍ ଇର୍‌ହାନ୍, “ଇନି ନିନ୍ଦାଦୁ ଇୟାସାନ୍ଦି ବିଚାରିତ ଆଇ ମାନି ଅରେନ୍ ରମିୟ ଲୋକ୍‌ତିଙ୍ଗ୍ କିରତା ତାକ୍‌ନିକା ଇନିକା ରିତିନିତି ମାନାଡ୍ ?”

୨୬ ଇକା ଝେନ୍‌ଜି ପାଣିକିନିକାନ୍ ସଲ୍‌ସି ସନ୍‌ସରି ନେତେଙ୍ଗ୍ ଇର୍‌ହାନ୍, “ନିନ୍ତୁ ଇନିକା କିଜିନି ? ଇୟା ଲୋକୁ ଜେ ଅରେନ୍ ରୋମିୟ ଲୋକୁ !”

୨୭ ସନ୍‌ସରି ନେତା ପାଉଲ୍‌ତି ଲାକ୍‌ତୁ ସଲ୍‌ସି ଝେନ୍‌ବାତାନ୍, “ନିନ୍ତୁ ଇନିକା ଅରେନ୍ ରୋମିୟ ଲୋକୁ ?”

ପାଉଲ ଇର୍ହାନ୍, “ହୁଁ ।”

୨୮ ସନ୍ଧ୍ୟାରି ନେତା ଇର୍ହାନ୍, “ଗାଦି ଡାବୁକୁଁ ସିଜି ନାନୁ ଅରେନ୍ ରୋମିୟ ଲୋକୁ ଆତାମାନା ।”

ପାଉଲ ଇର୍ହାନ୍, “ମାତର୍ ନାନୁ ଜନମ୍‌ତାନ୍ ରୋମିୟ ଲୋକୁ ।”

୨୯ ଦାପ୍ରେ ଦାପ୍ରେ ଏମେ ଲୋକୁ ପାଉଲତିଙ୍ଗ୍ ଝେନ୍‌ବାଦେଙ୍ଗ୍ ସଲ୍‌ସି ମାର୍ହାର୍, ଝେନ୍‌କା ଗୁସାଜିସର୍ହାର୍ ମାରି ପାଉଲ ଅରେନ୍ ରୋମିୟ ଲୋକୁ ଆତିମାନିକା ନେସ୍‌ସି ମାରି ଝାନ୍ ଜେ ଝାନିଙ୍ଗ୍ ସିକିଣିଦୁ ତର୍‌ତେଙ୍ଗ୍ ଇଜି ଆଦେସ୍ ସିତାମାନାନ୍, ଇକା ନେସ୍‌ସି ସନ୍ଧ୍ୟାରି ନେତା ନାଣ୍ଡୁ ତିଲାତାନ୍ ।

### ପେରିସଭା ଆଗ୍ତି ପାଉଲ

୩୦ ଜିହୁଦି ଲୋକୁ ପାଉଲତି ବିରଦ୍‌ତାନ୍ ଇନି ଦାବି କିତାମାନାର୍, ଆକା ସତେନେ ନେସ୍‌ତେଙ୍ଗ୍ ସନ୍ଧ୍ୟାରି ନେତା ମାରିନାଣ୍ଡିଙ୍ଗ୍ ପାଉଲତିଙ୍ଗ୍ ଗାଟି ଝିଜୁ କୁଡ୍‌ତାନ୍ ପେରିସଭାଦି ପୁରା ମିଟିଙ୍ଗ୍ କୁକିସ୍ କିଦେଙ୍ଗ୍ ଇଜି ପେରି ଜାଜକରିଙ୍ଗ୍ ଆଦେସ୍ ସିତାନ୍ । ତାନିଝେନ୍‌କା ପାଉଲତିଙ୍ଗ୍ ଅସି ଝାରି ଆଗ୍ତି ନିଲ୍‌ପତାର୍ ।

## ୨୩

୧ ପାଉଲ ପେରିସବା ତରିନ୍ ସିଦା ସୁଡ୍‌ଜି ଇର୍ହାନ୍, “ଏ ଇସ୍ରାଏଲ୍‌ତି ତଡାନ୍‌କୁ ! ନେର୍ ସାନ୍ଦି ମାପୁରୁଦି ଆଗ୍ତି ନାନୁ ଏଣ୍ଡେସ୍ ଜିତାମାନା, ଆୟା ବିସୟ୍‌ତାନ୍ ନା ମନ୍ ପୁରା ନେଗିକା ।”

୨ ଇୟା ମାଟା ଝେନ୍‌ଜି ପେରି ଜାଜକ ହନନିୟ ପାଉଲତି ମକମି ସାପୁଡ୍‌ତାକ୍‌ତେଙ୍ଗ୍ ପାଉଲତି ଲାକ୍‌ତୁ ନିର୍‌ଇ ମାନି ଲୋକାଙ୍ଗ୍ ଆଦେସ୍ ସିତାନ୍ ।

୩ ☆ପାଉଲ ଝାନିଙ୍ଗ୍ ଇର୍ହାନ୍, “ଏ ଅଡିନି ପେଡ୍‌ଝା ଉସ୍‌ତି ଗଡା, ମାପୁରୁ ସତେନେ ନିଙ୍ଗ୍ ତାକ୍‌ନାନ୍ । ନିୟମ୍ ଇସାବ୍‌ତାନ୍ ନା ବିସାର୍ କିଦେଙ୍ଗ୍ ନିନ୍ନୁ ଆବେ ବାସ୍‌ତିମାନି, ଜଦିବା ନାଙ୍ଗ୍ ତାକ୍‌ତେଙ୍ଗ୍ ଇଜି ଆଦେସ୍ ସିଜି ନିନ୍ନୁ ନିୟମ୍ ରୁକ୍‌ସିନି ।”

୪ ପାଉଲତି ଲାକ୍ତୁମାନି ଲୋକୁ ଖାନିଙ୍ଗ୍ ଇର୍ହାର, “ନିନ୍ଦୁ ମାପୁରୁଦି ପେରି ଜାଜକତିଙ୍ଗ୍ ଅପମାନ କିଜିନି !”

୫ ପାଉଲ ଇର୍ହାନ, “ଏ ଇସ୍ରାଏଲ୍ ତଡାନକୁ, ଖାନ ନେତାର୍‌ରି ପେରି ଜାଜକ ଇଜି ନାନୁ ନେସେଏ ମାର୍ହା । ଦାମ୍ବୁସାସ୍ତ୍ରୁ ରାସାତାମାନାଡ୍, ମିର୍ ନିଜେଦି ଲୋକା ସାସନ୍‌କିନିଖାନିଙ୍ଗ୍ ତାର୍‌ଲ ମାଟା ଇନ୍‌ମା ।”

୬ ଖିହୁଦି ଦଲ୍‌ତୁ ଏସ ପାରୁସିର୍ ନି ମାରି ଏସ ସାଦୁକିର୍ ମାନିକା ସୁଡ଼ଜି ପାଉଲ ପେରିସଭାଦିଙ୍ଗ୍ କୁକ୍‌ସି ଇର୍ହାନ, “ଏ ଇସ୍ରାଏଲ୍‌ତି ତଡାନକୁ, ନାନୁ ଅରେନ୍ ପାରୁସି, ପାରୁସି କୁଟ୍‌ମତୁ ନା ଜନମ୍ । ସାତି ଖାରି ମାରିଡେସି ନିଙ୍ଗ୍ ନିମାନୁ ନାନୁ ଆସା କିନି ଉଣ୍ଡିଙ୍ଗ୍ ଇବେ ନା ବିସାର୍ କିଜିନାର ।”

୭ ଖାରି ଲୋଇ ଦଲ୍ ଏରପିସିସାନିକା ମାରି ଖାନ ଟିକ୍ ଇୟା ମାଟା ଇନି ସାଜେ ସାଜେ ପାରୁସି ନି ସାଦୁକିରି ଲୋଇ ଆଉଲି ଆରାମ୍ ଆତାଡ୍ ।

୮ ଇରିଙ୍ଗ୍ ସାଦୁକିରି ଇସାବ୍‌ତାନ୍ ସାତି ଲୋକା ମାରିଡେସିନିଙ୍ଗ୍ ସିଲେଡ୍, ମୁସ୍‌କୁପୁରତି ଦୁଡ୍ ମାରି ଆମ୍‌ଜିଙ୍ଗ୍ ପେଡେନ୍ ସିଲେଡ୍; ମାତର୍ ପାରୁସିର୍ ଇୟା ମୁଣ୍ଡି ବିସୟ୍‌ତାନ୍ ବିସ୍‌ବାସ୍ କିନାର ।

୯ ଖାରି ଆଉଲି ନାଣ୍ଡ ଆଦେଙ୍ଗ୍ ଆସ୍‌ତାଡ୍ ମାରି ପାରୁସିର୍ ଦଲ୍‌ତି ଏସ ଦାମ୍‌ଗୁରୁର୍ ନିଲ୍‌ସି ଟାଟ୍‌ତାନ୍ ଇର୍ହାର, “ମାପ୍ ଝେନିମାନୁ ଇନି ଦସ୍ ପେଏଜିନାପ୍ ! ସଡେନେ ଖାନି ଖାଲେ ଅରେନ୍ ଆମ୍ବା ବା ମୁସ୍‌କୁପୁରତି ଦୁଡ୍ ମାଟା ଇନାମାନାନ୍ ।”

୧୦ ଆସ୍‌ସିସାନିକା ନିସା ପେରିକା ଆତାଡ୍‌ଜେ, ଲୋକୁ ପାଉଲତିଙ୍ଗ୍ କୟ୍‌ଜି ମକା ମକା କିନାର ଇଜି ସନ୍‌ୟରି ନେତା ତିଲାତାନ୍ । ଆଦେଙ୍ଗ୍ ଖାନ ଜାଟିକିନିଖାରି ଲୋଇରାନ୍ ପାଉଲତିଙ୍ଗ୍ ରିକିୟା କିଜି ଖାନିଙ୍ଗ୍ ଦୁର୍ଗ ଲୋଇ ଅଡେଙ୍ଗ୍ ଇଜି ସନ୍‌ୟରିଙ୍ଗ୍ ଆଦେସ୍ ସିତାନ୍ ।

୧୧ ଆୟା ନାଡ଼ା ପ୍ରବୁ ପାଉଲତି ଲାକ୍ତୁ ନିଲ୍ସି ଇର୍ହାନ, “ସାସ୍ ଆସ୍ଆ ! ନିନ୍ନୁ ଇବେ ଜିରୁସାଲାମ୍ତୁ ନା ଉଣ୍ଡିଙ୍ଗ୍ ୍ସାକି ସିତିମାନି । ରୋମ୍ତୁ ବା ନିନ୍ନୁ ସତେନେ ଆୟାଞ୍ଜା ସାକି ସିନି ।”

ପାଉଲତିଙ୍ଗ୍ ୍ସାୟାମାର୍ଗାତାକ୍ତେଙ୍ଗ୍ ୍ଝିଜି ଉପାୟ

୧୨ ମାରିନାଣ୍ଡିଙ୍ଗ୍ ୍ସାଲ୍ଲଦି ଏସ୍ ଜିହୁଦି ଲୋକୁ ଉଣ୍ଡାଜି ଉନ୍ତ୍ରୁ ଉପାୟ କିତାର୍ । ପାଉଲତିଙ୍ଗ୍ ୍ସାୟାମାର୍ଗା ତାକ୍‌ଇ ସାୟି ଝାର୍ ଉଣ୍ଡୁଏପ୍ ଇଜି ପାର୍‌ମାଣ୍ କିତାର୍ ।

୧୩ ଚାଲିସ୍‌ଲୋକ୍‌ତାନ୍ ନାଣ୍ଡ ଲୋକୁ ଇୟା ଉପାୟକିତାର୍ ।

୧୪ ଝାର୍ ସଲ୍‌ସି ପେରି ଜାଜକ ନି ଜିହୁଦି ନେତାର୍‌ରିଙ୍ଗ୍ ଇର୍ହାର୍, “ପାଉଲତିଙ୍ଗ୍ ୍ସାୟାମାର୍ଗା ତାକ୍‌ଇ ସାୟି ଇନିକା ବା ଉଣ୍ଡୁଏପ୍ ଇଜି ମାପ୍ ଉନ୍ତ୍ରୁ ତାଟ୍‌ତାନ୍ ପାର୍‌ମାଣ୍ କିତାମାନାପ୍ ।

୧୫ ଆଦେଙ୍ଗ୍ ୍ଝାନି ବିସୟ୍‌ତାନ୍ ନାଣ୍ଡ ସତ୍ ମାଟା ନେସ୍‌ନି ସାଲାକି ତରସି ପେରିସଭା ଆଗ୍‌ତି ନି ମି ଲାକ୍‌ତୁ ପାଉଲତିଙ୍ଗ୍ ୍ମାରି ଉନ୍ତ୍ରୁ ଦେବା ତାତେଙ୍ଗ୍ ୍ଝିଜି ରୋମିୟ୍ ସନ୍‌ସରି ନେତେଙ୍ଗ୍ ୍ସାତିଙ୍ଗ୍ ୍ମାଲ୍ଲଦୁ । ମାତର୍ ଝାନ୍ ଇବେ ଝାନି ଆଗ୍‌ତି ସାରିଦୁ ମାପ୍ ଝାନିଙ୍ଗ୍ ୍ସାୟାମାର୍ଗାତାକ୍‌ତେଙ୍ଗ୍ ୍ଝିଜି ତିଆର୍ ଆନାମାନାପ୍ ।”

୧୬ ମାତର୍ ପାଉଲତି ବାଣେଜେଙ୍ଗ୍ ଇୟା ଉପାୟ ମାଟା ଝେନ୍‌ଜି, ଦୁର୍ଗ ଲୋଇ ସଲ୍‌ସି ପାଉଲତିଙ୍ଗ୍ ୍ଝିକା ଝେର୍‌ତାନ୍ ।

୧୭ ପାଉଲ ରୋମିୟ୍ ପାଣିକିନିଞ୍ଜାରି ଲୋଇ ଅରେନ୍‌ଝାନିଙ୍ଗ୍ ୍କୁକିସି ଇର୍ହାନ, “ଇୟା ମୁରୁଲିଙ୍ଗ୍ ୍ସନ୍‌ସରି ନେତା ଲାକ୍‌ତୁ ଅଆ, ଝାନ୍ ଝାନିଙ୍ଗ୍ ୍ଏସ୍ ଇନିକା ମାଟା ମାନାଡ୍ ।”

୧୮ ପାଣିକିନିକାନ୍ ଝାନିଙ୍ଗ୍ ୍ସନ୍‌ସରି ନେତା ଲାକ୍‌ତୁ ଅସି ଇର୍ହାନ, “ତରାତିମାନି ପାଉଲ ନାଙ୍ଗ୍ ୍କୁକିସି ଇୟା ମୁରୁଲିଙ୍ଗ୍ ୍ନି ଲାକ୍‌ତୁ ତାତେଙ୍ଗ୍ ୍ଝିଜି । ନିଙ୍ଗ୍ ୍ଝାନ୍ ଏସ୍ ଇନି ମାଟା ମାନାଡ୍ ।”

୧୯ ସନ୍‌ସରି ନେତା ଝାନି କିୟୁ ଆସ୍‌ସି ନିଜେ ଅତାଡ୍ ମାରି ଝେନ୍‌ବାତାନ୍, “ନାଙ୍ଗ୍ ୍ଝିଜି ଇନିକା ଝେର୍‌ନିକା ମାନାଡ୍, ଇନ୍‌ଆଁ !”

୨୦ ମୁରୁଲିକତ ଇର୍ହାନ, “ଜିହୁଦି ଅଦିକାରିର୍ ଉପାୟ କିତାମାନାର୍ ଜେ, ପେରିସଭା ପାଉଲତି ବିସୟ୍‌ତାନ୍ ନାଣ୍ଡ ସତ୍ ମାଟା

ନେସ୍ତେଙ୍ଗ୍ ବଦା କିତାମାନାରୁ ଇଜି ସାଲାକିଜି ଖାନିଙ୍ଗ୍ ପେରିସଭାଦୁ ଅତେଙ୍ଗ୍ ଇଜି ନିଙ୍ଗ୍ ବାତିଙ୍ଗ୍ ମାଲ୍ନାର ।

୨୧ ମାତର୍ ଖାରି ମାଟା ଖେନ୍ମା; ଇରିଙ୍ଗ୍ ସାଲିସ୍ତାନ୍ ନାଣ୍ଟ ଲୋକୁ ଖାନିଙ୍ଗ୍ ସାୟାମାରଗା ତାକ୍‌ଇ ସାନ୍ତି ଉଣ୍ଟୁଏର୍ ଇଜି ପାର୍ମାଣ୍ ଅସି କାପ୍‌କିତାମାନାର । ଇଲେଇ ଖାର ନି ମାଟାଦିଙ୍ଗ୍ କାପ୍‌କିଜି ଜାଗାର୍‌ତା ମାନାର ।”

୨୨ “ନିନ୍ନୁ ନାଙ୍ଗ୍ ଇକା ଖେର୍‌ତିମାନି ଇଜି ଏଙ୍ଗ୍ ଇନ୍ମା ।” ସନ୍‌ସରି ନେତା ଇକା ଖେର୍‌ସି ମୁରୁଲିଙ୍ଗ୍ ପିକ୍‌ତାନ୍ ।

### ପାଉଲତିଙ୍ଗ୍ କାଇସରିଆଦୁ ପୋକ୍‌ତାର୍

୨୩ ସନ୍‌ସରି ନେତା ଖାନି ଆଡ୍‌ଗିମାନି ରିଏରି ପାଣିକିନିଝାରିଙ୍ଗ୍ କୁକିସକିଜି ଇର୍ହାନ୍, “ନେରୁ ନାଡ଼ା ନଅଟା ବେଡ଼ାଦୁ କାଇସରିଆଦୁ ସନ୍‌ଡ୍ରେଙ୍ଗ୍ ଇଜି ସତୁରି ଲୋକୁ ଗଡ଼ାସାଲାକିନିଝାରିଙ୍ଗ୍ ମାରି ଦୁଇସ ଇଟା ଆସ୍‌ନିଝାରିଝାଲେ ଦୁଇସ ବୁଲାନି ସନ୍‌ସରିଙ୍ଗ୍ ତିଆର୍ କିଦୁ ।

୨୪ ପାଉଲତି ସନ୍ତି ଉଣ୍ଟିଙ୍ଗ୍ ଏସ ଗଡ୍‌ଡେଙ୍ଗ୍ ସିଦୁ ମାରି ନେଗେନ୍‌ତାନ୍ ଖାନିଙ୍ଗ୍ ସାସନକିନି ପେଲିକସ୍‌ତି ଲାକ୍‌ତୁ ଅତୁ ।”

୨୫ ସନ୍‌ସରି ନେତା ଇୟାଝାଜା ଆକୁ ରାସ୍‌ତାନ୍ :

୨୬ “ସନ୍‌ମାନ୍‌ତି ସାସନକିନି ପେଲିକସ୍‌ତିଙ୍ଗ୍ କ୍ଳତିଅସ୍ ଲୁସିୟାଦି ନମ୍‌ସ୍ତାର୍ ଆପିଡ୍ ।

୨୭ ଜିହୁଦି ଲୋକୁ ଇୟା ଲୋକ୍‌ତିଙ୍ଗ୍ ଆସ୍‌ସି ଖାନିଙ୍ଗ୍ ସାୟାମାରାଗ୍ ତାକ୍‌ଡେଙ୍ଗ୍ ତିଆର୍ ମାର୍ହାର୍ । ଖାନ୍ ଅରେନ୍‌ ରୋମିୟ ଲୋକୁ ଇଜି ନେସ୍‌ତାର୍‌ଆକା ନାନ୍ନୁ ନା ସନ୍‌ସରି ମାଣାନ୍ ଖାନିଙ୍ଗ୍ ରିକିୟା କିତା ।

୨୮ ଖାରି ବିରଦ୍‌ତାନ୍ ଖାନ୍ ଇଜି ଦସ୍ କିତାମାର୍ହାନ୍, ନେସ୍‌ଡେଙ୍ଗ୍ ଇଜି ନାନ୍ନୁ ଖାନିଙ୍ଗ୍ ଖାରି ପେରିସଭାଦୁ ଅତା ।

୨୯ ମାତର୍ ଖାନ୍ ସାନିଦଣ୍ଟ ବା ଜଇଲ୍ ଦଣ୍ଟ ପୟ୍‌ନି ଝାଜା ଇଜି ପାଣି କିଏନ୍ ଇଜି ନାନ୍ନୁ ନେସ୍‌ଡେଙ୍ଗ୍ ଆର୍‌ତା । ଖାନି ବିରଦ୍‌ତାନ୍ ଆତିମାନି ଦାବିଝିଜୁ ଖାରି ଦର୍ମଦି ବିସୟ୍‌ତି ନିୟ୍‌ମ୍ ।

୩୦ ମାରି ୱାନି ବିରଦ୍‌ତାନ୍ ଉନ୍‌ଡ୍ରୁ ଉପାୟ ଆତାମାନାନ୍ ଇଜି କାବୁର୍ ପୟଜି ଦାପ୍ରେ ଦାପ୍ରେ ୱାନିଙ୍ଗ୍ ନି ଲାକ୍‌ତୁ ପୋକ୍‌ତେଙ୍ଗ୍ ଅଡ୍‌ବିତା । ୱାନି ବିରଦ୍‌ତାନ୍ ମାନି ଦାବିଞ୍ଜୁ ନି ଲାକ୍‌ତୁ ୱେର୍‌ତେଙ୍ଗ୍ ଇଜି ନାନ୍ ୱାନି ଦାବିକିନିଞ୍ଜାରିଙ୍ଗ୍ ଇର୍‌ହାମାନା ।”

୩୧ ସନ୍‌ୟର୍ ଆୟା ଆଦେସ୍ ଇସାବ୍‌ତାନ୍ ପାଉଲତିଙ୍ଗ୍ ଆୟା ନାଡା ଆକ୍ତିପାତ୍ରିଦୁ ଇପ୍‌ତାର୍ ।

୩୨ ମାରିନାଣ୍ଡିଙ୍ଗ୍ ବୁଲାନି ସନ୍‌ୟର୍ ଦୁର୍ଗଦୁ ଡେସି ସର୍‌ହାର୍

୩୩ ମାରି ଗଡେଙ୍ଗ୍ ଝାଲକିନି ସନ୍‌ୟର୍ ପାଉଲତିଙ୍ଗ୍ ଅସି କାଈସରିଆଦୁ ଇତାର୍ । ଆବେ ସନ୍‌ୟରି ନେତା ଆକୁଦିଞ୍ଜାଲେ ପାଉଲତିଙ୍ଗ୍ ଝାସନ୍‌କିନିମାନ୍ ସର୍‌ପେ କିତାନ୍ ।

୩୪ ସାସନ୍‌କିନି ମନ୍ତ୍ରୀ ଆକୁ ପଡାଜି ପାଉଲତିଙ୍ଗ୍ ଆମା ଦେସ୍‌ତାନ୍ ୱାତିମାନି ଇଜି ୱେନ୍‌ବାତାନ୍ । ପାଉଲ ସିଲିସିଆଦିକାଙ୍ଗ୍ ଇଜି ନେସ୍‌ସି,

୩୫ ୱାନ୍ ଇର୍‌ହାନ୍, “ନି ଦାବିକିନିକାର୍ ଇତି ୱେନ୍‌କା ନାନ୍ ନି ମାଟା ୱେନା ।” ୱେନ୍‌କା ପାଉଲତିଙ୍ଗ୍ ହେରୋଦତି ମେଡ୍‌ଜୁଲୁଡୁ ତର୍‌ସି ଇଡ୍‌ଦେଙ୍ଗ୍ ଇଜି ଆଦେସ୍ ସିତାନ୍ ।

## ୨୪

### ପାଉଲତି ଜିହୁଦିରି ମାଣ୍ଡୁକୁ ଦସି ଆତାନ୍

୧ ପାସ୍ ଦିନ୍ ୱେନ୍‌କା ପେରି ଜାଜକ ହନନିୟ୍ ଏସ ଜିହୁଦି ନେତାର୍ ନି ତର୍‌ଜୁଲସ୍ ଦର୍‌ତି ଅରେନ୍ ଅକିଲତି ୱାଲେ କାଈସରିଆଦୁ ସର୍‌ହାନ୍ । ୱାର୍ ପେଲିକ୍‌ସ୍‌ତି ଆଗ୍‌ଡି ୱାଜି ପାଉଲତି ବିରଦ୍‌ତାନ୍ ୱାରି ଦାବି ୱେର୍‌ତାନ୍ ।

୨ ୱେନ୍‌କା ପାଉଲତିଙ୍ଗ୍ ଆବେ ତାତାର୍ ମାରି ତର୍‌ଜୁଲସ୍ ଇୟାଞ୍ଜା ଲୋକା ଦାବିଞ୍ଜୁ ୱେର୍‌ତାନ୍ : “ମି ବୁଦିଦି ସାରି ତର୍‌ନି ମାଣାନ୍ ମାପ୍ ନାଣ୍ଡ ଦିନ୍ ଆସ୍‌ସି ସାକ୍ତିଦାନ୍ ତେବାଜିନାପ୍ ମାରି ମା ଦେସ୍‌ତି ନେଗି ଉଣ୍ଡିଙ୍ଗ୍ ଗାଦି ନିୟ୍‌ମ୍‌ତି ପାଣି କିଆୟ୍‌ଆତାମାନାନ୍ ।

୩ ଓଜୁ ପେଲିକସ୍ ବାଡ଼ିବୁ ନି ଓଜୁ ଖେଡ଼ାବୁ ମାପ୍ ତେନିଙ୍ଗ୍ କୁକ୍ସିନାପ୍, ମାପ୍ ନି ଲାକ୍ତୁ ନାଣ୍ଟ ଇସାବ୍ତାନ୍ ଦନ୍ୟବାଦ୍ ସିଜିନାପ୍ ।

୪ ଖାନ୍ ଏଣ୍ଟେସ୍ ଆପିନ୍, ନାନୁ ମି ନାଣ୍ଟ ସମୟ ଅତେଙ୍ଗ୍ ବଦାକିଏ, ଆଦେଙ୍ଗ୍ ନିନ୍ନୁ ଦୟା କିଜି ମା ଏସ ମାଟା ଖେନ୍ତେଙ୍ଗ୍ ଇଜି ନାନ୍ ମାଡ଼ିସ୍ କିଜିନା ।

୫ ଇୟା ଲୋକୁ ବୟଙ୍କର୍ ଜାଟିକିନିକାନ୍ ଇଜି ମାପ୍ ନେସ୍ତନାପ୍; ଖାନ୍ ଦୁନିଆଦି ଓଜୁତରିନ୍ ବୁଲାଜି ଜିହୁଦିଲୋକାଙ୍ଗ୍ ସାନ୍ତି ରୁକ୍ତେଙ୍ଗ୍ ଏଗ୍ରିସ୍ କିଜିନାନ୍ । ଖାନ୍ ନାଜରିୟତିୟ ଦଲତା ନେତା ।

୬ ଖାନ୍ ମା ମନ୍ଦିରତିଙ୍ଗ୍ ଅପବିତ୍ର କିଦେଙ୍ଗ୍ ସେସ୍ତା କିନିଖାଲେ ମାପ୍ ଖାନିଙ୍ଗ୍ ଆସ୍ତାପ୍ ।

୭ ମାତର୍ ସହେ ଲୋକା ମୁସ୍କୁ ମାନି ନେତା ଲୁସିୟା ଖାଜି ତାବ୍ତାନ୍ ଖେନିଙ୍ଗ୍ ମା କିୟୁଦାନ୍ ଡିବିସ୍ତାଅତାନ୍ ।

୮ ମାପ୍ ଖେନି ବିରଦ୍ତାନ୍ ଏମେ ଓଜୁ ଦାବି କିଜିନାପ୍, ଆକା ନିନ୍ନୁ ନିଜେ ଇୟା ଲୋକ୍ତିଙ୍ଗ୍ ଖେନ୍ଦାଜି ନେସ୍ତେଙ୍ଗ୍ ଆଟ୍ଟିନି ।”

୯ ଇବେମାନି ଜିହୁଦି ଲୋକୁ ବା ଇୟା ଦାବି ସଡ଼ ଇଜି ଆବ୍‌ଖାଦାନ୍ ରାଜିଆନିକା ଜାଣେକିତାନ୍ ।

### ପେଲିକସ୍ତି ଆଗ୍ତି ପାଉଲତି ନିଜେଦି ତରିଟାନ୍ ଖେର୍ନିକା

୧୦ ତାନିଖେନ୍କା ଆୟା ଦେସ୍ତି ମନ୍ତ୍ରୀ ପାଉଲତିଙ୍ଗ୍ ମାଟା ଇନ୍ତେଙ୍ଗ୍ ଇଜି ସାରିସିତାନ୍ ଆକା ପାଉଲ ଇର୍ହାନ୍, “ନାନୁ ନେସ୍ତନା ଜେ ନାଣ୍ଟ ବାର୍‌ସେକ୍ ଆସ୍‌ସି ନିନ୍ନୁ ଇୟା ଲୋକା ବିସାର୍ କିନିକିନ୍ଦା ଆତିମାନି, ଆଦେଙ୍ଗ୍ ନି ଆଗ୍ତି ନିଜେଦି ବିସୟ୍ ଖେର୍ତେଙ୍ଗ୍ ନା ତରିଟାନ୍ ଖେଡ଼ିକାଦି ମାଟା ।

୧୧ ନିନ୍ନୁ ନିଜେ ପୟ୍‌ଜି ନେସ୍ତେଙ୍ଗ୍ ଆଟ୍ଟିନି ଜେ, ଆନାଟ୍ ବାର୍ ଦିନ୍ ଆଗ୍ତି ନାନୁ ଜିରୁସାଲାମ୍‌ତୁ ପାର୍‌ତନା କିଦେଙ୍ଗ୍ ସିର୍ହାମାର୍ହା ।

୧୨ ମନ୍ଦିରତୁ ଏଖାଲେ ନା ଆସ୍‌ସିସାନିକା କିଜିମାନିକା ଜିହୁଦିଲୋକୁ ସୁଡ଼୍‌ସୁର୍ ମାର୍ହାର୍ ବା ପାର୍‌ତନାକିନି ଇଲ୍‌କାଙ୍ଗ୍ ଆପିତ୍ ଗାଡ଼ି ଆଇ ଇନି ବାଡ଼ିବୁ ନାଙ୍ଗ୍ ଲୋକାଙ୍ଗ୍ ଏଗ୍ରିସ୍‌କିନିକା ସୁଡ଼୍‌ସୁର୍ ମାର୍ହାର୍ ।

୧୩ ଆଦେଙ୍ଗ୍ ନା ବିରଦ୍‌ତାନ୍ ଇଲେଇ ତାତିମାନି ଦାବିଞ୍ଜୁକା ଉଣ୍ଡିଙ୍ଗ୍ ଝାର ସତ୍ ମାଟା ସିଦେଙ୍ଗ୍ ଆଟ୍‌ଏର୍ ।

୧୪ ନାନୁ ନି ଲାକ୍‌ତୁ ମାନାଜିନା ଜେ, ଏମେ ସାରିଦିଙ୍ଗ୍ ଝାର ମିର୍ ଇଜି ଇଜିନାର୍, ଆୟା ସାରିଦିଙ୍ଗ୍ ବୁଲାଜି ନାନୁ ମା ପୁର୍ବେଦିତକରାଦାଦାରି ମାପୁରୁଙ୍ଗ୍ ସେବା କିଜିନା । ମାତର୍ ନାନୁ ବା ମସାଦି ନିୟମ୍ ନି ବାବବାଦିରି ବଇଦୁ ରାସାତି ଞ୍ଜୁ ମାଟା ବିସ୍‌ବାସ୍ କିନା ।

୧୫ ଇୟାଞ୍ଜାରି ଞ୍ଜାଜା ମାପୁରୁଦିମାନୁ ନା ଆୟା ଉନ୍‌ତ୍ରି ଆସା ମାନାଡ୍ ଜେ, ଦାର୍ମୁ ନି ଅଦାର୍ମୁ ଲୋକୁ ଞ୍ଜେରେ ସାତି ମାଣାନ୍ ମାରିଡେସି ନିଙ୍ଗ୍ ନାର୍ ।

୧୬ ଆଦେଙ୍ଗ୍ ମାପୁରୁ ନି ଲୋକା ଆଗ୍ତି ନେଗି ବୁଦି ବ୍ୟବହାର୍ କିଦେଙ୍ଗ୍ ଇଜି ନାନୁ ଞ୍ଜୁଦିନ୍ ବଦା କିଜିନା ।

୧୭ ☆“ନାଶ୍ଟ ବାର୍‌ସେକ୍ ଆସ୍‌ସି ଜିରୁସାଲାମ୍‌ତାନ୍ ଆକ ତେବାତି ଝେନ୍‌କା, ନା ନିଜେଦି ଲୋକା ଉଣ୍ଡିଙ୍ଗ୍ ଏସ୍ ତାବୁଙ୍ଗ୍ ଅଡେଙ୍ଗ୍ ନି ପୁଜା ସିଦେଙ୍ଗ୍ ଇଜି ନାନୁ ଆବେ ସର୍ହାମାର୍ହା ।

୧୮ ନାନୁ ନେଗେନ୍‌କିନି ବିଦି ଞ୍ଜିସ୍‌ସି ମାର୍‌ଇ ବେଡ଼ାଦୁ ଝାର ନାଙ୍ଗ୍ ମନ୍‌ିର୍‌ତୁ ସୁଡ଼ତୁର୍ । ନାସ୍ତିଞ୍ଜାଲେ ନା ଲାକ୍‌ତୁ ଲୋକ୍‌ଉଣ୍ଡାତିକା ସିଲେତାଡ୍ କି ଅସାନ୍ତି ଆଏଡ଼ମାର୍ହାଡ୍ ।

୧୯ ମାତର୍ ଆସିଆ ଦେସ୍‌ତି ଏସ୍ ଜିହୁଦି ଲୋକୁ ଆବେ ମାର୍ହାର୍; ଜଦି ଞ୍ଜାରି ନା ବିରୁଦ୍‌ତାନ୍ ମାଟା ଇନିକା ମାନାଡ୍, ଝାର ନିଜେ ନି ଆଗ୍ତି ଞ୍ଜାଜି ଦାବି କିଦେଙ୍ଗ୍ ଆଟ୍‌ତାର୍‌ମାନ୍ ।

୨୦ ମାରି, ନାନୁ ଏସ୍ତିଞ୍ଜାଲେ ପେରିସଭା ଆଗ୍ତି ନିରୁଆ ମାର୍‌ହା, ନାନୁ ଏମେ ତାଗ୍‌ଇମାଟା ପାଣିଦୁ ଦସି ଇଜି ଝେଙ୍ଗ୍‌ତା, ଆକା ଇବେମାନି ଇୟା ଲୋକୁ ଇନିର୍ ।

୨୧ ☆ଜଦିବା ନାନୁ ଉନ୍‌ତ୍ରି ମାଟା କିତାମାର୍‌ହା : ଞ୍ଜାରି ଆଗ୍ତି ନିରୁଇ ମାର୍‌ଇଞ୍ଜାଲେ ନାନୁ ତାଟ୍‌ତାନ୍ ଇର୍‌ଆମାର୍‌ହା, ସାତିକାର୍ ମାରିଡେସି ଜିନାର୍ ଇଜି ନାନୁ ବିସ୍‌ବାସ୍ କିଜିମାନିଙ୍ଗ୍ ନେରୁ ମିବାଣକୁ ବିସାର୍ ଆଜିନା ।”

୨୨ ପେଲିକସ୍ ନେଗି ସାରିଦି ବିସୟତାନ୍ ନେଗେନ୍ କିଜି ନେସ୍ତିମାନିଙ୍ ଝେନିସକିନିକା ତେବା କିଜି ଇର୍ହାନ୍, “ସନ୍ଧ୍ୟାରି ନେତା ଲୁସିୟା ଖାତି ଝେନକା ନାନୁ ନି କେସ୍ ପୁରା କିନା ।”

୨୩ ପାଉଲତିଙ୍ ଝାନ୍ ତରସୋ ଇଡ୍‌ଦେଙ୍ ଝାନ୍ ସନ୍ଧ୍ୟାରିଙ୍ ଆଦେସ୍ ସିତାନ୍, ମାତର୍ ଖାନି ଉଣ୍ଡିଙ୍ କାପକିନା ଡିସ୍‌ସି ଖାନି ଜାତୁନ୍ କିଦେଙ୍ ଇଜି ଖାନି ତଡ୍‌କାଙ୍ ସାରି ସିଦେଙ୍ ଝାନ୍ ଆଦେସ୍ ସିତାନ୍ ।

### ପେଲିକସ୍ ନି ଦୁସିଲାଦି ଆଗ୍ତି ପାଉଲ

୨୪ ଏସ୍ ଦିନ୍ ଝେନକା ପେଲିକସ୍ ଖାନି ଜିହୁଦି ଆଇମା ଦୁସିଲାଦି ଖାଲେ ଖାତାନ୍, ଝାନ୍ ପାଉଲତିଙ୍ କୁକିସ୍ କିଜି ଜିସୁ କ୍ରିସ୍ତମାନୁ ବିସ୍‌ବାସ୍ କିନି ବିସୟତାନ୍ ଖାନି ମାଟା ଝେରୁଆନ୍ ।

୨୫ ମାତର୍ ଏସ୍ତିଖାଲେ ପାଉଲ ଦାମ୍‌ଦିକା, ନିଜେଦିଙ୍ ନେଗେନକିଜି ଇଡ୍‌ନିକା ମାରି ଖାନି ବିସାର୍ ଦିନ୍ ମାଟା ଖାରୁଗିତାର୍, ପେଲିକସ୍ ତିଲାଜି ଇର୍ହାନ୍, ନିନ୍ ଇଲେଇ ସନ୍‌ଡ୍‌ଡେଙ୍ ଆବ୍‌ନି । ସୁଜୋଗ ପୟ୍‌ତିଙ୍, “ମାରି ଅର୍‌ସୁ ନିଙ୍ କୁକିସ୍‌କିନା ।”

୨୬ ଆୟା ସମୟ୍‌ତୁ ପାଉଲ ଖାନିଙ୍ ଏସ୍ ତାରୁଙ୍ ସିନି ଇଜି ଝାନ୍ ଆସା କିତାମାହାନ୍, ଆଦେଙ୍ ଝାନ୍ ଅର୍‌ସୁଦିଙ୍ ଅର୍‌ସୁ ଖାନିଙ୍ କୁକିସ୍‌କିଜି ଖାନି ଖାଲେ ଖାରୁଗିଦେଙ୍ ଆସ୍‌ତାନ୍ ।

୨୭ ଇୟାଖାଜା ରୁଣ୍ଡି ବାର୍‌ସେକ୍ ତେବାତି ଝେନକା ପୋକ୍‌ୟସ୍ ଫେଷ୍ଟସ୍ ପେଲିକସ୍‌ତି ବାଡିଦୁ ସାସନକିନିକାନ୍ ଖାଜା ବାସେ ଆତାନ୍ । ପେଲିକସ୍ ଜିହୁଦିଲୋକା ଝେଡିକା ପୟ୍‌ନି ଉଣ୍ଡିଙ୍ ଲାଲାୟ୍ ମାନିଙ୍ ପାଉଲତିଙ୍ ଡିସ୍‌ଏଣ୍ଡା ଜଇଲ୍‌ତୁ ଡିସ୍‌ତା ସର୍ହାନ୍ ।

## ୨୫

### ସମ୍ରାଟ୍‌ତି ଲାକ୍‌ତୁ ପାଉଲ୍‌ତି ଦାବି

୧ ପେସ୍‌ସ୍ ଇୟା ରାଜିଦୁ ଇନି ମୁନେଟି ଝେନକା କାଇସରିଆଦାନ୍ ଜିରୁସାଲାମ୍‌ତୁ ସର୍ହାନ୍ ।

୨ ଆବେଟାନ୍ ପେରିଜାଜକ୍ ନି ଜିହୁଦି ନେତାର୍ ମାରିଡେସି ପାଉଲ୍‌ତି ବିରଦ୍‌ତାନ୍ ଦାବି କିତାର୍ ।

୩ ପାଉଲ୍‌ତିଙ୍ଗ୍ ଜିରୁସାଲୀମ୍‌ତୁ ତାସି ଖାରିଙ୍ଗ୍ ଖେଡ଼ିକାକିବିସ୍ କିଦେଙ୍ଗ୍ ଇଜି ଖାର୍ ପେସ୍‌ସ୍‌ତିଙ୍ଗ୍ ଫାଡ଼ିସ୍ କିତାର୍, ଇରିଙ୍ଗ୍ ଖାର୍ ପାଉଲ୍‌ତିଙ୍ଗ୍ ସାରିଦୁ ତାକ୍‌ତେଙ୍ଗ୍ ଇଜି ଉପାୟ୍ ତିଆର୍ କିତାମାର୍‌ହାର୍ ।

୪ ପେସ୍‌ସ୍ ଇର୍ହାନ୍, “ପାଉଲ୍‌ତିଙ୍ଗ୍ ଉନ୍‌ଡ୍ରୁ ତରାୟ୍‌ଆତି ଖାଜା କାଈସରିଆଦୁ ଇଟାୟ୍‌ଆତାମାନାନ୍ ମାରି ବେଗି ନାନ୍ ନିଜେ ଆବେ ଡେସି ସନା ।

୫ ଜଦି ଖାନ୍ ଇନ୍ ଦସ୍ କିତାମାନାନ୍, ଆର୍‌ତିଙ୍ଗ୍ ମି ନେତାର୍ ନା ଖାଲେ କାଈସରିଆଦୁ ସଲିର୍ ମାରି ତାନି ବିରଦ୍‌ତାନ୍ ଖାରି ଦାବି ଖେରୁଡୁ ।”

୬ ପେସ୍‌ସ୍ ଖାରି ଖାଲେ ଆର୍ ଦସ୍ ଦିନ୍‌ତାନ୍ ନାଶ୍ ତେବାଜି କାଈସରିଆଦୁ ଡେସି ଖାତାନ୍ । ମାର୍‌ନାଶ୍‌ତିଙ୍ଗ୍ ଖାନ୍ ବିଚାର୍‌କିନିମାନ୍ ବାସ୍‌ସି ପାଉଲ୍‌ତିଙ୍ଗ୍ ତାକ୍‌ତେଙ୍ଗ୍ ଇଜି ଆଦେସ୍ ସିତାନ୍ ।

୭ ପାଉଲ୍ ଖାତିଦାପ୍ରେ ଜିରୁସାଲୀମ୍‌ତି ଜିହୁଦିଲୋକୁ ଖାନି ସାରିବେଡ଼ି କେର୍‌ବ୍‌ଜି ନିର୍ହାର୍ ମାରି ଖାନି ବିରଦ୍‌ତାନ୍ ନାଶ୍ ଗୁରୁଦ୍‌ଦାନ୍ ଦାବି କିତାର୍ । ମାତର୍ ଖାର୍ ଇୟାଞ୍ଜିଲ୍ ପାର୍‌ମାଣ୍‌ତିଙ୍ଗ୍ ସାସ୍ କିଏତାର୍ ।

୮ ଇରିଙ୍ଗ୍ ପାଉଲ୍ ନିଜେଦି ମୋନ୍‌ତିଙ୍ଗ୍ ସିଜି ଇର୍ହାନ୍, “ଜିହୁଦିରି ନିୟ୍‌ମ୍ ବିରୁଦ୍‌ତାନ୍ ସିଲେ କି ମନ୍ଦିର୍ ବିରୁଦ୍‌ଦାନ୍ ସିଲେ କି ରୋମିୟ୍ ସମ୍ରାଟ୍, ଏ ବିରୁଦ୍‌ତାନ୍ ନାନ୍ ଇନିକା ଦସ୍ କିଏ ।”

୯ ମାତର୍ ଫେଷ୍‌ସ୍ ଜିହୁଦିରି ଖେଡ଼ିକାଦିକାନ୍ ଆଦେଙ୍ଗ୍ ଇଛା କିଜି ପାଉଲ୍‌ତିଙ୍ଗ୍ ଖେନ୍‌ବାତାନ୍, “ଜିରୁସାଲୀମ୍‌ତୁ ସନି ଉଣ୍ଡିଙ୍ଗ୍ ମାରି ଆବେନ୍ ନା ଆଗ୍‌ତି ଇୟାଞ୍ଜିଲ୍ ଦୋସ୍‌ଦୁ ବିସାର୍ ଆଦେଙ୍ଗ୍ ନିନ୍ ଇନିକା ରାଜି ଆନି ?”

୧୦ ପାଉଲ୍ ଇର୍ହାନ୍, “ନାନ୍ କାଈସର୍‌ଦି ବିଚାର୍ କିନି ଆଗ୍‌ତି ନିର୍ହାମାନା । ଇବେନ୍‌ନେ ନା ବିଚାର୍ ଆନିକା ମାନାଡ୍ । ନିନ୍ ନିଜେ ନେଗେନ୍‌ତାନ୍ ନେସ୍‌ତିମାନି ଜେ, ନାନ୍ ଜିହୁଦିରି ବିରୁଦ୍‌ତାନ୍ ଇନିକା ଜାତି କିଏ ।

୧୧ ଜଦି ନାନ୍ ଅନ୍ୟାୟ୍‌ପାଣି କିତିମାରିଙ୍ଗ୍ ସାନିଦଣ୍ଡ ପୋଇନା ଏମେ ପାଣିକିତାମାନା, ଆବେନ୍ ଦଣ୍ଡ ପୋଇଦେଙ୍ଗ୍ ନାନ୍ ଇଛା କିଏ ।

ମାତର ଝାର ନା ବିରୁଦ୍ଧତାନ୍ ତାତିମାନି ଦୋଷ୍ଟିକୁ ଜଦି ଇନିକା ସତ୍ତ୍ୱ ସିଲେଡ଼, ଆରତିଙ୍ଗ ଏନ୍ ନାଙ୍ଗି ଝାରି କିୟୁଦାନ୍ ଡିସିସ୍ କିଦେଙ୍ଗ୍ କାଇସର୍ଦିମାନୁ ନାନୁ ଇୟା ଅନୁରୋଦ କିତାମାନା ।”

୧୨ ତାନି ଝେନ୍‌କା ପେସୁସ୍ ଝାରି ନେତାରିଝାଲେ ଝାରିଙ୍ଗ୍ ଝେରତାନ୍, “ନିନ୍ନୁ କାଇସର୍ଦିମାନୁ ଅନୁରୋଦ କିତିମାନି, ଆଦେଙ୍ଗ୍ ୍ନିନ୍ନୁ କାଇସର୍ଦି ଲାକୁଡୁ ସନି ।”

### ଆଗ୍ରିପା ନି ବଣ୍ଟି ସ୍ବତି ଆଗ୍ରିପା ପାଉଲ

୧୩ ଏସଦିନ୍ ଝେନେକା ରାଜା ଆଗ୍ରିପା ମାରି ବଣ୍ଟି ସ୍ବ ପେସୁସ୍‌ଦିଙ୍ଗ୍ ମିସାନି ଉଣ୍ଡିଙ୍ଗ୍ କାଇସରିଆ ଗାଡ଼ୁଡୁ ଝାତାର ।

୧୪ ଆବେନ୍ନୁ ଝାର ଏସଦିନ୍ ତେବାତି ଝେନ୍‌କା ପେସୁସ୍ ରାଜାଦିଙ୍ଗ୍ ପାଉଲଦି ବିଷୟ ଝେରିସି ଇର୍ହାନ୍, “ପେଲିକସ୍ ଜଇଲ୍‌ଟୁ ଇଟିତି ମାନି ଅରେନ୍ ଲୋକ ଇବେନ୍ନୁ ମାନାନ୍ ।

୧୫ ନାନୁ ଏସ୍ତିଝାଲେ ଜିରୁସାଲାମ୍‌ଟୁ ସର୍ଥା ମାହା, ଜିହୁଦି ପେରି ଜାଜକ ମାରି ଦାମ୍‌ ନେତାର ଝାନି ବିରୁଦ୍ଧତାନ୍ ଏସ ଦୋସକୁ ତାତାର ମାରି ନାଙ୍ଗ୍ ଝାନିଙ୍ଗ୍ ଦୋସ୍ କିବିସ୍ କିଦେଙ୍ଗ୍ ଇର୍ହାର ।

୧୬ ମାତର ନାନୁ ଝାରିଙ୍ଗ୍ ଝେରତା ଜେ, ଅରେନ୍ ଦୋସିଙ୍ଗ୍ ବିସାର୍ କିନିବାଡିଡୁ ଝାନି ଦୋସ୍‌ଆସ୍ତିଝାରି ଆଗ୍ରି ନିଜେଦିଙ୍ଗ୍ ସର୍ପେ କିନି ଉଣ୍ଡିଙ୍ଗ୍ ସୁଜୋଗ ସିନି ଆଗ୍ରି ଝାନିଙ୍ଗ୍ ଦାଇ କିବିସ୍ କିଦେଙ୍ଗ୍ ମା ରୋମିୟରି ନିୟମ୍ ସିଲେଡ଼ ।

୧୭ ଝାର ଇବେନ୍ନୁ ଝାନି ଝେନ୍‌କା ନାନୁ ଝେଡ଼ା କିଏଣ୍ଡା ମାର୍‌ନାଣ୍ଡିଙ୍ଗ୍ ବିଚାରକିନି ବାଡିଡୁ ବାସ୍ତା ମାରି ଆୟାଝାନିଙ୍ଗ୍ ଲୋଇ ତାତେଙ୍ଗ୍ ଇଜି ଆଦେସ୍ ସିତା ।

୧୮ ଝାନି ବିରୁଦ୍ଧକିନି ଲୋକୁ ଝାନି ବିରୁଦ୍ଧତାନ୍ ଇନ୍‌ଡ୍ରେଙ୍ଗ୍ ନିର୍ହାର, ମାତର ଝାର ଏମେନାନି ଦୋସ୍ ତାନାର ଇଜି ନାନୁ ଅଡ଼ବିତା ମାର୍‌ଆ, ଆକା ଝାର କିଦେଙ୍ଗ୍ ଆର୍‌ଏତାର ।

୧୯ ଝାର କେବଲ ନିଜେଦି ଦର୍ମ ବିସୟତିଙ୍ଗ୍ ମାରି ଜିସୁ ଦର୍ଡି ଆମା ସାତି ଲୋକ୍‌ତିଙ୍ଗ୍ ପାଉଲ ଜିତିକାନ୍ ଇଜି ଦାବି କିଜିନାନ୍, ଝାନି ବିସୟ୍ ଅସି ଆସ୍‌ସିସାତାର ।

୨୦ ଇୟାଞ୍ଜିଲ୍ ବିସୟ ମାରି ନେଗେନ୍‌ତାନ୍ ନେସିନି ଉଣ୍ଡିଙ୍ଗ୍ ଇନିକା କିଦେଙ୍ଗ୍ ଆନାଡ଼, ଇନିକା ତିର୍ କିଦେଙ୍ଗ୍ ଆର୍‌ଏଜି ଇୟା ଦୋସ୍‌ତୁ ବିଚାର୍ ଆନିଉଣ୍ଡିଙ୍ଗ୍ ପାଉଲ ଜିରୁସାଲମ୍‌ତୁ ସୋନାନ୍‌ନୋ ଇଜି ନାନ୍ ଖାନିଙ୍ଗ୍ ଝେନ୍‌ବାତା ।

୨୧ ମାତର୍ ପାଉଲ, ନିଜେ କାଈସର୍ ଖାନି ମାଟା ପୁରା କିପିନ୍ ଇଜି ଝେର୍‌ସି କାପୁକିନିଝାରି ମାଣାନ୍ ସୁରକ୍ଷିତ ଆନି ଉଣ୍ଡିଙ୍ଗ୍ ଅଡ଼ବିତାନ୍ । ଆଦେଙ୍ଗ୍ କାଈସର୍‌ଦି ଲାକ୍‌ତୁ ପୋକ୍‌ନି ସାନ୍ ଖାନିଙ୍ଗ୍ ବନ୍ଦି କିଜି ଇତିନି ଉଣ୍ଡିଙ୍ଗ୍ ନାନ୍ ଆଦେସ୍ ସିତାମାନା ।”

୨୨ ଆଗ୍ରିପା ପେସ୍‌ସ୍‌ତିଙ୍ଗ୍ ଇର୍ହାନ୍, “ନାନ୍ ନିଜେ ଇୟା ଲୋକ୍‌ତି ମାଟା ଝେନ୍‌ଡ୍ରେଙ୍ଗ୍ ବଦା କିଜିନା ।” ପେସ୍‌ସ୍ ଇର୍ହାନ୍, “ଝିଗେରିଙ୍ଗ୍ ନିନ୍ ଖାନି ମାଟା ଝେନିଦେର୍ ।”

୨୩ ମାରିଉନ୍‌ଡ୍ରି ଦିନ୍‌ତୁ ଆଗ୍ରିପା ମାରି ବଣ୍ଟି ଷ୍ ସୌନ୍‌୪ରି ଦଲ୍‌ତି ପେରିକାନ୍ ମାରି ଗାଡ଼ତି ପେରି ଲୋକା ଖାଲେ ନାଣ୍ଡ ଝେଡ଼ିକାଦାନ୍ ଖାଜି ବିଚାର୍‌କିନି ବାଡ଼ିତୁ ଡ଼ଗ୍ରିତାର୍ । ପେସ୍‌ସ୍‌ଦି ଆଦେସ୍‌ତାନ୍ ପାଉଲ୍‌ତିଙ୍ଗ୍ ଲୋଇ ତାତାର୍ ।

୨୪ ପେସ୍‌ସ୍ ଇର୍ହାନ୍, “ରାଜା ଆଗ୍ରିପା ମାରି ଆବେନ୍ନୁ ମାର୍‌ଇ ପେରିମଣ୍ଡଲ୍, ମିରୁ ଇୟା ଆମା ଲୋକ୍‌ତିଙ୍ଗ୍ ସୁଡ଼ୁଜିନିଦେର୍, ଖାନି ବିରୁଦ୍‌ତାନ୍ ଇବେଣିକାର୍ ମାରି ଜିରୁସାଲମ୍‌ତୁ ମାନି ଜିହୁଦିର୍ ନା ଲାକ୍‌ତୁ ଝେର୍‌ତା ମାନାର୍ । ଖାର୍ ଖାନି ଜିନି ମାନିକା ଟିକ୍ ସିଲେଜି ଦାବି କିଜି ଆଉଲି ଆଜିନାର୍ ।

୨୫ ମାତର୍ ଖାନ୍ ସାନିଦଣ୍ଡ ପୟ୍‌ନି ନାନିକା କିତିମାନି ଇନି ଦସ୍ ନାନ୍ ସୁଡ଼ୁ । ଖାନ୍ ନିଜେ କାଈସର୍‌ତିଙ୍ଗ୍ ଝେର୍‌ତି ମାନିଙ୍ଗ୍, ନାନ୍ ଖାନିଙ୍ଗ୍ ଆବେନ୍ନୁ ପୋକ୍‌ତେଙ୍ଗ୍ ଇଜି ବଦା କିତାମାନା ।

୨୬ ମାତର୍ ଖାନି ବିସୟ୍‌ତାନ୍ ନେସ୍‌ନିଝାଜା କାଈସର୍‌ତିଙ୍ଗ୍ ରାସ୍‌ତେଙ୍ଗ୍ ଇଜି ନାନ୍ ଇନିକା ସିଲେଡ଼ । ଆଦେଙ୍ଗ୍ ନାନ୍ ଖାନିଙ୍ଗ୍ ମି ଆଗ୍ରି ମାରି ରାଜା ଆଗ୍ରିପା, ମି ଆଗ୍ରି ତାତାମାନାନ୍, ଏଣ୍ଡେସ୍ ଖାନି ବିସୟ୍ ନେଗେନ୍‌ତାନ୍ ଝେନ୍‌ବାତି ଝେନ୍‌କାନେ ନାନ୍ ଇନିକା ରାସ୍‌ତେଙ୍ଗ୍ ଆର୍‌ନା ।

୨୭ ଇରିଙ୍ଗ୍ ଅରେନ୍ ଜଇଲ୍‌ତୁମାନି ବିରୁଦ୍‌ତାନ୍ ମାନି ମାଟେଙ୍ଗ୍‌ଞ୍ଜିଲ୍ ପୁରାନ୍‌ଗେନ୍‌ତାନ୍ ବୁଜାଏଣ୍‌ଗା ଖାନିଙ୍ଗ୍ କାଈସର୍‌ତି ଲାକ୍‌ତୁ

ପୋକ୍‌ନିକା ଟିକ୍ ସିଲେ ଇଜି ନାନ୍ ଅଡ୍‌ବିଜିନା ।”

## ୨୭

ଆଗ୍ରିପାଦି ଆଗ୍ରିପା ପାଉଲ ନିଜେଦି ତରିଟାନ୍ ଝେର୍‌ନିକା

୧ ଆଗ୍ରିପା ପାଉଲଟିଙ୍କ ଇର୍ହାନ୍, “ମିଙ୍ଗ୍ ନିଜେଦି ମାଣ୍‌କୁ ଝେର୍‌ତେଙ୍ଗ୍ ଇଜି ସାରି ସିଆୟାଆତାଡ୍ ।” ପାଉଲ କିୟ୍ ସାର୍‌ପସି ନିଜେଦିଙ୍କ୍ ସମର୍ଥନ କିଜି ଇର୍ହାନ୍ :

୨ ଏ ରାଜା ଆଗ୍ରିପା, ଜିହୁଦିର୍ ନାଙ୍ଗ୍ ଆମା ଝିନ୍ନୁ ବିସୟତାନ୍ ଝେର୍‌ତାମାନାର୍, ଆୟା ବିସୟତାନ୍ ମି ଆଗ୍ରି ନାନ୍ ନିଜେଦିଙ୍କ୍ ଝେର୍‌ତେଙ୍ଗ୍ ସୁଜୋଗ ପୟତି ମାନିଙ୍କ୍ ନେରୁ ନିଜେଦିଙ୍କ୍ କାର୍ମ୍ ଇଜି ଅଡ୍‌ବିଜିନା,

୩ ଇରିଙ୍କ୍ ଜିହୁଦିରି ରିତି ନିତି ମାରି ଝାରଗିନି ବିସୟତାନ୍ ନିନ୍ନୁ ନେଗେନ୍‌ତାନ୍ ନେସ୍‌ନି, ମାଡିସ୍ କିଜିନା, ନିନ୍ନୁ ସାହାସ୍‌ତାନ୍ ନା ମାଟା ଝେନ୍‌ଆ ।

୪ କଡ଼ଝାଲେରାନ୍ ନାନ୍ ଏଣ୍ଡେସ୍ ଜିତାମାନା, ଆକା ଜିହୁଦିର୍ ନେସ୍‌ନାର୍ । ଆଗ୍ରି ନିଜେଦି ଦେସ୍‌ତୁ ମାରି ଝେନ୍‌କା ଜିରୁସାଲମ୍‌ତୁ ନାନ୍ ଏଣ୍ଡେସ୍ ଜିବନ୍ କାଟେ କିତାମାନା, ଲୋକୁ ଆୟାକା ନେସ୍‌ନାର୍ ।

୫ ନାନ୍ ଜେ ଆଗ୍ରିରାନ୍ ପାରୁସି ଦର୍‌ତି ମା ଦର୍‌ଦି ଝିନ୍ନୁମାଣ୍‌କୁ ଦଲ୍‌ତି ପେରିକାନ୍ ଆଜି ଜିଜି ମାର୍‌ଆ, ଝାର ଇକା ନେସ୍‌ନାର୍ ମାରି ବଦା କିତିଙ୍ଗ୍, ଝାର ଇୟା ବିସୟତାନ୍ ସାକି ସିଦେଙ୍ଗ୍ ଆଟ୍‌ନାର୍ ।

୬ ମାପୁରୁ ମା ପୁର୍ବେଦିତକ୍‌ରାଦାଦାରିଙ୍କ୍ ଆମା ମାଟା ସିତାମାର୍‌ହାନ୍, ଆବେନ୍ନୁ ନା ଆସା ମାନି ଉଣ୍ଡିଙ୍କ୍ ନେରୁ ନାନ୍ ଇବେନ୍ନୁ ବିଚାର୍ ଆଦେଙ୍ଗ୍ ନିର୍‌ଆମାନା ।

୭ ମା ବାରଗୋଟା କୁଟୁମ୍ ଝେଡେନାଡା ପ୍ରବୁଦି ସେବା କିଜି ଆୟା ଉନ୍‌ଡ୍ରି ବିସୟ ପୟନି ଉଣ୍ଡିଙ୍କ୍ ଆସା କିନାର୍ । ଏ ରାଜା, ନା ଆୟା ଆସା ଉଣ୍ଡିଙ୍କ୍ ଜିହୁଦିର୍ ନାଙ୍ଗ୍ ଦୋସ୍ କିଜିନାର୍ ।

୮ ମାପୁରୁ ଜେ ସାଡିଝାରିଙ୍କ୍ ନିକ୍‌ନାନ୍, ଇକା ବିସ୍‌ବାସ୍ କିନିକା ବେକାର୍ ଇଜି ମିର୍ ଏନ୍‌ ଅଡ୍‌ବିଜିନିଦେର୍ ?

୯ ☆ ନାଜରିୟତିୟ ଜିସୁଦି ବିରୁଦ୍ଧିଙ୍କ ମେଡେକ୍ନି ଉଣ୍ଡିଙ୍କ ନାନ୍ ଆୟାଦାପ୍ରେ ସେସ୍ତା କିନିକା ଇଜି ଅଡ଼ବିତାମାରୁଆ ।

୧୦ ଜିରୁସାଲମ୍‌ତୁ ନାନ୍ ଆୟାଝାଜା କିତା । ଝିଜେରିଙ୍କ ପେରିଜାଜକରିମାଣ୍‌କୁ ଅଦିକାର୍‌ତି ଆକୁ ଅସି ବିସ୍‌ବାସିରି ଲୋକା ଲୋଇରାନ୍ ନାଣ୍ ଲୋକାଙ୍କ ଜଇଲ୍‌ତୁ ନିର୍ତ୍ତାମାରୁଆ ମାରି, ଝାରିଙ୍କ ସାନିଦଣ୍ଡ ସିଆୟୁଆନିଝାଲେ ନାନ୍ ବା ଝାରି ବିରୁଦ୍ଧତାନ୍ ମାରୁଆ ।

୧୧ ଗାଦି ଦେବେଙ୍କ ଜିହୁଦିରି ପାର୍ତନାକିନି ଇଲ୍‌କାଙ୍କ ନାନ୍ ଝାରିଙ୍କ କାସ୍ତୁ ସିତାମାନା ମାରି ଝାରି ବିସ୍‌ବାସ୍‌ତାନ୍ ଅଲଗା କିନି ଉଣ୍ଡିଙ୍କ ସେସ୍ତା କିତାମାରୁଆ । ନାନ୍ ଝାରି ଉଣ୍ଡିଙ୍କ ବେସି ରିସା ଆତାମାରୁଆ, ଝାରି ମୁସ୍‌କୁ କାସ୍ତୁ ନିୟା ସିନି ଉଣ୍ଡିଙ୍କ ଆଇଦେସ୍‌କାଦି ଗାଡ଼କାଙ୍କ ବା ସର୍‌ଆମାରୁଆ ।

ନିଜେଦି ବାଦେଲ୍‌ଆନି ବିସ୍‌ୟତାନ୍ ପାଉଲତି ମାଟା  
(ପ୍ରେରିତ ୯:୧-୧୯; ୨୨:୬-୧୭)

୧୨ ଇୟା ଉଦେସ୍‌ତାନ୍ ଝିଜେରିଙ୍କ ପେରି ଜାଜକରି ମାଣ୍‌କୁ ଅଦିକାର୍‌ତି ଆକୁ ମାରି ଆଦେସ୍ ଅସିନାନ୍ ଦାମାସ୍‌କସ୍‌ତୁ ସର୍‌ଆମାରୁଆ ।

୧୩ ଏ ରାଜା ଆଗ୍ରିପା, ଅର୍‌ଲେନ୍ ଦାପ୍ରେନେ ମାଦ୍‌ଲାମ୍ ବେଡାଦୁ ପେରଜାରି ମୁସ୍‌କୁ ନାନ୍ ଝେଡାଦି ଜାୟତିମାଣ୍‌କୁ ନାଣ୍ ଅଡ଼ିନି ଜାୟ୍ ସୁଡ଼ତୁ, ମୁସ୍‌କୁପୁରତାନ୍ ଆୟା ଜାୟ୍ ଝାଜି ନାଙ୍କ୍ ମାରି ନା ଝାଲେମାରୁଇଝାରି ସାରିବେଡ଼ତି ତରିତିକା ସୁଡ଼ତୁ ।

୧୪ ମାପୁ ଝିଜୁଲୋକୁ ବୁମିଦୁ ମେଡେତାପ, ନାନ୍ ଏବି ବାସାଦାନ୍ ନା, ଉଣ୍ଡିଙ୍କ ଇୟା ମାଟା ଝେରୁଆ, ସାଉଲ, ସାଉଲ, ନିନ୍ ଏୟା ନାଙ୍କ୍ ତାଡ଼ନା କିଜିନି ? ଡ଼ୁଜି ମାନି ଲୋକ୍‌ତି ତୁତେରିବାଡିଗାଦି କୁଟି ଟିପୁଦୁ ଅଦ୍‌ରିଜିମାନି ଡାନ୍ ଝାଜା ନିନ୍ ନିଜେ କାସ୍ତୁ ଆନି ।

୧୫ ନାନ୍ ଝେନ୍‌ବାତା, ପ୍ରବୁ, ନିନ୍ ଏନ୍ ? ପ୍ରବୁ ଇର୍‌ହାନ୍, ନାନ୍ ଜିସୁ, ଆମାଝାନିଙ୍କ ନିନ୍ ନିୟା କିଜିନି ।

୧୬ ମାତର୍ ନିଙ୍କ୍ ଆ, ନିଙ୍କ୍ ନା ସେବାକିନି ଝାଜା ଆସକିନି ଉଣ୍ଡିଙ୍କ ନାନ୍ ନିଙ୍କ୍ ତରାୟୁଆତାମାନା । ନେରୁ ମିରୁ ନା ବିସ୍‌ୟତାନ୍

ଆମାକା ସୁତୁଦେର ମାରି ଖାଜିନିଦିନୁ ନାନ୍ ନିଙ୍ଗି ଆମାକା ତରନା, ଆୟା ବିସୟତାନ୍ ନିନ୍ ଆଇଝାରିଙ୍ଗ୍ ଖେରନି ।

୧୭ ଆମା ଜିହୁଦି ମାରି ଅଣଜିହୁଦି ଲୋକା ଲାକ୍ତୁ ନାନ୍ ନିଙ୍ଗି ପୋକ୍ନା, ଝାରିମାଣ୍ଡକୁ ନାନ୍ ନିଙ୍ଗି ରକିୟା କିନା ।

୧୮ ନିଙ୍ଗି ଝାରି କାଣ୍ଡକୁ ରେପିସ୍ କିନିକା ମାନାତ୍ ମାରି ଝାରିଙ୍ଗ୍ ସିକାଟିଦାନ୍ ଜାୟତୁ ମାରି ସୟତାନ୍ତି ମାଣାନ୍ ପ୍ରବୁଦି ଲାକ୍ତୁ ତାତେଙ୍ଗ୍ ପଡାନାତ୍, ଏଣ୍ଡେସ୍ ନା ମାନୁ ବିସବାସ୍ କିନିମାଣ୍ଡକୁ ଝାରି ପାପ୍ କେମା ଆନାତ୍ ମାରି ମାପୁରୁଙ୍ଗ୍ ଆସକିତି ଲୋକା ମାନୁ ଝାର୍ ବାଡି ପୟନାର୍ ।

### ନିଜେଦି ପାଣି ବିସୟତାନ୍ ପାଉଲତି ମାଟା

୧୯ ମାରି, “ଏ ରାଜା ଆଗ୍ରିପା, ନାନ୍ ମୁସକୁପୁରତାନ୍ ଆମା ଦର୍ଶନ ପୟତାମାନା, ଆୟାତାନିଙ୍ଗ୍ ଅମାନ୍ୟ ଆଏ ।

୨୦ ☆ନାନ୍ ଆଗ୍ରି ଦାମାସକସ୍ ନି ଜିରୁସାଲମତୁ ମାରି ତାନେଖେନକା ପୁରାଝିତୁ ଜିହୁଦା ଦେସତୁ ମାରି ଅଣଜିହୁଦିରି ମାନୁ ପ୍ରଚାର କିତା, ଏଣ୍ଡେସ୍ ଝାର୍ ପାପ୍ତି ଉଣ୍ଡିଙ୍ଗ୍ ମୋନ୍ ଡେପ୍ସି ମାପୁରୁଦି ଲାକ୍ତୁ ଡେସିଝାନାର୍ ମାରି ଝାର୍ ଜେ ଏଡ୍ କିତାମାନାର୍, ଆୟା ପାଣିତୁ ତରନାର୍ ।

୨୧ ଇୟା ବିସୟତାନ୍ ନାନ୍ ମନ୍ଦିରତୁ ମାନିଝାଲେ ଜିହୁଦିର୍ ନାଙ୍ଗି ଆସ୍ସି ସାୟାମାର୍ଗା ତାକ୍ତେଙ୍ଗ୍ ସେସ୍ଟା କିଜିମାର୍ହାର୍ ।

୨୨ ମାତର ମାପୁରୁଦିମାଣ୍ଡକୁ ସାହାଜ୍ୟ ପୟଜି ନାନ୍ ନେରୁ ସାନ୍ଧି ଇସ୍ରି ପେରି ଝିଜେରି ଲାକ୍ତୁ ସାମାନତାନ୍ ନା ସାନ୍ଧ୍ୟ ସିଦେଙ୍ଗ୍ ନିର୍ଆମାନା । ବାବବାଦିରି ନି ମୋସା, ଆମାକା ଗଟାନାତ୍ ଇଜି ଖେରତାମାନାର୍, ନାନ୍ ଆୟା ମାଟା ଖେରସିନା :

୨୩ ☆ମସିହ ଦୁଃକ୍‌ବୋଗ କିଜି ମାରି ସାତିଝାରି ମାଣ୍ଡକୁ ଝିଜେରିଙ୍ଗ୍ ଆଗ୍ରି ଜିବନ୍‌ଆଜି ମାରିଡେସି ନିଙ୍ଗି ଜିହୁଦି ମାରି ଅଣଜିହୁଦିରି ଲାକ୍ତୁ ରକ୍‌ୟାଦି ଜାୟ ତରନାନ୍ ।”

୨୪ ଇୟାଞ୍ଜା ପାଉଲ ନିଜେଦି ତରିଟାନ୍ ଖେରସିମାନିଞ୍ଜାଲେ ପେସ୍ତୁସ୍ ଆଉଲି ଆଜି ଇର୍ହାନ୍, “ପାଉଲ, ନିନ୍ତୁ ବାୟା; ନି ନାଶ୍ଟ ସିକିୟା ନିଙ୍ଗ୍ ବାୟା କିତାମାନାଡ଼ ।”

୨୫ ପାଉଲ ଇର୍ହାନ୍, “ନାନ୍ ବାୟା ସିଲେ, ଏ ସନ୍ମାନତି ପେସ୍ତୁସ୍, ନାନ୍ ଆମାକା ଇଜିନା, ଆକା ସତ୍ ମାରି ସାନ୍ତି ବୁଦିଦି ବାକ୍ୟ ଖେରସିନା ।

୨୬ ରାଜା ଆଗ୍ରିପା ! ନିନ୍ତୁ ଇୟାଞ୍ଜିନ୍ତୁ ବିସୟ ନେସ୍ତିମାନିଙ୍ଗ୍ ନାନ୍ ନି ଆଗ୍ତି ଇୟା ମାଟା ଖେରତେଙ୍ଗ୍ ସାହାସ୍ କିଜିନା, ନାନ୍ତୁ ପୁରା ନେସ୍ନା ଜେ, ଇୟାଞ୍ଜିନ୍ତୁ ବିସୟ ନିଙ୍ଗ୍ ଜାଣାମାନାଡ଼, ଇରିଙ୍ଗ୍ ନେସ୍ଲ ବାଡିଦୁ ନେସ୍ଲ ଖାଜା ଇୟା ବିସୟକୁ ଗଟାଉଁ ।

୨୭ ଏ ରାଜା ଆଗ୍ରିପା, ନିନ୍ତୁ ବାବବାଦିରିଙ୍ଗ୍ ବିସ୍ବାସ୍ କିନି ? ନିନ୍ତୁ ବିସ୍ବାସ୍ କିନି ଇଜି ନାନ୍ ନେସ୍ନା ।”

୨୮ ଆବେନ୍ତୁ ଆଗ୍ରିପା ପାଉଲତିଙ୍ଗ୍ ଇର୍ହାନ୍, “ଇୟା ଉଣା ସମୟତି ଲୋଇ ନିନ୍ତୁ ଇନିକା ନାଙ୍ଗ୍ କ୍ରିଷ୍ଟିୟାନ୍ କିନା ଇଜି ଅଡ଼ବିଜିନି ?”

୨୯ ପାଉଲ ଇର୍ହାନ୍, “ଉଣା ସମୟ ଆପିଡ଼, କି ନାଶ୍ଟ ସମୟ ଆପିଡ଼, ମାପୁରୁଦିମାନ୍ତୁ ନା ନିସ୍ ପାର୍ତ୍ତାନା, ନିନ୍ ମାରି ନେରୁ ନା ମାଟା ଖେରଇମାନି ଝିଜେରେ ନା ଖାଜା ଆପିର୍, ମାରିବା ଇୟାଞ୍ଜା ସିକିଣିଦାନ୍ ତରାୟଆଜି ଜଇଲ୍ତୁ ସୋଲିର୍ ଇଜି ନାନ୍ ଇନ୍ଏ ।”

୩୦ ତାନେଝେନ୍କା ରାଜା, ସାସନକିନିକାନ୍, ବଣ୍ଟିସ୍ ମାରି ଆଇକାର୍ ଝିଜେରେ ସନ୍ତେଙ୍ଗ୍ ଇଜି ନିଙ୍ଗ୍ ତାର୍ ।

୩୧ ଖାର୍ ସୋଲ୍ସି ମାର୍ଇଞ୍ଜାଲେ ନିଜେନିଜେଦିଙ୍ଗ୍ ଇର୍ହାର୍, “ଇୟା ଲୋକ୍ ଇୟାଞ୍ଜା ଇନି ପାଣି କିଏନ୍, ଆମାତାନି ଉଣ୍ଟିଙ୍ଗ୍ ଖାନ୍ ସାନିଦଣ୍ଟ ପୟ୍ନାନ୍ ମାରି ଜଇଲ୍ତୁ ସନାନ୍ ।”

୩୨ ଆଗ୍ରିପା ପେସ୍ତୁସ୍ତିଙ୍ଗ୍ ଇର୍ହାନ୍, “ଜଦି ଇୟା ଲୋକୁ କାଇସର୍ତିମାନ୍ତୁ ଖେରଏତାନ୍ ମାନ୍ତି, ଆର୍ତିଙ୍ଗ୍ ଖାନିଙ୍ଗ୍ ମାଡୁ ଡିସ୍ସୋ ସିଦେଙ୍ଗ୍ ଆତାଡ଼ମାନ୍ତି ।”

## ୨୭

ରୋମଡୁ ପାଉଲ ଏରଜାହାଜ୍ତୁ ସନିକା

୧ ମାପୁ ଇଟାଲିଦୁ ସନାଟ୍ ଇଜି ତିଆର୍ ଆତାମାର୍ହାପ୍, ନାସ୍ତିଝାଲେ ପାଉଲ ମାରି ଆଇ ଏସଲୋକ୍ ଜଇଲ୍‌ତୁ ମାର୍‌ଇକାର୍ “କାଇସର ସନ୍‌ଦଲ୍” ଦରତି ଉନ୍‌ତ୍ର ରୋମିୟ ସନ୍‌ଦଲ୍‌ତି ସେନାପତି ଯୁଲିୟସ୍‌ଦି କିୟୁଦୁ ସର୍‌ପେ ଆତାର୍ ।

୨ ମାପୁ ଆସିଆ ଦେସ୍‌ତି ସାମୁଦୁରତିପାଡ଼ିଦୁ ମାନି ବାତିଆଙ୍ଗ୍ ସନି ଉଣ୍ଡିଙ୍ଗ୍ ତିଆର୍‌ଆତିମାନି ଉନ୍‌ତ୍ର ଆଦ୍ରାମୁଉୟ ଉନ୍‌ତ୍ର ଏରୁଜାହାଜ୍‌ତୁ ଏକ୍‌ତାପ୍ । ଆରିସ୍‌ପାର୍‌କ୍‌ସ୍ ଦରତି ତେସଲନିକିଆ ଗାଡ଼୍‌ତି ଅରେନ୍ ମାସିଦୋନିଆଦି ଲୋକ୍ ମା ଝାଲେ ମାର୍‌ହାନ୍ ।

୩ ମାରି ଅର୍‌ଲେନ୍ ମାପୁ ସିଦନ୍‌ତୁ ଇତାପ୍ । ଯୁଲିୟସ୍ ପାଉଲତି ଉଣ୍ଡିଙ୍ଗ୍ ସାକା ମାର୍‌ହାନ୍ । ପାଉଲତି ସଙ୍ଗ୍‌ରିମାଣ୍‌କୁ ଝାରି ଦରକାର୍‌ମାନି ଜିନିସ୍ ଝିନ୍‌ ଉଣ୍ଡାକିନି ଉଦେସ୍‌ତାନ୍ ଝାରିଙ୍ଗ୍ ବେଟ୍‌ଆଦେଙ୍ଗ୍ ଇଜି ଝାନ୍ ପାଉଲତିଙ୍ଗ୍ ସାରି ସିତାନ୍ ।

୪ ମାପୁ ଆବେଟ୍‌ତାନ୍ ସନି ବେଡ଼ାଦୁ ପାଡ଼ିଝାନି ଗାଲି ଝାତାଡ଼‌ଆକା ସାଇପ୍ରସ୍ ସାମୁଦୁରତି ପାଡ଼ି ପାଡ଼ି ସର୍‌ହାପ୍,

୫ ସିଲିସିଆ ନି ପାଫ୍‌ଲିଆ ଜିଣାଜି ଲୁକିଆଦି ମୁରାଦୁ ଇତାପ୍ ।

୬ ଆବେନ୍‌ ଝିଜେରିଙ୍ଗ୍ ପେରିସେନାପତି ଆଲେକ୍‌ଜାଣ୍ଡ୍‌ ଆ ତ୍ରିଆଦି ଉନ୍‌ତ୍ର ଏରୁଜାହାଜ୍ ଇଟାଲିଦୁ ସନି ଉଣ୍ଡିଙ୍ଗ୍ ତିଆର୍ ଆଜିମାନିକା ସୁଡ଼ୁଲି ମାଙ୍ଗ୍ ଆବେନ୍‌ ଏକିସ୍‌ତାନ୍ ।

୭ ମାପୁ ବେସି ଦିନ୍ ସାନ୍‌ସି ଦିରେ ଦିରେ ସୋଲ୍‌ସି ବଡ଼େ କାସ୍‌କାନ୍ କ୍ଲିଦ୍ ଗାଡ଼୍ ଲାକ୍‌ତୁ ଇତାପ୍ । ପାଡ଼ିଝାନି ଗାଲିଦି ଉଣ୍ଡିଙ୍ଗ୍ ମାପ୍ ଆୟା ତରିନ୍ ମାରି ଆଗ୍‌ତି ସନ୍‌ଡ୍ରେଙ୍ଗ୍ ଆଟ୍‌ଏତାପ୍, ଆଦେଙ୍ଗ୍ କ୍ରିଟ୍ ସାମୁଦୁରତି ଉଣି ତରିନ୍ ସିଜି ରାଜିଦାନ୍ ସୋଲ୍‌ସି ସାଲମୋନି ପାଡ଼ି ସିଜି ସର୍‌ହାପ୍ ।

୮ ମାରି, ମାପୁ ପାଡ଼ି ପାଡ଼ି ବଡ଼େ କାସ୍‌କାନ୍ ଲାସାୟା ଗାଡ଼୍ ଲାକ୍‌ତୁରି ସୁନ୍‌ର୍ ବନ୍‌ର୍ ଦରତି ବାତିଦୁ ଇତାପ୍ ।

୯ ମାପ୍ ଆବେନ୍‌ ବେସି ଦିନ୍ ତେବାତାପ୍ । ଜିହୁଦିରି ଉପବାସ ପଣ୍ଡୟ ଝିଜିତା ମାର୍‌ହାଡ଼୍, ଆୟା ବେଡ଼ାଦୁ ସାମୁଦୁରତୁ ସନିକା ତିଲାନିପାଣି ଆତାଡ଼୍ । ଆଦେଙ୍ଗ୍ ପାଉଲ ଝାରିଙ୍ଗ୍ ଇୟା ମାଟେଙ୍ଗ୍ ଝେରତାନ୍ :

୧୦ “ତତ୍ତ୍ୱକୁ ନାନୁ ନେସ୍ତେଙ୍ଗ ଆଟ୍‌ସିନା ଜେ, ଜଦି ମାପ୍ ଇବେଣ୍‌କୁ ମାରି ସନ୍ତେଙ୍ଗ ଆରାମ୍ କିନିକା, ଆକା ତିଲାନିପାଣି ଆନାଡ୍ । କେବଲ ଜେ ଜିନିସ୍‌ପତ୍ର ନି ଜାହାଜ୍ ନାସ୍ ଆନାଡ୍, ଆକା ସିଲେ, ମାତର୍ ମା ଜିବନ୍‌ତିଙ୍ଗ୍ ବା ସାନି ମୁସ୍‌କୁ ମାନାଡ୍ ।”

୧୧ ମାତର୍ ସେନାପତି ପାତଲତି ମାଟା ବିସ୍‌ବାସ୍ କିଏଣ୍‌ଗା ଜାହାଜ୍‌ତି ପେରିଞ୍ଜାନିମାନୁ ମାରି ଜାହାଜ୍‌ତି ମାଲିକ୍‌ତି ମାଟାଦାନ ଆସ୍‌ତାନ ।

୧୨ ପିନି କାଡ଼ା କାଟେ କିଦେଙ୍ଗ୍ ଆୟା ବାଡି ସୁବିଦା ସିଲେତାଡ୍, ଆଦେଙ୍ଗ୍ ସୋଲ୍‌ସିମାର୍‌ଇଞ୍ଜାରି ମାଣ୍‌କୁ ଏସଲୋକ୍ ସାମ୍‌ଦୁରୁତାନ ସନ୍ତେଙ୍ଗ୍ ଜଦି ଆନାଡ୍, ଫୈନିକ୍‌ସ୍‌ତୁ ପିନି କାଡ଼ା କାଟେକିନି ଉଣ୍‌ଜିଙ୍ଗ୍ ମାରିଙ୍ଗ୍ । ଫୈନିକ୍‌ସ୍ ଉଣ୍‌ଜେରି ନି ଖେଡ଼ାଆରୁନି ତରିନ୍ ମାରି ତେବିରି ନି ଖେଡ଼ାଆରୁନି ତରିନ୍ ମକମ୍ କିଜି ତେବାତିମାନି କ୍ରିବ୍‌ଦି ଉନ୍‌ଡ୍ରି ବାଡି ।

### ସାମ୍‌ଦୁରୁ ଗାଲି

୧୩ ଏସ୍ତିଞ୍ଜାଲେ ଉଣ୍‌ଜେରି ତରିଟାନୁ ଦିରେ ଦିରେ ଗାଲି ଖାତାଡ୍, ସନିକାର୍ ଇୟାତାନିଙ୍ଗ୍ ଉନ୍‌ଡ୍ରି ନେଗି ମାଟା ଇଜି ଅଡ୍‌ବିତାର୍ ମାରି ଲଙ୍ଗର୍ ପେରଜି ଏସା ଆକ ସନ୍ତେଙ୍ଗ୍ ଆନାଡ୍, କ୍ରିବ୍‌ଦି ପାଡି ପାଡି ସନ୍ତେଙ୍ଗ୍ ଆସ୍‌ତାର୍ ।

୧୪ ମାତର୍ ଆୟା ଦାପ୍ରେନେ ସାମ୍‌ଦୁରୁ ଦିପ୍ ତରିଟାନୁ ତେବିରି ନି ଆଗଡ଼ିରାନୁ ଗାଲି ନାଣ୍‌ଦାନୁ ନାଣ୍ ଖାଜି

୧୫ ଜାହାଜ୍‌ତିଙ୍ଗ୍ ଆତାଡ଼ାତାଡ୍ । ଜାହାଜ୍‌ତିଙ୍ଗ୍ ଗାଲି ତରିନ୍ ମକମ୍ କିଜି ଇଡ୍‌ଦେଙ୍ଗ୍ ଆଟ୍‌ଏତାପ୍‌ଆକା ମାପ୍ ମାରି ସେସ୍ କିଏଣ୍‌ଗା ଗାଲିଦୁ ଜାହାଜ୍‌ତିଙ୍ଗ୍ ଦେଲ୍‌ଜ ସନ୍ତେଙ୍ଗ୍ ଡିସ୍‌ତା ସିତାପ୍ ।

୧୬ ମାରି, ଉନ୍‌ଡ୍ରି ଇସ୍ତି ବାଡି କାଉଦାଦି ଉଣ୍‌ଜେରି ତରିନ୍ ସିଜି ସନି ଖାଲେ ଅଡ୍‌ପ୍ ଗାଲିଦାନୁ ରକ୍‌ୟା ପୟ୍‌ତା ମାର୍‌ହାପ୍ । ଆବେନୁ ମାପୁ ଏଣ୍‌ସ୍‌ସ୍‌ବା ଜାହାଜ୍‌ତି ତଙ୍ଗାଦିଙ୍ଗ୍ ନେଗି ବାଡିଦୁ ଇଡ୍‌ଦେଙ୍ଗ୍ ଆଟ୍‌ତାପ୍ ।

୧୭ ତଙ୍ଗାସାଲାକିନିକାର୍ ତାନିଙ୍ଗ୍ ଜାହାଜ୍ ମୁସ୍‌କୁ ପେରତାର୍ ମାରି ନାସ୍‌ତି ସାକାଦାନୁ ତାଟ୍‌ତାନୁ ଜାହାଜ୍‌ତି ଖାଲେ ତର୍‌ତାର୍ । ଜାହାଜ୍ ଲିବିୟା ସାମ୍‌ଦୁର ପାଡିଦି ବାଲି ଲୋଇ ଡ୍‌ଗୁଗାସନାଡ୍ ଇଜି ତିଲାଜି

ତଙ୍ଗିଆଲାକିନିକାର ପାରଦା କୁତସାସିତାର ଜାହାଜ୍‌ତିଙ୍ଗ ଗାଲି  
 ଖାନିମାନୁ ଦେଲ୍‌ଜି ସନ୍ତେଙ୍ଗ ଡିସ୍‌ତାସିତାର ।

୧୮ ନାଣ୍ଡ ଗାଲି ଆଜିମାରିଙ୍ଗ ଆୟା ମାର୍‌ନାଣ୍ଡିଙ୍ଗ ଖାର ଜାହାଜ୍‌ତାନ  
 ଜିନିସ୍‌ପତ୍ର ଏରୁତୁ ପୋକ୍‌ତାର,

୧୯ ମାରି, ଆୟା ମାର୍‌ନାଣ୍ଡିଙ୍ଗ ଜାହାଜ୍‌ତି ଏସ ସାସାପାତି ସାମ୍‌ଦୁରୁତୁ  
 ପୋକ୍‌ତାର ।

୨୦ ନାଣ୍ଡ ଦିନ୍ ସାନ୍ଧି ମାପ୍ ଖେଡ଼ା କି ସୁକେଙ୍ଗ ସୁଡ଼ୁଦେଙ୍ଗ ଆର୍‌ଏତାପ୍  
 ମାରି ନାଣ୍ଡଦାନ ନାଣ୍ଡ ଗାଲି ଖାଜିମାରୁହାଡ଼ । ସାରାସାରିଖେନ୍‌କା ମାପୁ  
 ରକିୟା ପୟନି ଆସା ଝିଜୁ ଡିସ୍‌ତା ସିତାପ୍ ।

୨୧ ମାରି, ଝିଜେରେ ନିସ ଦିନ୍ ସାନ୍ଧି ବାଙ୍ଗାଦୁ ତେବାତି ଖେନ୍‌କା,  
 ପାଉଲ ଖାରି ଲୋଇ ନିଲ୍‌ତାନନୋ ଇହାନ୍, “ଏ ତଡ଼ାନକୁ, ମିରୁ  
 ନା ମାଟା ଇସାବତାନ କ୍ରିଟ୍‌ଦାନ ଜାହାଜ୍ ଡିସ୍‌ଲ ମାନିକାଇରିଙ୍ଗା, ମା  
 ଇୟା କାକୁତ ଗଟେଆଏତାଡ଼ ମାନ୍ତି ।

୨୨ ମାତର ଇଲେଇ ନାନ୍ ମିଙ୍ଗା ଇଜିନା, ମିରୁ ସାହାସ୍ ଆସ୍‌ତୁ ।  
 ମି ଲୋଇରାନ୍ ଅରେନ୍‌ଖାନିନ୍‌ସିବା ଜିବନ୍ ସଲ୍‌ଏଡ଼, କେବଲ ଜାହାଜ୍  
 ନାସୁ ଆନାଡ଼ ।

୨୩ ନାନ୍ ଆମା ମାପୁରୁଙ୍ଗୁ ସେବା କିଜିନା, ଇଏରି ନାଡ଼ାଦୁ ଖାନି  
 ଅରେନ୍ ମୁସ୍‌କୁପୁରତି ଦୁଡ଼ ନା ଲାକ୍‌ତୁ ଖାଜି ଇହାନ୍,

୨୪ ପାଉଲ, ନିନୁ ତିଲାମା । ନିନୁ ପୁରା କାଇସର୍‌ଦି ଆଗ୍‌ଡ଼ି ନିନି । ନି  
 ଉଣ୍ଡିଙ୍ଗ ମାପୁରୁ ସାକା ଆତିମାନିଙ୍ଗ, ନି ଖାଲେ ସୋଲ୍‌ସିମାନି ଝିଜେରି  
 ଜିବନ୍ ଖାନ ରକ୍‌ୟା କିନାନ୍ ।

୨୫ ମାରି, ତଡ଼ାନକୁ, ସାହାସ୍ ଆସ୍‌ତୁ ! ଇରିଙ୍ଗ ନାନ୍ ମାପୁରୁଦିମାନୁ  
 ବିସ୍‌ବାସ୍ କିନା, ନାଙ୍ଗା ଆମାକା ଖେରାୟ୍‌ଆତାମାନାଡ଼, ଟିକ୍  
 ଆୟାଖାଜା ଗଟାନାଡ଼ ।

୨୬ ମାତର ମାଡୁ ଆଗ୍‌ଡ଼ି ସୋଲ୍‌ସି ଉନ୍‌ଡ଼ି ସାମ୍‌ଦୁରୁ ଲୋଇ ମାନି  
 ବାଡ଼ିଦୁ ଇଦେଙ୍ଗ ପଡ଼ାନାଡ଼ ।”

୨୭ ଇୟା ସଲ୍‌ସିନିମାନୁ ସତି ସଉଦ ଦିନ୍‌ତୁ, ମାଡୁ ଆଡ଼ିଆ  
 ସାମ୍‌ଦୁରୁତୁ ଗାଲିପିରୁ ଦାନ ଆୟାଦାପ୍ରେ ପେଲାୟ୍ ଆଜି ସୋଲ୍‌ପୁ  
 ସୋଲ୍‌ପୁ, ପୁରା ମାଜାର୍‌ନାଡ଼ା ବେଡ଼ାଦୁ ତଙ୍ଗିଆଲାକିନିକାର  
 ଅନୁମାନ୍ କିତାର ଜେ, ମାଡୁ ପାଡ଼ି ଇଗା ସୋଲ୍‌ସିନିକା ।

୨୮ ଝାର ଲେକିସ୍ କିଜି ନେସ୍ତାର୍, ଆବେନୁ ଏରୁଦି ଗୁମି ସଏ କଡେ ପୁର୍ ମାନାଡ୍ । ମାରି ଅଡ଼ପ୍ ଆଗ୍ଡି ସୋଲ୍ସି ମାରି ଉନ୍ତ୍ର ଦେବା ଲେକିସ୍ କିଜି ନବେ ପୁର୍ ଗୁମି ଏରୁ ମାନେ ।

୨୯ ଜାହାଜ୍ ଏଣ୍ଡେସ୍ ଆମା ଗରନ୍ତୁ ସୋଲ୍ସି ତୁକାନାଡ୍ ଇଜି ତିଲାଜି ଝାର ଝେନ୍କାରାନ୍ ନାଲ୍ଗି ପେରିଲୁହାମକେଙ୍ଗ୍ ପୋକତାରୋ ମାରି ସାଲ୍ଦି ଏସ୍ତିଝାଲେ ଆନାଡ୍ ଇଜି କାପ୍କିଜି ତେବାତାର୍ ।

୩୦ ତାନେଝେନ୍କା ତଙ୍ଗାସାଲାକିନିକାର୍ ଜାହାଜ୍ତାନ୍ ରେସି ଝାଜି ସନ୍ତେଙ୍ଗ୍ ସେସ୍ କିତାର୍ । ଜାହାଜ୍ତି ଆଗ୍ଡିରାନ୍ ମାରି ଏସ୍ ପେରିଲୁହାମକେଙ୍ଗ୍ ପୋକ୍ତେଙ୍ଗ୍ ସାଲାକି କିଜି, ଝାର ଜାହାଜ୍ ମୁସ୍ତୁ ମାନି ତଙ୍ଗାଦିଙ୍ଗ୍ ଆଡ଼ଗି ରେପ୍ତାର୍ ।

୩୧ ମାତର୍ ପାଉଲ ସେନାପତି ମାରି ସନ୍ୟରିଙ୍ଗ୍ ଇର୍ହାନ୍, “ତଙ୍ଗାସାଲାକିନିକାର୍ ଜାହାଜ୍ତୁ ମାନ୍-ଏତିଙ୍ଗ୍, ମି ରକିୟା ପୟନିକା ମାରି ଆସା ସିଲେଡ୍ ।”

୩୨ ଆବେନୁ ସନ୍ୟର୍ ତଙ୍ଗାଦି ନାସ୍ତୁଝିଜୁ କୟ୍ଜି ଏର୍ଡୁ ଦେଲ୍ଜି ସନ୍ତେଙ୍ଗ୍ ଡିସ୍ତାସିତାର୍ ।

୩୩ ସାଲ୍ଦି ଆନି ଆଗ୍ଡିନେ ପାଉଲ ଝିଜେରିଙ୍ଗ୍ ଉଣ୍ଡେଙ୍ଗ୍ ଇଜି ଇର୍ହାନ୍, “ଇୟା ସଉଦ ଦିନ୍ ଆତାଡ୍ନି, ମିରୁ ଇନିକା ଉଣ୍ଡିଦେର୍ ।”

୩୪ ବାତିଙ୍ଗ୍ ମାଲିତା, ଇଲେଇ ଇନିକା ତିନ୍ତୁ, ଜିଜ ତେବାତେଙ୍ଗ୍ ଇକା ପୁରା ଦରକାର୍ ମାନାଡ୍ । ତିଲାମାଟ୍, ମି ତାଲାଦି ଉନ୍ତ୍ର ବା କୁକୁଟି ନାସ୍ତୁ ଆଏଡ୍ ।

୩୫ ଇୟାଝିଜୁ ମାଟା ଝେର୍ସି ପାଉଲ ରୁଟି ଆସ୍ସି ଝିଜେରି ଆଗ୍ଡି ମାପୁରୁଙ୍ଗ୍ ଦନ୍ୟବାଦ୍ ସିଜି ରୁଟି ରୁକ୍ସି ତିର୍ହାର୍ ।

୩୬ ଆବେନୁ ଝାର ଝିଜେରେ ସାହାସ୍ ଆଜି ନିଜେନିଜେ ବା ତିର୍ହାର୍ ।

୩୭ ନାସ୍ତିଝାଲେ ଜାହାଜ୍ତୁ ଝିଜେରେ ଦୁଇସ ସତୁରି ସୋଅ ଲୋକ୍ ମାର୍ହାର୍ ।

୩୮ ଝିଜେରେ ପଟା ବଡ଼ ଉଟି ଝେନ୍କା ଜାହାଜ୍ତିଙ୍ଗ୍ ଉସାସ୍ କିନି ଉଣ୍ଡିଙ୍ଗ୍ ଆବେନୁ ମାର୍ଜି ଝିଜୁ ଗଦ୍ମୁ ସାମ୍ବୁରୁତୁ ପୋକ୍ତାର୍ ।

ଜାହାଜ୍ତି ନାସ୍ତୁଆନିକା

୩୯ ମାର୍ନାଣ୍ଟିଙ୍କ ସାଲ୍‌ଦି ପାଡ଼ି ଆମା ବାଡ଼ିବୁ ଖାଜି ଖାର ଇତାର୍, ଡଙ୍ଗାସାଲ୍‌କିନିକାର୍ ନେସ୍‌ଡେଙ୍ଗ୍ ଆର୍‌ଏତାର୍; ମାତର୍ ଖାର ସୁଡ଼ତୁର୍, ଆକା ଉନ୍‌ଡ଼ି ଇସ୍‌ସାମ୍‌ବୁରୁତି ବାଲି ବୁମି । ଆବେନ୍‌ ଜାହାନ୍ ଅଡେଙ୍ଗ୍ ଇଜି ତିର୍ କିତାର୍ ।

୪୦ ଆଦେଙ୍ଗ୍ ପେରିଲ୍‌ହାମକେଙ୍ଗ୍ ନାସ୍‌କୁ ଝିନ୍‌ କୟ୍‌ଜି ଆୟାଝିନ୍‌ ସାମ୍‌ବୁରୁ ଆଡ଼ଗି ମୁସାୟ୍ ଆନି ଉଣ୍‌ଜି ଡିସ୍‌ତାସିତାର୍ । ମାରି ଏଣ୍‌ଲ୍‌ତି ନାସ୍‌କୁଝିନ୍‌ କୁଡ଼ସି ସିଜି ସାମାନ୍‌ବୁ ତର୍‌ତିମାନି ପାର୍‌ଦାଦିଙ୍ଗ୍ ପେର୍‌ତାର୍ । ଏଣ୍‌ସକି ଗାଲିଦାନ୍ ପେଲ୍‌ୟ୍ ଆଜି ଜାହାନ୍ ପାଡ଼ି ତରିନ୍ ସନ୍‌ଡେଙ୍ଗ୍ ଆସ୍‌ତାଡ଼ ।

୪୧ ମାତର୍ ବାଲି ତଡ଼ା ମୁସ୍‌କୁ ନାଣ୍‌ଡୁକାଜି ଜାହାନ୍‌ତି ଆଗ୍‌ଡିରିକା ଆଡ଼ଗି ମୁଜାୟ୍ ଆତାଡ଼ ମାରି ଉଲ୍‌କାଏରୁ ନାଣ୍‌ ଡୁକାଜି ଜାହାନ୍‌ତି ଝେନ୍‌କା ତରିଟିକା ରୁଙ୍ଗ୍‌ଦେଙ୍ଗ୍ ଆସ୍‌ତାଡ଼ ।

୪୨ ଜଇଲ୍‌ଡୁମାରିଇକାର୍ ପାଡ଼ି ପଙ୍ଗ୍‌ରାଜି ପଙ୍ଗ୍‌ରାଜି ସନାର୍ ଇଜି ଅଡ଼ବିଜି ଖାରିଙ୍ଗ୍ ସାୟାମାର୍‌ଗା ତାକ୍‌ଡେଙ୍ଗ୍ ଇଜି ସନ୍‌ସର୍ ବିଚାର୍ କିତାର୍ ।

୪୩ ମାତର୍ ସେନାପତି ପାଉଲ୍‌ତି ଜିବନ୍ ରକିୟା କିଦେଙ୍ଗ୍ ଅଡ଼ବିଜି ମାର୍‌ହାନ୍; ଆଦେଙ୍ଗ୍ ଖାନ୍ ସନ୍‌ସରିଙ୍ଗ୍ ଆବେର୍‌ତାନ୍ ଆଲେ କିତାନ୍ । ପଙ୍ଗ୍‌ରାଦେଙ୍ଗ୍ ଆର୍‌ସିମାନି ଝିଜେରିଙ୍ଗ୍ ସାମ୍‌ବୁରୁରୁ ଗାଡ଼ସି ପଙ୍ଗ୍‌ରାଜି ପଙ୍ଗ୍‌ରାଜି ପାଡ଼ି ସନି ଉଣ୍‌ଜି ଆଦେସ୍ ସିତାନ୍,

୪୪ ମାରି ମାର୍‌କାପାଟା ନି ଜାହାନ୍‌ତି ଆମା ରୁଙ୍ଗ୍‌ତି ମକାଦିଙ୍ଗ୍ ଆସ୍‌ସି ଦେଲ୍‌ଦେଙ୍ଗ୍ ଇଜି ଆଇଝାରିଙ୍ଗ୍ ଇର୍‌ହାନ୍ । ଇୟାଝାଜା ମାପୁ ଝିଜୁଲୋକ୍ ନେଗେନ୍‌ତାନ୍ ସୋଲ୍‌ସି ପାଡ଼ି ଇତାପ୍ ।

## ୨୮

### ମେଲ୍‌ତି ବାଡ଼ିବୁ ପାଉଲ୍

୧ ନେଗେନ୍‌ତାନ୍ ପାଡ଼ି ସଲ୍‌ସି ସୁଡ଼ତୁାପ୍ ଜେ ମାପ୍ ମେଲ୍‌ତି ବାଡ଼ିବୁ ଇତାମାନାପ୍ ।

୨ ଆବେଣି ପୁର୍ବେଦାନ୍ ବାସାତିଲୋକୁ ମା ଉଣ୍‌ଜି ଜିବନ୍‌ନୋନିକା ତର୍‌ତାର୍ । ନାସ୍‌ିଝାଲେ ପିରୁ ଖାଜି ପିନି ଆଜିମାର୍‌ହାଡ଼ । ଆଦେଙ୍ଗ୍ ଖାର୍ ସିସୁ କାସିସ୍‌କିଜି ମାଙ୍ଗ୍ କୁକ୍‌ତାର୍ ।

୩ ପାଉଲ ମୋପ ଖେରକୁ ପେରଜି ସିସୁଦୁ ପକ୍ତେଙ୍ଗ୍ ସିଲ୍‌ସି ମାହ୍‌ଝାଲେ ଆବେଟାନ୍ ଉନ୍‌ଶ୍ଟି ସାରାସ୍ ସତାଡ଼ ମାରି ଖେସ୍‌ନି ମାଣାନ୍ ରକିୟା ପୟ୍‌ଦେଙ୍ଗ୍ ଇଜି ଖାନି କିୟୁ ମୁସ୍‌କୁ ଏକ୍‌ସି ଆବେ ତେରବିଜି କାସ୍‌ତା ମାର୍‌ହାଡ଼ ।

୪ ଆବେ ବାସାତିଲୋକୁ ପାଉଲ୍‌ତି କିୟୁଦୁ ଦୁଙ୍ଗ୍‌ଜିମାନି ସାରାସ୍‌ତିଙ୍ଗ୍ ସୁଡ଼ଜି ଖାରିଖାରି ଲୋଇ ଇନ୍‌ଜିସାତାର, “ଇକାନ୍ ସତେନ୍ ଅରେନ୍ ଲୋକାଙ୍ଗ୍ କାଡ଼ତିକାନ୍ ଆନାମାନାନ୍, ଖାନ୍ ସାମ୍‌ଦୁରତାନ୍ ରକିୟା ପୟ୍‌ତି ସହ୍‌ମାରିଙ୍ଗ୍ ବା ଦାମ୍‌ କିୟୁଦାନ୍ ମାରି ଜିଏନ୍ ।”

୫ ମାତର୍ ପାଉଲ ନିଜେ ଗାଉ ଆଏଜି, ସାରାସ୍‌ତିଙ୍ଗ୍ ସିସୁ ଲୋଇ ସାଡ଼ତା ପକ୍‌ତାନ୍ ।

୬ ପାଉଲ୍‌ତି ମେନ୍‌ଲ୍‌ ଖାସ୍‌ସି ନିଙ୍ଗ୍‌ନାଡ଼ ମାରି ଖାନ୍ ସାଜି ଆଡ଼ଗି ଆରନାନ୍ ଅଡ଼ବିଜି, ଖାର ଏସ୍ ସମୟ୍ କାପକିତାର । ମାତର୍ ନାଶ୍ ସମୟ୍ କାପକିଜି ଏସ୍‌ଝାଲେ ସୁଡ଼ତୁର ଜେ, ପାଉଲ୍‌ତି ଇନିକା ନାସ୍ ଆଏତାଡ଼, ଖାର ମନ୍ ଡେପ୍‌ସି ଇର୍‌ହାର, “ଇକାନ୍ ଅରେନ୍ ମାପୁରୁ !”

୭ ଆବେଟାନ୍ କାଣ୍ଡେକ୍ ଆକ ଦ୍ଵୀପ ବାଡିଦି ପେରି ପାଣିକିନିକାନ୍ ପଲ୍ଲିୟତି ଇଲୁ ନି କିଡ଼ିଇ ମାର୍‌ହାଡ଼ । ଖାନ୍ ମାଙ୍ଗ୍ କୁକ୍‌ତାନ୍ ମାରି ମାପ୍ ମୁନେନ୍ ସାନ୍ ତାମେମାନୁ ତେବାତାପ୍ ।

୮ ପଲ୍ଲିୟତି ବୁବାସି ନବ୍ ନି ଆମାସୟ୍ ରୋଗ୍ ଆତାମାର୍‌ହାନ୍ । ପାଉଲ ଖାନି ବାକରାଦୁ ସର୍‌ହାନ୍, ଖାନି ଉଣ୍ଡିଙ୍ଗ୍ ପାର୍‌ତନା କିଜି ଖାନି ମୁସ୍‌କୁ କିୟୁ ଇଡ଼ଜି ଖାନିଙ୍ଗ୍ ନେଗେନ୍ କିତାନ୍ ।

୯ ଇୟା ଗଟନା ଖେନ୍‌କା ଦିପଦି ରୋଗିଲୋକ୍ ଝିଜେରେ ପାଉଲ ଲାକ୍‌ତୁ ଖାଜି ନେଗେନ୍ ଆତାର ।

୧୦ ଖାର ମାଙ୍ଗ୍ ନାଶ୍ ସାହାଜ୍ୟ ସିତାର ମାରି ମାପ୍ ଆବେଟାନ୍ ଜାହାଜ୍‌ତୁ ବାସ୍‌ସି ସନିଝାଲେ ମା ସନି ଉଣ୍ଡିଙ୍ଗ୍ ଦିରକାରି ମାନି ଝିଜୁ ଖାର ତାସି ଜାହାଜ୍‌ତୁ ଇଟା ସିତାର ।

### ମେଲିତିଦାନ୍ ରୋମ୍‌ତୁ

୧୧ ଆଲେକ୍‌ଜାଣ୍ଡିଆ ଦାନ୍ ଖାତିମାନି “ଜାଡ଼୍‌ଝା ଦିୟାମ୍” ଦରୁତି ଉନ୍‌ଶ୍ଟି ଜାହାଜ୍ ମେଲିତି ଦିପଦୁ ପିନି କାଡ଼ା କାଟେ କିତାମାର୍‌ହାଡ଼ ।

ଦିପଦୁ ମୁନଶ୍ଚି ଲେଉଟୁ ତେବାତି ଖେନକା ମାପ୍ ଆୟା ଜାହାଜୁ ବାସ୍ତବି ମାରି ସନ୍ତେଜ୍ ଆରାମ୍ କିତାପ୍ ।

୧୨ ଆଗଡ଼ି ମାପ୍ ସିରାକୁସ୍ ଗାଡ଼ୁ ଇଜି ଆବେ ମୁନେନ୍ ତେବାତାପ୍ ।

୧୩ ଆବେଟାନ୍ ମାରି ସଲ୍‌ସି ମାପ୍ ରେଗିୟ ଗାଡ଼ୁ ଇତାପ୍ । ମାରନାଶ୍ଚିଜ୍ ଡେବିରି ତରିଟାନ୍ ଗାଲି ଖାତାତ୍ ମାରି ରିନେନ୍ ଖେନକା ପୁତେଅଲି ଗାଡ଼ୁ ଇତାପ୍ ।

୧୪ ଆବେ ଏସ ଲୋକୁ କ୍ରିସ୍ ବିସ୍‌ବାସତି ତଡ଼ାନ୍‌କାଜ୍ ବୁଡ଼ିତାପ୍ । ଖାରି ଖାଲେ ଉନ୍‌ଶ୍ଚି ଖାରା ତେବାଦେଜ୍ ଇଜି ଖାର୍ ମାଜ୍ ବାତିଜ୍ ମାଲିତାର୍ । ସାରାସାରି ରୋମ୍‌ତୁ ସର୍ହା ଇତାପ୍ ।

୧୫ ମା କାବୁର୍ ଖେନଜି ରୋମ୍‌ତି ତଡ଼ାନ୍‌କୁ ମାଜ୍ ବେଟ୍‌ଆଦେଜ୍ ଇଜି “ଆପିୟ ସାତାଦୁ” ନି “ତିନି ସରାଜ୍” ଦରତି ଗାଡ଼କାଜ୍ ଖାତାର୍ । ଖାରିଜ୍ ସୁଡ଼ଜି ପାଉଲ ମାପୁରୁଜ୍ ଦନ୍‌ସବାଦ୍ ସିତାନ୍ ମାରି ଖେଡ଼ିକା ଆତାନ୍ ।

### ରୋମ୍ ଗାଡ଼ୁ ପାଉଲ

୧୬ ମାପ୍ ରୋମ୍‌ତୁ ଇତି ଖେନକା, ପାଉଲ୍‌ତିଜ୍ ସାରି ପୁଟାତାଆକା, ଖାନିଜ୍ କାପ୍‌କିଦେଜ୍ ବାସେ ଆତି ଅରେନ୍ ସନ୍‌ସ ଖାଲେ ଖାନ୍ ନିଜେ ବଦାଦାନ୍ ଆମା ବାତିଦୁବା ତେବାଦେଜ୍ ଆଟ୍‌ନାନ୍ ।

୧୭ ମୁନେଟି ଖେନକା ପାଉଲ ଲାକ୍‌ତୁରି ଜିହୁଦି ନେତାରିଜ୍ ଉନ୍‌ଶ୍ଚି ମିଟିଜ୍ ମିସାଦେଜ୍ ଇଜି କୁକ୍‌ତାର୍ । ଖାର୍ ଉଣ୍ଡାତାଆକା ପାଉଲ ଖାରିଜ୍ ଇର୍ହାନ୍ : “ଇସ୍ରାଏଲ୍‌ତି ତଡ଼ାନ୍‌କୁ, ମା ଲୋକା ବିରଦ୍‌ତାନ୍ ମାରି ମା ତକ୍ରାଦାଦାରି ମାଣାନ୍ ମାପ୍ ପୟତିମାନି ରିତିନିତି ବିରଦ୍‌ତାନ୍ ନାନ୍ ଇନିକା କିଏତିଜ୍ ବା, ଜିରୁସାଲାମ୍‌ତୁ ନାନ୍ ତରାୟାଜି ରୋମିୟରି କିୟୁଦୁ ସର୍ପେ ଆତାମାନା ।

୧୮ ନାଜ୍ ଖେନବାତି ଖେନକା ସାନି ଉଣ୍ଡିଜ୍ ନାନ୍ ଇନି ଦସ୍ କିଏ ଇଜି ନେସ୍‌ତେଜ୍ ଆଟ୍‌ସି ରୋମିୟ ଲୋକୁ ନାଜ୍ ଡିସ୍‌ସକିଜି ସିଦେଜ୍ ବଦାକିତାମାହାର୍ ।

୧୯ ☆ମାତର ଜିହ୍ୱାଦି ଲୋକୁ ତେନି ବିରୁଦ୍ଧକିତାରଥାକା, ନିଜେଦି ଲୋକା ବିରଦ୍ଧତାନ୍ ନା ଇନି ଦସ୍ ସିଲେତିଙ୍ଗ୍ ବା, ନାନ୍ ସମ୍ରାଟ୍ତିଙ୍ଗ୍ ା ମାଡ଼ିସ୍ କିଦେଙ୍ଗ୍ ା ରାଜି ଆତା ।

୨୦ ଆୟାଉଣ୍ଡିଙ୍ଗ୍ ଇୟା ବିସୟତାନ୍ ଖାରଗିଜି ସାଦେଙ୍ଗ୍ ା ନାନ୍ ମିଙ୍ଗ୍ କୁକିସ୍ କିତାମାନା । ସତ୍ତତାନ୍, ଆମାଖାନି ମୁସକୁ ଇସାଏଲ୍ତି ଲୋକୁ ଆସା କିତାମାନାର୍, ଖାରି ଉଣ୍ଡିଙ୍ଗ୍ ା ନାନ୍ ସିକ୍‌ଣି ଦାନ୍ ତରାତାମାନା ।”

୨୧ ଖାର ଖାନିଙ୍ଗ୍ ଇର୍ହାର୍, “ମାପ୍ ଜିହ୍ୱାଦା ଦେସ୍ତାନ୍ ନି ବିସୟତାନ୍ ଇନି ସିଟିଆକୁ ପୟ୍‌ଏପ୍, କିନି କାରୁର୍ ଅସି ମାରି ନି ବିସୟତାନ୍ ଇନି ଦସ୍ କିଜି ଇନ୍‌ଡ୍ରେଙ୍ଗ୍ ା ମା ତଡ଼ାନ୍‌କା ଲୋଇରାନ୍ ଏନ୍ ଇବେ ରେଏନ୍ ।

୨୨ ଆୟା ଆମାକାଆପିଡ଼, ମାପ୍ ନି ମାଟା ଖେନ୍‌ଡ୍ରେଙ୍ଗ୍ ା ବଦାକିନାପ୍, ଇରିଙ୍ଗ୍ ା ମାପ୍ ନେସ୍‌ନାପ୍ ଖିଜୁ ଲୋକୁ ନି ଦଲ୍ ବିରଦ୍ଧତାନ୍ ମାଟା ଇଜିନାର୍ ।”

୨୩ ଖାର ଉନ୍‌ଶ୍ଟି ଦିନ୍ ତିଆର୍ କିଜି ମାରି ଖାରି ଲୋଇ ନାଶ୍ଟ ଲୋକୁ ଆୟାନାଣ୍ଡିଙ୍ଗ୍ ପାଉଲ୍ ତେବାଜିମାନି ବାଡ଼ିବୁ ଖାତାର୍ । ସାଲ୍‌ଦିରାନ୍ ନାଡ଼ା ସାନ୍ ପାଉଲ୍ ଖାରିଙ୍ଗ୍ ା ମାପୁରୁଦି ରାଜିଦି ବିସୟତି ବାକ୍ୟ ପ୍ରଚାର୍ କିଜି ସାକି ସିତାନ୍ ମାରି ମୋସାଦି ନିୟମ୍ ନି ବାବବାଦିରି ମାଣାନ୍ ରାସାତି ବାକ୍ୟ ସପ୍‌ସି ଜିସୁଦିମାନୁ ଖାର ବିସ୍‌ବାସ୍ କିଦେଙ୍ଗ୍ ା ତେଷ୍ଟାକିତାନ୍ ।

୨୪ ଖାରି ଲୋଇ ଏସ୍ ଲୋକା ଜିବନ୍ ବାଦେଲ୍ ଆତାଡ଼, ମାତର୍ ଆଇକାର୍ ବିସ୍‌ବାସ୍ କିଏତାର୍ ।

୨୫ ଇୟା ବିସୟତାନ୍ ଖାରି ଲୋଇ ନାଶ୍ଟ ଜାତି ସତାଡ଼ । ଖାର ସନି ଆଗଡ଼ି ପାଉଲ୍ ଉନ୍‌ଶ୍ଟି ମାଟା ମୁସକୁ ଦିୟାନ୍‌ସିଜି ଇର୍ହାନ୍ : “ପବିତ୍ର ଆମ୍ବା ମି ତକ୍ରାଦାଦାରିଙ୍ଗ୍ ବାବବାଦି ଜିସାୟଦି ଖେୟୁଦାନ୍ ଟିକ୍ ମାଟା ଇର୍ହାମାର୍ହାନ୍ !

୨୬ ଖାନ୍ ଇର୍ହାନ୍ :

“ଇୟା ଲୋକାଙ୍ଗ୍ ସଲ୍‌ସ ଇନ୍‌ଆଁ,  
ମିର୍ ଖେନିଦେର୍, ନାଶ୍ଟ ଖେନିଦେର୍, ମାତର୍ ବୁଜାଇଦେର୍ ।

ମିର ସୁତୁଜିମାନିଦେର, ମାତର ସୁତୁଦେଇ ଆବୁଇଦେର ।  
 ୨୭ ଇରିଇଁ ଲୟା ଲୋକାଦି ଜିବନ୍ ଉଣା ବୁଦି,  
 ଝାର ନିଜେ ନିଜେଦି କାଣୁକୁ ନି  
 ଗିତଶିଇଁ ମୁକ୍ତାମାନାର,  
 ଆକା ଆଏତିମାରିଇଁ, ଝାର କାଣୁକୁ ରେସି ସୁତୁଦେଇ  
 ଆବୁତାରମାନ୍ଦି  
 ମାରି ଗିତଶିଇଁ ସିଜି ଝେନ୍ଦ୍ରେଇଁ ଆବୁତାରମାନ୍ଦି ।  
 ଝାରି ତାଲାଦୁ ବୁଜାନି ସାକ୍ତି ମାର୍ହାତମାନ୍ଦି;  
 ଝାର ମାପୁରୁ ତରିନ୍ ଦେସି ସର୍ହାରମାନ୍ଦି  
 ମାରି ଝାରିଇଁ ନାନ୍ ନେଗେନ୍ଦିତାମାନ୍ଦି ।”  
 ୨୮ ସାରାସାରି ପାଉଲ ଇର୍ହାନ୍, “ମିର ନେସସ ମାନ୍ଦୁ, ପରିତ୍ରାଣ  
 ଉଣିଇଁ ମାପୁରୁଦି ସୁସମାଚାର ଅଣଜିହୁଦି ଲୋକା ଲାକ୍ତୁ  
 ପକାୟାଆତାମାନାତ୍ । ଝାର ଆକା ଝେନାର ।”  
 ୨୯ ମାରି, ପାଉଲ ଇୟାଞ୍ଜି ମାଗା ଇର୍ହାନ୍ଆକା, ଜିହୁଦି ଲୋକୁ  
 ଆପଣା ଆପଣା ଲୋଇ ସୁରି ଝାରଗିଜି ଝାରଗିଜି ସର୍ହାର ।  
 ୩୦ ପାଉଲ ଉନ୍‌ଶି, ଇଲୁ ବାଡ଼ା ଅସି ଦୁଇ ବାସେକ୍ ସାଦି  
 ତେବାତାନ୍ ମାରି ଝାନିଇଁ ସୁତୁଦେଇ ଝାଜିମାନି ଝିଲୁ ଲୋକାଇଁ  
 କୁକ୍ସି ମାର୍ହାନ୍ ।  
 ୩୧ ଦର୍ଜ ନି ସାହାସତି ଝାଲେ ଝାନ୍ ମାପୁରୁଦି ରାଜି ବିସୟତାନ୍  
 ପ୍ରଚାର କିଜି ପ୍ରବୁ ଜିସୁ କ୍ରିସ୍ତଦି ବିସୟତାନ୍ ସିକିୟା ସିଜି ମାର୍ହାନ୍ ।

## ମାପୁରୁଦି ସବ୍ ବାକ୍ୟ

### **The New Testament in the Konda Porja Lanugage of India. Konda-Dora: ମାପୁରୁଦି ସବ୍ ବାକ୍ୟ (Bible)**

copyright © 2020 The Word for the World International and Konda Porja Translation Samithi, Dasamanthpur, Odisha

Language: Konda Porja (Konda-Dora)

Contributor: The Word for the World South Asia

## ମାପୁରୁଦି ସବ୍ ବାକ୍ୟ

ପୁନି ନିୟମ, 2020

The New Testament in Konda Porja Language

The Word for the World International

This translation is made available to you under the terms of the Creative Commons Attribution Share-Alike license 4.0.

You have permission to share and redistribute this Bible translation in any format and to make reasonable revisions and adaptations of this translation, provided that:

You include the above copyright and source information.

If you make any changes to the text, you must indicate that you did so in a way that makes it clear that the original licensor is not necessarily endorsing your changes.

If you redistribute this text, you must distribute your contributions under the same license as the original.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

Note that in addition to the rules above, revising and adapting God's Word involves a great responsibility to be true to God's Word. See Revelation 22:18-19.

2025-05-07

---

PDF generated using Haiola and XeLaTeX on 6 May 2025 from source files dated 7 May 2025

506ae627-08e2-556a-b39e-5315f886d95a